



Xtidxcoob Dios ni biädinä dad Jesucrist

Mitla Zapotec New Testament

Contents

Guijtz Ni Bacuaa Mateo	1
Diidx Xcuent Jesucrist Nani Bacuaa San Marcw	49
Rediidx Nani Bacuaa Lucas Xcuent Jesucrist	78
Redidxhuen Xten Jesucrist Ni Bacuaa San Juan	129
Redzuun Rexepeñ Dios	165
Guijtz Nani Bacuaa Pabl Lo Reben Roman	215
Guijtz Ganid Ni Bacuaa Pabl Lo Guidoo Xten Guedx Corinto	234
Stee Guijtz Ni Bacuaa Pabl Lo Guidoo Xten Guedx Corinto	253
Te Guijtz Lo Reben Gálatas	265
Te Guijtz Lo Reben Efesios	272
Te Guijtz Lo Reben Filipos	279
Te Guijtz Lo Reben Colosas	284
Guijtz Ganid Lo Reben Tesalónica	289
Guijtz Ni Rojp Lo Reben Tesalónica	293
Guijtz Ganid Lo Timoteu	295
Guijtz Ni Rojp Lo Timoteu	300
Te Guijtz Lo Tito	304
Te Guijtz Lo Filemón	306
Te Guijtz Nani Biääd Loj Reben Hebreë	307
Guijtz Nani Bacuaa Santiaag	321
Guijtz Ganid Nani Bacuaa Pedr	326
Guijtz Ni Rojp Ni Bacuaa Pedr	332
Guijtz Ganid Ni Bacuaa Juan	336
Guijtz Ni Rojp Ni Bacuaa Juan	342
Guijtz Ni Riojn Ni Bacuaa Juan	343
Guijtz Ni Bacuaa Judas	344
Rediidx Nani Bacuaa Juan Xcuent Recos Ni Churu Gac	346



Xtidxcoob Dios ni biädinä dad Jesucrist

New Testament in Zapotec, Mitla (MX:zaw:Zapotec, Mitla)

Language: Zapotec, Mitla

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2006 Wycliffe Bible Translators, Inc.

Copyright © 2006 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

3a4bb1c7-ef9e-52ca-bfc9-65dd5eef51db

ISBN: 978-1-5313-0748-6

Guijtz Ni Bacuaa Mateo

Retoxpengoldoo Jesucrist

(Lc. 3:23-38)

1 Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

² Abraham gujc xtd Isaac, Isaac gujc xtd Jacob, Jacob gujc xtd Judá con rebejtzni. ³ Judá con Tamar gujc xczajjn Fares con Zara. Fares gujc xtd Esrom, Esrom gujc xtd Aram. ⁴ Aram gujc xtd Aminadab. Aminadab gujc xtd Naasón. Naasón gujc xtd Salmón. ⁵ Salmón con Rahab gujc xczajjn Booz. Booz con Rut gujc xczajjn Obed. Obed gujc xtd Isaí. ⁶ Isaí gujc xtd reii David. David con nani gujc chääł Urías gujc xczajjn Salomón.

⁷ Salomón gujc xtd Roboam. Roboam gujc xtd Abías. Abías gujc xtd Asa. ⁸ Asa gujc xtd Josafat. Josafat gujc xtd Joram. Joram gujc xtd Uzías. ⁹ Uzías gujc xtd Jotam. Jotam gujc xtd Acaz. Acaz gujc xtd Ezequías. ¹⁰ Ezequías gujc xtd Manasés. Manasés gujc xtd Amón. Amón gujc xtd Josías. ¹¹ Josías gujc xtd Jeconías con rebetzni cheni huij reben Israel pres lo guedx Babilonia.

¹² Che gudejd huij rebejnnga pres Babilonia, dxejc guyu' xi'n Jeconías, Salatiel. Salatiel gujc xtd Zorobabel. ¹³ Zorobabel gujc xtd Abiud. Abiud gujc xtd Eliaquim. Eliaquim gujc xtd Azor. ¹⁴ Azor gujc xtd Sadoc. Sadoc gujc xtd Aquim. Aquim gujc xtd Eliud. ¹⁵ Eliud gujc xtd Eleazar. Eleazar gujc xtd Matán. Matán gujc xtd Jacob. ¹⁶ Jacob gujc xtd José chääł Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil reni agudejd gubi'reni lo guedxliujre che gubajjli toAbram cheni gubajjliza toreii David. Tzudajza rexagdoo najc

reni gudejd cheni gubajjli toDavid cheni huijli reben Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

Cheni gojl Jesucrist

(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guchnaani José ni gac chääłni. Per ansde xca' sa'reni, Marii agac nuxi'nni sa'csi biääđ Sprit Dxan xten Dios lojni. ¹⁹ José com najcni te bensa'c, di rłajzni nuřo'nni Marii nez loj rebejn te niacbeereni, ni'c bejnni xhigab Guronxhiga'tzni Marii. ²⁰ Xhigabga cayujnni cheni baluiloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni chääłlu sa'csi xi'nni nani chu najc xten Sprit Dxan xten Dios.

²¹ Che gaal xi'nni cuälajluni Jesús sa'csi laani guslaani rexpejnni lo rextojl'reni.

²² Guiraa redee gujc si'c te guzojb di-idx ni gunii tej ni bacuaa xtidx Dios. Räjpni:

²³ Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajjn con nuure).

²⁴ Che gubajjn José lo bacal, bejnni si'cni räjp xangl Dad lojni. Cua'ni Marii gujc chääłni. ²⁵ Luxh dini niembeeni si'c chääłni dxejli cheni gudejd gojl xingan-galojni ni gulälajni Jesús.

Che biädhuii reben nanduxh ni laa remagos lojni

2 Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujjn reben-najn ni najc remagos, siääđreni nejz cadro rliejn gubijdx, bidzujjnreni guedx Jerusalén. ² Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajlni laadxlinu, ni'cni siopdonnuni.

³ Che biejn diajg reii Herodes diidxga, guyuduxhni yärsia' näjza guiraa reben Jerusalén. ⁴ Dxejcti batie'ni guiraa rebixhojzro ni rnibee loj rebixhojz, näjza guiraa renani ruluui xleii Moisés lo re-bejn te gunabdiidxni lojreni:

—¿Caro gaal Crist?

⁵ Laareni räjpreni:

—Neñ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

⁶ Luj guedx Belén xten guedx Judea, dilu gajc maazru huiñ loj reguedxro xten guedx Judea sa'csi neñ guejdxre guirii tej nani guinibee, te ni ga'p rexpenä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸ Dxejcti baxhalnireni guedx Belén, räjpni lojreni:

—Colchäj ro'c, colnabdiidxsa'c xcuent biuuxga te che abidxältuni jäadniitu loä te näjza narä chaganäni.

⁹ Che biejn diajgreni xtidx reii, sä'tireni. Bajl nani bahuiireni lagajc lajdxreni laltis nijdni lojreni. Che bidzujñlireni cadro yu' bázga, dxejcru guzobdx bajlga. ¹⁰ Che bahuii remagos loj bajlga, rbalazduxhrene. ¹¹ Si'c bidzujñrene. Che biu'reni neñ yu', bahuiireni lo bázga con xnanni Marii. Dxejcti bazuxhijbreni, gojñreni bázga, baxhalreni rexcäl'nasa'creni bazalajzreni oor, näjza yaal näjza yalnejxh. ¹² Che agojl guibi'reni, gunixcäl'reni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biääd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huiñareni Egipto. Ro'c guläjz che guiniäli lojlu. Siguiil Herodes biuxe're sa'csi rlanjzi ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto. ¹⁵ Ro'c guyu'reni cheni gujñli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbáz

¹⁶ Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p iiz näjza rebiuxe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjp remagos lojni. ¹⁷ Dxejc guzobj diidx ni bacuaa Jeremías ni gunii xtidx Dios che räjpni:

¹⁸ Biejn xse' bejn neñ guedx Ramá, te yälhuinduxh, te yälrbedxij, yälrbedxnen:

laa Raquel ni roon yejc rexi'nni.

Naaddini jääjñ lajzni sa'csi agujt rexi'nni.

¹⁹ Cheni gujt Herodes, dxejc lo te bacal huiluiloj xangl Dios loj José neñ Egipto.

²⁰ Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlanj ju't biuxe're.

²¹ Dxejcti huistie José, cua'ni biuxe' näjza xnanni. Gubi'reni Israel. ²² Luxh che biejn diajgni rnibee Arquelao guejdx Judea lacuaa Herodes, xtadni, bidxejbn nuiini ro'c. Dxejc gunisac Dios lojni loj te bacal, ni'c huijni lo reguejdx xten Galilee. ²³ Dxejc biädälajzni neñ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

Juan Bautist basule' xtidx Dios loj rebejn

(Mr. 1:1-8; Lc. 3:1-9, 15-17; Jn. 1:19-28)

3 Nen redxejga biääd Juan Bautist lo reyubijdz xten guedx Judea, ro'c cag-ulijdxni, ² cayäjpni:

—Colgusiechljaztu rextojltu sa'csi xcäl'ribee Dios abidzungajxhni.

³ Juan najc nani basä't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz: “Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh.

⁵ Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadiajgreni xtiidxni. ⁶ Che ruxhobdojl'reni xtojlrëni, rutiobnis Juanreni ro' gueu Jordán.

⁷ Che bahuuini siääd xhidajl reben guidoo ni najc refarisee näjza ni najc re-saducee, rlanjreni gutiobnisnireni, räjpni lojreni:

—La'tu benguidxduxh, najctu si'c bäl.

¿Chu balijdxtu guxuntu loj xcäl'rdxe'ch Dios ni siääd? ⁸ Colguibansa'c si'cni nungäj'l te fiipac rebejn guliipac abasiechljaztu. ⁹ Na'c litis guntu xhigab naatu: “iNi nurnu najcnu rexagdoo toAbram!” Rniliä lojtu, sajc xca' Dios reguijre gunni gacreni rexin toAbram.

¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹ Narä guliicani rustiobnisä con nis si'c te seen cheni abasiechljaztu, abaxhobdojl'tu. Niluxh nani siääd detzä sutiobnisi la'tu con Sprit Dxaan xten Dios näjza con guiboo. Rnibeeruni loä. Beñsacduxhni. Nicla xcura'chni digacdi chanää. ¹² Aca'ni xhi cojn gusiani triuu xtëni te chuchee triuuga nen ngodx xtëni. Dxejcti

guixhtriuuga, suze'cni guijxhga lo guiboo ni rejc par tejpas.

Che gurobnis Jesús

(Mr. 1:9-11; Lc. 3:21-22)

¹³ Dxejc birii Jesús nez Galilee, bidzujni ro' gueu Jordán cadro yu' Juan te gutiobnis Juanni. ¹⁴ Niluxh naaddi Juan gutiobnis Jesús. Räjp Juan lojni:

—Luj nanab gutiobnislü narä, niluxh naj alga luj siäädlu loä te gutiobnisälu.

¹⁵ Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

¹⁶ Chëni gulujx gurobnis Jesús, birigajcni lo nis. Dxejc bixal xhaguibaa, bahuiini siädya'jt Sprit Dxaan xten Dios si'c te palom, biäjtmi lojni. ¹⁷ Dxejc xhaguibaali biejn diajgreni te xse' ni räjp:

—Dee najc xi'nä ni sanälazä. Laani rbanälazä.

Che huij Jesús lo reyubijdz

(Mr. 1:12-13; Lc. 4:1-13)

4 Dxejc bejn Sprit Dxaan xten Dios huij Jesús nez lo reyubijdz te nejzga nuhual bendxab Jesús.

² Che gulujx bacua'n Jesús tiuu gubijdx, tiuu guxhijj, gulaanni. ³ Sas biääd bendxab lojni, räjpni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidre lojni, räjpni:

—Loj reguijtz xten Dios caj scree: “Xhet ganaxdi yä'txtiil guibajj rebejn; sibajnzani con guiraa diidx nani rni Dios.”

⁵ Dxejcti huinä bendxab Jesús guedx Jerusalén. Gulä'pnini jiaa yejc xques guidoro. Dxejcrü räjp bendxab lojni:

⁶—Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj; siliäsreni luj con ñaareni didi gacnaj ni'lu lo reguijga.

⁷Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

⁸Stee huält huinä bēndxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcäl'nasa'creni. ⁹Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰Dxejcti räjp Jesús lojni:

—Huij nez rec bēndxab! Scree caj loj rexquijtz Dios: “Dad Xtioistislu ganlu; lojtisni chulu.”

¹¹Dxejcti gubicaj bēndxab loj Jesús. Dxejc biääd rexangl Dios biädhuiireni Jesús.

Gusloj Jesús cayujn xtzuumni

(Mr. 1:14-15; Lc. 4:14-15)

¹²Che biejn diajg Jesús yu' Juan nen ladzguiib, huijni nez Galilee. ¹³Dxejcti gudejndi guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabalón con Neftalí. ¹⁴Si'c gujc te guzobj diidx ni bacuaa Isaías ni gunii xtidx Dios:

¹⁵Lajdx Zabalón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejn nani di gac rexpen Israel.

¹⁶Rebejn nani rbäjz nen te yälkäjy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

¹⁷Dxejcli gusloj cagulijdx Jesús, räjpni:

—Colgusiejchljaztu, colguxhobdojl te guiba'nsa'ctu sa'csi abidzungajxh xcäl'nibee Dios.

Che gurejdx Jesús tajp xpejn

(Mr. 1:16-20; Lc. 5:1-11)

¹⁸Sasaj Jesús nez ro' nisdoo xten Galilee che bahuini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bälj, ni'c cacuaareni guijxh lo nisdoo. ¹⁹Dxejcti räjp Jesús lojreni:

—Coltanajl narä. Naj riniaaztu bälj, niluxh narä gunä cuedxtu rebejn.

²⁰Lagajc dxejc basa'nreni xquijxhrene te sanajlreni laani.

²¹Che gudejdreni ro'c, bahuini loj stio'p niguii, Jacoob con bejtzni Juan. Yu'reni nen te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni. ²²Lagajc dxejc basa'nreni barcw näjza xtadreni te sanajlreni Jesús.

Caguluii Jesús xhidajl bejn

(Lc. 6:17-19)

²³Sasajti Jesús guideb nez región xten Galilee, caguluiini nen teja rexquidooreni. Cagusule'ni redidxcoob xten xcäl'nibee Dios. Cagusiajczani guiraa yälracxhuu ni rajc rebejn guejdxga, guiraa yälguijdx. ²⁴Biejn diajg reben Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yälguijdx, yäl'nayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixu'n tiejxhrene. Dxejcti basiajc Jesús rebejnga. ²⁵Xhidalduxh ben Galilee huinajl, näj reben reguedx Decápolis, näjza reben guedx Jerusalén, näjza reben Judea näjza rebejn ni tre' stelaad gueu Jordán.

Yejc te dajn balijdx Jesucrist rebejn

5 Che bahuini Jesús loj reben xhidajl, huä'pni yejc te dajn. Dxejcti gubig

rexpejn̄ni ni gurejdxni lojni. ²Dxejc gus-
loj cagului Jesús reni'c, scree räjpni:

Rebejn̄ ni sibaalajz

(Lc. 6:20-23)

³—Sibaalajz rebejn̄ nani nanchee
rquinduxhreni xcälracnäj Dios, sa'csi
laareni nungäjreni xcälrnibee Dios.

⁴'Sibaalajz rebejn̄ nani rac-huin la-
jzreni xcuent rextojreni, sa'csi sudzucaj
Dios xtojreni, susiäjlni lajzreni.

⁵'Sibaalajz rebejn̄ nani nadolajz nani
rlajz guntis si'cni rnibee Dios, sa'csi
sacnäj Diosreni lo xcäl'nabajn̄reni lo
guedxliujre.

⁶'Sibaalajz rebejn̄ ni nastoocanu
rliaanreni, riojlreni, sa'csi rlajzreni
guibaŋsa'ctisreni nez loj Dios, sa'csi
sudeed Dios lojreni guiraa ni rniabreni.

⁷'Sibaalajz rebejn̄ nani rulasajz
sa'reni, sa'csi sulasajzza Diosreni.

⁸'Sibaalajz rebejn̄ nani najc nayatis
lastooreni rujnreni rexhigabsa'c xten
Dios sa'csi suhuiireni lo Dios.

⁹'Sibaalajz rebejn̄ nani ruscuecdxilajz
sabejn̄reni, sa'csi laareni sirilajzreni rexi'n
Dios.

¹⁰'Sibaalajz rebejn̄ nani rusutijp
lajzreni che rusacsí bejn̄reni sa'csi
nabaŋsa'creni nez loj Dios, sa'csi
xtenreni najc xcälrnibee Dios
xhaguibaa.

¹¹'Colŋpaalajztu che gusacsí
bejn̄tu tlnäjreni la'tu, guiniireni
guiraloj didx-xhii xcuent xtidxä.

¹²Colguibaalajz, colbalajz sa'csi
xhaguibaali sunidduxh Dios xcuent
xtzuuntu. Sigajcza basacsíreni reniguii
ni gubajn̄ galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³Räjpzani:

—La'tu najctu si'c sejd lo guedxliu-
jre. Palga di sejd gac nadzujy, ¿xho
gacsacni nadzujy? ¿Xhi gun bejn̄ni dx-

ejc? Susälreni sejdga detz yu', suläj bejn̄
yejcn̄i.

¹⁴'La'tu najctu si'c te bianij lo guedxli-
ujre. Te guejdx nani tre' jiaa yejc te dajn,
digacdi guiga'tzni. ¹⁵Digacdi xcaguij te
bajl dxejcti jiäuuni nen̄ te caj. Maazru
huen soobni jiaa nen̄ te gandilieer te
gusänijni loj guiraa rebejn̄ ni tre' nen̄
yu'. ¹⁶Xcäl'nabansa'ctu najc si'c te bajl loj
rebejn̄ guedxliuj. Suhuiireni xtzunsa'ctu
dxejc siliä'preni xpala'n xtadtu ni yu'
xhaguibaa.

Ruluii Jesús xcuent leii

¹⁷Räjpzani:

—Na'c guntu xhigab siädgudzucaá leii
xten toMoisés, niclaza rediidx ni baluii
redad ni gunii xtidx Dios. Xhet siädzdu-
caá'dini, narä siälä te guluiäpacni si'cni
najcni. ¹⁸Rniliäpac, dxejli che ni nit-
loj guibaa näjza guedxliuj, nicla tej letr
ni caj loj leii di nit. Sajcpac guiralii ni
caj lo reguijtzga. ¹⁹Ni'cni chutis ni rlajz
gusaan te diidx nani caj loj leii, mase
te didxbäzni, luxh ruluiini gun bejn̄ si'c,
laani guxiduxh sajcn̄i lajdx Dios guibaa.
Niluxh renani rucuaadijg xtidx leii, luxh
rujnpacreni si'cni caj lo leii, ruluiizani
leii, beŋsacduxh gacni lajdx Dios guibaa.
²⁰Ni'cni rniä lojtu, palga ditu gunsa'cru
xtzun Dios, ditu guibaŋsa'cru loj reni
najn xcuent xleii toMoisés, näjza loj re-
bejn̄ guidoo ni laa farisee, dipactu jiu' la-
jdx Dios xhaguibaa.

Ruluii Jesús xcuent yälrdxe'ch

(Lc. 12:57-59)

²¹Räjpzani:

—Abiejnza diajgtu nani gunii reben-
goldoo: “Na'c ju'tlu. Chutis te nani
ju't sa'ni, sinärenini lo guxhtis te jiäu-
uni nen̄ latzguiib.” ²²Niluxh narä rniä
chutis nani guidxechduxh lo sa'ni sijni
lo guxhtis. Chutis ni guinii didxnaj lo
sa'ni, sijni lo juejz. Chutis ni gäb lo
sa'ni: “beŋnayälajz” sidejdni loj yälgu-

htis xten Dios, sijni gabijl cadro cayejc guiboduxh.

²³ Che sanälu gojn guidoo te gusa'nluni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nu gojn xtenlu.

²⁵ Palga yu' chu rdxe'ch lojlu, basquejn basiäjł diidx con laani lagajc cheni sasanäjłluni lonezyuj te di gutedni luj lo juejz. Luxh juejz suteedni luj loj reguixhajg te gusaüreni luj neñ latzguiib. ²⁶ Rniliápac lojlu: "Dilu guirii ro'c palga dilu cue'c guiralii meel nani guiniabni lojlu."

Rulúi Jesús xcuent yälrusguee sa'ni

²⁷ Räjpszani:

—Abiejn diajgtu guniireni galoo: "Na'c guesnäjtu gunaa nani di gac chäältu."

²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni. ²⁹ Palga balo- jlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl.

³⁰ Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chää guideb tiejxhlu gabijl.

Rulúi Jesús xcuent yälruo'n chääł bejn

(Mt. 19:9; Mr. 10:11-12; Lc. 16:18)

³¹ Räjpszani:

—Abiejn diajgtu guniireni galoo: "Chutis niguii ni rłajz guo'n chääłni, nanabtis gudeedni te guijtz nani nrii abaro'nni chääłni." ³² Narä rniä, niguii nani guo'n chääłni niluxh xhet dojłdi bejn chääłni, niguiiga sujn gun chääłni yälgubejxh, niluxh chutis ni guchnaa gunaaga sujnzani yälgubejxh.

Rulúi Jesús xcuent che ria'n diidx

³³ Räjpszani:

—Abiejn diajgtu gunii rebengool: "Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios." ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxla- jdx reiuro, ³⁶ niclaza por lagajc bituuej- clu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitisl: "Mbaj" o "Ajndi". Palga yu' xhiru rniilu, bendxab najc ni rujn rniiluni.

Chanälajzni rebejn ni rdxe'ch lojni

(Lc. 6:29-30)

³⁸ Räjpszani:

—Abiejn diajgtu gunii rebengool ga- loo: "Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu." ³⁹ Narä rniä, na'c tiłnäjlu te bejn ni bejn te cos guijdx lojlu. Palga chääzni ladbee lojlu badeed ste- laad lojlu chääzni. ⁴⁰ Palga yu' chu rłajz tiłnäjlu te xca'ni xcamangwlu, badeedza näj xsa'cwlu lojni. ⁴¹ Palga yu' chu guinibee guulu xcargwni te kilómetro, huinani tio'p kilómetro. ⁴² Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxojnłuni lojni, na'c gäblu: "Xhetini."

⁴³ Abiejn diajgtu gunii rebengool: "Colchanälajz sa'tu. Colguidxe'ch loj re- nani rdxe'ch lojtu." ⁴⁴ Narä rniä lo- jtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dx- unsa'c loj renani rdxe'ch lojtu. Colcue- jdx, colnab loj Dios xcuent rebejn nani rdxagdijłtu, rusacsfreni la'tu, ⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigaj- cza lo reben guijdx. Rujnzani riabj nis- guij lo rebensa'c sigajcza lo rebenguijdx. ⁴⁶ Palga la'tu chanälajztu lagajctis rebejn nani rinälajz la'tu, xhi gaan guntu dx-

ejc? Najctu lagajc si'c najc rebejn ni rutie' meel ni rajx lo gubier. ⁴⁷Palga guiniitu: "Xchan", lagajctis loj resa'tu, ¿xhini'c ru-jntu ni najc hueenru lo chutis bejn? ¿La et sigajcdiza rujn rebejn nani di gumbée Dios? ⁴⁸Colyajc bensa'c si'c ni najc xtadtu ni yu' xhaguibaa.

Rulúi Jesús xho gudeedni gojn

6 Rájpzani:

—Na'c gusábdiidx guntu dzunsa'c nez loj rebejn te fiitisreni xhi ru-jntu. Palga gusábdiidxu di xtadtu ni yu' xhaguibaa guniidx xhi xca'tu. ²Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee nen reguidoo, nájza lad nezuyuj. Rujnsireni si'c te ruhuii rebejn xhi rujnreni te rliá'p rebejn xpala'nreni. Nará rniá acua'reni gaan xtenreni. ³Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnájni luj nez loj rebejn.

Rulúi Jesucrist xho cueedx, guiniabni lo Dios

(Lc. 11:2-4)

⁵Rájpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglazreni rniabreni lo Dios rsiulireni nen reyul' cadro riel' xtidx Dios, nájza guiraa resquiin, nájza nez ronejz te ruhuii rebejn xho rujnreni. Rniliá'pac, acua'reni gaan xtenreni. ⁶Naj luj cheni cueedx, guiniablu lo Dios, bitu' nen xyu'lu. Basáuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnájni luj nez loj rebejn.

⁷Cheni caniiu lo Dios, na'c guinisactu balti huált rediidx nani aguniitu. Si'c rujn rebejn nani di gumbée Dios. Naareni sa'csi sanuutis rniireni xhidajl

diidx balti huált, siejn diajg Dios. ⁸Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. ⁹Ni'cni scree colguinii lo Dios:

Xtadnu ni yu' xhaguibaa dxan najc lajlu. ¹⁰Sujiáád xcálrnibeelu; bejn si'cni rlanjlu lo guedxliujre sigajc rujnlu xhaguibaa.

¹¹Nadxej baniidx xcu'nnu sa' ni rdaunu guira dxej.

¹²Basiäjł lajzlu redojl xtennu si'c riäjł lajznu redojl xten rebejn ni rujn dojl loonu.

¹³Na'c gusaanlu jiaabnu xhigabguijdx, basłaa nuure lo dojl, sa'csi xten guejblu najc yálrnibee, yálnadip nájza yálrđimbicha' par tejpas.

Sugacni si'c.

¹⁴Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu. ¹⁵Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

Rulúi Jesús xho gucua'n bejn

¹⁶Rájpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliá acua'reni rexgaanreni. ¹⁷Niluxh la'tu, che rucua'ntu, colcun yejctu, colquiib lojtu ¹⁸te na'c gacbee rebejn cagucua'ntu, xtadtistu suhiii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

Yálnasa'c ni yu' xhaguibaa

(Lc. 12:33-34)

¹⁹Rájpzani:

—Na'c gapdajntu yálnasa'c lo guedxliujre cadro rajw reman o rbihtiejn xhixtentu, niluxh richu' gubaan rolijz bejn te rbajnreni. ²⁰Hueenru ga'ptu xcálnasa'ctu xhaguibaa cadro di reman

gauu, diza rehxixtentu cuibtiejn, diza regubaan jiu' te cuanreni. ²¹ Sa'csi cadreo yu' xcäl'nasa'ctu, ro'cza naga' lastootu.

Bianij xten tiejxhtu

(Lc. 11:34-36)

²² Räjzpzeni:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³ Niluxh palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, jlinacäiboo najc guidebtu!

²⁴ 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälazni steeni. Digacdi guntu xtzuum Dios palga caguuiltistu xcäl'nasa'ctu lo guedxliujre.

²⁵ 'Ni'cni rniä lojtu, na'c chutu yärsia' por xcäl'nabajntu, xhicha gautu, xhicha yätu, niclaza naatu xhicha lajd gajcwtu. Yäl'nabajn sajcru lo yäl'rajw, luxh sajcru tiejxhtu lo xhajbtu. ²⁶ Colhuii remane' ni rtajt xhaguibaa. Direni cue'c binij, dizareni guilia' gäjł, dizareni cuhee xhi gaureni neñ yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä? ²⁷ ¿Chu tej la'tu sa'csi ru'tu yärsia' sajç tiobrutu ste bo'c jjaaru?

²⁸ ¿Xhicuent runduxhtu xhigab xcuent xhajbtu? ¿Colhuii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. ²⁹ Narä rniä lojtu, nicla reii Salomón guideb najcwni rexhabsa'c xtenni di nisiuchee si'c rsiuchee tej reguiiga. ³⁰ Palga Dios rujn rajc recuaan ni yu' nesiät ni rial nadxej luxh guixee ahuejreni, ¿xhixh dini gunduxhru par la'tu, bejn nani guxii rililajç? ³¹ Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” ³² Sa'csi rebejn nani di gumbee Dios xhigabtisga rujnreni, caguuilreni guiraa recosga. Niluxh

xtadtu ni yu' xhaguibaa anajnmi xhini'c rquiintu. ³³ Colquixgaa yäl'rniabee xten Dios näjza yäl'nabansa'c si'cni rłajz Dios dxejç sica'tu guiraa ni rquiintu. ³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

Na'c cubeetu sa'tu

(Lc. 6:37-38, 41-42)

7 Räjzpzeni:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajçza sigubee Dios xhi rujntu; niluxh lagajç si'cni rutixhtu lo bejn, si'cza sutiexh Dios lojtu. ³ ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajç balojlu? ⁴ ¿Xhicuent gäblu lo sa'lu, nädonnu cuää guijxh ni yu' neñ balojlu, luxh dilu fii loj yagro ni yu' neñ balojlu? ⁵ Benguijdx ni rusguee, guläxgaa yagro ni yu' balojlu te gac fisa'clu te cuäälü guijxh nani yu' baloj sa'lu.

⁶ Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajçza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najçreni si'c cuch ni ruläj yejç xhitis xhi cos.

Colnab, colquiił, colgusejç rolä'

(Lc. 11:9-13; 6:31)

⁷ Räjzpzeni:

—Colnab lo Dios te guniidxni nani rni-abtu. Colquiiłni te guidxäjłtuni. Colni rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejç rolä', suxhalzareni lojni.

⁹ ¿La yu' chu tejtu che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bäjł, ¿la sudeedni te bäl? ¹¹ Palga la'tu ni najc beñ guijdx rajç rudeedtu cossa'c loj xi'ntu, aticaxh

xtadtu ni yu' xhaguibaa. Laani suniidxni cossa'c loj renani guiniabni lojni.

¹² Ni'cni guira'ti cos ni rlanjtu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo didix ni bacuaa redad ni gunii xtidx Dios.

Rolä' xten yäl'nabajn najc dää

(Lc. 13:24)

¹³ Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijt, luxh xhidajlreni riu' nejzga. ¹⁴ Sa'csi dää najc rolä', dääza najc nezyuj nani rinä bejn nez loj yäl'nabajn, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga

(Lc. 6:43-44)

¹⁵ Räjpszani:

—Colnatiro rebejn nani rlanj gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riäd-chu' loob lojreni. ¹⁶ Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guech-biojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c'di, ganax ninejxh ni di ganaxsa'c rcaj lojni. ¹⁸ Digacdi xcaj ninexhdxuudx loj te yajg ninexhsa'c. Di gac'diza xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c xcaj lojni, nanab guidinni te checni. ²⁰ Sigajcza sajg gumbeetu beñsa'c sa'csi rujnreni dzunsa'c.

Xhet guiraadi bejn jiu' lo xcäl'nibee Dios

(Lc. 13:25-27)

²¹ Räjpszani:

—Xhet guiraadi renani rnii, “Dad, Dad”, jiu' lo xcäl'nibee Dios xhaguibaa.

Ganaxtis renani rujn si'cni rlanj Xta'dä ni yu' xhaguibaa. ²² Sidzujñ dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu rebendxab, con lajzalu biennu remilagwr.” ²³ Dxejc säpä lojreni: “Dina gumbeä la'tu. Colbicaj loä benlatsiaj.”

Tio'p cimient

(Lc. 6:47-49; Mr. 1:22)

²⁴ Räjpszani:

—Chutis nani rucuadiajg diidx nani caniä, luxh ruzoob xtidxä, laani najc si'c te beñsin nani basoob rolijzni yejc te guilaj. ²⁵ Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶ Nani riejn diajgni xtidxä, luxh dini guzoob xtidxä najc si'c te beñ guyalajz nani basoob rolijzni lo yujxh. ²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebän yu'ga. Lacti xhiroob banijt bejnğa.

²⁸ Che guluix gunii Jesús rediidxga, lacti bidxeloj rebejn rediidx ni baluiini, ²⁹ sa'csi baluiini rebejn si'cpac te nani rnibee, xhet si'c ruluiidi rebejn ni najn leii.

Rusiajc Jesús te bejn ni ral tiejxhni

(Mr. 1:40-45; Lc. 5:12-16)

8 Che biäjt Jesús yec dajn, xhidajl bejn huinajlñi. ² Dxejcti biääd te benracxhuu ni ral tiejxhni nez loj Jesús. Bazuxhijbni, räjpnii:

—Dad, palga rlanjzlu, sajg gusiajclu narä.

³ Dxejcti basгаа Jesús naani, gudajnni dade'ga con naani, räjpnii:

—Rlazä jiajclu. Siajc tiejxhlu.

Lagajc dxejc gubicaj guejdx ni ral tiejxhni. ⁴ Dxejcti räjп Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

Rusiajc Jesús te xmos capitán roman*(Lc. 7:1-10)*

⁵Che biu' Jesús guedx Capernaum, bidzujñ te capitán roman nani rnibee te gayuu soldaad. Gunabduxhni lo Jesús, ⁶räjpni:

—Dad, xmosä naga' rolizä. Di gacdi guiniibni luxh cayanduxhni.

⁷Räjp Jesús:

—Do'o te gusiacäni.

⁸Dxejcti räjp capitán lojni:

—Dad, xhet sacädi; di nungäjñ jiu' guejblu rolizä. Guiniitis te diidx, siacgajc xmosä. ⁹Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰Che biejn diajg Jesús si'c, bidxelo-duxhni, räjpni loj renani siädnajni:

—Rniliäpac lojtu, nicla nen guideb reguedx Israel dina nidxälä te bejn ni rililajz si'c rililajz dade're. ¹¹Niluxh rniä, sirii xhidajl benzijt nez ladjiaa, nez ladjiät, te jädcuenäjreni Abram, Isaac, Jacob lajdx Dios xhaguibaa. ¹²Luxh reben Israel nani niajc xi'n Dios si-jreni te laad lo yälcäjy cadro soonreni, sauya'reni läjyreni, sidejdtisreni trabajw par tejpas.

¹³Dxejcti räjp Jesús loj capitán:

—Gubi' rilijzlu. Sigajcni huililajzlu, sigajcza gacni.

Dxejc lagajc orga bjaic xmosni.

Rusiajc Jesús xnansueegr Pedr*(Mr. 1:29-31; Lc. 4:38-39)*

¹⁴Che bidzujñ Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa. ¹⁵Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajl beñ racxhuu*(Mr. 1:32-34; Lc. 4:40-41)*

¹⁶Che biu' guxhijñ, biädnäreni loj Jesús xhidajl bejn ni yu' rebenxgab lostooreni; con xtiidxni gunibeeni birii guiraa rebenxgabga. Basiajczani guiraa reben racxhuu. ¹⁷Si'c bejn ni te guzojz diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcälracxhuunu, sanäzani rexcälñayannu.

Reni rlajz ninajl Jesús*(Lc. 9:57-62)*

¹⁸Che bahuii Jesús tre' xhidalduxh rebejn guideb gabi cadro suga'ni, gunibeeni tednäjni rexpejñpacni stelaad ro'nis. ¹⁹Dxejcti biädä te bennajn loj Jesús, räjpni:

—Mastr, sisiaäza cadrotis chäälü.

²⁰Räjp Jesús lojni:

—Rebäjz rajpreni xpiliääreni, remane'ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹Stee rexpejñpacni räjp lojni:

—Dad, basaan chaxgaä ladxä te chacuatzä xtadä.

²²Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni bendojñ.

Basiacdx i Jesús te beduxh*(Mr. 4:35-41; Lc. 8:22-25)*

²³Che biu' Jesús nen barcw, biu'za rexpejñpacni lagajc nenga. ²⁴Dxejc huäjs te bedonduxh lo nisdoo. Lirusiääzni barcw nen nisdoo. Luxh Jesús nagayejsni. ²⁵Dxejcti huij rexpejñpacni huicuäänni, räjpreni:

—Dad, gucnäj nuure te di guetnu.

²⁶Dxejc räjp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej nájza lo nisdoo, te biacdxireni. ²⁷Dxejc bidxeloduxh rexejnpacni, rájpreni:

—¿Chuni'c najc niguiire? ¡Ahuilaa xho rucuardiajg bej nájza nisdoo xtiidxni!

Rebendxab ni yu' lajdx regadarenos

(Mr. 5:1-20; Lc. 8:26-39)

²⁸Che bidzujñ Jesús stelaad nisdoo cadro najc lajdx regadarenos, tio'p bejñ ni yu' bendxab lastooreni biädchaglojreni Jesús. Rebejñga riireni neñ rebaa, nialazduxhrene, ni'cni rut rajcdi rdejñd nezyujga. ²⁹Guredxa'reni rájpreni:

—¿Xhicuent siädchu'lu loonu luj ni najc Jesús Xi'n Dios? ¿La siädälu ree te gusacsilu nuure luxh gad galdi xornu, ä?

³⁰Nez te laad, zijte' cadro suga'reni, cayajp bejñ xhidalro cuch. ³¹Dxejcti gunab rebendxabga loj Jesús, rájpreni:

—Palga cuäälü nuure, basaan jiu'nu neñ recuchre.

³²Dxejcti rájñ Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxunreni, huitejbreni ro' te guilaj, biääzreni neñ nisdoo, gujñtiren neñ nis.

³³Rebejñ ni cayajp recuchga, baxunreni, huijreni lajdxreni, huiyeireni didix guiraa ni guzajczeni nájza ni guzajc redade' ni guyu' rebendxab lastooreni.

³⁴Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

Basiajc Jesús te bejñ nani abixu'ñ tiejxhni

(Mr. 2:1-12; Lc. 5:17-26)

9Dxejcti biu' Jesús neñ barcw. Gudejñdni stelaad ro' nis te bidzujñni lajdxni. ²Ro'c biädnäreni lojni te bejñ nani abixu'ñ naani, ni'ni. Naga'ni lo te da'. Che bahuii Jesús lacti rililajzreni, rájñni loj benracxhuuga:

—¡Baspaa lajzlu xi'nä! Agubicaj rextojllu.

³Dxejcti gaii bennajn ni ruluii xleii Moisés cayujñreni xhigab ensilaareni, caniyaj dee Dios con rextiidxni. ⁴Dxejc gucbegajc Jesús xhi xhigab cayujñreni, dxejc rájñni lojreni:

—¿Xhicuent cayujntu xhigabguijdx neñ lastootu? ⁵¿Con ni najc guyasiru? Guiniä lo te bejñ: “Agubicaj rextojllu”, o guiniä lo te bejñ: “Huistie, guzaj.” ⁶Dec gunä te gacheetu Xi'n Dios ni gujc Niguii rajp yälrñibee lo guedxliujre te gudzucajni dojl.

Dxejcti rájñni loj benracxhuuga:

—Huistie, cua' xta'lu, huij rolizlu.

⁷Dxejcti huistie benracxhuuga, siini rolizni. ⁸Che bahuii rebejñ lojni, bidxeloduxhrene, gulä'preni xpala'n Dios, ni badeed yälrñibee ga loj rebejñ.

Che gurejdx Jesús Mateo

(Mr. 2:13-17; Lc. 5:27-32)

⁹Dxejcti birii Jesús cadro basiajñni benracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc rájñ Jesús lojni:

—Gudanajl narä.

Dxejcti huisuni, sanajlñi Jesús.

¹⁰Cheni sobga' Jesús lo mex caya-jwreni rolizj Mateo, biädza xhidajl rebejñ nani ruquijx xcuent guiraloj, ni najc rebejñ ni di gac xpen Israel, gurejzaren lo mex náj Jesús nájza reni najc rexejnpacni. ¹¹Che bahuii reben guidoo, ni laa refarisee, xhi cayujñ Jesús, rájpreni loj rexejnpac Jesús:

—¿Xhicuent raunäj xmastrtu rebejñ nani ruquijx xcuent reyuj nájza rebejñ ni di gac xpen Israel?

¹²Che biejn diajg Jesús xhi guniireni, rájñni lojreni:

—Rebejñ nani nadaan dini guiquiin chu gusiajñni, niluxh rebejñ racxhuu ni'c rquiinreni chu gusiajñni. ¹³Colchäj te

colchaseed xhi säloj diidxre ni caj loj reguijtz: “Yäl̄rulaslajz rlazä, dina rlazä guniidxtu guidxaa loä.” Sa'csi narä dina niädtedxä rebensa'c, narä siädtedxä re-bendojl̄ te gusiechlajzreni.

Gunabdiidxreni xcuent yäl̄rucua'n

(Mr. 2:18-22; Lc. 5:33-39)

¹⁴ Dxejcti biäd rexpejn̄pac Juan loj Jesús räjpreni:

—Nuure con refarisee rcua'nnu xhidäl̄ huält, çhicient di rexpejn̄pacu gu-cua'n, ä?

¹⁵ Räjp Jesús lojreni:

—Che ruchnaa te bi'n, çhixh rac-huïn lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶ Rut gundi remiend te ladbieww con te la' ladcoob sa'csi sixu'n ladcoobga, sutiäjsruni ladbiewwga, sajc xhiroobru cadro biräjsga. ¹⁷ Niclaza gac guida' bin-coob neñ reguidbieww, sa'csi reguidbieww siräjsni dxejc sixe' bin, sinijtzä reguijdgä. Ni'cni nanab guida' bincoob neñ reguid-coobza, te si'c nicla tejreni di nit.

Xindxa'p Jairo näjza gunaa nani gudajñ xhajb Jesús

(Mr. 5:21-43; Lc. 8:40-56)

¹⁸ Lañ ni caniini rediidxga, biäd te dade' ni rnibee neñ guidoo xten rexpejn̄ Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub naalu yejçni te guibañsacni.

¹⁹ Dxejcti huisu Jesús, sanäni Jairo. Näj rexpejn̄pacni sanajlreni. ²⁰ Luxh guyu' te gunaracxhuu nani agujc tzu-bitio'p ijz cayaçni yäl̄guidxbäi. Bidzu-jñni nez dejtz Jesús, gudajñni ro' xhajbni, ²¹ sa'csi bejn̄ni xhigab neñ lastooni: “Palga sajc canätis ro' xhajbni, siacä.”

²² Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yäl̄rililajz xtenlu abasajçlu.

Luxh lagajc dxejc bjaic gunaaga.

²³ Cheni biu' Jesús roliz dade' nani rnibee neñ xquidoo rexpeñ Israel, bahuiini rebejn̄ ni roñ bizej näjza xhidajl̄ rebejn̄ ni cabedxa' cayoon, li te biey cayajc, dxejc ²⁴ räjpni loj rebejn̄ga:

—Colguibicaj. Nagayejstis dxa'pğa, gajdni guet.

Dxejc rebejn̄ga alga ruxhiznäjreni Jesús. ²⁵ Cheni abirii rebejn̄ neñ yu', biu' Jesús, gunaañni naa dxape', dxejc huistie dxape'ga. ²⁶ Dxejcti bire'ch di-idxga guiraa neñ reguejdx ni tre' nejzga.

Basiajc Jesús tio'p lotiä'p

²⁷ Che birii Jesús ro'c, huinajl̄ tio'p be-jñni nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸ Che bidzujñ Jesús cadro caya'n̄ni, gubigreni lojni. Dxejcti gunabdiidx Jesús lojreni, räjpni:

—ÇLa rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

²⁹ Dxejcti gudajñni balojreni, räjpni:

—Sugacni si'cpacni rililajztu.

³⁰ Lagajc dxejc bixal balojreni. Sas räjp̄pac Jesús lojreni:

—Arniä, na'c chayeitu diidxre, te rut gacbeedi xhi guzajçtu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadro bjaic baloj re-bejn̄ga, biäd sgaii bejn̄ biädnäreni te gop loj Jesús. Yu' xp̄rit bendxab neñ lastoo bejn̄ga. ³³ Che barilaagw Jesús xp̄rit bendxab neñ lastoo bengopğa, guslogaçni caniini. Rdxeloduxh rebejn̄ räjpreni:

—Gajdpacnu guihuii sa' redzuunre la-jdx rexpejn̄ Israel.

³⁴ Dxejc rebeñ guidoo ni najc refarisee, räjpreni:

—Rbääni rexprít bendxab con yálrnibee xten bendxabro.

Rulaslajz Jesús rebejn

³⁵Gudejd Jesús guiraa reguedxro nájza reguedxbáz, basule'ni xtidx Dios nen reguidoo xten rexpejn Israel. Basääbni diidx xten xcálrnibee Dios. Basiajczani guiraloj yálracxhuu, guiraloj yálguijdx ni rajc bejn nen reguejdxga. ³⁶Che bahuiini loj reben xhidajl biaduxhni rebejnga sa'csi rdebya' lajzreni, rac-huin lajzreni, najcreni si'c najc rexiil nani di ga'p baxtoor. ³⁷Dxejcti rájzni loj rexpejn pacni:

—Guliipac xhidalduxh ben guedxliuj di gan xtidxá, luxh guxii najc reni gu-luiireni; najcni si'c gájl ni agojl guilia', niluxh ruti mos ni guilia'ni. ³⁸Colnab lo Dad nani najc xtenni guedxliujre te gux-ha'lni rebejn ni sajc guluii reben guedxliujre, gacreni si'c mos ni rlia' gájl.

Gule Jesús guitzubitio'p rexpejn pacni

(Mr. 3:13-19; Lc. 6:12-16)

10 Dxejcti gurejdxni guitzubitio'p rexpejn pacni, badeedni yálrnibee lojreni te gurilaagwreni rexprít bendxab lastoo bejn nájza te gusiajcreni guiraloj yálguijdx nájza yálracxhuu.

²Laj reguitzubitio'p rexpejn ni gu-leni najc: Simón, ni laaza Pedr; Andrés bejtz Simón; Jacoob xi'n Zebedeo; Juan bejtz Jacoob; ³Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni miiireni Tadeo; ⁴Simón, te bejn ni yu' loj recananita; Judas Iscariote, nani bateed Jesús ladzñaa rebejn nani rdxe'ch lojni.

Baxha' Jesús rexpejn pacni gutie'chreni diidx

(Mr. 6:7-13; Lc. 9:1-6)

⁵Guitzubitio'p rebejnre baxha' Jesús. Balijdxnireni rájzni:

—Na'c cháātu nez cad yu' rebejn ni di gumbee Dios. Na'c jiu'tu lajdx reben samaritan. ⁶Colchäxgaa lo rexpejn Israel nani agunijt nen dojl. ⁷Colchäj, colzäbdiidx lo rebejn, colye'tz lojreni xcálrnibee Dios abidzungajxh. ⁸Colgusiajcz bejn racxhuu, colgusiajcz tiejxh rebejn ni ra' guejch tiejxhreni, colguspajn bengut. Colgurilaagw xprít bendxab lastoo rebejn. Ligaj cua'tu yálrnibee, ligajza colyejn dzuun.

⁹Rájpzani:

—Na'c chanātu oor, niclaza pla't, niclaza coobr nen xdobdájltu, ¹⁰niclaza guijxh na'c chanātu lo nejz. Na'cza chanātu tio'p xhajbtu, nicla gura'ch, nicla baston sa'csi bejn ni rujn dzuun nungájl xca'ni xhi gauni.

¹¹Rájpzani:

—Che guidzujntu xhitis te guedxro, xhitis te guedxbáz, colquuil te bensa'c. Rolijztsini coljia'n dxejli ni jiunejztu guejdxga. ¹²Cheni jiu'tu nen yu', colnii xtidx Dios lo rebejnga. ¹³Palga najcreni bejn ni numbee Dios, sujia'n yálrbedxilajz loj rebejnga. Niluxh palga direni gac bensa'c, naaddireni xca'reni xtidx Dios, suguibi' yálrbedxilajzga lojtu, coljiunejz ro'c. ¹⁴Palga direni gusaan jiu'tu rolijzreni, palga di rlaizreni gucuadiajgreni xtiidxtu, dxejcz coljiunejz rolijz bejnga, o coljiunejz guejdxga, dxejcz colcuijb guxhuj ni'tu si'c te seen gulälazreni xtidx Dios. ¹⁵Rniliápac lojtu, dxejcz ni gun Dios xcálguxhtisni, te yálguxhtisoru gun Dios rebejnga, quela yálguxhtis ni gujcz reben guedx Sodoma náj Gomorra.

Yálrusacsí ni siäd

¹⁶Rájpzani:

—¡Colhuiire! Narä suxhalä la'tu si'c xile' nez loj reloob, ni'cni colgacnasinduxh si'c najc te bäl, colyajcza nadolajz si'c te palom. ¹⁷Colnatiro rebejn sa'csi suteedreni la'tu

ladzṇaa rexcuxhtisreni, siguijnzareni la'tu nen xquidooreni. ¹⁸ Sināzareni la'tu nez loj regubier, nez loj reṛeii xcuent rextidxä, te gusule'tu xtidxä nez lojreni näjza nez loj rebejn nani di gumbee Dios. ¹⁹ Cheni chanāreni la'tu nez loj reguxhtis, na'c guntu xhigab xho guiniitu, niclaza guntu xhigab xhichani'c guiniitu, sa'csi lagajc Dios suniidx diidx guiniitu orga. ²⁰ Sa'csi et la'ditu ni guinii dxejc, Sprit xten Xtadtu Dios ni yu' nen lastootu, laani guinii nen lastootu.

²¹ 'Luxh rebejn suteedreni lagajc bejtzreni ladzṇaa reni ju'treni. Redad suteedreni lagajc xi'nreni, rexi'n bejn sidxe'chzareni lo xcuzajnneni te ju't bejn xcuzajnneni. ²² Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yälṇabajṇ par tejpas. ²³ Che guirinajlreni la'tu te gusacsireni la'tu nen te guejdx, colguxuṇ ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexepejn Israel ansde jiaäd Xi'n Dios ni gujc Niguui.

²⁴ 'Di te bejn ni casieedgaj beṇroru lo xmastrni, diza te mos gac beṇroru lo xlamni. ²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee beṇdxab, xho direni cuälaja Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Räjzpāni:

—Ni'cni na'c guidxejbtu rebejn, sa'csi anajntu xheti te cos ni niāuu lojni ni di guidzujṇ dxej guixal lojni, te fii chutis bejn lojni. Xhetiza te cos xhiga'tzdi ni di guidzujṇ dxej siejn diajg bejn xcuentni. ²⁷ Diidx nani rniä lojtu guxhijṇ, colguiniini che nianij lo guedxliuj. Rediidx

nani rniä chigaj rodiajgtu, colguiniini dip, jiaali colzuj, guredxa' te jiejnni. ²⁸ Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn nen gabijl.

²⁹ '¿La di bejn guto' tio'p manbāz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. ³⁰ Näjza rexquidxejclu nagab tebgajreni. ³¹ Ni'cni rniä na'c guidxejbtu; sajcrutu lo te chinaa manbāz ni rutajt.

Renani rusule' xtidx Jesucrist nez loj rebejn

(Lc. 12:8-9)

³² Räjzpāni:

—Chutis renani rusule' xtidxä nez loj rebejn, narä siniäza xcuentni nez loj xtidä ni yu' xhaguibaa. ³³ Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtidä ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴ Räjzpāni:

—Na'c guntu xhigab siädnaä yälṛbedxilajz lo rebejn guedxliujre, xhet yälcedxidi ni siädnaä, yälṛdxagdijl siädnaä. ³⁵ Narä siädnaä yälṛdxagdijl te bi'n con xtidni; te dxa'p con xnanni; te gulijzni con xnansueegrni. ³⁶ Ni'cni lagajc resa'tu ni yu' roliztu sidxe'chreni lojtu.

³⁷ 'Nani sanälajzru xtidni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä. ³⁸ Nani di guu xcrujzni, nalajznu tedni trabajw, jiaṇnajlṇi narä, di gacdi gacni xpenä. ³⁹ Nani guidxäl xcälṇabajṇni lo guedxliujre, sunitni yälṇabajṇ xhaguibaa. Luxh nani gunijt xcälṇabajṇni lo guedxliujre xcuent rextidxä, sidxälṇi yälṇabansa'c xhaguibaa.

Gaan nani xca'ni

(Mr. 9:41)

⁴⁰ Räjpszani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhaļ narä. ⁴¹ Nani guscuääz te niguii ni rñii xtidx Dios rolijzni sa'csi baxhaļ Dios niguiiga, sica'za bejnga lagajc gaan ni xca' niguii ni rñii xtidx Dios. Nani guscuääz te bensa'c rolijzni sa'csi bensa'cni, sica'zani lagajc gaan ni xca' bensa'cga. ⁴² Chutis nani gudeed mase te xhijgtis nis niäliuj xcuentä lo rebiuxe're, rniliápac lojtu, direni gunijt, sica'pacreni nani nungäjļ xca'reni.

Renani baxhaļ Juan Bautist loj Jesús

(Lc. 7:18-35)

11 Che gulujx baluii Jesús rexpeljpacni xho gunreni dzuun, dxejcti biriini ro'c te saluiini, chasule'ni diidx lajdx rexpeljpacni.

² Juan yu' nen latzguiib. Che biejn diajgni xhi cayujn Jesús, baxhaļni tio'p xpejnpjacni ³ te huinabdiidxreni:

—¿La luj ni najc Crist ni jiääd, ä?, o ¿la silääznu chu stee bejn?

⁴ Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajgtu, näjza recos nani ruhuiitu.

⁵ Reni di fii, ruhuiireni; reni di sa, arsiajreni, reni raļ tiejxhni, abiajx tiejxhreni; reni di jien diajg, ariejn diajgreni; rebengut, ahuäjzreni, gubansacreni. Dxejcti loj rebejn proob nani cabäjx xcälracnäj Dios cagusule'reni xtidx Dios ni ruslaa bejn nen dojļ. ⁶ Chicbaa renani di jieed narä.

⁷ Cheni sii rebejnga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? ⁸ ¿Xhini'c huihuiitu? ¿Te bejn ni

sucheduxh, ä? Ni najntu rebejn nani sucheduxh rbäjzreni rolijz rereii. ⁹ La'tu ¿xhicuent huijtu ro'c? ¿Te fiitu te niguii ni rñii xtidx Dios, ä? O'n. Rñiliä lojtu, luxh dini gac bejntis ni rñii xtidx Dios; benroruni. ¹⁰ Laa Juan nani rusä't ni bacuaa lo reguijtz cadre caj scree:

Narä suxhaļ te niguii nani guinii xtidxä nez lojlu;

laani susuceeni nezyuj nezlojlu.

¹¹ Guliipac rñiä, loj guiraa rexingaan xten gunaa, nicla tejni gajd guiricaj ni najc te bensa'cduxh loj Dios si'c ni najc Juan Bautist. Niluxh bejn nani najc ben huinru lo xcälrnibee Dios xhaguibaa, bejnga maazru sajcnj loj Juan.

¹² 'Cheni gucli dxej ni gusloj rusule' Juan Bautist diidx najli, yu'duxh reni rla-jzpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxecha' rla-jzreni cuäxuuni xcälrnibee Dios.

¹³ Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. ¹⁴ Palga rla-jztu chalilajztu, lagajc Juan najc Elías, niguii xten Dios nani bia'n diidx jiääd. ¹⁵ Nani sobdiajg diidx, gucuadiajgni.

¹⁶ '¿Xhicojn guntebloä rebejn nani tre' naj, ä? Najcreni si'c najc rebiuux nani rguijt nez lo guii cadre rdo', rbejdxreni lo sa'reni, ¹⁷ rñiireni: “Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon.”

¹⁸ Sa'csi che biääd Juan dini niajw dizani niä', luxh räjp rebejn najcni te xpejn bendxab. ¹⁹ Dxejcti biälä narä, Xi'n Dios ni gujx Niguii, rauä, rä'ä dxejcti räjp rebejn: “Niguiire rauxha't, rätejzani bin, najcni xamigw rebendojļ näjza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn Dios yuduxh xcäl'najn Dios, ni'cni baxhaļni guiro'p rebejnre.

Reguejdx gualajz

(Lc. 10:13-15)

²⁰ Dxejcti gusloj Jesús gudiñajni re-benguejdx cadro benduxhni remilaagwr, sa'csi naaddireni gusiechlajzreni xtojłreni, sanuutis nabajłreni neñ dojl. Dxejcti räjpnı:

²¹ —ıGunatiru guedx Corazın! ıGunatiro guedx Betsaida! Paru neñ guedx Tiro nájza guedx Sidón nıajc remılaagwr nani gujc guedx lajdxtu, cadxejlı nusiejch lajzreni xtojłreni, cadxejlı nıajcwreni neñ godx, nidäáb cobdäj yejcreni. ²² Luxh rniä lojtu: che guidzujł dxej ni gun Dios xcälguxhtisni, sidejdru tu castiıgw loj rebejł ni guläjz guedx Tiro nájza guedx Sidón. ²³ Luj guedx Capernaum di gunlu xhıgab chäslu xhaguıbaa; jıäjt neñ baa jıajblu, sa'csi paru neñ guedx Sodoma nıajc sa' remılaagwr nani gujc guedxlajdxlu, pet najlı tresıjc guejdxga. ²⁴ Luxh rniä lojtu, dxej ni gun Dios xcälguxhtisni, trabajwduxhru tedtu loj rebejł Sodoma.

Colıtaa loä, te gusilajztu

(Lc. 10:21-22)

²⁵ Laa dxejcnı räjpnı Jesús:

—Rliä'pä xpala'nlu Xtadä, Dad xten xhaguıbaa nájza guedxliuj, sa'csi bacua'tzlu recosre lo rebenıajn, lo rebejł ni racbee, te baluiiluni loj rebenıadolajz ni najc si'c biuxbäz. ²⁶ O'n. Guliini, Xtadä, sa'csi rujnlu xhıgab si'c najc hueen gacni.

²⁷ Guıraa recosre abanııdx Xtadä loä, rutru numbeedi xıngaanni; xtadtisni rumbeeni. Rutruza numbeedi xtadni, xtebtis xıngaanni, nájza loj renani gudeed xıngaanni gumbee xtadni. ²⁸ Colıtaa loä guıraatu nani abadxajg, nani rsina', narä sunıdxä yälrusilajz lojtu. ²⁹ Colıguısieed guntu dzuun si'cni ruluiätu. Colıhııı xho runä, xho nacä nadolajz, dizana gacä benıayedxlajz

neñ lastoä, ni'cni sıdxäl xaimtu yälrusilajz. ³⁰ Sa'csi guyasi najc xtzunä ni ruluiätu, dizani gac naganduxh.

Rutie' rexpejł Jesús triuu dxej ni rusilajzreni

(Mr. 2:23-28; Lc. 6:1-5)

12 Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejł Israel, calaan rexpejłpacni, guslojreni calädxa'reni dojl lo triuu te cayajwreni. ² Che bahıııı rebenı guidoo ni laa farısee, räjpnı loj Jesús:

—Ahıııı xho rujn rexpejłpacıu dzuun nani di nungäjł gunreni dxej nani rusilajz bejł.

³ Luxh laani räjpnı lojreni:

—ıLa gajdıtı goł xhi caj loj reguijzt xcuent ni bejł toDavid che gulannäjni rexpejłni, ä? ⁴ Biu'reni xquıdoo Dios, gıdajwreni yätxtiıl nani di nungäjł gauni, nicla laani, nicıaza rebejł nani sanäni, sa'csi yätxtiılga rebıxhojztis rajwnı. ⁵ O ıla gajdıtı goł lo reguijzt xten leııı cadro caj xcuent rebıxhojz, ä? Laareni rıu'reni neñ reguidoo dxej ni rusilajz bejł, rujnreni xtzıunreni niluxh xhet dojłdı rujnreni. ⁶ Narä rniä lojtu, ree suga' teıı nani sajıru loj guıdooıga. ⁷ Paru niacbeetu xhi säloj dee: “Yälıruıasıajz rıazä, xhet yälrejtđı guıdxaä”, dıtı nucuaquıj redee ni xhet bejđı. ⁸ Sa'csi narä Xi'n Dios ni gujc Nıguııı rııııbeä dxej ni rusilajz rebejł.

Nıguııı ni rxu'n naani

(Mr. 3:1-6; Lc. 6:6-11)

⁹ Che birııı Jesús ro'c, bıu'ni te xquıdobäjzreni. ¹⁰ Ro'c suga' te bejł ni gubıjdz te naani. Luxh sa'csi caguiılreni xho gucuaquıjreni Jesús, gusloj canabđııdxreni lojııı, räjpnı:

—ıLa rusaan leııı gusıajcnı benıracxhuu dxej ni rusilajz bejł, ä?

¹¹ Badzu' Jesús đııdxre lojreni, räjpnı:

—Chutejtu ni rajp te xiil niluxh palga guitejbni nen bisie che gal dxej ni rusilajz bejn, çxhixh dini cuää xiilga nen bisie, ä? ¹²Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³Dxejcti räjpni loj dade'ga:

—Baslii ñaalu.

Che basliinini, dxejc biajc ñaani, gujcní tebloj si'c najc stelaad ñaani. ¹⁴Dxejcti birii reben guidoo ni laa farisee, bachagsa'zarení te bia'nrení didix ju'trení Jesús.

Diidx ni guniireni xcuent Jesús

¹⁵Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu.

¹⁶Dxejc räjpni lojreni:

—Na'cpac gäbreni chu najcni.

¹⁷Si'c gujc te gusojb diidx ni gunii Isafas ni gunii xtidx Dios che räjpni:

¹⁸Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹Dini tilnä j bejn, dizani cuedxa'; rudza jieyndi diajgni xse'ni lad nezyuj.

²⁰Dini qui'ch nicla te nijt ni cabiejc, dizani gusuii te duxiil ni cayujn guxh, dxejli che gunni gaan guinibeeni yälguxhtis.

²¹Lajtisni sustioob lastoo reben ni digac xpejn Israel.

Rucuaquijreni Jesús rajpni yälrnibee xten bendxab

(Mr. 3:19-30; Lc. 11:14-23; 12:10)

²²Dxejcti biändäreni loj Jesús te bejn ni di fii, dizani guinii, yu' te bendxab las-tooni. Dxejcti basiajc Jesúsni, te gujc guniini, te gujca bahuiini. ²³Guiraa rebejn bidxelojreni, räjpreni:

—ÇXhaa laa Xi'n toDavidni, ä?

²⁴Che biejn diajg reben guidoo ni laa farisee rediidxga, räjpreni:

—Bejnre rbää rebendxab con yälrnibee xten Beelzebú ni rnibee loj rebendxab.

²⁵Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridilnä j sa'reni, sinitlojreni. ²⁶Sigajcza palga bendxab rbää sabendxabni, silia' sa'reni, dxejc çxho gac chanuu xcälrnibeereni? ²⁷Palga narä rbää rebendxab con yälrnibee xten Beelzebú, çchu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab.

²⁸Palga narä rbää rebendxab con Xprit xten Dios, guliipacni abidzujn xcälrnibee Dios lojtu.

²⁹'Bahuilaa. ÇXho gac jiu' te bejn cuan rolizj te bendaan, xho gac cuanni xhixten bejnga, palga dini gulibxgaani bendaanga? Che abiliib bejnga, sajcuanni rexhixten bejnga.

³⁰'Nani xhet yu'di xladä, rdxe'chni loä. Nani di jiädna j narä, rutie'chni reni siädna j narä.

³¹'Ni'cni rniä guira'ti dojl, guira'ti yälrusguee xte bejn sajcuansiä j lajzni xtebtis yälrnijay Sprit Dxan xten Dios di Dios gusiä j lajzni. ³²Chutis ni guinii xhi te diidx yälrnijay Xi'n Dios ni gujc Niguii sajcuansiä j lajzni, luxh chutis ni guiniijay Sprit Dxan xten Dios, di Dios gusiä j lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni

(Lc. 6:43-45)

³³'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴Sa' la'tu benguidx ni najc si'c te bäl niälasduxh, çxho gac guiniitu te didxsa'c?, ni ro' bejn

miiis rexhigab ni yu' neṅ lastoo bejn. ³⁵Te beṅsa'c rmiini didxsa'c, sa'csi ganax xhigabsa'c yu' neṅ lastooni, te benguijdx rmiitisi cosguijdx sa'csi ganax xhigabguijdx yu' neṅ lastooni. ³⁶Narä rmiäza, guiraa redidxguijdx nani rni bejn sudeedreni cuent lo Dios cheni gunni yälguxhtis, ³⁷sa'csi lagajc rextiidxlu sujn guinii Dios najclu beṅsa'c, lagajc rextiidxlu sujn gunijflu lo Dios.

Rebenguijdx rniab te milagwr si'c te seen

(Mr. 8:12; Lc. 11:29-32)

³⁸Dxejcti rebejn ni rului xleii to Moisés näjza rebeṅ guidoo ni laa farisee, räjpreni loj Jesús:

—Mastr, nuurnu rrajznu guihuiinu te seen; bejn te milagwr te fiinuni.

³⁹Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios.

⁴⁰Sa'csi lagajc si'cni guyu' Jonás xque' te bälro choṅ dxej, choṅ yääl, si'cza chu Xi'n Dios ni guj Niguii neṅ lastoo guedxliuj choṅ dxej, choṅza yääl.

⁴¹Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi rebeṅ Nínive basiejch lajzreni, bia xtojlrēni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴²Näjza rein xten rebeṅ sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyälñajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³Räjpzani:

—Cheni rii te spritdxab neṅ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. ⁴⁴Dxejcti rujni xhigab, naani, guibisacä cadro biriä. Cheni rbisacni ro'c, rdzujjni si'c rdzujn te bejn neṅ te yu' ni naya nenni, naliobsa'cni, sucheeni, luxh rut rbäjzdi ro'c. ⁴⁵Dxejcti rijni, rixiini sga-jdz sprit nani najc nadxuudxru lojni te jiädlnäjrenini neṅ lastoo bejnga. Dxejcti rxhiṅduxhru bejnga lojni gujcn ga-loo. Sigajcza gac rebejn ni tre' lo guedxliujre naj.

Xnan Jesús con rebejtzni

(Mr. 3:31-35; Lc. 8:19-21)

⁴⁶Laṅ ni caninäjni rebejn, bidzujn xnanni con rebejtzni, suga'reni rolä' rrajzreni guiniireni lojni. ⁴⁷Dxejcti biääd tej ni räjp loj Jesús:

—Xnanlu näjza rebejtzlu suga' rolä' rrajzreni guinäjäjreni luj.

⁴⁸Laani badzu'ni diidx lo bejnga räjpni:

—¿Chuni'c najc xnanä? ¿Chuni'c najc rebetzä?

⁴⁹Dxejcti basgaani naani nez loj rexpejn pacni, räjpni:

—¡Redee najc xnanä redeeza najc rebetzä! ⁵⁰Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

Xcuent bejn nani rbe'c binij

(Mr. 4:1-9; Lc. 8:4-8)

13 Lagajc dxejga birii Jesús royu'ga, huicueni nez ro' nisdoo. ²Xhidalduxh bejn bire' cadro suga'ni, sas biu'ni neṅ te barcw, ro'c gurejni. Dxejcti rebejn gurej nez lo plaii. ³Dxejc gusloj caguluui Jesús con recuent, räjpni:

—Colcuadiajg. Birii te dade' ni rbe'c binij te cue'cni binij. ⁴Laṅ ni cabe'cni binij yu' binij ni bitejb gajxh nez ro' nesuij, biääd remane' ni rutajt, sas guda-jwreni binijga. ⁵Yu' binij ni bitejb nez

neñ reguij cadro guxii yu' yuj. Gulen-gajc binijga sa'csi direni nibej jät neñ yuj. ⁶Che birii gubijdx, bigolreni sa'csi xhetiza xlobaani, dxejc gubijdzni. ⁷Yu'za binij ni bitejb neñ reguejch. Che guroob reguejchga, dini nusaan niroob regäjle', gubijdztireni. ⁸Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej. ⁹Nani rsobdiajg diidx gucuadiajgni diidxre.

Xhi pajr najc recuent xten Jesús

(Mr. 4:10-12; Lc. 8:9-10)

¹⁰Dxejcti gubig rexpejnacni, gunab-diidx lojni, räjpreni:

—¿Xhicuent rusule'lu diidx loj rebejn con recuent?

¹¹Dxejcti badzu' Jesús diidx rajpni lojreni:

—Sacnäj Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeereni. ¹²Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni rajpni sibicaj. ¹³Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni. ¹⁴Laareni najcreni si'c te soob diidx ni gunii Isafas, dade' ni gunii xtidx Dios, che räjpni:

Siejn diajgpactu, niluxh xhetliidi gacbeetu,

sidxelojactu, niluxh ditu fii.

¹⁵Sa'csi guyalajz rebejnre, lastooreni najc si'c te guij,

di diajgreni jiejn,

luxh niäüza balojreni, didi fisa'creni con balojreni,

didi jiejnza diajgreni, didi gacbeeza lastooreni,

didi gusiejch lajzreni guibi'reni loä te gusiaca lastooreni.

¹⁶La'tu colguibalaznäj balojtu sa'csi rhuisa'ctu, riensa'cza diajgtu. ¹⁷Rniliá-pac, xhidajl redade' ni gunii xtidx Dios, näjza xhidajl bensa'c rlazduxh nuhuui sa' recos ni cahuiitu, luxh direni nuhuuiini, rlaizreni niejn diajgreni sa' rediidx nani cayejn diajgtu, luxh di diajgreni niejnni.

Rusule' Jesús xcuent bejn ni rbe'c binij

(Mr. 4:13-20; Lc. 8:11-15)

¹⁸Colcuadiajg xhi säloj xcuent bejn nani rbe'c binij. ¹⁹Rebejn nani rucua-diajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesyuj; riääd bendxab rudzucajni rediidx nani biu' neñ lastooni. ²⁰Rebinij nani bitejb nez neñ reguij, najc si'c rebejn nani rucua-diajg diidx, gustli rca'reni diidxga, ²¹luxh guxii yu' xlobaani, direni sutijp. Che rdejdreni trabajw, che rdxe'ch bejn lojreni, sa'csi rucua-diajgreni xtidx Dios, rusiejch lajzreni, rbälazni diidxga. ²²Rebinij nani gurej neñ reyaguejch säloj rebejn nani rucua-diajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre rusgueereni. Guiraa recosre rutau lo xtidx Dios neñ lastoo rebejnre, dini gusaan gac te cosechsa'c neñ lastoo rebejnre. ²³Dxejc rebinij nani rtejb lo reyusa'c, ni'c najc si'c rebejn nani rucua-diajg xtidx Dios, nani racbee diidxga, nani rutie'ru sa'reni te racxhida-jlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojñ; yu'za bejn ni najc si'c binij ni gujc galbitzuu.

Xcuent triuu cadro guyu' cuanguejch

²⁴Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni. ²⁵La'l nagaguejs bejnnga, biääd te bejn nani rdxe'ch lajz loj xpaxhuan

binijga, biädle'cni bedz cuanguejch lo xtriuu bejn̄ga, dxejcti sääni. ²⁶Cheni gulejn triuuga, birii doj lojni, dxejc biricaj näjza cuanguejch ro'c. ²⁷Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?” ²⁸Räjp xlamreni: “Te bejn̄ ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlanj guejblu cholädxa'nu recuanguejchga, ä?” ²⁹Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu. ³⁰Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen̄ yu'.”

Xcuent bedz muxhtas

(Mr. 4:30-32; Lc. 13:18-19)

³¹Bijza Jesús stee cuent räjpni:

—Xcäl̄rniee Dios xhaguibaa najcni si'c te bedz muxhtas nani cue'c te bejn̄ lo xyujni. ³²Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiääzreni lo xajcw yajgga.

Xcuent levaduur

(Lc. 13:20-21)

³³Bijzani stee cuentre, räjpni:

—Xcäl̄rniee Dios xhaguibaa najc si'c levaduur nani rugu'ch te gunaa lo choñ mediid arin, dxejc ni'c rusaguijni guideb cojbga.

Xhicuent baluui Jesús ganaxtis con cuent

(Mr. 4:33-34)

³⁴Baluui Jesús guiraa rebejn̄ ganaxtis con recuent, xhetiru stee mood nuluiini, ganaxtis con cuent guniini lojreni.

³⁵Si'c bejn̄ni te guzobj xtidx dade' ni gu-

nii xtidx Dios che bacuaani lo reguijtz, räjpni:

Suiyä diidx con recuent,

suiyä diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch nen̄ triuu

³⁶Dxejcti basadiidx Jesús rebejn̄, biu'tini nen̄ yu' cadro bire' rexpejn̄pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷Räjp Jesús lojreni:

—Bejn̄ nani rbe'c retriusa'c, najc Xi'n Dios ni gujc Niguii; ³⁸loniaaga najc guedxliuj; retriusa'c najc rebejn̄ nani najc xpejn̄ Dios, nani rucuadi-ajg xtiidxni; recuanguejchga najc rebejn̄ ni najc xpejn̄ bendxab. ³⁹Bejn̄ nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. ⁴⁰Sigacni guire' recuanguejch te chääni lo guiboo te checni, sigajcza gac che gac fis guedxliuj. ⁴¹Xi'n Dios ni gujc Niguii suxhal̄ rexangl̄ni te jiädgutie'reni, te jiädlääreni lo xcäl̄rnieeni guiraa renani rujn̄ riab̄ bejn̄ nen̄ dojl̄, näjza reni rujn̄ cosguijdx. ⁴²Susäl̄reni rebejn̄ga nen̄ te or̄ cadro cayecduxh. Ro'c sonduxhreni, sauya'reni läijyreni. ⁴³Dxejcti rebensa'c sidimbicha'reni si'c gubijdx lo xcäl̄rniee Xtadreni. Palga sobdiajgtu, colgucuadiagsa'c.

Te cossacduxh ni naga'tz

⁴⁴Räjpzani:

—Si'cza xcäl̄rniee Dios xhaguibaa najc si'c te cossacduxh ni naga'tz lo te yuj loniaa. Bidxäl̄ te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räjpzani:

—Xcäl̄rnibee Dios xhaguibaa najcza si'c najc te dad rapduxh nani caguuil perlsa'c te siini. ⁴⁶ Che bidxäl̄ni te perlsa'c, tejni sacduxh, bato'ni guiraa xhixtenni te gusiini perlga.

Guijxh ni rniaaz bäj̄l

⁴⁷ Räjpzani:

—Xcäl̄rnibee Dios xhaguibaa najcza si'c te guiexh ni rusäl̄ bejn̄ lo nis te rniaazreni guiraloj cuaa bäj̄l. ⁴⁸ Cheni agudxajni, rbäärenini nez ro' nisdoo, te ro'c rbereni loj rebäj̄l. Rebäj̄l ni najc hueen rucheeni nen̄ te dxijm̄; nani di gac hueen rusäl̄renini te laad. ⁴⁹ Si'cza gac che gac fis guedxliuj; sirii rexangl Dios te sudzucajreni rebenguijdx lo rebensa'c. ⁵⁰ Dxejcti susäl̄reni rebenguijdx nen̄ te oꝛ cadro cayecduxh; ro'c sonduxhrenei, sauva'reni läjyreni.

Te beñ rajp

⁵¹ Dxejcti gunabdiidx Jesús lojreni, räj̄pni:

—¿La racbeetu guiraa ni caniä lojtu, ä?

Dxejcti räj̄preni:

—O', racbeenuni Dad.

⁵² Dxejcti räj̄pni lojreni:

—Cheni rsieed te bejn̄ nani najn leii xcuent yäl̄rnibee xten Dios xhaguibaa, najcni si'c te lam̄ nani rajc rbää lo rex-cäl̄nasa'cni recos ni nacoob, näjza recos biejw.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuente, birini ro'c, sääni. ⁵⁴ Huijni lagajc lajdxni. Ro'c gusloj caguluiini nen̄ xquidobäzreni ro'c. Dxejcti rdxeloduxh reben̄ ro'c, räj̄preni:

—¿Caro bisieedni reyäl̄najnre? ¿Xho rajc rujnni remilagwr? ⁵⁵ ¿La et laadi dee ni najc xi'n carpinteer, ä? ¿La et Mari-idi najc xnanni? Dee ni najc bejtz Jacoob, José, Simón con Judas. ⁵⁶ Luxh rebisiajn̄ni rbäj̄zreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejcti räj̄p Jesús lojreni:

—Guiraa rebejn̄ rinäl̄ajz te niguii nani rnii xtidx Dios, biädra reben̄ lajdxpacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

Che gujt Juan Bautist

(Mr. 6:14-29; Lc. 9:7-9)

14 Lagajc nen̄ redxejga Herodes, ni laaza tetrarca, biejn̄ diajgni diidx xcuent ni cayujn Jesús. ² Dxejcti räj̄pni lo rexmosni:

—Dee najc Juan Bautist. Pet agubansa'cni lo rebengut, ni'cni rajpni yäl̄rnibee te rujnni remilagwr.

³ Si'c gunii Herodes sa'csi laani basäuni Juan nen̄ latzguiib. Niluxh gunibeeni biliibni con caden̄ nen̄ latzguiib xcuent Herodías, ni gujc chääl bejtzni Felipe. ⁴ Bidxe'cni sa'csi räj̄p Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguii ni rnii xtidx Dios. ⁶ Dxejcti che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, ⁷ räj̄pni loj gunaaga:

—Gunab xhitis ni rlaizlu, sa'csi gudix lazä gunidxä ni guiniabtislu.

⁸ Dxejcti gunaaga, abalijdx xnannini, räj̄pni lo Herodes:

—Loj te platón̄ baniidx bitiuwejc Juan Bautist.

⁹Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰Dxejcti gunibeeni biru' yejc Juan Bautist neñ latzguuib. ¹¹Sas biädnäreni yejcn lo te platón, badeedrenini loj gunaaga. Dxejcti gunaaga badeednini lo xnanni.

¹²Dxejcti bidzujn rexpejn Juan sanäreni togoolga te huicua'tzrenini. Dxejcti huiasa'nreni diidx loj Jesús.

Bayaan Jesús gaii miñ bejn

(Mr. 6:30-44; Lc. 9:10-17; Jn. 6:1-14)

¹³Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni. ¹⁴Che birii Jesús neñ barcw, bahuiini loj xhidalduxh bejn, dxejc balazlajznireni, basiajcn rebejn nani racxhuu. ¹⁵Cheni acayu' guxhijn, gubig rexpejn pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gauren.

¹⁶Räjp Jesús:

—Xhicuent jiireni. La'tu colgudeed xhi gauren.

¹⁷Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjl rajpnu.

¹⁸Laani räjpni:

—Coltanäni ree.

¹⁹Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjl, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisrenini loj reben xhidajl. ²⁰Guiraareni gudajw, gudxaj xque'reni. Dxejcti batie'reni yätxtilbiujy

nani bia'n. Si'cti tzubitio'p dxijm gudxajni. ²¹Renani gudajw najczeni si'cti gaii miñ niguii, xhet näjdi regunaa niclaza rebuux bigab.

Gusaj Jesús lo nisdoo

(Mr. 6:45-52; Jn. 6:16-21)

²²Sas gunibee Jesús biu' rexpejn pacni neñ barcw te ganidreni tedreni stee lad nis lañi casadiidxni rebejn. ²³Che gulux basadiidxni rebejn, huä'p Jesús yec-dajn te xtebni guninäjni Dios Xtadni. Che gojl guxhijn, ro'c sugaxteb Jesús. ²⁴Luxh barcw galäi lo nis sasaj. Cagusnibduxh reol barcw, liriääzni lo nis sa'csi cabi' beduxh cadre sääreni. ²⁵Rsil-dooru gubig Jesús, bidzujn lojreni, siädsajni lo nisdoo. ²⁶Che bahuii rexpejn pacni siädsajni lo nisdoo, bidxejbreni, räjpreni:

—Colhuii te fantasmni —guredxa'reni sa'csi bidxebduxh'reni.

²⁷Dxejc gunii Jesús lojreni, räjpni:

—Na'c guidxejbtu, laa naräni; colsu-tijp lastootu.

²⁸Dxejcti gunii Pedr lojni, räjpni:

—Dad, palga lujni, gunibee jäälä lojlu nez lo nisre.

²⁹Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús. ³⁰Che bahuii Pedr beduxh ni cabi', bidxejbni, dxejc gusloj cayääzni neñ nisdoo. Guredxa'ni, räjpni:

—Dad, jgulää narä!

³¹Lagajc dxejc gunaaz Jesús naani, räjpni loj Pedr:

—Guxii rajplu yärlililajz. ¿Xhicuent guctio'p lajzlu?

³²Che huä'preni neñ barcw, guläz-gajc bej. ³³Dxejcti renani sää neñ barcw bazuxhijbreni nez loj Jesús räjpreni:

—Guliipacni najclu Xi'n Dios.

Basiajc Jesús reben racxhuu guedx Genesare't

(Mr. 6:53-56)

³⁴Che gudejdreni lo nis, bidzujñreni nez lo reyuj xten Genesare't. ³⁵Che biembeeb reben ro'cni, batie'chreni diidx guideb gabi lajdxreni. Dxejcti biädñäreni guiraa reben racxhuu lojni. ³⁶Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, białjreni.

Nani ruxhiñ bejn

(Mr. 7:1-23)

15 Dxejcti gubig gaii rebejn nani ru-luii leii näjza rebejn guidoo ni laa farisee. Siäädreni guedx Jerusalén, räjpreni loj Jesús:

²—¿Xhicuent di rexpejnpaclu jiu xcostrumbr rebengool? ¿Xhicuent direni gusoob yälrdiib ñaareni che rajwreni?

³Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu.

⁴Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” ⁵Luxh la'tu rniitu sajc gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.” ⁶Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu. ⁷Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

⁸Rebenguejdxre con ro'reni rliä'preni xpala'nä niluxh lastooreni zijt suga' nez loä.

⁹Xlia'si rajñreni narä, sa'csi ruluiireni si'c xtidxä reyälñribee xten reben guedxliuj.

¹⁰Dxejcti gurejdxni rebejn, räjpni lojreni:

—Colcuadiajg, colyacbee. ¹¹Nani riu' ro' bejn di guxhiñ bejnğa, sanga nani rii ro' bejnğa ni'cni ruxhiñ bejnğa.

¹²Dxejcti rexpejnpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³Dxejc laani räjpni:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani. ¹⁴Colgusaanreni; lotiä'preni, ruluiireni nezyuj lo salotiä'preni. Luxh palga te ben lotiä'p guluii canejz chää stee lotiä'p, guiro'preni sitejbreni nen te gueed.

¹⁵Räjp Pedr loj Jesús:

—Basule' cuentre loonu.

¹⁶Räjp Jesús:

—¿La näjza la'tu ditu gacbee, ä?

¹⁷¿La ditu gacbee guiraa ni rajw bejn ru' xque'ni, dxejcti che rdejdnı xque'ni, abigo'ñni? ¹⁸Niluxh diidx nani rii ro' bejn, nen lastoo bejn riini; dee ni ruxhiñ bejn. ¹⁹Sa'csi nen lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chääł sa'ni; xten rebejn ni rbajn; xten rebejn ni rnii didxxhii lo sa'ni; xtenza rebejn ni rutijł sa'ni. ²⁰Laa sa' recosre ni ruxhiñ bejn. Che dini gusoob recostumbr xte yälrdiib ñaani, di ni'c guxhiñ bejn.

Te gunazit nani huililajz xtidx Jesús

(Mr. 7:24-30)

²¹Biriiti Jesús ro'c, sääni nez región xten Tiro näjza Sidón. ²²Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej bendxab lastooni, niluxh cagusacsıduxhni.

²³Xhet räjpdi Jesús lojni. Dxejcti biädñabduxh rexpejnpacni lojni, räjpreni:

—Barilaagw gunaare, didi rbedxa'ni siädnajl_{ni} luj.

²⁴ Dxejcti räjp Jesús lojni:

—Dios baxhal narä lojtis xpen Israel nani agunijt nen dojl.

²⁵ Dxejcti gubig gunaaga, bazuxhibjni nez loj Jesús, räjpni:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejn xcuxtiil rexi'nni gusa'nini lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸ Dxejcti räjp Jesús lojni:

—Nane', lacti guroob najc xcälirililajzlu. Sugac si'cni rlanjzu.

Lagajc dxejc biajc xindxa'pni.

Basiajc Jesús xhidal bejn racxhuu

²⁹ Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni. ³⁰ Xhidajl bejn bidzujn cad sobga'ni. Siädnäreni reben ni rajc ni'ni, reben ni najc lotiä'p, reben gop, reben ni xheti naani, näjza xhidalro bejn racxhuu, bidzunäjrenini nez loj Jesús. Dxejcti basiajcnireni. ³¹ Ni'cni lacti bidxeloduxh reben xhidajlga che bahuiireni nii regop, rijc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpen Israel.

Badeed Jesús xhi gudajw tajp mił bejn

(Mr. 8:1-10)

³² Gurejdx Jesús rexpejn_{pacni} räjpni lojreni:

—Riaä rebejnre sa'csi agujc chon dxej yunäjreni narä luxh xhet ca'direni gau-reni. Di rlazä guxhaläreni jiireni roli-jzreni palga gajdreni gau didi guidxaj-jreni lo nezyuj.

³³ Dxejcti räjp rexpejn_{pacni} lojni:

—¿Xho guidxälnu xhi gau reben xhidajlre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdzitisi, näjza gaii bälbäze'.

³⁵ Sas gunibee Jesús cue rebejn lo yuj.

³⁶ Dxejc cua' Jesús guigajdz yätxtiilga näjza rebäjł, badeedni xquixtios lo Dios dxejc gula'ni reyätxtiilga näjza rebäjłga badeednireni loj rexpejn_{pacni}. Dxejcti laareni gudisreni yätxtiilga con rebäjłga lo rebejn xhidajlga. ³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni. ³⁸ Renani gudajwga najc si'cti tajp mił bejn, niluxh xhet näjdi regunaa niclaza rebiuux bigab. ³⁹ Dxejcti basadiidx Jesús rebejn, biu'tini nen barcw te gudejdni lo nisdoo nez región xten Magdala.

Reben guidoo ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

16 Refarisee näjza resaducee bidzujreni lo Jesús, gunabreni gunni te milagwr, gudeedni te seen ni rien xhaguibaali. Niluxh caguguesireni, sa'csi rlanjreni guiga' Jesús. ² Dxejc badzu' Jesús diidxre räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.”

³ Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseen ni rien xhaguibaa, luxh ditu gumbee xhi säloj reseen xcuent redxejre, nalajznu recos ni cayajc. ⁴ Reben guijdxre, reben gualajz rniab te senro, te milagwr, luxh dirureni fii stee milagwr; suhuiitireni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr. 8:14-21)

⁵ Che gudejd rexpejnpackni stelaad nis-
doo biäl-lajzreni ninäreni yätxtiil. ⁶ Dxe-
jcti räjp Jesús lojreni:

—Bacuadiajg, colnati levaduur xten
refarisee näjza resaducee.

⁷ Dxejcti bejnreni xhigab nen las-
tooreni: “Si’c caniini sa’csi dinu niopnä
yätxtiil.” ⁸ Luxh gucbee Jesús xhigabga,
dxejc räjpni lojreni:

—¿Xhicuent rujntu xhigab xhet yätx-
tiildi ca’tu, ä? ¿Huinduxh najc xcälirilila-
jztu! ⁹ ¿La gajdtu gacbee? ¿La diza lajztu
guinaj che gudisä gaii yätxtiil gudajw
gaii miļ bejn, ä? ¿Bal dxijmni batie’tu, ä?
¹⁰ ¿La diza lajztu guizaj che gudisä gajdz
yätxtiil gudajw tap miļ bejn, ä? ¿Bal dxi-
jmni batie’tu? ¹¹ ¿Xhicuent ditu gacbee
et yätxtiildi cagusä’tä cheni caniä lo-
jtu colnati levaduur xten refarisee näjza
resaducee?

¹² Dxejcru gucbeereni dini niäjp: “Col-
nati levaduur xten yätxtiil.” Laani cani-
ini: “Colnaāti yälrlului xten refarisee
näjza resaducee.”

Bicäjp Pedr Jesús najc Cristpac

(Mr. 8:27-30; Lc. 9:18-21)

¹³ Che bidzujn Jesús región xten Ce-
sarea xten guedx Filipo, gunabdiidx
Jesús loj rexpejnpackni, räjpni:

—¿Chu naj rebejn nacä narä Xi’n Dios
ni gujc Niguui?

¹⁴ Laareni räjpreni:

—Yu’reeni naj luj najclu Juan Bautist;
yu’zarenii nrii luj najclu Elías, peta sgai-
ireni nrii luj najclu Jeremías o stee niguii
ni nrii xtidx Dios.

¹⁵ Dxejcti räjpni lojreni:

—La’tu, ¿chuni’c rniitu nacä?

¹⁶ Dxejc räjp Simón Pedr:

—Luj najclu Crist, Xi’n Dios nani
nabajn.

¹⁷ Badzu’ Jesús diidxre, räjpni:

—Chicbaalu, Simón Pedr, xi’n Jonás,
sa’csi xhet bejndi baluui dee lojlu,
Xtadätis ni yu’ xhaguibaa baluuiini lo-
jlu. ¹⁸ Narä rniä lojlu, luj najclu Pedr,
nani säloj: “Te guij.” Sa’csi sibäx-
tiejlu guidxagsa’za renani rililajz xtidxä,
niluxh che guetreni, direni nitloj. ¹⁹ Narä
gunidxä yälrmibee lojlu te gulijdxlu re-
bejn nani ahuiliilajz xtidxä. Xhitis ni
gusaanlu gunreni, o xhitis ni dilu gusaan
gunreni, susoob Dios xtiidxlu.

²⁰ Dxejcti gunibee Jesús rutlojdi gäb
rexpejnpackni laani najc Guejb Crist.

Gunii Jesús xho guetni

(Mr. 8:31-9:1; Lc. 9:22-27)

²¹ Lagajc dxejc gusloj cagusule’ Jesús
diidx lo rexpejnpackni, guniini lojreni
xho nanabpac chääni guedx Jerusalén
te ro’c tedni trabajwduxh ladznaa re-
bengool xten guidoo, ladznaa rebixhojz,
näjza rebejn ni najn xleii Moisés. Guni-
izani sugutrenini, niluxh ni riojn dxej
sibansacni lo rebengut.

²² Dxejcti huinä Pedr Jesús te laad,
gusloj cadilnäjnni, räjpni:

—¿Gacnäj Dioslu, Dad! ¿Gurniälojlu
gaclu si’c!

²³ Dxejc gubiré Jesús, räjpni lo Pedr:

—¿Gubicaj loä bendxab! Na’c
rusiejytislu loä. Luj dilu gun xhigab xten
Dios, alga xhigab xten rebenguedxliuj
rujnlu.

²⁴ Dxejcti räjp Jesús loj rexpejnpackni:

—Palga yu’ chu tejtü rlanj guirinajl
narä, sucuälazni lagajc laani, suguuni
xcrujzni, nalajznu tedni trabajw, sujiäd-
najlni narä. ²⁵ Sa’csi nani rlanj gunni
gaan xcäl’nabajnni, sunijtnini. Luxh nani
runijt xcäl’nabajnni por narä, sidxälni
xcäl’nabajnni par tejpas. ²⁶ Sa’csi ¿xhi
gaan gun te bejn palga ga’pni guideb
guedxliuj, luxh nit xaimni lo Dios, ä? o
¿la yu’ xhi gudeed bejn te siini xaimni?

²⁷ Sa’csi narä Xi’n Dios ni gujc Niguui
siälä lo yälrdimbicha’ xten Xtadä con

rexanglni, dxejcti siguixä tebgaj bejn si'ctis ni gujc xtzuumni. ²⁸Rniliápac lojtu, loj reni tre' ree naj, yu'reni di guet dxejli ni fixgaareni jialä narä Xi'n Dios ni gujc Niguui lo xcälrnibeä.

Chuni'c najc guroob

(Mr. 9:2-13; Lc. 9:28-36)

17 Che gudeed xho'p dxej, huiinä Jesús Pedr, Jacobob, con Juan betz Jacobob, xtebreni huijreni jiaa yejc te dajn. ²Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl. ³Dxejc bahuigajcreni loj Moisés najza loj Elías, cayujyreni diidx con Jesús. ⁴Dxejcti räjp Pedr loj Jesús:

—Dad, ¡huenduxh suga'nu ree! Palga rlajzlu, sajc jiennu chon yuguijxh, tejni gac xten guejblu, steeni gac xten Moisés, steeni gac xten Elías.

⁵Lałni canii Pedr, biäjt te za ni rdimbicha' guideb gabireni; neñ zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶Che biejn diajg rexpejnpac Jesús diidxga, bazuxhijbreni, basajbreni lojreni lo yuj, bidxebduxhrene. ⁷Dxejcti gubig Jesús lojreni, batzuubni naani yejcreni, räjpni:

—Colchasulii, na'c rdxejbtu.

⁸Che guläs lojreni, lojtis Jesús bahuiireni, rutru suganäjdini.

⁹Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibañsacä narä Xi'n Dios ni gujc Niguui lo rebengut.

¹⁰Dxejcti gunabdiidx rexpejnpacni lojni:

—¿Xhicuent rnii rebejn ni najn xleii Moisés ganid Elías nanab jiaäd, ä?

¹¹Badzu' Jesús diidxre, räjpni:

—Guliini siädxgaa Elías, laani gunsa'cni guira'ti, ¹²niluxh narä

rniä lojtu, abiääd Elías, di rebejn nienbeeni, luxh bennäjrenini si'ctis ni rlajzreni, basacsíduxhreneini. Sigajcza gunnäjreni narä Xi'n Dios ni gujc Niguui, susacsíduxhrene narä.

¹³Dxejcti gucbee rexpejnpacni caniini xcuent Juan Bautist.

Jesús basiajc te biuux ni guyu' xpej bendxab

(Mr. 9:14-29; Lc. 9:37-43)

¹⁴Cheni bidzujnreni cadro tre' xhidajl bejn, gubig te bejn lojni bazuxhijbni, dxejc räjpni:

¹⁵—Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguijdxgani, yu' huält rtejbni lo guiboo yu' huält rtejbni lo nis. ¹⁶Biäd-nääni loj rexpejnpaclu, luxh di niajcdi nusiajcrenini.

¹⁷Jesús badzu' diidxre lojreni räjpni:

—Benguijdx, bejn ni di chalilajz, ¿guccli yu'ä lojtu? ¿Cati gac gunä huant la'tu? ¿Coltanä biuuxga ree!

¹⁸Dxejcti gudilnäj Jesús bendxab ni yu' lastoo biuuxga, gunibeeni biriini, la-gajc dxejc biajc biuuxga.

¹⁹Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di niajcdi nibäänu bendxab neñ lastoo biuuxga?

²⁰Jesús räjp lojreni:

—Sa'csi la'tu guxiduxh rililajztu. Rniliá lojtu, paru najc yärlililajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpacktu, xhetliidi yu' ni di gacdi guntu. ²¹Niluxh sa' bendxabre, dini guirii palga ditu guini-abduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²²Lałni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladzṇaa rebendojḷ te gusacsṛeni narä. ²³ Niluxh sugu'treni narä, dxejc ni riojn dxej sibansacä lo rebengut.

Che biejn diajgreni diidxga, guc-huinduxh lajzreni.

Gudijxni impuest xten guidoo

²⁴ Che bidzujṇ Jesús näjza rexejṇpacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr nen yu', ganid Jesús gu-nii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuest, recuyo't? ¿Reben lajdxreni o rebenzajt?

²⁶ Badzu' Pedr diidxre räjpni:

—Rebenzajt.

Räjp Jesús:

—Ni'cni di rexi'nreni quiixni. ²⁷ Luxh te di guidxe'chreni, huij ro' nisdoo, bacuaa ansuel, gulää bājḷ ni guiniazx-gaalu. Ro' bājḷga sidxällu te melpla't ni sajl te chatijxlu impuest xcuentä näjza xcuentlu.

¿Chuni'c sajrcu lajdx Dios xhaguibaa?

(Mr. 9:33-37; Lc. 9:46-48)

18 Laa dxejcnī gubig rexejṇpac Jesús lojni te gunabdiidxreni:

—¿Chuni'c sajrcu lajdx Dios xhaguibaa?

² Dxejcti gurejdx Jesús te biuxbāz, bazujnini nez galäiireni, ³ dxejc räjpni:

—Rniliāpac lojtu, palga ditu gusiech-lajztu, palga ditu gac nadolajz si'c te bi-uxbāz, ditu jiu' lajdx Dios xhaguibaa.

⁴ Ni'cni chutis bejn nani gac nadolajz si'c biuxe're, laani gac ni sajrcu lajdx Dios

xhaguibaa. ⁵ Chutis ni riu te sa' biuxe're, sa'csi rinälajzni narä, lagajc narä riuni.

Riezgw jiajbni nen dojl

(Mr. 9:42-48; Lc. 17:1-2)

⁶ Räjzpāni:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnī, chatejbni loj nisdoo, palga gunni jiajb tej reni'c lo dojl. ⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ Palga ni'lu o ṇaalu gun jiajbḷu lo dojl, batiu'ni. Hueenru jiu'lu lo xcälṇ-abajṇ Dios nitiujṇglu o natiujṇglu lacuaa jiilu con guiro'p ni'lu o guiro'p ṇaalu lo balduxh ni rejc par tejpas. ⁹ Palga te balojlu rujn riajbḷu lo dojl, gulääni. Hueenru jiu'lu lo xcälṇribee Dios najclu lotiä'p lacuaa chu guiro'p baloj chazälreni luj lo balduxh ni rejc par tejpas.

Xcuent xiil ni gunijt

(Lc. 15:3-7)

¹⁰ Räjzpa Jesús lojreni:

—Colnatiro, andi cuälaztu rebejn ni najc si'c biuxbāzre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. ¹¹ Sa'csi Xi'n Dios ni gujc Niguii biääd te guslaani rebejn nani agunijt nen dojl.

¹² Räjzpāni:

—¿Xho rhuiitu? Palga rajp te bejn te gayuu xiil, dxejc nit tejni, ḷlaa dini gusaan stabitzubigaaga ni yu' nen gu-rajl te chatiilni xile' ni gunijt, ä? ¹³ Luxh palga guidxälṇi xile'ga, rniliä lojtu, sibal-azduxhruni xcuent xile'ga luxh guxi-iru guibanāj lajzni xcuent rexiil nani di ninijt. ¹⁴ Sigajcza Xdadnu ni yu' xh-

aguibaa di rlanj nit lo Dios nicla tej reni ahuililajz xtiidxni, ni najc si'c biuxbázre.

Xho gunnäjlju bejtzlu

(Lc. 17:3)

¹⁵ Räjzpni:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejni lojlu. Palga saru gucuadiajgni xtiidxlu, abiäjl lajztu. ¹⁶ Palga naaddini gucuadiajgni, dini jiu xtiidxlu, dxejc huiinä stee o stio'p bejn chaninäjluni, te guiraa ni guiniitu jiejn diajg rebejnğa, te arajplu tio'p o choñ testiigw. ¹⁷ Palga di bejtzlu gucuadiajg xtidx rebejnğa, luxh dizani jiu xtiidxreni, neñ guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojlu si'c te benguijdx ni di gumbee xtidx Dios o si'c rebejn nani rusquijx loj rebejn nani ruto'.

¹⁸ 'Ni'cni rniliápac lojtu, guiraa yälguxhtis xten bejn ni di gusiechljaz xtojlrēni ni guntu lo guedxliuj, si'c jia'nni xhaguibaa; guiraa redojl nani gusiäjl lajztu lo guedxliuj sa'csi basiechljaz beñdojlğa, si'cza jia'nni xhaguibaa.

¹⁹ 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni. ²⁰ Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäii rebejnğa.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjl lazä? ¿La sajl gajdzli huält, ä?

²² Badzu' Jesús diidxre lojni räjpni:

—Dina guiniä gajdztis huält, rniä gayonbidzuu huält, nalajznu si'ctiza huält basiäjl lajzlu.

Xcuent tio'p bejn ni nazääb meel

²³ 'Xcälrnibee Dios xhaguibaa najc si'c te rei ni rlanj gunni cuent lac nazääb rexmosni lojni. ²⁴ Agusloj cayunni xcuentni chela bidzunnäjreni te mos ni nazääb balti mil lojni. ²⁵ Luxh mosre xhet rajpdini te quiixni rexti'nni, ni'c gunibee rei guido'ni si'c sclav, näjza chäälni, näjza rexi'nni, nägajcza guiralii xhixtenni, te gaxh xti'nni. ²⁶ Dxejcti mosga bazuxhijbni loj xlamni, gunabduxhni lojni, räjpni: “Guläzsijc tiop-choñ dxej, Dad, te gac quixä xti'nä.” ²⁷ Dxejcti lamga balazlajzni xmosni, badzucajni guiraa ni nazääb mosga lojni, baslaanini. ²⁸ Cheni birii mosga rolijx xlamni, bidxaagni stee samosni ni nazääb bale'si beex lojni. Gunaaznini, baxhiya'ni yejnni, dxejc räjpni: “Gudijxga ni nazääblu loä.” ²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.” ³⁰ Luxh steega naaddini, alga huisäugacni samosni neñ latzguiib te bejnni gaan gudijxni guiraa ni nazääbni. ³¹ Cheni bahuii sgaii mos xhini'c bejnni, gucnaduxhlijzreni, huiye'tzreni lo xlamreni xhi huiyejnni. ³² Dxejcti gurejdx xlamreni mosga, räjpni lojni: “¡Mos guiidx! Narä badzucä di'n ni nazääblu loä, sa'csi gunabduxhlu loä.” ³³ Si'cza niunnäjlu sa'lu, nulazlajzluni sigajc ni balazlazälu.” ³⁴ Sas lacti bidxechduxh lamga, gunibeeni biäuuni te gudijxni guiragajc ni nazääbni lo xlamni.

³⁵ Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn ni di gusiällajzpac guiraa redojl ni rujn resa'ni lojni.

Jesús ruluu xcuent yälrufo'n sa'ni

(Mr. 10:1-12; Lc. 16:18)

19 Che gulujx gunii Jesús recuentre, biunejzni Galilee, huijni lo

región xten Judea, stelaad gueu Jordán.
²Xhidajl bejn birinajlni, ro'c basiajnci rebenracxhuu, ³dxejc gubig refarisee lojni, rlanjreni gusguesireni Jesús ni'c rājpreni lojni:

—¿La sajc guro'n te niguii chäälni che rlanjtisni, ä?

⁴Badzu' Jesús diidxre lojreni, rājpreni:

—¿La gajdtu goļ lo reguijtz nani bacuaa toMoisés cadro caj xho benchee Dios bejn galooli: “Niguii nājza gunaa benchenireni?” ⁵Guniiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najczeni.” ⁶Ni'cni dirureni gac tio'p, anajczeni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷Dxejcti gunabdiidxreni lojni, rājpreni:

—¿Xhicuent gunibee Moisés gudeed niguii te guijtz lo chäälni te si'c gac guro'nni gunaaga, ä?

⁸Rājpre Jesús lojreni:

—Sa'csi najc lastootu si'c te guij, ni'c basaan toMoisés baro'n niguii chäälni, niluxh galodoo et si'cti gujnci. ⁹Luxh rniä lojtu, niguii nani gusaan chäälni, luxh xhet dojlđi bennāj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälnini, rujnza niguiiga dojl.

¹⁰Dxejc rājpre rexpejnpacni lojni:

—Palga si'c najc xcuent niguii con chäälni, hueenru na'c guchnaani.

¹¹Jesús rājpre lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee. ¹²Yu' xhicuent digacdi guchnaa niguii: yu'reni digacdi guchnaa sa'csi si'c gojlreni; yu'reni digacdi guchnaa sa'csi baxhiñ sabejpreni; yu'zarenigacdi guchnaareni sa'csi rlanjreni gunreni xtzuuntis Dios. Nani rajc racbeeni rediidxre, sugacbeenireni.

Biädnäreni rebuux loj Jesús

(Mr. 10:13-16; Lc. 18:15-17)

¹³Dxejcti biädnäreni rebuuxe' loj Jesús te gudzuubni naani yejcreni, guiniabni lo Dios xcuentreni. Luxh rexpejnpacni gudilñaj rebejn ni siädnä rebuuxe'ga.

¹⁴Dxejc rājpre Jesús lojreni:

—Colgusaan guibig rebuuxe' loä, na'c gudxojturenig, sa'csi xcälñibee Dios xhaguibaa najc xten reni nadolajz si'c najc rebuuxe're.

¹⁵Che gulujx badzuubni naani yejc rebuuxe', biunejzni ro'c.

Te bejn ni rajp gunināj Jesús

(Mr. 10:17-31; Lc. 18:18-30)

¹⁶Dxejc biäd te bi'n lo Jesús, gunabdiidxni lojni; rājpreni:

—Mastr sa'c, ¿xhini'c nanab gunä te xca'ä yälñabajñ lo Dios par tejpas?

¹⁷Dxejc rājpre Jesús lojni:

—¿Xhicuent rniilu maestr sa'c narä? Diostis najc sa'c. Per par rlanjzlu xca'lu yälñabajñ lo Dios, bazoob rextidx Dios ni caj lo xlei Moisés.

¹⁸Dxejcti rājpre bi'nga lojni:

—¿Xhi rediidxga?

Dxejc rājpre Jesús lojni:

—Na'c ju'tlu, na'c guesnäjllo bejn nani di gac chäällu, na'c cuanlu, na'c guiliäslu didxxhii xcuent bejn. ¹⁹Bazoob xtidx xtadlu con xnanlu, huinälajz sa'lu si'cni sanälajzlu lagajc luj.

²⁰Dxejcti rājpre bi'nga lojni:

—Guiraa rediidxre runä che nacáli biuux. ¿Xhiruxni'c riädax gunä?

²¹Dxejc rājpre Jesús lojni:

—Palga rlanjzlu gaclu bensa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaä te jädnajllu narä.

²²Cheni biejn diajg bi'nga rediidxre, guchhuinduxh lajzni sa'csi rajpreni xhidalduxh xhixtenni.

²³ Sas Jesús räjp loj rexpejn̄pacni:

—Rniliápac lojtu, naganduxh jiu' te bejn̄ rajp loj xcäl̄rnibee Dios. ²⁴ Rnisacá lojtu, guyasiru ted te cameii nejn̄ baloj te guux; naganduxhru jiu' te bejn̄ ni rajp lo xcäl̄rnibee Dios.

²⁵ Che biejn̄ diajg rexpejn̄pacni redi-idxre, bidxeloduxhreni, dxejc canabdi-idx loj sa'reni:

—¿Chuni'c sajc jiu' lo xcäl̄rnibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn̄ dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtenu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rniliápac lojtu, la'tu ni biädna-jltu narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadro guinibeä lo guiraa reben̄ guedxliuj, la'tu ni siädna-jltu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn̄ Israel. ²⁹ Luxh guiraa rebejn̄ ni basa'n rolizni o rebejtzni, o rebisiajn̄ni, o xtadni, o xnanni, o chäälni, o xi'nni, o rexhujni, te siädnajlni narä, rebejn̄ga sajp te gayuu huält locni gojpn̄i, nä-gajc ga'preni xcäl̄nabajn̄ Dios par tejpas.

³⁰ Rebejn̄ nani rchalo najcreni bejn̄roru lo sa'reni nez loj Dios, reni'c gac bejn̄ ni guxii sajc nez loj Dios. Rebejn̄ nadolajz ni di guchalo sajcrureni lo sa'reni, reni'c sajcrureni nez loj Dios.

Xcuent reni rujn̄ dzuun

20 Räjpzani:

—Xcäl̄rnibee Dios najc si'c te bejn̄ ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. ² Che bidxäl̄ni gaii mos, bachaagni diidx. Bia'nreni diidx quixn̄reni te denaar tebdx̄ej cade tej remosga. Dxejc

baxhal̄n̄reni loj xyujni sayujn̄reni dzuun. ³ Birisacni, satiilni sgaii mos si'cti rcagaa, rsil. Bidxaagni sgaii bejn̄ ni xhet cayujndi, suga'sireni nez lo guii. ⁴ Räjpni lojreni: “Näjsa la'tu colchayujn̄ dzuun lo xyuä. Narä siguixä si'cni riäl̄j xca'tu.” Sä'ti rebejn̄ga lo dzuun. ⁵ Birisacni dade' si'cti läiidx̄ej, birisaczani si'cti rcachon̄ gudx̄ej. Bidxaagni sgaii bejn̄, sigajcza räjpni loj rebejn̄ga. ⁶ Dxejc si'cti rcagaii birisacni, huijni lo guii. Ro'c bidxäl̄ni sgaii bejn̄ ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?” ⁷ Dxejc räjpreni lojni: “Sa'csi rut siädtildinu te choyennu dzuun.” Dxejcti räjpni lojreni: “Näjsa la'tu colchayejn̄ dzuun lo xyuä. Narä siguixsa'cätu.” ⁸ Che biu' guxhijn̄, räjp lam̄ lo mos ni rnibee remos: “Gurejdx remos te quixlureni. Gudix-xгаа reni biu' gudx̄ejru lo dzuun. Lult gudijx reni biu' ganid lo dzuun.” ⁹ Dxejc ganid biu' remos ni agudx̄ej biu'reni lo dzuun. Cade tejreni cua' te denaar, si'cni rca' ni rujn̄ dzuun guideb dxej. ¹⁰ Cheni biu' reni biu' lo dzuun rsildoo, bejn̄reni xhigab sica'uren̄i meel, per sigajcza laareni cua'reni te denaar cade tejreni. ¹¹ Che cua'reni xcuentreni gusloj cadx̄e'chreni lo baxhuaan xten dzuunga. ¹² Räjpreni: “Redee ni biu' lult lo dzuun pet teb ortis bejn̄reni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl̄nanlaa.” ¹³ Dxejc räjp lam̄ga lo tejreni: “Xamigwä, xhet cosguijdx̄di cayunä lojlu. ¿La xhet bia'ndinu diidx te denaar quixälu tebdx̄ej? ¹⁴ Huij, cua' xmeellu. Narä rlazä quixä bejn̄re ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmelä? ¿O rdx̄echlajzlu loä sa'csi nacä hueen, ä?” ¹⁶ Ni'cni reni biäd lult sajcreni tebloj

con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷Che sasaj Jesús lo nezyuj sääni Jerusalén, huináni rexpejn pacni te laad te räjpni lojreni:

¹⁸—La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguui, siabä ladznaa reni rnibee lo rebixhojz, näjza lo rebejn ni najn lei. Laareni sinibeereni guetä. ¹⁹Suteedreni narä ladznaa rebenzijt te cubeereni narä quinreni narä, dxejc gucuaareni narä lo crujz. Luxh ni riojn dxej, sibansacä loj rebengut.

Ni gunab xnan Jacobo näjza Juan

(Mr. 10:35-45)

²⁰Dxejcti gubig xnan Jacobo näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús. ²¹Gunabdiidx Jesús lojni:

—¿Xhini'c rlanjzlu?

Räjp gunaaga lojni:

—Che jiu'lu lo xcälrnibeelu, gunibelaa cue tej rexi'nä xladbeelu, steeni cue xladbäjgwlu.

²²Dxejc räjp Jesús:

—¡Ditu gan xhini'c rniabtu! ¿La sajc tedtu yärsacsí sa'ni tedä? ¿La sajc tedtu trabajwduxh sa'ni nanab tedä?

Dxejc räjpreni:

—Sajc tednuni.

²³Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yärsacsí. Et narädi cueä reni cue xladbägwä o xladbeä. Xtaä ni yu' xhaguibaa alaguleni rebejnga.

²⁴Che biejn diajg stzuu rexpejn pac Jesús, bidxe'chreni loj guiro'p rexi'n nane'ga. ²⁵Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebe-

jnga si'c xlamreni. Luxh reni najc rebenro lojreni runnäjreni rebejnga si'ctis ni rlanjzreni. ²⁶Et si'cni gunditu la'tu loj rebejn. Chutis rlanjz gac benro lojtu, nanab gunni dzuun gacnäjni guiraliitu si'c te mos. ²⁷Luxh chutis tejtü ni rlanjz guiliä'p xpala'nni, nanab gacni si'c xmos lo guiraliitu. ²⁸Sigajcza biääd Xi'n Dios ni gujc Niguui. Dini niniab mos chu lojni, alga laani najc xmos bejn, badeedzani lagajc yäl nabajñ xtenni te gudijxni baslaani xhidal bejn ni yu' lo dojl.

Jesús rusiajc tio'p lotiä'p

(Mr. 10:46-52; Lc. 18:35-43)

²⁹Che gojl guiriireni guedx Jericó, xhidalduxh bejn sanajlni. ³⁰Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹Gudiñäj rebejnreni, te gusaureni ro'reni. Luxh laareni dipru guredxa'reni: —¡Dad, Xi'n toDavid, balazlajz nuurnu!

³²Dxejc guzudxi Jesús, gurejdxni reni di fii, räjpni lojreni:

—¿Xhini'c rlanjztu gunä?

³³Räjpreni lojni:

—Dad, rlaaznu guixal balojnu te gac finu.

³⁴Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

Biu' Jesús guedx Jerusalén

(Mr. 11:1-11; Lc. 19:28-40;

Jn. 12:12-19)

21 Cheni Siäddzungajxhreni guedx Jerusalén, bidzujñreni te guedxbäz ni laa Betfagé, cuä' dajn ni laa Oliib. Baxhañ Jesús tio'p xpejn pacni, ²räjpni lojreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu

näjza teburhuin. Colguxhecni, coltanäni loä. ³Palga yu' chu naa: “¿Xhini'c ru-jntu?”, colye'tz lojni: “Dad caquiinnini terate'. Suxhalgajcni.”

⁴Luxh guiraa dee gujç te guzobj didix ni gunii dade' nani bacuaa xtidx Dios agujç xchero, che räjpni:

⁵Colye'tz loj reni rbäjz guedx Siön, bahuii xreiilu siääd lojlu, nadolajzni bijbni te burbäz, te burbäz, xi'n man ni rujn dzuun, ni ruu cargw.

⁶Dxejcti huij rexpejnpacni, bejnreni si'c gunibee Jesús gunreni. ⁷Biädnäreni burga näjza burbäz xi'nni. Gudixhreni xhajbreni detz burbäzga, dxejç gubijb Jesús burbäzga. ⁸Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhreni rebalajg lo nez yuj cadro ted Jesús. ⁹Rebejn ni nijd, näjza reni siääd dejtzni gusloj cabedxa'reni, räjpreni:

—¡Xchej guibajn Xi'n toDavid!
¡Chicbaa ni siääd xcuent Gueb Dios!
Rliä'pnu xpala'n Guejblu Dios.

¹⁰Cheni biu' Jesús nejn guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹Yu'zaren i räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19;

Lc. 19:45-48; Jn. 2:13-22)

¹²Dxejç biu' Jesús nejn guidoro xten Dios, guläani guiraa rebejn ni caguto' näjza rebejn ni casii. Barexhätni remex xten reni ruchaa meel xten rebejn, näjza reyagxhil xten reni ruto' repalom. ¹³Dxejç räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbajdx,

yälrniab loj Dios.” Niluxh la'tu abejntuni xpiliäa gubaan.

¹⁴Lagajc nejn guidooga, gubig loj Jesús gaii bejn ni di fii näjza gaii bejn ni rsi-acoj, luxh basiajcnireni. ¹⁵Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajreni xho cabedxa' rebixue' caniireni: “Rliä'pnu xpala'nlu Xi'n torei David”, bidxe'ch rebixhojzga. ¹⁶Dxejç räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goł lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu goł rebixue näjza rebäznite' dij ni rliäpsa'cpac xpala'n Dios.

¹⁷Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdn yääl.

Te yag iigw ni gubijdz

(Mr. 11:12-14, 20-26)

¹⁸Cheni bara yääl, rsilru gubisac Jesús guedx Jerusalén. Lał ni sääni, gusloj calaanni. ¹⁹Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejç räjp Jesús lo yajg iigwga:

—¡Nuncru xcaj nicla tej ninejxh lojlu!

Dxejcti gubidzgajç yajgga. ²⁰Cheni bahuii rexpejnpacni, bidxeloduxhreni, gunabdiidxreni loj Jesús:

—¿Xhi cuent gubidzgajç yajgga?

²¹Räjp Jesús lojreni:

—Rniliäpac lojtu, palga chalilajzfactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. ²²Guiraa ni guiniabtu loj Dios, palga chalilajzfactu, suniidxnini.

Xcäl̄rnibee Jesús

(Mr. 11:27-33; Lc. 20:1-8)

²³ Dxejcti biu' Jesús neṅ guidoro, dxejc laḷ ni caguluiini rebejṅ gubig reni rnibee loj rebixhojz nájza rebengool, gunabdiidxreni lojni:

—¿Xhi yäl̄rnibee rajplu ni'cni rajc rujnlu recosre? ¿Chuni'c baniidx yäl̄rnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yäl̄gunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yäl̄rnibee te runä recosre. ²⁵ ¿Chuni'c gunibee gutiobnis Juan ni rutiobnis? ¿La Dios o la beṅ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? ²⁶ Palga jie'tznu bejṅ guedxliuj gunibeeni, dxejc sixa't rebejṅ yejenu sa'csi guiraareni rililajzreni Juan najc te Dade' ni gunii xtidx Dios. ²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yäl̄rnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.” ²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujjni xtzun xtadni. ³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. ³¹ Loj guiro'preni, ¿chuni'c bejṅ si'cni rlazxtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliápac lojtu, reni ruquijx guiraloj, nájza regunabdxab ganidreni jiu'reni lojtu loj xcäl̄rnibee Dios, ³² sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, nájza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³ ¡Col̄cuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcní te tanc te chuchee nisubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejṅ ni rujn dzuun, sä'tini te bñaj zijtro. ³⁴ Che agojl guire' cose'ch baxhaḷ baxhuaanga gaii xmosni loj xyujni te chaxiireni cose'ch ni riäjł xca' baxhuaanga. ³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶ Dxejc baxhaḷsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ Dxejcti bejṅ baxhuaanga xhigab: “Maazru huen guxhaḷä xi'nä; sucuadiajgrureni xtiidxni.” ³⁸ Cheni bahuiireni lo xi'n baxhuaan xten yujga, bejṅreni xhigab: “Deeni jiannäj yujre; do'oo guigu'tnuni te jiannäanu yujre.” ³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiääd baxhuaan xten yujga, ¿xhi gunnäjni rebejṅ nani biannäj xyujni?

⁴¹ Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca

bejn nani gudeed cose'ch ni riäjł xca'ni che gaļ guire' cose'chga.

⁴²Dxejcti räjł Jesús lojreni:

—ŁLa gajdtu goļ lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijsa gudixhnini squiin yu',

sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

⁴³'Ni'cni rniä lojtu, sibicaj xcälrnibee Dios lojtu, sidejđni loj rebejn nani gudeed ni riäjł xca' xcälrnibee Dios, nalajznu renani chalilajzpac xtiidxni. ⁴⁴Luxh xcuent guijsa: nani jiajb lo guijsa, silia'ni, per nani guitejb guijsa yejcnı, li siujyni, gacni däj.

⁴⁵Che biejn diajg reni rnibee lo rebixhojz näjza refarisee recuent ni canii Jesús, gucbeereni cagusä'tni lagajc laareni. ⁴⁶Rłajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

Xcuent yälřuchnaa

22 Guslosac canii Jesús lojreni con recuent, räjłpni:

²—Xcälrnibee Dios najc si'c te reii ni bejn te sa' te guchnaa xi'nni.

³Baxhalni rexmosni te saxiireni regolnejdx chääreni sa', niluxh rebejnre di rłajzđireni. ⁴Dxejc baxhalřacni rexmosni, räjłpni: “Colye'tz loj reni abidon, agujc comiid. ĩAbagutä balti gonsa'c, gonguro! Anacchee guira'ti yälřajw. Coltaa.” ⁵Niluxh reni abidonga di niu xtiidxreni. Tejñi sahuui rexyujni, steeni säa lo rexnegosni, ⁶dxejcti sgaii reni nıajc biooz gunaazreni rexmos reii, basacsıreni remosga, sas bagu'trenini.

⁷Che biejn diajg reiiga, bidxe'chduxhni, baxhalni rexsoldaadni te sagu'treni guiraa rebenguijdxga, te saze'czareni guejdx cadre rbäjzreni. ⁸Dxejcti räjłpni

loj rexmosni: “Guiraa dee anacchee, di nungäjł jıäädru reni abidon.

⁹Colchäj, pues, lo resquiin lo nezyuj, colcuejdx chutis bejn ni guidxaagtistu.”

¹⁰Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc beñhveen te gudxaj roliz reiiga.

¹¹'Dxejc biu' reii biädhuiini loj rebiooz. Bahuiini loj te bejn ni sobga' ro'c, luxh xhet xhablanijđini najcwni. ¹²Dxejc räjł reii lojni: “Xamigwä, Łxho bejnlu biu'lu ree luxh xhet xhablanijđilu najcwlu?” Dxitis sobga' bejnğa, xhet rniđini. ¹³Dxejc räjł reii loj rexmosni: “Colguliib ni'ni näjza naani, colřälni detzyu' cadre nacäjy te ro'c gonduxhni chubejli reläjyni.” ¹⁴Sa'csi xhidajł najc reni bidon luxh guxii najc reni bibee.

La sajc quixni impuest

(Mr. 12:13-17; Lc. 20:20-26)

¹⁵Dxejcti sii refarisee, bia'nreni diidx siguiilreni xho gunijł Jesús te diidx te guiga'ni. ¹⁶Ni'c baxhalřeni gaii xpejnreni näjza gaii bejn ni nadxaag Herodes te räjłpni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rnii rebejn, sa'csi dilu cue bejn ni sajcro lo stee bejn. ¹⁷Gunii loonu, pues: ŁLa laaca najc quixnu impuest lo César ni rnibee loonu o et laadi?

¹⁸Dxejc gucbee Jesús xhet laadi xhigab cayujñreni neñ lastooreni, dxejc räjłpni lojreni:

—ĩBenguijdx! ŁXhicuent rłajztu guquiltu narä? ¹⁹Colguluii te meel loä.

Dxejc badeedreni te meel ni laa denario. ²⁰Che bahuii Jesús loj meelga, gunabdiidxni lojreni, räjłpni:

—ŁChuni'c caj lo meelre?

²¹Dxejc räjłpni:

—Loj César.

Dxejc räjł Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibansac rebejn

(Mr. 12:18-27; Lc. 20:27-40)

²³ Lagajc dxejga bidzujñ gatii reni laa saducee, reni di chalilajz sibansac bejn loj rebengut. Gubigreni loj Jesús, gunabdiidxreni, ²⁴ räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjł guchnaa bejtzni biuudga te chu xi'nreni xcuent bejtzni. ²⁵ Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chääłni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, näjza gunaaga gujt. ²⁸ Che guibansac rebejnğa lo rebengut, ¿chu tej lo rebejtzga gac chääłpac gunaaga, ni guiraareni bachnaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälñibee Dios. ³⁰ Ni che guibajn rebengut, diru yälruचनाa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. ³¹ Dxejc xcuent yälrbansac loj rebengut, ¿la gajdту goł reguijtz ni bacuaa toMoisés che räjp Dios xcuent retoxtadgoldoonu: ³² “Narä nacä Xtios Abram, Xtios Isaac, näjza Xtios Jacob”, ä? Dios di gac Xtios bengut, Xtioistis rebejn ni nabajn najcni.

³³ Che biejn diajg rebejn xtidx Jesús, bidxeloduxhreni diidx ni ruluini.

Diidx ni maazru sajç

(Mr. 12:28-34)

³⁴ Che gucbee refarisee basäu Jesús ro' resaducee, bidojpreni, bachaagreni diidx. ³⁵ Dxejc tejreni nani najn leii, rla-jzni guquiilni Jesús ni'c gunabdiidxni lojni räjpni:

³⁶ —Mastr, ¿xhi diidx ni gunibee Dios sajçru lojreni çaj lo leii?

³⁷ Räjp Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.” ³⁸ Diidxre ni gunibee Dios najc ni sajçru, luxh ganidni siädni loj rextidx Dios. ³⁹ Ni ro'pga sigajcza najcni: “Huinälajz resa'lu sigajc ni sanälajzlu lagajc luj.” ⁴⁰ Guiro'p remandamientre nanab te guzoob bejn guiraa rediidx ni bacuaa toMoisés näjza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ Lałni tre' refarisee, gunabdiidx Jesús lojreni, räjpni:

⁴² —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

⁴³ Räjp Jesús lojreni:

—¿Xhicuent räjp David “Xtadä” lojni che basanij Sprit Dxañ xten Dios las-tooni? Ni'c bacuaa toDavid rediidxre:

⁴⁴ Dad Dios räjp lo Xtadä, gurej xladbeä lał ni gudzugä guiraa reni rdxe'ch lojlu ladzni'lu.

⁴⁵ Palga lagajc David rnii: “Dad” lojni, ¿xho mood najcni xi'nni?

⁴⁶ Dxejc rut gujedi badzu' nicla te diidx lojni, luxh dxejliga rutru gojpdı xhi diidx niniabdiidxrureni lojni.

**Rucuaquij Jesús refarisee
nájza rebejn nani najn leii**

(Mr. 12:38-40; Lc. 11:37-54; 20:45-47)

23 Dxejc rájp Jesús loj rebejn xhidaalga nájza loj rexpejn pacni: ²—Rebejn ni najn leii nájza refarisee rajp yálnajn te gusule'reni xleii Moisés. ³Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. ⁴Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni. ⁵Guiraa recos ni rujnreni, rujnrenini te fiitis rebejn. Rchagljazreni rcaj lo cuaajsreni nájza roxhajgwreni recaje' cadre yu' tla' guijtz ni caj xtidx Dios lojni. Rustioolzareni xi' xhajbreni. ⁶Rlajzreni ganidreni tedreni lo mex che gal te lanij; rlajzreni cuereni lo rebancw ni suga' delant nen reguidobáz. ⁷Sigajcza rlajzreni guchagro' bejn naareni nez lo guii, guiniza rebejn “Mastr” lojreni.

⁸Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹Na'c guiniitu “Xtadä” loj te ben guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹Ni yu' si'c mos lojtu ni'c najc benroru loj resa'ni. ¹²Sa'csi chutis ni rchaloni najcni benro lo sa'ni, ni'c sustuiyá lojni, chutis ni najc nadolajz loj Dios, ni'c sunäni benro lo sa'ni.

¹³Proobzatu remastr xten leii nájzatu refarisee, najctu benguijdx! Sa'csi rudxoijntu jiu' rebejn loj xcäl'rnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

¹⁴Proobzatu remastr xten leii nájzatu refarisee, najctu benguijdx!

Sa'csi rudzucajtu rolijz renanbiuud lajsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabdudxh fis xten Dios yejctu.

¹⁵Proobzatu remastr xten leii nájzatu refarisee, najctu benguijdx! Zijt rijtu lo reneyuj nájza lo nisdoo te guntu gaan guchaa mase tejtis bejn xmoodni te ganni Dios si'c rajntuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

¹⁶Proobzatu, najctu si'c lotiä'p, rlajztu guluiitu nezyuj! La'tu ni rni palga te bejn guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' nen guidoo, dxejc sii rniliini dxejc nungäjł guzoobni xtiidxni. ¹⁷Ben nayääl, benlotiä'p! ¿Xhini'c sajcru? ¿La oor la guidoro ni rundxan oorga? ¹⁸Rniizatu: “Palga te bejn guiniliipacni guzä'tni lo bacuug ni yu' nen guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäjł gusoobni xtiidxni.” ¹⁹Ben nayääl, ben lotiä'p! ¿Xhini'c sajcru? ¿La gojn o la bacuug nani rundxan gojnga, ä? ²⁰Nani ruzä't lo bacuug che rniliipacni, et ganaxdi lo bacuug ruzä'tni, nájza guiraa ni tre' lo bacuug ruzä'tni. ²¹Ni ruzä't guidoro che rniliipacni, et ganaxdi guidoro ruzä'tni, nájza Dios ni rbäjzza nen guidoro ruzä'tni. ²²Sigajcza ni ruzä't guibaa che rniliipacni caguzä'tzani yagxhilo xten Dios nájza lagajc Dios ni sobga' ro'c.

²³Proobzatu remastr xten leii nájzatu refarisee, najctu benguijdx! Bedzxtiil, anis nájza comin ni rajptu, rudeedu lo Dios tej tantga yejc cade te tzuu, niluxh ditu jiu' ni sajcru lo xtidx Dios, cadre caj xcuent yálnabanya, yälrlulazlajz, nájza yälrlililajz. Deeza ni riäjłpac guntu lał ni cayujnzatu steega.

²⁴ ¡La'tu, lotiä'p ni rla'jz guluii nezyuj! Riutu rediidx ni guxii sajc, niluxh rediidx ni sacduxh ditu jiuni, najctu si'c bejn ni rbää te rex lo xpla'tni dxejrcu räjmni te cameii.

²⁵ ¡Proobzatu remastr xten leii näjzatu referisee, najctu benguijdx! Rusiatu detz bas näjza pla't luxh nenni najc-dxuudx. Sigajcza la'tu riuduxhtu recostumbr, luxh lastootu guidxa yälgubaan näjza yälrdx'echlajz.

²⁶ Farisee ni najc lotiä'p: gudibxгаа nen bas näjza nen pla't, dxejc näj dejtzni sajc naya.

²⁷ ¡Proobzatu remastr xten leii näjzatu referisee, najctu benguijdx!, sa'csi najctu si'c rebaa ni natchesa'c; nolbäjreni, saru rluuini, luxh nenreni guidxa dzujt xte bengut näjza bälyudx.

²⁸ Sigajcza najctu la'tu. Saru rujn lojtu, rchalo rebejn najctu bensa'c, niluxh lastootu guidxa yälrusguee näjza yälguyalajz.

²⁹ ¡Proobzatu remastr xten leii näjza referisee, najctu benguijdx! Runcheetu xpaä redade' ni gunii xtidx Dios galoo, rusucheezatu ro' xpaä rebejn ni gujc bensa'c, ³⁰ dxejc rniitu: “Paru nibajnnu nen redxej ni gubajn retoxtadgoldoonu dinu niacnäj reni bagu't redade' ni gunii xtidx Dios.” ³¹ Lagajc con rediidxre rcäjptu najctu rexajg renani bagu't redade' nani gunii xtidx Dios.

³² ¡Colguscuääz guntu sa' recos ni guläx'tiej retoxtadgoldootu!

³³ ¡La'tu ni najc si'c bäl, la'tu ni najc si'c te bitiääz guidxa bälñialajz! ¿Xho guntu te na'c chäätu gabijl par tejpas? ³⁴ Ni'cni, guxhalä rexpenä ni guinii xtidxä, näjza bennajn, näjza mastr. Luxh yu'reni sugu'ttu sucuaatureni lo crujz; yu'zarenii siguijntu nen reguidobäz, sirinajltureni guejdx por guejdx. ³⁵ Si'cza yejctu jiajb xtiejn guiraa rebennadolajz ni bagu't bejn xchejli toAbel ni gujc nadolajz, xchejliza Zacarias,

xi'n Berequías, ni bagu'ttu nen guidoro gajxh lo bacuug. ³⁶ Rniliápac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷ Räjpa Jesús:

—¡Jerusalén, Jerusalén! Xpejnlu rugu't redade' ni mii xtidx Dios, rucuaazarenii guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni nen xhigani, per ditu nicäjb! ³⁸ Colhuii xho jianxteb xquidootu cuälazrenini. ³⁹ Rnixgää lojtu, naj dirutu fii loä, dxejli che guiniitu: “Benle' Dios nani siääd xcuentni.”

Jesús räjp sibijl guidoro

(Mr. 13:1-2; Lc. 21:5-6)

24 Birii Jesús nen guidoro te asiini, dxejc gubig rexpejn pacni lojni, gusloj caguluiireni reyuduxhga lojni. ² Dxejc räjp Jesús lojreni:

—¿La ruhuiitu guiraa reyure? Rniliápac nicla tej guij di jia'n yejc sa'ni ree; guiragajc reyure sibijl.

Cos ni guluijoj gac fis

(Mr. 13:3-23; Lc. 21:7-24; 17:22-24)

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejn pacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluijoj ameer jiäädlu näjza che ameer nitloj guedxliuj?

⁴ Dxejc räjp Jesús lojreni:

—¡Colnatiro te rut gusgueedi la'tu! ⁵ Sa'csi su' xhidajl reni jiääd, naareni: “Narä nacä Crist”, luxh susgueereni xhidajl bejn. ⁶ Siejn diajgtu xcuent cadro cayajc guer, näjza xcuent cadro rla'jz chu guer, na'c guidxiejbtu sa'csi si'c nungäjl

gac, niluxh gajd galdi nitloj guedxliuj. ⁷Sa'csi siäjs te naciõn sidilnäjni stee naciõn; te yälrnibee sujn guer con stee yälrnibee, luxh su' gubijn, su' yälguijdx, su'za xuduxh xhidajl lajt. ⁸Luxh guiraa redee cuäxtiejtis re TRABAJWDUXH ni churu chu.

⁹Dxejc guteedreni la'tu ladznaa rebendojl te gusacsireni la'tu, te gugu'tzaren i la'tu, luxh guiraa rebejn sidxe'ch lojtu sa'csi sanälajztu narä. ¹⁰Neñ redxejga, xhidajlreni sibälaz xcälirililajzreni, sidxe'ch lo sa'reni, suto' sa'reni lo sa'reni. ¹¹Dxejc siricaj xhidajl bejn ni rusguee, gäbreni xcuent Dios nniireni, luxh susgueereni xhidajl bejn. ¹²Sa'csi lacti suduxh yällatsiaj lo guedxliuj, diru bejn chanälajz sa'ni. ¹³Dxejcti bejn ni chasanäj xnezyujtis Dios, ni'c sun gaan xca'ni yäl nabajñ par tejpas. ¹⁴Luxh sisiule' xtidx Dios guideb lo guedxliuj te gacbee guiraa reben guedxliuj xtiidxn i; dxejcru jiaäd fis xten Dios.

¹⁵'Cheni fiitu asobga' te benguidx-duxh neñ yu' ni najc dxan neñ guidoro, si'cni gunixгаа toDaniel ni gunii xtidx Dios gacni, bejn ni goļ dee sugacbeeni nani roļni, ¹⁶dxejc renani rbäjz lo guedx Judea, suguxunreni gucuatzlojreni neñ dajn. ¹⁷Bejn ni niä'p yejc xyu'ni dxejga di galdi jiajt i te chalääni xhixtenni neñ xyu'ni; ¹⁸bejn nani cayujn dzuun lo niaa, na'c guibi'ni niclaza chaxhiini xhajbni. ¹⁹iProobza regunaa ni nuxi'n, näjza reni cagusiä' báz neñ redxejga! ²⁰Coln-abduxh loj Dios xhet nendi redxej ni cay-acnalduxhdi nanab guxunditu, niclaza dxej che rusilajz bejn. ²¹Sa'csi su' trabajwduxh neñ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. ²²Luxh palga di Dios gutiu' yejc redxejga, nicla tej bejn di laa. Luxh suti u' Dios yejc redxejga sa'csi rinälajz i reni aguleni.

²³'Neñ redxejga palga yu' chu naa lojtu: "Colhuii, aree Crist", o "Colhuii ani arec", na'c chalilajztuni. ²⁴Siääd xhidajl niguii ni rusguee, gäbreni najczeni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzaren i senro, parsi gus-gueereni, susgueduxhreni rebejn, niluxh rlaizreni gusguezaren i rebejn ni agule Dios, ni rililajz xtiidxn i. ²⁵Agunixгаа lojtu xhini'c gac. ²⁶Ni'cni palga naaren i lojtu: "Bahuii, a crist yu' neza lo reybijdz", na'c chäät u; o palga naaren i: "A crist suga' neñ yu're", na'c chalilajz-tureni. ²⁷Sa'csi si'cni guideb xhaguibaa rien che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguii, cheni jiaälsacä lo guedxliuj. ²⁸Ni najntu cadro naga' te mangut, ro'c re' regolbetz.

Cheni jiaädsac Xi'n Dios ni gujc Niguii

(Mr. 13:24-37; Lc. 21:25-33;
17:26-30, 34-36)

²⁹Räjpzani:

—Cuantsi ted guiraa re TRABAJWDUXH, sicäy i lo gubijdx, diruza bäi gusanij, sitejbza rebajl ni yu' xhaguibaa, sinib-duxhza guideb xhaguibaa. ³⁰Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neñ guiraa reguejdx lo guedxliujre, son-duxhreni suhuiireni siääd Xi'n Niguii lo reza xhaguibaali. Siäädni con yälrnibee näjza yälrdimbichaduxh. ³¹Dxejc sux-halñi rexangl i con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiun guedxliuj, guideb lo guedxliuj näjza xhaguibaa.

³²'iColguisieed ni ruluii yajg iigw! Che naren renaani che cabääni be'n, asiääd bäi curex, ³³sigajcza cheni fiitu cayajc guiraa recosre, sacbeetu asiädga-jxh fis, rolä'li abidzujñni. ³⁴Rniliäpac lojtu, guiraa redee sajc laļ ni nabajñ gaii

rebejn ni suga' ree naj. ³⁵ Guibaa näjza guedxliuj sinitloj, niluxh xtidxä di nitloj.

³⁶ Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ Sigajcni gujc neñ redxej che gubajn toNoé, si'cza gac che jiälä Xi'n Dios ni gujc Niguii. ³⁸ Neñ redxe galoo, cheni gajd nisguiduxhga jiajb, rebejn ni nabajn dxej cayajwreni, cayä'reni, caguchnaareni, cagudeedza bejn xindxa'preni guchnaa, dxejli cheni biu' Noé neñ barcwro. ³⁹ Direni niacbee xtiidxni; cheni biädli nisguiduxh ni sanä guiraareni dxejcru gubeereni. Sigajcza gacni che jiälsacä narä Xi'n Dios ni gujc Niguii. ⁴⁰ Neñ redxejga palga cayujn tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² Ni'cni colsusin, sa'csi ditu gan xhi dxej jiädad Dad xtentu. ⁴³ Colganchee, paru niacbee baxhuan xten yu' cor yääl niädad gubaan ni siädlan rolijzni, nisiusinni dxejc, dini nusaan niu'ni rolijzni te cuanni. ⁴⁴ Ni'cni colsusinza la'tu, sa'csi siädad Xi'n Dios ni gujc Niguii lagajc or ni ditu gan xhigab jiädadni.

Xcuent te mossa'c näjza te mosguijdx (Lc. 12:41-48)

⁴⁵ '¿Chuni'c najc mossa'c ni ruzoob diidx, ni basannäj xlamni rebejn ni yu' rolijzni te gudeedni xhi gaureni ä? ⁴⁶ Chicbaa mos ni saru cayujn xtzunni che guidzujn xlamni. ⁴⁷ Rniliápac lojtu, lamga susa'nni sa' mosga te fiini guiraa xhixtenni. ⁴⁸ Dxejc palga mosga di gusoob xtidx xlamni, gunni xhigab: "Sacladuxh guibi' xlamä", ⁴⁹ dxejc guisloj cagusacsíni resamosni, guislojni gaunäjni, yänäjni rebengu. ⁵⁰ Dxejc sidzujn xlamni dxej che dini gun xhigab jiädadni, luxh or ni dini gan guidzujni. ⁵¹ Dxejc siguinduxhni mosguijdxga, suri-

laagwnini te guidxagsa'ni sabenguijdxni, dxejc sonduxhni, chubejli reläjyni.

Xcuent tzuu gunaa

25 Räjpa Jesús: —Pues xcälrmibee Dios najc si'c tzuu gunadxa'p nani cua' xcandilse'treni te huijreni te sa'. ² Gaii regunaaga nasin, sgaiireni nayääl. ³ Reni nayäälga sanäreni xcandilreni, niluxh direni nica' sijn se't. ⁴ Niluxh reni nasinga sanäreni sijn se't te guze'creni neñ xcandilreni. ⁵ Sa'csi bi'nga di nidzungaj, gunaa bacal regunadxa'pga, gudiejstireni. ⁶ Dxejc si'cti garol yääl, biejn te xse' ni räjp: "Bi'n asiäd, colchäj, colchachaglojni." ⁷ Guiraa regunaare huistieguxunreni, dxejc bensa'creni xcandilreni, te cuagujreni. ⁸ Dxejc guigaii regunayääl räjpreni loj reni nasin: "Colgunidxlaa te bo'c se't gusanijnu xcandilnu, sa'csi arlajzni jiuini." ⁹ Dxejcti regunanasin räjp lojreni: "Digacdini, dxejc dini gal nicla par nuurnu nicla par la'tu. Colchäj cadre ruto'reni se't colchazii xse'ttu." ¹⁰ La'ni sasii guigaii regunayäälga se't, bidzujn bi'n. Regunaa-sin ni cabäjz bi'n biunäjrenini lo sa', biäuuti ro lä'. ¹¹ Cheni bidzujn regunayäälga, räjpreni: "Dad, Dad, baxhal ro lä'." ¹² Dxejc räjpni lojreni: "Rniliápac lojtu, dina gumbeätu."

¹³ Dxejc Jesús räjp lojreni:

—Colsusinza, sa'csi ditu gan nicla xhi dxej nicla xhi or siädad Xi'n Dios ni gujc Niguii.

Xcuent lam ni badeed meel

¹⁴ Xcälrmibee Dios xhaguibaa najc si'c te bejn ni agojl guirii chääni zijt te biaj. Gurejdxni rexmosni, badeedni meel lojreni.

¹⁵ Lo tejni badeedni si'cti gaii miļ meel, lo steeni badeedni si'cti tio'p miļ, dxejc steeni cua' te miļ. Loj tejgani badeedni si'cti ni rujni xhigab sajc gun-

näjreni dzuun, dxejcti biriini xpiajni. ¹⁶Ni cua' gaii mił meel bejn te dzunro, bejnni gaan sgaii mił meel. ¹⁷Sigajcza ni cua' tio'p mił meel, bejnni gaan stio'p mił. ¹⁸Dxejcti ni cua' te mił meel, huicua'tzni xmeel xlamni nen te gueed ni gudäänni lo yuj.

¹⁹'Gudejdti balti bäii, dxejc gubi' xlam remosga, bejnni cuent loj guiraarani. ²⁰Che bidzujñ ni cua' gaii mił meel, bidzunñäjni sgaii mił meel ni bejnni gaan, räjpni loj xlamni: "Dad, baniidx guejblu gaii mił loä. Aree sgaii mił meel ni benä gaan." ²¹Räjp xlamni lojni dxejc: "Hueenca, mos hueen najclu, ru-soobzalu xtidä. Sa'csi gujclu bensa'c con te cos báz, naj sunidxä guinibeelu xhiroobru. Biu' loä, bibalaznäj narä." ²²Che bidzujñni ni cua' tio'p mił meelga, räjpni loj xlamni: "Baniidx guejblu tio'p mił meel loä, aree stio'p mił meel ni benä gaan." ²³Räjp xlamni lojni: "Mbaj. Mos hueen najclu rusoobzalu diidx. Sa'csi gujclu bensa'c con te cosbáz, naj sunidxä guinibeelu xhiroobru. Biu' loä, bibalaznäj narä." ²⁴Che bidzujñ mos ni cua' te mił meel, räjpni lo xlamni: "Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij." ²⁵Ni'cni bidxebä, huicua'tzä xmeellu nen yuj. Niluxh axh aree xmeellu." ²⁶Dxejc räjp xlamni lojni: "iMos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij." ²⁷Riäjl nisa'nlu xmelä nen te bancw te che nibi'ä nicasacä xmelä con xi'nni ni niujni gaan." ²⁸Dxejc räjpni loj reni suga' ro'c: "Colgudzucay te mił meel ni ca'ni colgudeedni loj ni rajp tzuu mił meel. ²⁹Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni." ³⁰Dxejc räjpni: "Colca' mosre ni xhet sajcdi, colguzälñi lo yäl-nacäy, cadre chu yälronduxh, näjza yälrajw reläjy bejn."

Yälguختis xten reguejdx

³¹'Che jiädsac Xi'n Dios ni gujc Niguii con yälrdimbicha' xtenni, siäd-näni rexangl Dios. Dxejc sibejni lo tron ni rdimbicha' xtenni te guinibeeni. ³²Dxejc sidojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtroo cheni rbeni rexiił loj redxib, te rlia'reni loj sa'reni. ³³Suzujni rexiił xladbeeni dxejc redxib xladbäjgwni. ³⁴Dxejc säjb reiı loj reni suga' xladbeeni: "Coltaa, la'tu ni benle' Xtaä. Coljiu' lo yälrnibee ni guc-chee cheni guzoblojlı guedxliuj. ³⁵Sa'csi che calanä la'tu baniidx xhi gudauä, che cay-olä, la'tu baniidx xhi gu'ä. Che cuanzaä si'c te benzijt, la'tu banidxlaatu cadre bia'nä. ³⁶Che xheti xhabä, la'tu baniidxni, che gucxhuä, la'tu biädhuiitu narä, che guyu'ä nen latzguiib, biädhuiitu narä." ³⁷Dxejc sinii reni suga' xladbeeni, säjbreni: "Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸¿Guc bahuiinu najclu si'c te benzijt, baniidxnu cadre bianlaalu, o biäädx xhajblu, baniidxnu xhi gojtlu? ³⁹O ¿guc bahuiinu cayacxhuulu, o yu'lu nen latzguiib, biophuiinu lojlu?" ⁴⁰Dxejc reiıga säjb lojreni: "Rniliäpac lojtı, xhitis xhi bejntu loj te rexpənä ni rniı xtidä mase proobreni, lagajc loä bejntu recosga."

⁴¹'Dxejc säjpszani loj reni suga' lad-bäjgwni: "Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibe näjza rexpədxabni. ⁴²Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³cuanzaä si'c te benzijt, luxh ditu nunidxlaa cadre nia'nä, biädxzä xhabä, niluxh ditu nuniidx xhi niacwä; gucxhuä, guyu'äza nen latzguiib, niluxh ditu niädhuii loä." ⁴⁴Dxejc laareni säjbreni: "Dad, ¿guc bi-

huiinu calaanlu, o cayojllu, o canzajlu si'c te benzijt, o cayäädx xhajblu, o cay-acxhuulu, o yu'lu neñ latzguiib, luxh dinu niacnäjlu?”⁴⁵ Dxejc säjb reiiga lojreni: “Rniliápac lojtu, loj xhitis ni ditu niacnäj rebejn ni rililajz xtidxä, mase proobreni naräni ditu niacnäj.”⁴⁶ Dxejcti sij rebejnre lo yälrusacsí par tejpas, per rebejn ni nadolajz, ni agule Dios, si-jreni lo xcälñabajn Dios par tejpas.

Bejnreni xhigab xho guiniaazreni Jesús

(Mr. 14:1-2; Lc. 22:1-2; Jn. 11:45-53)

26 Che gulujx gunii Jesús rediidxre, räjpni loj rexpejnpacni:

²—Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguui ladzña reni gucuua narä lo crujz.

³Dxejc bidojp rebejn ni rnibee rebixhojz, näjza remastr xten leii, näjza rebengool lo rexpejn Israel. Lo xle' Caifás, ni rnibee loj rebixhojz, bidojpreni. ⁴Ro'c bachaagreni diidx xho guiniaazreni Jesús con yälrusguee, te ju'trenini. ⁵Luxh räjpreni lo sa'reni:

—Na'c jiennuni neñ redxe lanij, te di gun rebejn bieiduxh.

Te gunaa ni biädnä perfum

(Mr. 14:3-9; Jn. 12:1-8)

⁶Che yu' Jesús guedx Betania, rolizj Simón te bejn ni basiajcní che räñ tiejxhni, ⁷ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸Che bahuii rexpejnpacni xhi cayujni, bidxe'chreni, gusloj cayäjpreni:

—¿Xhicuent casäxlía'ni perfumga?⁹ Perfumre niäc nido'ni, nirii xhidajl meel lojni te niacnäjni rebenproob.

¹⁰Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtu gunaare? Ni te coshueen najc dee nani bejnni loä.

¹¹Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹²Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. ¹³Rniliápac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús

(Mr. 14:10-11; Lc. 22:3-6)

¹⁴Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵räjpni:

—¿Lac guniidxtu loä te gutedä Jesús ladzñaatu?

Dxejc badeedreni galbitzuu melpla't lojni. ¹⁶Dxjeclí caguiil Judas xho gut-edni Jesús lojreni.

Lult xchej xten Jesús

(Mr. 14:12-25; Lc. 22:7-23;
Jn. 13:21-30; 1Co. 11:23-26)

¹⁷Primer dxej lanij, dxej ni rajwreni yätxtiil ni di saguij, gubig rexpejnpacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

¹⁸Dxejc räjpni lojreni:

—Colchäj lo guejdx rolizj te dade', colye'tz lojni: “Si'c naj Dad mastr: Asiäd-dzungajx xorni, ni'cni rolizlu gaunäjni rexpejnni xchej lanipascw.”

¹⁹Bejnti rexpejnpacni si'cni gunibee Jesús gac, bazucheereni xchej xten pascw.

²⁰Che biu' guxhijñ, sobga' Jesús lo mex con retzubitio'p xpejnpacni. ²¹Laj ni cayajwreni räjpni lojreni:

—Rniliá lojtu, yu' tejtú ni guto' narä.

²²Dxejc guc-huinduxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä nen tejtis pla't, laa ni'cni guto' narä. ²⁴ Xi'n Dios ni gujc Niguii sajc si'ctis ni caj loj gujtz xten Dios, per gunatiro bejn ni guto'ni. Huenru na'c niajl bejnga.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶ La_l ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn_{pacni}, räjpni:

—Coltajw; dee najc si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejn_{pacni}, räjpni:

—Guiraatu colyä', ²⁸ sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni nen dojl. ²⁹ Luxh rniä lojtu, diruna yä'ä nis nani rii yejc uub, dxejlini yänäsacätu lo xcälrnibee Dios, Xtäädä.

Räjp Jesús sibälaz Pedroni

(Mr. 14:26-31;

Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Oliib. ³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtz xten Dios caj scree: “Sugu'treni baxtoor dxejc sire'ch rexiiil.” ³² Dxejc cheni guibansacä lo rebengut, ganidä cha'ä región Galilee, dxejcti jiadnajltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgaii cuedxa', luxh luj alagulälazlu narä choñ huält.

³⁵ Räjp Pedr loj Jesús:

—Masque riäj_l guetnäälü, dina cuälazälu.

Dxejc sigajcza gunii guiraa rexpejn_{pacni}.

Gurejdx-gunab Jesús loj Dios nen Getsemaní

(Mr. 14:32-42; Lc. 22:39-46)

³⁶ Dxejcti bidzujn Jesús näjza rexpejn_{pacni} te lajt ni laa Getsemaní, räjpni lojreni:

—Colcuésijc ree la_l ni cuedx-guiniabä lo Dios.

³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. ³⁸ Dxejc räjpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal_l lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedxcanabni lo Dios:

—Xtäädä, palga sajcn, basanlaa tedcaj trabajwduxhre ni tedä, te na'c tedäni. Xhet si'cdi ni rlazä gacni; si'cpacni rlaizlu gac, si'c gacni.

⁴⁰ Dxejcti gubi'ni cadro suga' guichon rexpejn_{pacni}, che bidzujn_{ni} ro'c, nagayej_{sreni}. Räjpni lo Pedr:

—¿La di niajcdi nutie'chtu bacal_l lojtu nicla tebor, ä? ⁴¹ Colguibaj_n, colnab lo Dios te na'c jiajbtu nen dojl. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, räjpni:

—Xtäädä, palga digacdi tedcaj tedä trabajwre, sugacni si'ctis ni rlaizlu gacni.

⁴³ Dxejc gubisacni, bidxäl_{ni} rexpejn_{pacni}, nagayej_{sreni} sa'csi yuduxh bacal_l lojreni. ⁴⁴ Basaannireni, dxejc sä_{sacni}, gurejdx-gunabni lo Dios ni riojn huält, gunisacni lagajc rediidx ni guniini galoo.

⁴⁵ Dxejc huijni cadro suga' rexpejn_{pacni}, räjpni lojreni:

—iNaj sii, colguejs, colgusilajz! Abidzujn or ni gutedreni Xi'n Dios ni gujc Niguii ladznaa rebendojl.⁴⁶ iColchastie, colcho', colhuii! Asiääd nani guted narä ladznaa rebendojl.

Gunaazreni Jesús sanärenini pres

(Mr. 14:43-50;

Lc. 22:47-53; Jn. 18:2-11)

⁴⁷ Lalni canii Jesús bidzujn Judas, nani najc tej retzubitio'p xpejnpacni. Bidzunñajni xhidalduxh bejn ni ca' espaad, ni ca' garo't, najcreni xpejn reni rnibee rebixhojz, näjza xpejn rebeñgool xten rexpejn Israel. ⁴⁸ Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazagajcni.

⁴⁹ Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. ⁵⁰ Jesús räjp lojni:

—Xamigwä, ¿xhi siäädllu?

Dxejcti gubig rebejn lojni, gunaazrenini.

⁵¹ Per tej reni suganäj Jesús gulääni te spaad, batiu'ni diajg te mos xten rebixhojz ni rnibee. ⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. ⁵³ ¿La ditu gan sajca guiniabä lo Xtadä, luxh laani suxhalgajcni gayonbitzubitio'p miñ xanglni gacnäjä narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäjñ gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädñätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu neñ guidoro, luxh ditu niniaaz narä. ⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejnpacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujreni cadro abidojg guiraa rebejn nani ruluii leii näjza rebeñgool xten xpejn Israel. ⁵⁸ Dxejcti zit-zijt biäd-najñ Pedr rebejnğa, bidzujñlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, näjza rebeñgool con guiraa reni rajp yälrnibee gusloj caguiilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajñ bejn, guniireni xhidajñ didx-xhii xcuent Jesús. Dxejcti bidzujñ tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajc gutzulä guidoro xten Dios, sajca gunchesacäni neñ choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajñ. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde najñli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jialä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—iNiguiire aguniyajni Dios con xti-idxni! ¿Xhiru testiigw rquiinnu? Abiejn diajgtu didxyaj xtenni. ⁶⁶ ¿Xhi rchalotu?

Dxejc basejcreni diidx:

—iAbiga'ni! Riäjł guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62;
Jn. 18:15-18, 25-27)

⁶⁹ Lał ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanjlu Jesús, ni siääd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniiłu loä.

⁷¹ Asii Pedr nez ro' puert, che bidx-aagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanj Jesús ni siääd Nazare't.

⁷² Dxejc basguee Pedr stehuält, räjpni:

—Rniliápac dina gumbleä dade'ga.

⁷³ Che gojl sterate', gubig reni suga' ro'c loj Pedr, räjpni:

—Guliini; näjza luj najclu te xpejnini; huenliisi riejn diidx ni rniilu.

⁷⁴ Dxejcti goslojni cagueni, caguzät'ni Dios, räjpni:

—Dipacna gumbleä niguiiga.

Guniitisni si'c, chela guredxa' te guidgaii. ⁷⁵ Dxejcru banalajz Pedr rediidx ni gunii Jesús lojni che räjpni: “Che gajdli guidgaii cuedxa', choñ huält alaguniilu dilu gumbee narä.” Dxejc birii Pedr ro'c, gosloj cayonduxhni.

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

27 Che bianij lo guedxliuj, guiraa reni najc rebixhojz ni rnibee näjza rebengool xten rexpejn Israel bia'nreni diidx xho gunreni ju'treni Jesús. ² Baliibrenini, guläärenini ro'c, huisa'nrenini loj Poncio Pila't, ni najc gubernador.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool. ⁴ Räjpni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj neñ guidoro, biritini ro'c. Sas huijni, baliibni te duu guejnini, gojłni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälnu meelre neñ caj gojn sa'csi najcni xcuent xtejn te bejn.

⁷ Dxejc bia'nreni diidx con meelga sireni te la' yuj xten te dade' ni runchee guejs te ro'c gucua'tzreni rebenzajt.

⁸ Ni'cni najli rniireni yujga: “Yurejn”. ⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel sajc bejnğa.

¹⁰ Con meelga guziireni yuj lo bejn ni runchee guejs, sigacni gunibee xtdadnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzunnäjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

¹² Lałni cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³ Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

¹⁴ Per xhetliidi diidxdi basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25;
Jn. 18:38–19:16)

¹⁵ Nen redxe lanij rajpreni costumbr ruslaa Pila't tej bejn ni cue rebejn loj reni yu' nen latzguiib. ¹⁶ Nen redxejga guyu' te bejn ni sääb xtiidxni ni laa Barrabás. ¹⁷ Cheni tre' guiraareni ro'c, gunabdiidx Pila't lojreni:

—¿Chuni'c rlaiztu guslaá, la suslaá Barrabás o Jesús ni laa Crist?

¹⁸ Sa'csi najn Pila't rdxe'chljazreni lo Jesús, ni'c bateedrenini lojni.

¹⁹ Lał ni sobga' Pila't lo yajgxiil cadro rujni yälguxhtis, baxhał chäälni diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunixcalä xcuentni.

²⁰ Niluxh rebixhojz ni rnibee näjza rebengool baquuilreni rebejn te gunabreni laa Barrabás, näjza te guet Jesús. ²¹ Dxejcti gunii gubernadoor stehuält, räjpni lojreni:

—¿Chu tej loj guiro'preni rlaiztu guslaá?

Dxejc guredxa'reni, räjpreni:

—¿Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³ Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¿Bacuaani lo cruzj!

²⁴ Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuent-titu najcni.

²⁵ Dxejc guiraa rebejn ga badzu' didxre, räjpreni:

—Suxcaquijnu xtiejnni, nuurnu näjza rexi'nnu.

²⁶ Dxejc baslaa Pila't Barrabás, dxejc gunibeeni gudijnreni Jesús dxejc bateed-nini ladznaa rebejn te gucuaarenini lo cruzj.

²⁷ Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni. ²⁸ Dxejc gulääreni xhajbni, bashuajcwrenini te lad xniaa. ²⁹ Dxejc bencheereni te coron guejch, basälrenini yejcn, basälreni te yabixijl naani, xlad-beeni, sas bazuxhijbreni nez lojni guslogajc caguxhisnäjrenini, räjpreni:

—¿Collä'p xpala'n reii xten rexpejn Israel!

³⁰ Sas batiobxhejnreni lojni, cua'reni yabixijlga te ni'c batiäjlneni yejcn. ³¹ Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajbni, sanätirenini te xcajni lo cruzj.

Bacuaareni Jesús lo crujz*(Mr. 15:21-32;**Lc. 23:26-43; Jn. 19:17-27)*

³²Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcrujz Jesús.

³³Che bidzujnreni te lajt ni laa Gólgota, nani säloj: dan Calabeer, ³⁴ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naadiruni niä'nini.

³⁵Cheni abacuaareni Jesús lo crujz, gudzujt resoldaad yejc xhajbni, te si'c gudisreni xhajb Jesús cua'reni, te si'c guzobj diidx xten te dade' ni gunii xtidx Dios. ³⁶Gurejtireni ro'c, gusloj canäjreni Jesús. ³⁷Yejc crujzga bacuaareni te guijtz con lettro. Lo guijtzga rcaj xhini'c najc xtojł nani cayejt. Lo guijtzga caj: "Dee najc Jesús reii xten rexpejn Israel."

³⁸Näjza tio'p gubaan cuaj lo stio'p crujz con laani. Tejani cuaj lo te crujz xladbee Jesús, steeni cuaj xladbäjgwni. ³⁹Luxh renani sadejd nejzga guniyajreni Jesús, cagusniibreni yejcreni, ⁴⁰cayäjpreni lojni:

—Ja'ä! Luj ni nutiexhlu guidoo, luxh chontis dxej niunchesacluni; palga gullii najclu Xi'n Dios, biäjt loj crujzga.

⁴¹Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

⁴²—Baslaani xhidajł bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtmi lo crujz nanaj te chalilajznu xtiidxni. ⁴³Huinälajzmi Dios, naj suguslaa Diosni palga sanälajz Diosni; ni najni: "Narä nacä Xi'n Dios."

⁴⁴Regubaan ni caj lo recrujz sigajcza guniyajreni Jesús.

Che gujt Jesús*(Mr. 15:33-41;**Lc. 23:44-49; Jn. 19:28-30)*

⁴⁵Dxejcti bicäyj guideb guedxliuj läidxej hasta rcachon gudxej. ⁴⁶Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

⁴⁸Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binargra ro' Jesús.

⁴⁹Dxejc reni tre' ro'c räjp:

—Basaan; guidon la siääd Elías te guslaanini.

⁵⁰Dxejc guredxaduxh Jesús stehuält, baslaatini xpritni. ⁵¹Lagajc orga biräsya' ladro ni zääh nen guidoro, gujcnii tio'p la' jiaali hasta lo yuj. Gujc te xuro, sas gusuj bej reguiro. ⁵²Dxejc gubicaj reguij ni niäuu ro' rebaa, luxh gubansac xhidajł xpejn Dios ni gujt aguc xchej. ⁵³Dxejcti, che huäjs Jesús lo rebengut, biriireni nen baa, baluilojreni lo xhidajł bejn ni rbäjz guedx Jerusalén.

⁵⁴Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

⁵⁵Zijtru tre' xhidajł regunaa ni biäd-najł Jesús che biriini nez Galilee te bahuiirenini. Cadxelojtisreni guiraa ni cayajc ro'c. ⁵⁶Tej regunaaga najc Marii Magdalen, steeni najc Marii xnan Jacoob näjza José, steeni najc xnan rexi'n Zebedeo.

Huicua'tzreni Jesús

(Mr. 15:42-47;

Lc. 23:50-56; Jn. 19:38-42)

⁵⁷ Che gojl gudxej, bidzujn te benrajp ni siääd guedx Arimatea; laani José. Näjza dade'ga najc tej reni birinajl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹ Cua'ti José tiejxh Jesús, batejbnini nen te bariadya, ⁶⁰ huitixhnini nen xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini. ⁶¹ Sobga'za Marii Magdalen näjza stee Marii nez loj baa, bahuiireni biga'tzni.

Xhi räjp resoldaad ni cuanäj xpaä Jesús

⁶² Che gudejd dxej xten ni guleccheereni lanij, bara yääl bidojp rebixhojz ni rnibee näjza rebejn ni laa re-farisee, bidzujnreni loj Pila't, ⁶³ räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted choñ dxej sibansacni loj rebengut.” ⁶⁴ Ni'c baxhal chu chacanäj ro' baaga dxejli guisa' choñ dxej, te di chää rexpejnpacni chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutzu'tz ro' baaga si'ttis ni sajc guntu.

⁶⁶ Dxejcti sääreni, basäutzu'tzreni ro' baaga; con resoldaad bacuaarenini te seii lojni te rut faldini. Dxejc basa'nreni resoldaad canäj ro'c.

Sibansac Jesús loj rebengut

(Mr. 16:1-8; Lc. 24:1-12; Jn. 20:1-10)

28 Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn

Marii Magdalen näjza stee Mariiga, siädhuiireni lo baa. ² Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajbni najc nolbäj si'c najc yejg ni riajb. ⁴ Che bahuii resoldaadni, bichebduxhreni, sädiidxreni, gujcreni si'c bengut. ⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguuiltu Jesús ni cuaj lo cruzj. ⁶ Rutini ree sa'csi agubansacni sigajc ni najni. Coltahuii cadro gojtni. ⁷ Colguxun, colchaye'tz loj rexpejnpacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejnpac Jesús. ⁹ Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudäazreni guenni'ni, gojrenini. ¹⁰ Dxejc räjpni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni löä.

Rediidx ni räjp resoldaad

¹¹ Lałni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹² Dxejc rebixhojz ni rnibee bachags'zarenini con rebengool te bia'nreni diidx gudeedreni xhiroob meel lo resoldaad, ¹³ räjpreni lojreni:

—Sree colye'tz lo rebejn: “Lał ni gayesnu, canäjnu ro' baa, biääd rexpejnpac Jesús guläxhiga'tzreni tiejxhni.” ¹⁴ Palga jriendajg gubernadoor dee, siohuiinuni te di yu' xhi gunni la'tu.

¹⁵Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisjcreni si'c.

BaxhaĴ Jesús rexpejn pacni

(Mr. 16:14-18;

Lc. 24:36-49; Jn. 20:19-23)

¹⁶Dxejcti sää retzubiteeb xpejn pac Jesús lo región Galilee, lo dajn cadre bia'n Jesús diidx guidxaagnireni.

¹⁷Cheni bahuiireni loj Jesús,

bazuxhijbreni, gojnrenini, per yu' reni ractio'p lajzreni. ¹⁸Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj. ¹⁹Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxaan xten Dios. ²⁰Colguluiireni gusoo-breni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Diidx Xcuent Jesucrist Nani Bacuaa San Marcw

Baluii Juan ni rutiobnis

(Mt. 3:1-12; Lc. 3:1-9,
15-17; Jn. 1:19-28)

1 Scree gusloj diidx xcuent Jesucrist, Xi'n Dios. ²Si'cni bacuaa tolsafas, ni gunii xtidx Dios, che räjp Dios: Bahuii gan, guxhaḷä ni chanä xtidxä, ganidni chääni lojlu te guzucheeni xnezyujlu.

³Riejn xse' ni rbedxa' nez loj reyubijdz: "Colyunsac xnezyuj Dad, colslui rexnezyulajzni."

⁴Biricaj Juan ni rutiobnis nez loj reyubijdzga. Rägajcni nanabpac gusiechla-jzreni, tiobnisgajczeni, te jia xtojḷreni. ⁵Riädcuadiajg xhidajḷ reni rbäjz Judea, näjza reni rbäjz guedx Jerusalén. Dxejcti cheni ruxhobdojḷreni lo Dios, rustiobnis Juanreni neḅ gueu Jordán.

⁶Xhajb Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäserguijxh. ⁷Caguluiini rebejn, räpajceni:

—Detzä siääd tej nani sajcru loä, nani nicla di nungäjḷ surloä, cuää xcura'chni. ⁸Narä abatiobnisä la'tu con nis, biädla laani guxhaḷni Sprit Dxaan xten Dios te cuääzni neḅ lastootu. Si'c gustiobnis nani jääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹Dxejc, neḅ redxejga, birii Jesús guedx Nasare't ni yu' Galilee. Dxejcru batiobnis Juan Jesús neḅ gueu Jordán. ¹⁰Che birii Jesús neḅ nis, bahuiini bixal guibaa. siädjäjt Sprit Dxaan xten Dios yejcti si'c te palom. ¹¹Dxejcti guibaali bejn xse' te ni räjp:

—Luj najclu xi'nä ni sanälazä; rbanälazduxhälu.

Bateed beḅdxab prueb Jesús

(Mt. 4:1-11; Lc. 4:1-13)

¹²Sas baxhaḷ Sprit Dxaan xten Dios Jesús lo reyubijdz. ¹³Dxejc guyu' Jesús ro'c tiuu dxej, guyu'ni cadro yu' reman. Sas gudiil beḅdxab nani rnibee, nani laa Satanäs, xho niujnmi te nusoob Jesús xti-idxni. Dxejcru biääd reangl xten Dios, biädhuiireneni.

Gusloj Jesús xtzuumni

(Mt. 4:12-17; Lc. 4:14-15)

¹⁴Basälreni Juan neḅ latzguiib. Dxejcti huij Jesús nez Galilee, huiluini xtidx Dios. ¹⁵Dxejc räjp Jesús:

—Abidzujn dxej, luxh yälrnibee xten Dios abidzujn gajxh. Colsiejch lajztu, colchalilaj xtidx Dios.

Gurejdx Jesús tajp bejn ni rniaaz bäl

(Mt. 4:18-22; Lc. 5:1-11)

¹⁶Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäl. ¹⁷Dxejc räjp Jesús lojreni:

—Coltanajḷ narä, te gunä cueedxtu bejn lacuaa ni guiniaaztu bäl.

¹⁸Lagajc dxejc basa'nreni rexquijxhreni, sanätirenini.

¹⁹Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'czeni xquijxhreni neḅ xcanu-ureni. ²⁰Guredxgajcni guiro'preni, dxejcti laareni basa'nreni xtadreni Zebedeo neḅ canuu, näjza rexmosni, sanätireni Jesús.

Te bejn nani guyu' beḅdxab neḅ lastooni

(Lc. 4:31-37)

²¹Bidzujntireni guedx Capernaum. Dxejcru sabd, dxej ni rusilajz rexpēn

Israel, biu' Jesús nen guidobáz xten rexpen Israel. Dxejcti baluii Jesús rebejn ni tre' ro'c. ²²Bidxelojni rebejn xtiidxni, sa'csi caguluiinireni si'cpac te ni rnibee, xhet si'c di remastr xten leiidi. ²³Nen xquidobázreni yu' te bejn yu' te bendxab nen lastooni. Bendxabga guredxa', rájpní:

²⁴—Jesús, ni siäd Nazare't, ¿xhicuent riu'lu loonu? ¿La siädgunitojlu nuunu? Narä numbeälu, luxh nanä luj najclu bendxan ni siäd lo Dios.

²⁵Dxejcti gudidxa' Jesús lo bendxabga, rájpní lojni:

—Basäuu ro'lu, birii nen lastoo niguiire.

²⁶Sas bendxabga batienguij niguiiga, luxh cabedxa'ni biriini nen lastoo niguiiga. ²⁷Bidxeljbtí guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluini? Niguiire rnibeeni näj rebendxab, luxh ruzoobreni xtiidxni.

²⁸Di niaclaa gucbee rebejn guideb nez Galilee xhi rujn Jesús.

Basiajc Jesús xnan suegr Pedr

(Mt. 8:14-15; Lc. 4:38-39)

²⁹Che biriireni xquidobáz rexpejn Israel, huinä Jesús Jacob näj Juan roliz Simón näjza Andrés. ³⁰Luxh xnan suegr Simón naga', yu'ni xliaa. Dxejc rájpreni lo Jesús:

—Cayacxhuuni.

³¹Dxejcti gubig Jesús lojni, gunaazni naani, guläsnini; lagajc dxejc biriini xliaa. Dxejc gusloj cayunireni.

Xhidajl benracxhuu basiajc Jesús che huääz gubijdx

(Mt. 8:16-17; Lc. 4:40-41)

³²Che huääz gubijdx, luxh abiu' guxhijj, biädnäreni guiraa rebenracxhuu loj Jesús, näjza renani yu' bendxab nen lastooni. ³³Luxh guideb guejdxga bidojp ro' yu'ga. ³⁴Basiajc Jesús xhidajl re-

nani rajc garen-garen yälguuidx. Niluxh gulääzani xhidajl bendxab, niluxh dini nusaan ninii rebendxabga, sa'csi najreni chu najcni.

Baluii Jesús nez Galilee

(Lc. 4:42-44)

³⁵Che bara yääl, cäjyru bistie Jesús, biriini sääni te laad cadro ruti bejn. Ro'c cabejdx-canabni loj Dios. ³⁶Dxejcti Simón näj resa'ni huitiilreni Jesús. ³⁷Che bidxälrenini, rájpreni lojni:

—Guiraa rebejn caguillu.

³⁸Dxejc rájpní Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹Dxejcru cuansaj Jesús guideb nez Galilee, caguluiini xtidx Dios nen reguidobáz xten rexpejn Israel. Gunibeezani birii rebendxab nen lastoo xhidajl rebejn.

Basiajc Jesús te bejn ni ral tiejxhni

(Mt. 8:1-4; Lc. 5:12-16)

⁴⁰Gubig te benracxhuu ni ral tiejxhni loj Jesús, bazuxhijbni. Dxejcti rájpní lojni:

—Narä nanä sajc gusiajclu narä palga rlaizlu.

⁴¹Balaslajz Jesús benracxhuuga, gunaazni naani, rápgajcni:

—Rlazä jiajclu. Bijaç naj.

⁴²Cheni guniini scree, biacgajc benracxhuuga. ⁴³Dxejcti gulunejz Jesús bejnğa. Per rápxgaani lojni:

⁴⁴—Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani rájpní toMoisés gudeed bejn lo Dios si'c te seen, te gacbee rebejn abiajclu.

⁴⁵Dxejc sää bejnğa. Sas gusloj cayujyni diidx lo rebejn xcuent guiraa nani gujçni. Ni'cni diru niajçdi niu' Jesús nicla tej guejdx. Cansajni te laad cadro ruti bejn. Niluxh guiranejz rii rebejn, siädhuiireni Jesús.

Basiajc Jesús te bejn ni di guniib

(Mt. 9:1-8; Lc. 5:17-26)

2 Che agudejd balti dxej, biusac Jesús nen guedx Capernaum. Dxejcti bejn diajg rebejn arbäjzni. ²Bidopgajc xhidalduxh bejn. Gudxaj nen yu'. Nicla rolä' di niajl nisiujreni. Dxejcti caguluii Jesús xtidx Dios lo rebejn. ³Dxejcti bidzujn tajp bejn, nuureni te bejn ni digacti guiniib; siädnärenini lo Jesús. ⁴Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejc cadro sujni. Dxejcru cadro baxhalreni basiäjtreni da' ni naga' benracxhuuga lojni. ⁵Che bahuii Jesús rililajzreni, dxejc räjpni loj benrachxhuuga:

—Xi'nä, agubicaj rextojllu.

⁶Sas gatii bejn ni ruluii leii ni sobga' ro'c bejnreni xhigab nen lastooreni, naareni: ⁷“¿Xhicuent mii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!” ⁸Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c nen lastootu? ⁹¿La guyasiru gäbni loj benracxhuure: “Agubicaj rextojllu”, o la gäbni: “Huistie, cua' xta'lu, gusaj?” ¹⁰Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj benracxhuure:

¹¹—Lojlu miä, ¡Huistie, cua' xta'lu, huij rolizlu!

¹²Lagajc dxejc huistie benracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

Gurejdx Jesús Leví

(Mt. 9:9-13; Lc. 5:27-32)

¹³Dxejcru gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. ¹⁴Sasaj

Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

¹⁵Dxejc sobga' Jesús cayajwni roliz Leví. Luxh sobganäj Jesús xhidajl reni rusquijx, näjza rebendojl ni di chasanäj leii, näjza rexpejnpacni, lo mex. Xhidajlreni tre', luxh sanajlreni Jesús. ¹⁶Dxejcru rebejn ni ruluii leii näj refarisee, che bahuiireni cayaunäjni renani rusquijx näjza rebendojl, räjpreni loj rexpejnpac Jesús:

—¿Xhicuent rbenäj xmastrtu reni rusquijx näj rebendojl, luxh raunäjnirenini, ränäjnirenini?

¹⁷Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebensa'c, biädtedxä rebendojl, te gusiech lajzreni.

Gunabdiidxreni loj Jesús xcuent yälrucua'n

(Mt. 9:14-17; Lc. 5:33-39)

¹⁸Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biääd gatii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejnpaclu di gucua'n?

¹⁹Dxejcti räjp Jesús lojreni:

—¿La rucua'n rebejn ni rdon chää cadro ru' yälrucua'n che meer suga' bi'n? Che meer suga' bi'n lojreni, direni gucua'n. ²⁰Per sidzujn dxej sibicaj bi'n lojreni, dxejc sii sucua'nreni.

²¹Rut rucuaadi tla' ladcoob loj tla' ladyux, sa'csi ladcoob rxu'nni luxh rutäjäzni ladyuxga, dxejc xhiroobruni räjs. ²²Rutza rusäldi bin ni gajd guilaj nen guidyux ni abigaa. Sa'csi bin ni gajd guilajga sutiäjsni guijdga che guilajni,

luxh sinijt binga näjza guiidga. Ni'cni nanab gusälni bincoob neñ guidcoobza.

**Batojp rebejn ni rinajl
Jesús triuu sabd**

(Mt. 12:1-8; Lc. 6:1-5)

²³Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. ²⁴Dxejc räjp reфарisee, renani najc benguidoo loj guedx Israel, loj Jesús:

—Arniä, ¿xhücent rujn rexpejn paclu dzuun ni di guchaag gunni neñ dxej ni rusilajznu, ä?

²⁵Dxejcti räjp Jesús lojreni:

—¿La gajdtu goñ nani bejn toDavid te huält, laani näj resa'ni, ä? Che biäädx xhi gauureni, gulaanreni. ²⁶Biu' David neñ xyu' Dios cheni guyu' toAbiatar loj Dios. Abiatar sajrcru loj rebixhojz ni guyu' neñ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

²⁷Räjpza Jesús lojreni:

—Dios bejn dxe sabd sa'csi najjni naquiinpac gusilajz bejn. Dini niujn sabd te gapda bejn. ²⁸Ni'cni narä, Xi'n Dios ni gujc Niguii, näjza sabd rnibeä.

Niguii ni nabijdz te ñaani

(Mt. 12:9-14; Lc. 6:6-11)

3 Biu' Jesús stehuält neñ xquidobäz rexpejn Israel. Ro'c yu' te niguii nani nabijdz te ñaani. ²Niluxh ro'c cagula'tz rebejn Jesús don la susiajcní niguiiga sabd, dxej ni rusilajz rexpejn Israel, sa'csi rlajzreni cue'creni xquejni loj nani rnibee rexpen Israel. ³Dxejc räjp Jesús lo niguii nani nabijdz ñaani:

—Huistie, guzuj galäiire.

⁴Dxejcti gunabdidxgajcni loj gaii rebejn ga, räjpni:

—¿La laaca gunni dzunza'c, o la dzun-guijdx, sabd, ä? ¿La suslaani yälñabajn, o la sugu'tni?

Luxh laareni biacdxireni. ⁵Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguiiga:

—Baslii ñaalu.

Dxejcti basliini ñaani. Biajctini. ⁶Dxejrcru biunejz reфарisee. Guslogajceni caguhaagreni diidx con reni nadxaag Herodes, te don xho ju'treni Jesús.

Xhidajl bejn bire' ro' nis

⁷Jesús näjza rexpejn pacni sääreni ro' nis, luxh xhidajl beñ Galilee birinajlni. ⁸Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zarení birii nejz stelaad gueu Jordán, biriizarení nez guedx Tiro, näj nez guedx Sidón, biäd-huiireni loj Jesús. ⁹Ni'cni räjp Jesús loj rexpejn pacni quuilreni te canuu, te na'c gutää rebenxhidaalgani. ¹⁰Abasiajc Jesús xhidajl benracxhuu, ni'cni guiraasi benracxhuu caxa't lojni, te canrenini te jiajcreni. ¹¹Niluxh che rhuii rebenxhab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹²Dxejcti Jesús gudidxa' lojreni te na'c niäjbreni chu najcni.

**Gule Jesús tzubitiop
bejn loj reni rinajlni**

(Mt. 10:1-4; Lc. 6:12-16)

¹³Birii Jesús sääni lo te dajne' cadro gurejdxni renani rlajzni cueni. Gubigtireni lojni. ¹⁴Dxejcti guleni tzubitiopreni te sanäjreni laani, te guxhalñireni chaluiireni xtidx Dios; ¹⁵te ga'preni yälñrñibee te gusiajcreni benracxhuu, te cuääzarení rebenxhab. ¹⁶Retzubitiop bejn ni gule Jesús najc: Simón, ni gulälajzani Pedr. ¹⁷Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. ¹⁸Näj

Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc, ¹⁹näj Judas Iscariot, ni bato' Jesús loj reni rdexchlajz lojni. Sä'tireni rolizj te dade'.

Yälrniyaj loj Sprit Dxan xte Dios

(Mt. 12:22-32; Lc. 11:14-23; 12:10)

²⁰Dxejc bidopsac rebenxhidaalga; nicla niajc niaunäj Jesús rexpejn pacni. ²¹Che biejn diajg resa' Jesús dee, biädxhiirenini, sa'csi naareni, yej cni cayajc.

²²Rebejn ni ruluii lei ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee reben dxab, yu' neñ lastoo niguiire. Niluxh nani rnibee reben dxab rudeed yälrnibee lo Jesús te cuääni ben dxab.

²³Dxejc gurejdx Jesús rebejn ga, bijyni te cuent ni ruluii lojreni, räjpni:

—¿Xho gurilaagw ben dxab lagajc saben dxabni? ²⁴Palga rebejn xten te yälrnibee la'reni, luxh tilnäj te cuaani ste cuaaga, di yälrnibeega chu xchej. ²⁵Palga te famil' rdilnäj lagajc sa'ni, di familga chu xchej. ²⁶Palga ben dxab nani rnibee tilnäj lagajc laani, di xcälrnibeeni chu xchej, sa'csi ni'c gun luuxni.

²⁷Rut gacdi jiu' rolizj te niguidaan, cuanni xhixhtenni, palga dini gulibxgaani, si'tis saj c cuanni xhixhtenni.

²⁸Rniliápac lojtu guiraa dojl nájza yälrniyaj xten rebejn saj c jia. ²⁹Nani guiniyaj Sprit Dxan xten Dios, digacdi guibicaj rextoljni, anuutisni xtojlni par tejpas.

³⁰Räjpni si'c sa'csi caniireni yu' ben dxab neñ lastooni.

Xnan con rebetzhuin Jesús

(Mt. 12:46-50; Lc. 8:19-21)

³¹Dxejcru bidzujn xnan Jesús, näj rebetzhuinni. Direni niu', baxhałtisreni

chu huitejdxni. ³²Rebejn ni sobga' gabi Jesús räjpreni lojni:

—Xnanlu näj rebejtzlu suga' ro lä', caguiilreni luj.

³³Dxejcti räjp Jesús lojreni:

—¿Chu reni'c najc xnanä näj rebetzä?

³⁴Bahuigajcni loj renani sobga' gabini, dxejc räjpni lojreni:

—Redee najc xnanä, rebetzä. ³⁵Chutis ni rujn ni rlajz Dios, ni'c najc betzä, bisianä, nájza xnanä.

Xcuent niguii ni sale'c binij

(Mt. 13:1-23; Lc. 8:4-15)

4 Suga' Jesús ro' nis guslosac cagului- ini xtidx Dios, luxh bidojp xhidajl bejn cadre suga'ni. Xhidalduxh najcreni, ni'cni biu' Jesús neñ te canuu ni suga' ro' nisga. Dxejcti gurejni nenga, biääd guiraa bejn bia'tireni ro' nis. ²Dxejc baluiinireni guiraloj, ganax cuent ni ruluii guniini. Che caguluiini, räjpni lojreni:

³—Gucudiajgtu dee. Guyu' te niguii. Biriini sale'cni binij. ⁴Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵Stee lajt biajb binijga neñ guij cadre xheti xhidajl yuj. Binijga gulengajcni, sa'csi xheti xhidajl yuj ro'c. ⁶Dxejc, sa'csi lo jiaa yu' xlobaani, che birii gubijdx, bigolni, gubijdztni. ⁷Stee lajt biajb binijga neñ yaguejch. Dxejcti biroob reyaguejchga, luxh bejnreni balaa loj binijga, ni'cni guj cni ganax bilii. ⁸Per stee lajtga biajb binij lo yusa'c. Gulejn reyäjlg, guroobreni, gucsa'ceni. Yu'reni cuaj galbitzuu xob, yu'reni cuaj gayojn xob, yu'zarenini cuaj tegayuu xob.

⁹Dxejc räjpni lojreni:

—Chutis ni rlajz guisieed, sucudiajgñi.

¹⁰Che asii xhidajl bejn, rebejn nani suga' gajxh cadre suganäj Jesús guitzubi- tio'p xpejn pacni gunabdiidx lo Jesús xhi säloj cuentre. ¹¹Dxejc räjp Jesús:

—Dios abejn gacbeetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, ¹²te mase cahuiireni direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojlneni.

¹³Räjpzani lojreni:

—¿La ditu gacbee cuentre? ¿Xhocha gacbeetu xhidajru cuent? ¹⁴Niguiire nani sale'c binij najc si'c te nani ruluii xtidx Dios. ¹⁵Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluii bejn. Dxejc che jiejn diajgreni xtidx Dios, riääd Satanás rbä-gajcni xtidx Dios ni yu' nen lastooreni. ¹⁶Yu'za rebejn ni najc si'c binij ni biajb nen reguij, renani che jiejn diajgreni xtidx Dios, rbaa lajzreni rca'reni didixga. ¹⁷Niluxh direni nisiudzu'tz, sa'csi guxii huilii lajzreni. Che rdejdreni trabajw o che rusacsí bejnreni xcuent xtidx Dios, rusaanreni xtidx Dios. ¹⁸Yu'zarenii najc si'c binij ni biajb nen yaguejch, riejn diajgreni xtidx Dios, ¹⁹dxejc che ru'rurenii yärsia' xcuent recos guedxliujre, rsia' lajzreni ga'preni meel, rlanjzreni ga'prurenii guiraloj recos, dxejc riu' redee nen lastooreni, rusäuuni lo xtidx Dios, xlia'si biejn diajgreni xtidx Dios. ²⁰Yu'za bejn ni riejn diajgreni xtidx Dios, rlii lajzreni diidixga, xhet xlia'ti biejn diajgreni xtidx Dios. Najczeni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx

(Lc. 8:16-18)

²¹Räjpza Jesús lojreni:

—¿La riädnätu te bajl te suuni dejtz te alm, o nen te loon, ä? ¿La xhet nan-

abdi suuni jiaa te guzanijni, ä? ²²Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. ²³Pal yu' chu rlanjz guisieed, sucuadiajgni.

²⁴Räjpza Jesús lojreni:

—Colyunxgaa xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵Renani rajp che'n yäl'najn, lojreni sudeedru Dios yäl'najn. Luxh renani xhetru rusäldi loj xhigabreni, sudzucaj Dios yäl'najn nani rajpreni.

Xcuent binij ni roob

²⁶Guniiza Jesús lojreni:

—Yälrnibee xten Dios najc si'c rsiaje te niguii che rbe'cni binij lo yuj, ²⁷dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdze' nen dojga. ²⁹Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidojpni.

Xcuent bedz muxhtas

(Mt. 13:31-32; Lc. 13:18-19)

³⁰Räjpza Jesús:

—¿Xhini'c najc si'c najc xcälrnibee Dios? ¿Xhi te cuent guiniinu te guilui-inuni? ³¹Si'c te bedz muxhtas ni rbej loyuj, si'c najcni. Bedz muxhtas najcni bedz baze'ru loj guiralii bedze' ni yu' loj guedxliuj. ³²Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiäazni nen xpalaani.

Si'c baluii Jesús ganax con cuent

(Mt. 13:34-35)

³³Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni. ³⁴Con recuent ni ruluiitis gunii Jesús lojreni. Niluxh lo rexepjpacni basule'ni guiraa recuentre.

Rusiadxi Jesús bej näj nisdoo

(Mt. 8:23-27; Lc. 8:22-25)

³⁵Lagajc gudxejga räjpni loj rexpejn̄pacni:

—Colcho', chonnu stelaad nis xten Galilee.

³⁶Basa'ntireni rebejn̄, sanätireni Jesús neñ canuu cadro sobgajcni. Dxejcti sgaii canuu sanajlni. ³⁷Chela gubi' te beduxh, gusloj cayu' nis neñ canuuga. Cadxaj canuuga nis. ³⁸Nagayejs Jesús dejt canuuga, nagayejsni. Bacuäänreni Jesús, räpgajczeni lojni:

—Dad mastr, ¿la dilu jiu siääznu neñ nis, ä?

³⁹Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biacdxini. ⁴⁰Räjp Jesús loj rexpejn̄pacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

Nigui Gadara ni yu' bendxab neñ lastooni

(Mt. 8:28-34; Lc. 8:26-39)

5 Bidzujntireni stelaad ro' nisga, lo yuj xten Gadara. ²Si'ctis ni birii Jesús neñ canuu, biädgjajc te niguii lojni ni birii neñ rebiliää cadro rga'tz bengut. Yu' bendxab neñ lastoo niguiiga. ³Rbäjzni neñ rebiliääga luxh rut rajcdi rucuaduuni, niela con cadenguuib. ⁴Xhidajl huält agacbacuaduureni ni', naa niguiiga con cadenguuib, luxh litis batiuugni recadenguuibga, rut rajcdi rusiacdxini. ⁵Si'ctis canzajni, dxej, yääl. Rbedxa'ni neñ redajn, neñ rebiliää, luxh cagutiugni tiejxhni con reguij. ⁶Che bahuiini loj Jesús zijtru, baxunni huicha-

glojni Jesús, bazuxhijbni lojni. ⁷Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsilu narä.

⁸Sa'csi agac cayäjb Jesús lojni:

—Luj, bendxab, birii neñ lastoo niguiiga.

⁹Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidarlo, sa'csi xhidajl najcnu.

¹⁰Sanuutis canabni lo Jesús na'c guxhañni rebendxabga ste'ca guejdx. ¹¹Ro'c tre' xhidalduxh cuch cuä' dane'ga, caya-jwreni. ¹²Dxejc gunab rebendxabga loj Jesús, räjpreni:

—Baxhañ nuure loj recuchre te jiu'nu neñ lastooreni.

¹³Dxejcti basaan Jesúsreni. Biriiti rebendxabga neñ niguiiga, dxejc biu'reni neñ lastoo recuchga. Yu' si'cti tiop miñ cuch ro'c. Baxun recuchga, dxejc birolreni ro' guilaj, bitejbreni neñ nis, gujttireni neñ nisga.

¹⁴Renani cayajp recuchga baxunreni, huiyeiireni diidxga neñ guejdx, näjza loniaa. Dxejc biääd bejn̄ biädhuii nani gujc ro'c. ¹⁵Che bidzujn̄reni cadro suga' Jesús, bahuiireni loj niguii nani guyu' rebendxabga neñ lastooni. Sobga'ni ro'c, najcwni xhajbni luxh nasa'c yejcni. Niguiire najc nani guyu' bendxab ni laa Legión neñ lastooni. Bidxejbti rebejn̄ nani bahuii lojni. ¹⁶Dxejcru rebejn̄ ni bahuii xhi gujc ro', huiyeiireni diidx xho guzajc niguiire nani guyu' bendxab neñni galoo, näjza nani guzajc recuch. ¹⁷Dxejc gusloj canabreni loj Jesús jiunejzni.

¹⁸Che biu' Jesús neñ canuu, niguii nani guyu' bendxab neñ lastooni gunabni loj Jesús, räjpni:

—Huinä narä.

¹⁹ Per di Jesús nusaan nijni. Räj p Jesús lojni:

—Huij rolizlu, lo resa'lu. Huiyeii didix lojreni xho bennäj Dadlu, näjza xho balaslajzni luj.

²⁰ Sä'ti niguiiga, gusloj cayujyni diidx nen reguejdx xten Decápolis xho bennäj Jesúsni. Guiraa rebejn bidxeloj.

Xindxap' Jairo näjza gunaa ni bahual xhajb Jesús

(Mt. 9:18-26; Lc. 8:40-56)

²¹ Che bidzunsac Jesús stelaad ro'nisga nen canuu, bidzujn xhidalduxh bejn cadro suga'ni. Bia'nti Jesús ro'nisga.

²² Dxejru biääd te niguii nani laa Jairo, ni rnibee nen xquidobáz rexpén Israel. Che bahuiini loj Jesús, bazuxhijbni lojni.

²³ Canabpacni lojni, räj pni:

—Xindxapä'a acayejt. Gudaa, guzujlu naalu yejcn, te jiajcn, te guibajjni.

²⁴ Sanäti Jesús bejnga. Xhidajl bejn sanajlni, luxh cagutäärenini. ²⁵ Loj rebenxhidaalga yu' te gunaa ni agujc tzubitio'p ijz racxhuuni yälguidxbäi.

²⁶ Agudedduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuruni. ²⁷ Sa'csi biejn diajgni xhini'c canii rebejn xcuent Jesús, gubig gunaaga nez dejt Jesús, guideb nen rebejn, bahualni xhajb Jesús.

²⁸ Cayujnni xhigab, naani: “Palga narä falä xhajbtisni, siacä.” ²⁹ Lagajc dxejc guläjz caxe' xtiejn, gucbeeza tiejxhni abirii xcälracxhuuni. ³⁰ Gucbegajc Jesús yu' chu abasiajcn. Gubiregajcn nen rebenxhidaalga, räj pni:

—¿Chuni'c bahual xhabä?

³¹ Dxejru räj p rexpejn pacni lojni:

—Rhuiilu benxhidaal cagutääl, luxh naalu: “¿Chuni'c bahual xhabä?”

³² Sas cahuii Jesús nez ree, nez rec, te fiini loj nani bahualni. ³³ Dxejc bidxejb gunaare, racejsni, sa'csi gucbeeni xhini'c gujcn. Dxejc biäädni, bazuxhi-

jbni loj Jesús, räbliini loj Jesús guira'ti ni bejn. ³⁴ Dxejc räj p Jesús lojni:

—Xindxapä, abiajclu sa'csi huililajzlu. Gulecdxi lajzlu, huij rolizlu, abiajc xcälracxhuulu.

³⁵ Canisijc Jesús si'c che bidzujn renani birii roliz dade' ni rnibee nen xquidobáz rexpejn Israel. Räj pni:

—Agujt xindxape'lu. ¿Xhicuent rusieedru lu Dad mastr?

³⁶ Dxejc che biejn diajg Jesús nani caniireni, räj pni lo dade'ga:

—Na'c guidxejblu. Bililajzti.

³⁷ Luxh dini nusaanru nij chu ninäni, Pedrtis näj Jacoob näjza Juan bejtni.

³⁸ Che bidzujnni roliz dade'ga, bahuii Jesús biey ni cayujn rebejn ni rbedxa' roon. ³⁹ Biu'tini räj pni:

—¿Xhicuent rujntu si'c? Gajd dxape're guet. Nagayejsini.

⁴⁰ Alga baxhiznäjrenini. Dxejc gunibee Jesús birii guiraa rebejnga. Dxejcti huinäni xczuzajn dxape'ga con renani sanäni. Biu'reni cadro naga' dxape're.

⁴¹ Gunaazni naa dxape'ga, dxejc räj pni:

—Talita cumi —nani säloj con xtiidxnu: Dxape', lojlu rniä, huistie.

⁴² Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuii guläs Jesús dxape'ga. ⁴³ Dxejc balijdx Jesús reni te rut lojdi chaye'tzreni xhini'c gujc. Gunibegajcn gudeedreni xhi gauu dxape'ga.

Che guyu' Jesús Nazare't

(Mt. 13:53-58; Lc. 4:16-30)

6 Dxejru birii Jesús ro'c, huijni lajdxni, sanäzani rexpejn pacni. ² Che bidzujn sabd, dxej nani rusilajz rexpejn Israel, gusloj caguluiini nen xquidobáz rexpejn Israel. Bidxeloj xhidajl bejn nani biejn diajg rextiidxni, räj pni:

—¿Caro bisieed niguiire guiraa recosre? ¿Xhi yälnajnre cua'ni ni'c rajc rujnni rextzunduxh Dios con naani? ³ ¿La xhet laadi carpinteer, xi'n Marii, be-

jtz Jacoob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. ⁴Dxejc räjp Jesús lojreni:

—Catis rinälajzreni te ni nmii xtidx Dios. Lajdxotisni, lagajc loj resa'ni, roli-jztisni, ro'c rut rinälajzdini.

⁵Luxh di niajcdi niujn Jesús xhidajl milaagwr ro'c. Tiopchontis benracxhuu basiajcnj, bazujni naani yejcreni. ⁶Bidx-elo Jesús sa'csi di lajzreni nilii. Caguluitini neñ guiraa reguejdx'e ni ria'n gajxh nejzga.

Baxhaļ Jesús tzubitio'p bejn ni rinajlni chaluiireni xtidx Dios

(Mt. 10:5-15; Lc. 9:1-6)

⁷Dxejcru gurejdxni guitzubitio'p xpejnpacni. Gusloj caguxhaļni tiopgajreni; badeedzani yälrnibee lojreni te guinibereeni loj rebendxab.

⁸Gunibeeeni xhet chanädireni lo nejz, ganaxhtis te yajg te sanäjreni. Di nungäjļ chanäreni nicla bisiuud, nicla yätxtiil, niclaza meel neñ dobdäjļ.

⁹Nungäjļza xcaj gura'ch ni'reni, năgajc ga'preni tejtis gamangw, xhet tio'pdini.

¹⁰Dxejcti räjpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga. ¹¹Palga yu' te guejdx cadro direni gusaan jiu'tu luxh di rļajzreni cuadijgreni diidx ni sanātu, colrii guejdxga, colcuijb guxhuj ni'tu si'c te seen te gacbeereni xhet laadi bejnreni. Rnili-iaāpac lojtu, guxiiru trabajw ted reben Sodoma näj reben Gomorra quela rebejn ni yu' guejdx cadro direni gusaan jiu'tu.

¹²Dxejc biriireni, sääreni. Cayäbga-jcreni nanabpac gusiejch lajz rebejn.

¹³Gulääzarenj xhidajl bendxab dxejcti gudääbreni se't yejc xhidajl benracxhuu, luxh biajcreni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴Herodes najc nani rnibee dxejc. Biejn diajgni xpala'n Jesús, sa'csi guiralii rebejn calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

¹⁵Sgaii bejn räjp:

—Laa Elías ni gunii xtidx Diosni.

Sgaiireni räjp:

—Laa te bejn ni nmii xtidx Dios, o sa' te rebejn ni gunii xtidx Dios agujc xchero.

¹⁶Che biejn diajg Herodes si'c, räjpni:

—Laa Juan dee, nani gunibea biru' yejcnj, luxh naj agubansacni loj rebengut.

¹⁷Sa'csi lagajc Herodes gunibee biga' Juan, dxejc bacuaduurenini con cadenguiib neñ latzguiib, xcälnasa'c Herodías. Herodías gujc chääl Lib, bejtz Herodes, dxejc cua' Herodes gunaaga si'c chäälni. ¹⁸Räjp Juan loj Herodes:

—Xhet laadi rbäznäjlu chääl bejtzlu.

¹⁹Ni'cni rdxechlajz Herodías loj Juan, luxh rļajzni ju'tnini, luxh di niajcdini

²⁰sa'csi rdxejb Herodes Juan, sa'csi najnni beñsa'c, bendxan najc Juan, ni'cni dini nusaan niujn Herodías latsiajni.

Mase dini gacbesa'c ni nmii Juan, rucua-diagsa'cni xtiidxni. ²¹Niluxh guyu' xmood Herodías. Che gojļ laj Herodes,

bayaanni rexpejnni ni rnibee, näjza rebejn nani sajc nez región Galilee. ²²Dxejcti biu' xinxä'p Herodías cadro caya-jwreni, baya'ni nez lojreni. Bidxaglaz-

duxh Herodes näjza rexpoozni baya' gunaaga, xinxä'p Herodías. Dxejc räjp Herodes lo gunaaga:

—Gunab ni rļajztislu loä, narä sunidxäni.

²³Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibea.

²⁴ Biriitini nen̄ yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

²⁵ Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Nen̄ te pla't baniidx yejcn̄i.

²⁶ Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlanjni nudxojnni nani gunab gunaaga lojni. ²⁷ Baxhalgajc reii te soldaad ni rcanäj ro'c, baxhalnini, te chaxiini yejc Juan. ²⁸ Ni'c huij, dxejcti bagu'tni Juan nen̄ latzguiib, biädnätini yejc Juan nen̄ te pla't. Badeedtinini loj gunaaga. Dxejcti gunaaga badeednini loj xnanni.

²⁹ Che biejn diajg rexpejnpac Juan si'c, biädläsreni togoolga. Dxejcti bacua'tzrenini nen̄ te baa.

Bayaan Jesús gaii mil bejn

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesús, birreni diidx guiraa ni bejnreni näjza ni baluiireni. ³¹ Dxejc räjp Jesús lojreni:

—Coltaa, xtebnu choñnu cadro rut rbäjzdi, guisilaaznu tudxe'n.

Räjp Jesús si'c sa'csi yu' xhidajl bejn̄ ni sää, ni siäd, nicla gal̄ gauureni. ³² Dxejcti sääreni nen̄ te canuu cadro rut rbäjzdi. ³³ Bahuii xhidajl bejn̄ sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujnreni loj Jesús näjza rexpejnpacni, dxejcti bidojpreni lojni. ³⁴ Birii Jesús nen̄ canuu, bahuiini loj bejnxhidaalga. Dxejc balazlajznireni, sa'csi najceni si'c rexiil ni ruti baxtoor xtenreni. Dxejc gusloj caguluiinireni guiraloj. ³⁵ Che gojl gudxaj, gubig rexpejnpacni lojni, räjpreni:

—Rut rbäjzdi ree, luxh agudxaj naj.

³⁶ Baxhal̄ rebejn̄ te chääreni lo reguejdx, näjza rerench, te chasiireni yätxtiil gauureni sa'csi xheti xhi gauureni ree.

³⁷ Dxejc räjp Jesús lojreni:

—La'tu coldeed xhi gauureni.

Dxejc räjpreni loj Jesús:

—¿Xhixh saj̄l tiop gayuu meel yätxtiil chosiinu gauu guiraa rebenxhidajlre?

³⁸ Dxejcti räjp Jesús lojreni:

—¿Bal̄ yätxtiil rajtju? Colchahuii.

Che gojnreni balni dxejc räjpreni:

—Gaii yätxtiil, näjza tiop bāj̄l.

³⁹ Dxejcru gunibee Jesús räjpreni loj guiraa rebejn̄:

—Colcuj̄ xcua-xcuuatu loj guixhaya'.

⁴⁰ Sas gurej xcua-xcuuareni. Yu' lajt gurej tegayuureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga näjza guiro'p bāj̄lga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bāj̄l, badeednini loj rexpejnpacni te badeedreni loj guiraa rebenxhidaalga. ⁴² Dxejc gudajw guiraareni, gudxaj xque'reni.

⁴³ Dxejcru batojpreni tzubitiop dxijm̄ guidxadoo yätxtiil näjza bāj̄l ni bia'n.

⁴⁴ Luxh loj guiraa rebejn̄ ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

⁴⁵ Gunibee Jesús jiu' rexpejnpacni nen̄ canuu, chägajceni Betsaida, ni tre' dejt̄z nis stelaad, lał̄ni cagusadiidxni rebejn̄.

⁴⁶ Che gulujx basadiidxnireni, sääni nen̄ redane', sanabni lo Dios. ⁴⁷ Cheni acayu' guxhij̄n, yu' rexpejnpacni nen̄ canuu galäīi nis lał̄ ni suga' Jesús xtebni ro' nis.

⁴⁸ Dxejcti bahuii Jesús abadxajgreni cagusajreni xcanuureni, sa'csi säbduxh bej.

Bejga rulanaareni nez dejt̄zreni stehuält.

Dxejcru che acara yääl, gusaj Jesús loj nis, huijni cadro sasajreni, rlanjni ninijdni lojreni. ⁴⁹ Dxejc che bahuiireni sasaj Jesús loj nis, naareni pet te bejmalni,

ni'c guredxa'reni. ⁵⁰Guiraareni bahui-ireni lojni, bidxebduxh'reni. Sas guniga-jcni loj'reni, räjpni:

—Colsutijp lajz'tu. Laa naräni. Na'c guidx'ejbtu.

⁵¹Dxejcti huä'p Jesús neñ canuu cadro yu'reni. Lagajc dxejc biacdx'i bej, luxh laareni bidxeloduxh'reni, ⁵²sa'csi direni niacbee xhini'c bennäj Jesús reyätxtiil. Guc najd lajz'reni, ni'c direni niacbee.

**Basiajc Jesús rebenracxhuu
neñ guedx Genesare't**

(Mt. 14:34-36)

⁵³Gudejd'reni lo nis, bidzujp'reni lo yuj xten Genesare't. Ro'c bacuaduureni canuu ro' nis. ⁵⁴Che biriireni neñ canuu, biembegajc rebejn Jesús, ⁵⁵dxejcti birii rebejn guideb nejzga. Guslojti siäd-näreni benracxhuu loj Jesús, naga' rebenracxhuuga lo da'. Cadrotis riejn diajg'reni yu' Jesús riäd'näreni rebenracxhuu. ⁵⁶Niluxh cadrotis rij Jesús, neñ reguedxbáz, neñ reguedxro, nájza loj rerench, rguixh'reni rebenracxhuu cadro rajc guii. Dxejcti rniab'reni loj Jesús te gac caan'reni xhajbni, niluxh biajc guiralii renani gudaj'n xhajb Jesús.

Nani runij't lastoo bejn

(Mt. 15:1-20)

7 Dxejcti refarisee, renani najc benguidoo loj guedx Israel, nájza gaii rebejn ni ruluui leii, renani birii Jerusalén, bidojp'reni loj Jesús. ²Bahuiireni cayajw gaii rexpejnpac Jesús, luxh canii rebejn nacdxuudx naareni (dee säloj direni quiiib naareni si'ctis ni rdiib naa reben lajdx'reni). Ni'cni guniyaj'reni rexpejnpac Jesús. ³(Guiraa rebejn xten Israel, nájza refarisee, sasanäj nani baluii rebengool ni yu' guedx Israel'reni. Direni gauu palga direni quiiib naareni balti huält. ⁴Che rbi'reni rij'reni lo guii, rguibsa'creni naareni, loj'reni, ni'reni,

dxejcti rajc rajw'reni. Niluxh guyu' xhidaj'l costumbr ni sasanäj'reni, luxh yu' mood rguuib'reni rextrast'reni nájza rexplooreni, nájza rextrastguiib'reni, nájza rexloon'reni.) ⁵Dxejc gunabdiidx refarisee nájza rebejn ni ruluui leii loj Jesús, räjpni:

—¿Xhicuent di rexpejnpacu gun si'cni baluii rebengool, niluxh rajw'reni guideb nacdxuudx naareni?

⁶Dxejcti gunii Jesús loj'reni räjpni:

—¡Ben guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni, niluxh lastooreni zitro suga' loä.

⁷Xlia'si ruzuxhijb'reni, sa'csi direni chanälajz narä.

Ruluui'reni si'c xtiidxpac Dios nani rniib rebejn.

⁸Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidaj'lru cos sa' redee.

⁹Räjpza Jesús loj'reni:

—Rusa'ntu xtidx Dios te risanäjtu recostumbr xtentu. ¹⁰Sa'csi räjp Moisés: “Huinalajz xtadlu con xnanlu.” Räjpzani: “Sujut'pactu nani gudzubde yejc xtadni o yejc xnanni.” ¹¹Niluxh la'tu rniitu sajc gäb bejn loj xtadni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios).

¹²La'tu ditu gusaan gunru bejn por xtadni nicla por xnanni. ¹³Si'c rbälaztu xtidx Dios, te sasanäjtu recostumbr nani ruluui, luxh xhidaj'l cos sa' dee rujntu.

¹⁴Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä.

¹⁵Rexhicos yälrajw ni rajw bejn, dini gunij't bejnğa, rediidx ni rii neñ lastoo bejn, nájza recos ni rujn bejn, ni'c runij't bejnğa. ¹⁶Pal yu' chu rrajz guisieed, sucuadiajg'ni.

¹⁷ Dxejcti gula'reni loj rebenxhidaal, biu'reni nen yu'. Dxejc gunabdiidx rexpejn pacni loj Jesús xhi säloj cuent ni guniini. ¹⁸ Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' nen bejn digacdi gunijtni lastoo bejn, ä? ¹⁹ Sa'csi dini jiu' nen lastooni; riu'ni xque'ni, rdejdtini.

Si'c guniini te baluini guira'ti xhicos najc naya. ²⁰ Dxejc räjpni:

—Rediidx ni rii nen lastoo bejn, näjza recos ni rujn bejn, ni'c sii runijt lastoo bejn. ²¹ Sa'csi nen lastoo rebejn rii rehxigabguijdx, näjza yälresnäjä chääl sa'ni, yälresnäjä ni xhet najcdi chäälni, yälrugut sa'ni, ²² yälgubaaan, yälrlajzni ga'pni xhixhten bejn, yällatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yälñayechlajzni, yälguyalajz. ²³ Guiraa reyällatsiajre nen lastoo bejn riireni, luxh reni'csi runijt bejn.

Tej guna Sirofenicia ni bililajz xtidx Jesús

(Mt. 15:21-28)

²⁴ Dxejc biriini ro'c, sääni nez guedx Tiro näjza nez Sidón. Ro'c bia'nni nen te yu' sa'csi di rlajzni niacbee rebejn caro yu'ni, niluxh di niajcdi niuxhiga'tztisni. ²⁵ Biengajc diajg te gunaa ro'c yu' Jesús. Xindxape' gunaaga yu' bendxab nen lastooni. Bidzujn gunaaga, bazuxhijbni lo Jesús. ²⁶ Gunaaga rni griegw, najcni bejn Sirofenicia. Gunabni lojni guinibeeni guirii bendxabga nen lastoo xi'nni. ²⁷ Dxejc räjp Jesús lojni:

—Basaan gauxgaa rebiiux, sa'csi xhet laati gudzucajni xcuxtiil rebiiux te gudeednini loj rebä'cw.

²⁸ Dxejc gunii gunaaga, räjpni loj Jesús:

—Yo, Dad. Näjza rebäcua' ni suga' nen mex rajw nani rtejb ro' rebiiux.

²⁹ Dxejcti räjp Jesús lojni:

—Laaca rniliilu. Huij rolijzlu. Abirii bendxab nen lastoo xindxape'lu.

³⁰ Luxh che bidzujn gunaare rolijzni, a dxape' naga' lo da'. Gucbegajc gunaaga abirii bendxab nen lastoo dxape'ga.

Basiajc Jesús te bengop

³¹ Dxejcru birii Jesús stehuält lo rexyuj guedx Tiro, gudejdn nez Sidón näjza rexyuj Decápolis. Bidzujntini ro' nis xten Galilee. ³² Biädnä gaii bejn te niguii ni nacua't diajgni lo Jesús. Digacdi za guinisa'c niguiiga. Biädñabreni lo Jesús nusujni naani yejc niguiiga. ³³ Dxejcti badzucajnini loj rebejn. Baquitzgajcni rebicueñaani nen diajgni, dxejcru batiobxhejn, gudajntini lujdxni. ³⁴ Bahuiini xhaguibaa, bazaa lajzni, dxejc räjpni: —¡Efata! —nani säloj bixal.

³⁵ Dxejcru bixalgajc rediajgni, guban-gajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che räjpni lojreni si'c, laareni batie'chruren diidxga. ³⁷ Rdxeloduxhrene, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

Bayaan Jesús tajp mil bejn

(Mt. 15:32-39)

8 Nen redxejga bidojp xhidalro bejn, luxh xheti xhigauureni. Dxejc gurejdx Jesús rexpejn pacni ni rinajlni, räjpni lojreni:

²—Rulazlazä rebejnre, sa'csi naj rajc chon dxej tre'reni loä, luxh xhet yu'di gauureni. ³ Niluxh palga guxhaläreni rolijzreni, xliajzreni, sidxajgreni lo nejz; sa'csi yu' renani zijtru siäädreni.

⁴ Dxejcru räjp rexpejn pacni lojni: —¿Caro chaca'nu yätxtiil te cha xque' rebejnre ree, cadro rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztisni.

⁶Gunibee Jesús gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, guła'ni reyätxtiilga. Dxejc badeednini loj rexpejn pacni te gutedrenini loj rebenxhidaal. Bateedtireni yätxtiilga lo rebenxhidaalga. ⁷Rajpzareni gaii bälbáz, dxejcti badesac Jesús xquixhtios lo Dios, gunibeeni bateedzareni rebälbázre loj rebenxhidaalga. ⁸Dxejc gudajwreni, gudxaj xque'reni. Dxejc batojp rexpejn pac Jesús gajdz dxijm reyätxtiil naj rebälj dxuc ni bia'n. ⁹Niluxh renani gudajwga najcreni si'cti tajp mil bejn. Dxejcti basadiidxnireni. ¹⁰Biunägajc Jesús rexpejn pacni nen canuu, biädreni nez Dalmanuta.

Gunab reфарisee te senro loj Jesús

(Mt. 16:1-4; Lc. 12:54-56)

¹¹Biäd reфарisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. ¹²Dxejcti bazaa lajz Jesús nen lastooni, räjpni:

—¿Xhicuent rlajz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

¹³Dxejcti basa'nnireni ro'c, biusacni nen canuu, sä'tini stelaad nisga.

Levaduur xten reфарisee

(Mt. 16:5-12)

¹⁴Biallajzreni nica'reni yätxtiil, luxh xhetliidi sanädireni. Tejtis yätxtiil nu'reni nen canuu. ¹⁵Cagulijdx Jesús rexpejn pacni, räjpni lojreni:

—Colsusin, colnati levadaur xten reфарisee, colnatiza levadaur xten Herodes. (Nalajznu, xtiidxreni najc si'c levadaur.)

¹⁶Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

¹⁷Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La lałtis nacnaj lastoottu? ¹⁸¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹Che guła'a guigaii yätxtiil te gudajw gaii mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

²⁰—Che guła'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

²¹Dxejc räjpni lojreni:

—¿La gajdtu gacbesa'c xhi benä?

Basiajc Jesús te lotiä'p Betsaida

²²Bidzunnäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. ²³Dxejc gunaazni naa lotiä'pga, guläänini nen guejdx. Che batiobxhejnni nen rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

²⁴Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

²⁵Basusac Jesús naani yejc rebaloj bejnga. Dxejc bejn Jesús bahuii bejnga. Bi-ajctini, zijtru gujc bahuisa'cni lo guiraa rebejn. ²⁶Dxejcti baxhał Jesúsni rolizjni, räjpni:

—Basquejn, huijga rolizlzu, na'c jiu'lu nen guejdx, na'c gäblu xhi gujclzu lo rebejn ni yu' nen guejdx.

Basule' Pedr Jesús najc Crist

(Mt. 16:13-20; Lc. 9:18-21)

²⁷Birinäj Jesús rexpejn pacni lo reguejdx ni ria'n nez Cesarea xten Filipo.

Lalni sasajreni lo nejz räjp Jesús loj rexpeljpacni:

—¿Chuni'c nii rebejn nacä narä?

²⁸ Sas räjpreni lojni:

—Yu'reni nii najclu Juan ni batiobnis, yu'zareni nii najclu Elías, yu'zareni nii najclu te rebejn ni gunii xtidx Dios.

²⁹ Dxejc räjpni lojreni:

—¿La'tu a'? ¿Chuni'c nriitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

³¹ Dxejcti gusloj Jesús caguluuini rexpeljpacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebejgool ni najc guxhtis nen guedx Israel narä, näjza renani rnibee loj rebixhojz, näjza rebejn ni ruluu lei: sugu'treni narä, luxh ni riojn dxej guibansacä lo rebengut.

³² Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rexpeljpacni. Dxejc gudilnäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴ Dxejc gurejdxni rebenxhidaal con reni najc xpejn pacni, räjpni lojreni:

—Palga yu' chu rlajz gac xpenäpac, sucuääz gunni ni rsia' lajzni gunni, sut-edni trabajw si'c tej ni caj lo crujz, sujiädnajlmi narä. ³⁵ Sa'csi nani rlajz gusläa xcäl nabajjni, sunijtni xcäl nabajjni. Luxh nani runijt xcäl nabajjni xcäl nasa'c narä, xcäl nasa'c xtidxä, siliaapac xcäl nabajjni. ³⁶ Xlia' ga'p bejn guiraloj lo guedxliujre palga nitni lo Dios par tejpas. ³⁷ Xhet gacdi gudeed bejn te

guibannäjni Dios. ³⁸ Nani guituinäj narä con rextidxä naj, cheni najc rebejn ben-dojl, narä, Xi'n Dios nani gujc Niguii, si-tuinääzani che jiädnaä reangl xten Dios che jiälää lo xcälrdimbicha' Xtaä.

9 Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcälrnibee Dios.

Gubixhlo Jesús garenca

(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacoob, näjza Juan, laatisreni huinäni yejc te danro. Ro'c gubixhlojni garenca lojreni. ³ Gusloj rdimbicha' rexpeljpacni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. ⁴ Dxejc baluiiloj Elías näjza Moisés lojreni, cayuinäjreni Jesús diidx.

⁵ Sas räjp Pedr loj Jesús:

—Dad, laaca dxunnu ree. Naj jiennu choñ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacbeeni xhini'c guiniini, sa'csi cadxebduxhrenei.

⁷ Dxejc biääd te za bejn balaa yejcreni. Nen zaga biejn xse' te ni räjp:

—Dee najc xi'nä nani sanälazä, colcua-diajg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjreni dajnga, gunibee Jesús rut lojdi guiniireni xcuent ni bahuiireni, guibanxgaasi Xi'n Dios nani gujc Niguii lo rebengut. ¹⁰ Basälcheereni rediidxre nen lastooreni. Dxejrcu canabdiidx lo sa'reni xhicha säloj guibansacni lo rebengut. ¹¹ Sas gunabdiidxreni lojni, räjpreni:

—¿Xhicuent nii remastr xten leii naquinpac jiädxgaa Elías?

¹² Dxejcti bazejcti diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a',

¿Xhicuent caj lo guijtz xcuent Xi'n Dios ni gujc Niguii, sidejdni trabajwduhx, rutza jiidini? ¹³Luxh narä rniä lojtu, abiääd Elías, luxh bennäjrenini si'ctis ni rlanjreni, si'cpac ni caj loj guijtz ni rusule' xcuentni.

Basijajc Jesús te biuux ni guyu' bendxab nen lastooni

(Mt. 17:14-21; Lc. 9:37-43)

¹⁴Che asiäädreni cadro tre' sgaii rexpejn pac Jesús, bahuiireni loj xhidarlo bejn ni tre' lojreni, luxh cayeinäj rebejn ni ruluii leiireni. ¹⁵Che bahuii guiraa rebejn loj Jesús, bidxeloduxhzeni, baxunreni, huiye'tzreni xchan lojni. ¹⁶Dxejc gunabdiidx Jesús lojreni:

—¿Xhini'c rusieinäjtu laareni?

¹⁷Sas gunii tej reni yu' lo benxhidaalga, räjpni:

—Dad, ree siädnää xi'nä lojlu, yu' bendxab nen lastooni, nani rujn najcni gop. ¹⁸Cheni rniaaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpejn pacu cuääreni bendxabga, niluxh di niajcdi nibäärenini.

¹⁹Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¡Coltanäni loä!

²⁰Dxejc biädnäreni biuuxga lojni. Che bahuii bendxab lo Jesús, basnijni bi'nga, basälta'tinini lo yuj. Sädiidxni, luxh carii bitzun ro'ni. ²¹Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. ²²Balti huält rusäljnini lo guiboo näjza lo nis te ju'tnini. Palga yu' xhi gac gunlu, bala-zlajz nuunu, gucnäj nuunu.

²³Sas räjp Jesús lojni:

—¿Xhicuent rniabdiidxlu la sajc gac-näälu? Xhitis sajc gac par nani rililajz.

²⁴Guredxa' xtad bi'nga, räjpni:

—¡Rililazä! Gucnäj narä te chaliiru lazä.

²⁵Che bahuii Jesús bixa't xhidajl bejn lojni, gudidxa'ni lo bendxabga räjpni lojni:

—Bendxab ni rujn gop, narä canibeä, birii nen lastoo bi'nga. Na'cru chulu nen lastooni.

²⁶Dxejcru guredxa' bendxabga, luxh basnibzejni bi'nga, dxejcru biriini nen lastooni. Astoo te bengut bia'n bi'nga ro'c. Xhidajl rebejn räjp:

—Agujtni.

²⁷Dxejc gunaaz Jesús naa bi'nga guläs-nini. Guzuliiti bi'nga. ²⁸Dxejcti che abiu' Jesús nen yu', gunabdiidx rexpejn pacni lojni:

—¿Xhicuent di niajcdi nibäänu bendxabga?

²⁹Dxejc räjp Jesús lojreni:

—Di gacdi cuäätu sa' bendxabre palga ditu cuedx-guinab lo Dios, palga ditu gucuanxgaa.

Gunisac Jesús xho guetni

(Mt. 17:22-23; Lc. 9:43-45)

³⁰Dxejc biriireni ro'c, gudejdreni Galilee. Luxh di rlanj Jesús niacbee rebejn sadejdreni nejzga, ³¹sa'csi caguluiini rexpejn pacni. Cayäjpni lojreni: “Xi'n Dios ni gujc Niguii sidejdni ladznaa rebejn, niluxh sugu'trenini. Che guiza' choñ dxej gujtni, sibajjni stehuält.” ³²Niluxh laareni direni niacbee xhini'c guniini, bidxejbzarenini abdiidxreni lojni.

¿Chuni'c sajrcu?

(Mt. 18:1-5; Lc. 9:46-48)

³³Bidzujntireni Capernaum. Che biu'ni nen yu' räjpni lojreni:

—¿Xhini'c cagusieyту lo nejz?

³⁴Dxejc xhet guniitireni, sa'csi laareni cagusieinäj sa'reni lo nejz don chuni'c sajrcu lojreni. ³⁵Sas gurej Jesús, dx-

ejc gurejdxni guitzubitio'p xpejn'pacni, räjpni lojreni:

—Palga yu' chu r'rajz gasajcru lojtu, sugacxgaani si'c te nani xhet sajcti, sugunzani xtzuun chutis.

³⁶ Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

³⁷ —Chutis ni gacnä j te rebiuxe're sa'csi rinälajzni narä, sacnä jni narä, luxh nani gacnä j narä, xhet narätis gacnä jtini, näjza xtadä nani baxha j narä racnä jni.

Nani di guiniyaj nuunu, xladnu yu'ni

(Lc. 9:49-50; Mt. 10:42)

³⁸ Dxejcti gunii Juan räjpni lojni:

—Bahuiinu lo te bejn ni rbää bendxab con xcäl'rnibee lajlu, niluxh dini sanä j nuunu. Sas huiye'tznu lojni na'c gunni si'c sa'csi dini sanä j nuunu.

³⁹ Dxejc räjp Jesús lojni:

—Na'c gudxojntu gunni si'c sa'csi bejn nani rujn milagwr con xcäl'rnibee laä digacdi guiniyajajcni narä. ⁴⁰ Nani di guidxagdijl nuunu, xlaadnu yu'ni.

⁴¹ Rniliápac lojtu, chutis ni guniidx te bas nis lojtu sa'csi najctu xpejn'pac Crist, siguijx Diosni xcuent nani bejnni.

Nani rujn jiajb bejn lo dojl

(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä nen dojl, sugal te guimolin yejnni dxejcti gucuaarenini lo nisdoo.

⁴³ Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusal'reni luj gabijl, loj bajl ni di jiuui,

⁴⁴ cadro diza xpisiujgreni guet, diza bajl jiuui. ⁴⁵ Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chäälü gabijl, lo bajl ni di jiuui,

⁴⁶ cadro di xpisiujgreni guet, diza bajl jiuui. ⁴⁷ Luxh palga tej balojlu gun gunlu dojl, gulääni: hueenru chäälü

cadro rnibee Dios natiá'p lojlu quela sojb guiro'p balojlu chäälü gabijl, ⁴⁸ cadro di xpisiujgreni guet, diza bajl jiuui.

⁴⁹ 'Si'cni rloj sejd yejc xhi cos yäl'rajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. ⁵⁰ Hueen najc sejd, luxh palga agudejd yäl'nadzij yej'cni, ¿xho guntu te gacsacni nadzij? Colyajc nadzij la'tu, colguibannäsa'c sa'tu.

Baluu Jesús xcuent rä jru'o'n sa'ni

(Mt. 19:1-12; Lc. 16:18)

10 Dxej'cru birii Jesús ro'c huijni nez Judea näjza nez ro' gueu Jordán stelaad. Ro'c bidoj'p xhidajl bejn lojni stehuält, sas guslosacni caguluu'niireni si'ctis ni ruluu'niireni. ² Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chääl'ni, ä?

³ Dxejc laani bazej'cni diidx, räjpni lojreni:

—¿Xhini'c gunibee Moisés guntu?

⁴ Dxej'cru räjpreni:

—Moisés basaan gudeedni te guitz gusaan chääl'ni che guro'nnini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej bejn guedxliuj, “niguii con gunaa benchee Diosreni.” ⁷ “Ni'cni te niguii siriini loj xtadni, loj xnanni te cuäznä jni chääl'ni. ⁸ Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. ⁹ Na'c gudzucaj bejn lo sa bejn'ni nani abachaag Dios lo sa'ni.

¹⁰ Che biu'reni nen yu' gunabdidxsac rexpejn'pacni lojni xcuent rediidxre.

¹¹ Dxejc räjpni lojreni:

—Chutis niguii ni gusaan chääl'ni, sas guchnaani ste'cani, ruj'nni dojl.

¹² Niluxh palga gunaa guro'n chäälni sas guchnaani ste'ca niguii, rujnzani dojl.

**Gunab Jesús gunle'
Dios yejc rebiuxbáz**

(Mt. 19:13-15; Lc. 18:15-17)

¹³ Biädnäza rebejn biuxbáz lojni te gutzuub Jesús naani yejcreni, sas gudidxa' rexpejnacni lojreni. ¹⁴ Che bahuii Jesús xhi cayujn rexpejnacni, bidxe'chni räjpni lojreni:

—Colsaan jiäd rebiuxbáz loä. Na'c gudxojnurení, sa'csi xcälribee Dios najc xten reni najc nadolajz si'c najc biuxbáz. ¹⁵ Rniliäpac lojtu, chutis ni rlajz jiu' lo xcälribee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälribee Dios.

¹⁶ Dxejcti gudääz Jesús rebiuxbáz, bazujzani naani yejcreni, gunab Jesús gunle' Dios yejcreni.

Te bi'n ni rapduxh guninäy Jesús

(Mt. 19:16-30; Lc. 18:18-30)

¹⁷ Che birii Jesús loj xnejzni, ruxun te niguii biäd lojni, bazuxhijbni. Dxejcti gunabdiidx niguiiga lojni räjpni:

—Dad, bensa'c, ¿xhini'c gunä te xca'ä yälñabajn par tejpas?

¹⁸ Sas räjp Jesús lojni:

—¿Xhicuent rmiilu loä bensa'c? Tejtisni najc bensa'c; Diostis najc bensa'c. ¹⁹ Najnlu xhini'c gunibee Dios gunni: “Na'c guesnäjlü chäälni sa'lu, na'c ju'tlu, na'c cuanlu, na'c gusgueelu chutis, na'c cuäalu yejc xhixten sa'lu, huinälajz xtadlu, xnanlu.”

²⁰ Dxejc räjp niguiiga lojni:

—Dad, guiraa redee cayunä cheni gucäli bi'n.

²¹ Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani digap, dxejcti guniidx

Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn diajgni diidxre, guchuin lajzni, xhet laadi yu'ni siini, sa'csi naclenduxh xhixtenni yu'.

²³ Dxejc bahuii Jesús guideb gabi lojreni, räjpni loj rexpejnacni:

—Naganduxh jiu' rebejn nani yu'duxh xhixtenni lo xcälribee Dios.

²⁴ Dxejc bidxelo rexpejnacni che biejn diajgrenti rextiidxni. Dxejc räjp Jesús lojreni stehuält:

—¡Aiitu xi'nä!, lacti naganduxh gusaan renani sanälajz xhixtenni guinibee Diosreni. ²⁵ Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

²⁶ Dxejc bidxeloduxhreni, räjpreni lojni:

—¿Chuxhni'c sajç laa lo dojl?

²⁷ Dxejc bahuii Jesús lojreni, räjpni:

—Bejn digacdi guslaa sabejnni, Diostis rajc ruslaa bejn lo dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajlnu luj.

²⁹ Dxejc räjp Jesús:

—Rniliäpac lojtu, chutis nani cuälaz rolizjni, rebejzjni, rebisiajnini, xtadni, xnanni, chäälni, rexi'nini, rexyujni, xcäl'nasa'c narä, näjza xcäl'nasa'c xtidx Dios, ³⁰ sica'ni lo guedxliujre te gayuu huält xhidajlrü. Sica'ni rolizjni, rebejzjni, rebisiajnini, xnanni, rexi'nini, rexyujni. Sisi-unajlrenini naj, dxejc xhaguibaa sica'ni yälñabajn par tejpas. ³¹ Xhidajl rebejn nani sajç lo guedxliujre xhet sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajcreni.

Gunisac Jesús diidx xho guetni

(Mt. 20:17-19; Lc. 18:31-34)

³² Dxejcru sasaj Jesús, nijdni lo rexpejnacni sääreni Jerusalén, luxh cadxelo-

ljreni. Cadxejbza rebejn nani sanajljreni. Dxejcti guläsac Jesús rexpejnⁿpacni lo rebejn, gusloj cayäjpni lojreni guira'ti nani sacni. ³³ Räjⁿp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladznaa re-bixhojz nani rnibee näjza rebejn ni ruluii leii. Luxh sinibeereni guetä. Suteedreni narä lo rebenzajt nani digac xpejn Israel. ³⁴ Suxhisnäjreni narä, siguijnreni narä, sutiobxhejnzareni loä, dxejⁿcru sugu'treni narä. Che riojn dxej sibansäcä.

Gunab Jacob näjza Juan te yälⁿasa'c

(Mt. 20:20-28)

³⁵ Dxejcti gubig Jacob näjza Juan, rex'i'n Zebedeo, räjⁿpreni lojni:

—Dad, rlaaznu gunlaalu nani guini-abnu lojlu.

³⁶ Dxejc räjⁿp Jesús lojreni:

—¿Xhini'c rlaⁿzⁿtu gunä xcuent la'tu?

³⁷ Räjⁿpreni:

—Cue tejnu cuä'lu ladbee, xteenu cue cuä'lu ladbäⁿgw che acanibeelu.

³⁸ Dxejc räjⁿp Jesús lojreni:

—Ditu gan xhini'c rniabtu. ¿Xhixh sajⁿc yätu nani yä'ä? ¿Xhixh sajⁿca guirobnistu si'cni guirobnisä? Nalajznu, xhixh sajⁿc tedtu trabajw nani tedä narä.

³⁹ Sas räjⁿpreni lojni:

—Sajⁿc tednuni.

Dxejc räjⁿp Jesús lojreni:

—Guliini sajⁿc yätu nani yä'ä, luxh guirobnistu si'cni guirobnisä narä. ⁴⁰ Te cue tejtu ladbee xtenä steetu cue xladbägⁿwä, xhet xtenä dini te gunidxäni. Rebejn nani agule Dios, reni'c cue xladbeä, xladbägⁿwä.

⁴¹ Luxh che biejn diajg stzuureni bidxe'chreni loj Jacob näjza loj Juan.

⁴² Sas gurejdx Jesúsreni, räjⁿpni lojreni:

—La'tu najntu renani rnibee lo rebejn nani digac xpejn Israel, rdxagⁿlajz gasajcⁿureni lo rebejn. Luxh rebejn ni sajⁿc rnibeduxhⁿreni lo rebejn. ⁴³ Xhet si'cdi guntu la'tu. Chutis nani rlaⁿz

gasajⁿcru lojtu, riäjⁿl gacni mos lojtu. ⁴⁴ Luxh chutis la'tu nani rlaⁿz gasajⁿcru, riäjⁿl gacni xmos guiraatu. ⁴⁵ Di Xi'n Dios ni gujc Niguii niääd, te ga'ptisni mos, biäädzani te quixni con xcälⁿnabajⁿni te laa xhidajⁿl bejn lo dojl.

Basiajc Jesús

Bartimeo, ni natiä'p lojni

(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpejnⁿpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. ⁴⁷ Che biejn diajgⁿi laa Jesús ni siääd Nasare't ni sadejd ro'c, guslojni rbedxa'ni, räjⁿpni:

—Jesús, xi'n David, balazlajz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjⁿpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjⁿpreni lojni:

—Basutijp lajzlu, gusulii, luⁿj cabejdxni.

⁵⁰ Sas ro'ca xhablajzni gudixhni, huisulii, biäädⁿtini lo Jesús. ⁵¹ Dxejc räjⁿp Jesús lojni:

—Naja', ¿xhini'c rlaⁿzⁿtu gunä?

Dxejc räjⁿp lotiä'pga loj Jesús:

—Dad, rlaⁿzä gunlu fiä.

⁵² Dxejcti räjⁿp Jesús lojni:

—Huij, abiajⁿcⁿlu sa'csi rililajzlu.

Lagajc dxejc gujc bahuiini. Sanajltini Jesús lo nejz.

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

11 Cheni sadzujⁿreni gajxh Jerusalén, gudejⁿdreni nen reguedx Betfagé näjza nen guedx Betania nez cuä' dajne' ni laa dan Oliib. Baxhaⁿl Jesús tiop xpejnⁿpacni, ² räjⁿpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxäلتu te bure' ni caduu. Gajd bejn cuibni. Colxhecni, coltanägajcni. ³Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

⁴Säätireni ro'c. Dxejcro ronejz bidxälreni te bure' caduu ro' te lä'. Dxejcti baxhecrenini. ⁵Gaii bejn ni tre' ro'c räjp lojreni:

—¿Xhicuent caguxhectuni?

⁶Dxejc räjpreni loj rebejnğa si'cni räjp Jesús lojreni gäbreni. Basangajc rebejnğa sanäreni bure'ga. ⁷Dxejcro biädnäreni bure'ga loj Jesús. Badzubreni xhablajzreni dejtz bure'ga. Gubijbti Jesús bure'ga. ⁸Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹Rebejn ni nijd lojni näj reni sanajl dejtzni guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. ¹⁰Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

¹¹Dxejcti biu' Jesús nejn guedx Jerusalén. Biu'zani nejn guidoro. Che bahuii Jesús guira'ti ni cayajc neņa, sanäni guitzubito'p xpejnpacni, sääreni Betania sa'csi agudxej.

Batzubde Jesús yejc te yagiigw ni xhet cajdi lojni

(Mt. 21:18-19)

¹²Che bara yääl, biunejzreni Betania. Dxejcti gusloj calaan Jesús, ¹³bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejnpacni.

Gulää Jesús renani ruto' näj renani rsii nejn guidoog

(Mt. 21:12-17; Lc. 19:45-48; Jn. 2:13-22)

¹⁵Dxejcti bidzujnreni guedx Jerusalén. Biu' Jesús nejn guidoro. Gusloj cabääni renani ruto' näj renani rsii nejn guidooga. Niluxh batiejxhni rexmex renani ruchaa meel, näjza reyagxhil xten renani ruto' paloom. ¹⁶Diruni nusaan nidednäjreni xhicos nez nejn guidooga. ¹⁷Dxejc caguluiinireni, räpgajcni lojreni:

—¿La et screedi caj loj guijtz? “Xyu'ä sirilaj yu' cadro rinab guiraa re-benguedxliuj lo Dios.” La'tu abejntuni si'c xpiliää gubaan.

¹⁸Rebixhojz ni rnibee näjza remastr xten leii bejn diajgreni nani gunii Jesús. Sas gudiilreni xho ju'trenini, sa'csi rdxejbrene Jesús, sa'csi guiraa rebejn rdxeloz rextidx Jesús. ¹⁹Che biu' guxhijn, birii Jesús guejdxga.

Gubijdz yagiigw ni bidzubde

(Mt. 21:20-22)

²⁰Che bara yääl gudejdreni, bahuiireni agubijdz guideb yagiigw, näj rexlobaani. ²¹Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcti, agubijdzni.

²²Dxejcti gunii Jesús räjpni lojni:

—Colchalilajz Dios. ²³Rniliäpac lojtu, chutis nani gäb loj dajnre: “Gubicaaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. ²⁴Ni'cni rniä lojtu, xhitis nani guiniabtu lo Dios che rminäjtuni, colchalilajz xca'tuni, dxejc sica'tuni. ²⁵Luxh che guiniabtu Dios, palga yu' chu loj rdxechlajztu, colsiäjilza lajztu, te näjza Xtadtu nani yu'

xhaguibaa gusiäjłza rextojłtu. ²⁶Palga ditu gusiäjł lajztu con resa'tu, diza Xtadtu nani yu' xhaguibaa gusiäjł lajzni rextojłtu.

Yälrnibee xten Jesús

(Mt. 21:23-27; Lc. 20:1-8)

²⁷Sas bidzunsacreni guedx Jerusalén. Lał ni sasaj Jesús neņ guidoro, rebixhojz nani rnibee, nájza rebejn ni ruluii leii, nájza reguxhtis gubig lojni. ²⁸Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

²⁹Dxejc räjpre Jesús lojreni:

—Guiniabdixäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre. ³⁰¿Chu baxhał Juan ni batiobnis? ¿La Dios o la rebejn? Colnii loä naj.

³¹Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxni?”

³²Diza niacti niäjbrei “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac tixdx Dios.

³³Dxejcti guniireni, räjpreni loj Jesús:

—Dinu guidon.

Sas räjpre Jesús lojreni:

—Dizana guiniä xhi yälrnibeere rapä runä redzuunre.

Te xcuent rebenguijdx ni rbázlaa

(Mt. 21:33-46; Lc. 20:9-19)

12 Dxejcti gusloj caguseed Jesús rebejn con recuent ni ruluii, räjpreni:

—Yu' te bejn bazuj yaguub loj xyujni, bejnzani bazaani, dxejceru gudäänni te lajt cadro jiät uubga. Dxejcti bejn ni te yu' jiaa, te ro'c cue nani ga'p lo xyujni.

'Badedlaatinini loj gaii bejn, sä'tini zijt. ²Che bidzujñ xpäii uub, baxhał baxhuan uubga te xmosni loj rebejn ni rbázlaa ro'c, te xca'ni uub nani riäjł

xca' bejnğa. ³Dxejc rebejn ni rbázlaa ro'c gunaazreni mosga, gudijnrenini, luxh bazejrenini siini ganaxni. ⁴Dxejceru baxhał baxhuaanga stee mos lojreni. Niluxh laareni bacuaareni gujni, gudilguijdxreni yejc mosga, xho rnijai ni gubi'ni. ⁵Dxejc baxhał bejnğa stee mos, dxejc bagu'trenini. Baxhałni xhidajlrreni. Gaii gudilguijdxreni, sgaiini bagu'treni.

⁶'Yu'za tejtis xi'nni, luxh sanälajznini. Por lult nájza xi'nni baxhałni, naani: “Siucareni xi'nä.” ⁷Dxejc rebejn nani rbázlaa ro'c räjpre loj sa'reni: “Dee najc laa ni jiannäj ree. Coltaa, guigu'tnuni, te xca'nu yujre.” ⁸Sas gunaazrenini, bagu'trenini. Guläätirenini lo yujğa.

⁹'¿Xhicha gun baxhuan yaguubga rebejnre? Siädni luxh sugu'tni rebejnre, dxejcti gudeedni yujğa loj ste'ca bejn.

¹⁰'¿La gajdtu goł guijtż ni rnii scree?

Guij nani guläcaj renani runchee yu', ni'c agujc mastr ni guzuj galoo.

¹¹Dad xtenu bejn scree, cos sacduxhni nezlojnu.

¹²Dxejc rłajz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidre. Sa'csi bidxejbreni rebenxhidaal, ni'c basa'nrenini, sä'tireni.

Diidx xcuent reimpuet

(Mt. 22:15-22; Lc. 20:20-26)

¹³Dxejcti baxhałreni gaii xpejn refarisee nájza gaii xpejn Herodes loj Jesús te gula'tzreni don xho gac guiniaazreni Jesús. ¹⁴Dxejcti biädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajč tebloj, sa'csi dilu fii la sajč bejn o la xhet sajčdi bejn. Luj ruluiipaclu xhini'c rłajz Dios gun bejn. ¿La laaca quiix bejn reimpuet lo xcubieer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsireni si'cni rniabdiidxreni. Räjpnı lojreni:

—¿Xhicuent runnäjtu narä scree? Col-tanä te meelga loä, te fiä lojni.

¹⁶ Badeedtireni te meel lojni, dxejc räjpnı lojreni:

—¿Chu yejc caj lojni, chu laj caj lojni? Dxejc räjpnı:

—Xten César.

¹⁷ Dxejc räjpnı Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejnğa con xtiidxni.

Yälrbaniabdiidx xcuent yälrbansacni lo rebengut

(Mt. 22:23-33; Lc. 20:27-40)

¹⁸ Sas biädhuui resaducee loj Jesús. Resaducee najc rebejn nani rnii di rebengut guibansac. Dxejc gunabdiidxreni lojni, räjpnı:

¹⁹ —Dad, xleii Moisés ruluii loonu, palga guet te niguii luxh gusa'nıi chäälni ruti xi'nıi, nanabpac xca' bejtzni chäälni, te chu xi'nıi con laani lacua niu' xi'n to-bejtzni. ²⁰ Guyu' gajdz niguii, bejtz najczeni. Sas cua' nıguigalooga chäälni. Che gujtnı ruti xi'nıi. ²¹ Dxejcti cua' ni rojpnğa gunaaga. Che gujtnı, rut gajcdı xi'nıi. Si'cza gusajc ni riojnğa. ²² Si'cza gulänäj gunaaga guigajdzreni. Per nicla tej reni di xi'nreni niu'. Dxejcti gujtzta gunaaga. ²³ Guigajdzreni gulänäjreni gunaare. Cheni guibansacreni lo rebengut, ¿chu chääl gacni?

²⁴ Dxejc bazejc Jesús diidx lojreni, räjpnı:

—Et laadi nııtu, sa'csi ditu gumbesa'c rextidx Dios nani bacuaa renıguui lo guijtz, dizatu gumbec yälrbınee xten Dios. ²⁵ Che guibansacreni loj rebengut, direni guchnaa, rutza gudeedtireni te guchnaareni. Niluxh sajcreni si'c najc

rexangl Dios nani yu' xhaguıbaa. ²⁶ Palga canabdiidxtu la rbansac rebengut, ¿la di lajztu guısaj bıltu guijtz ni bacuaa Moısés? Moısés bacuaa nani gunii Dios lojni neñ bajl, räjpnı: “Narä nacä Xtios Abraham, Xtios Isaac, Xtios Jacob.” ²⁷ Palga Dios najc Xtios rebejnre, direni gac bengut, nabannäjreni Dios. Et laadi najc xhıgabtu.

Yälrbınee ni sajrcu

(Mt. 22:34-40)

²⁸ Dxejrcu bidzujn tej rebejn ni najn leii, biejn diajnı xhi canıireni, biejnza diajnı laaca gunii Jesús lojreni. Dxejcti gunabdiidxni loj Jesús:

—¿Xhi mandamıent sajrcu lo guıraareni?

²⁹ Dxejc räjpnı Jesús lojni:

—Mandamıent nani sajrcu loj guıraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, näj xaimlu, näj guideb xcäıejnlu, näjza guideb xcälnadıplajzlu.” ³¹ Sigajcza najc mandamıent ni rojpnğa: “Huınälajz sabejnlu si'ctis sanälajzlu lagajc luj.” Redee najc remandamıent nani sajrcu loj guıraareni.

³² Dxejcti räjpnı bejnğa ni najn leii lojni:

—Laaca gunıılu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn Dios guideb lastoonı, näj xcäıejnıi, näjza xaimnı, näj guideb xcälnadıplajznı, luxh chanälajznı resabejnıi sigajc laani. Redee sajrcu loj ni rujn bejn che rudeedreni gojn lo Dios.

³⁴ Che bahuii Jesús laaca gunııni, räjpnı lojni:

—Guxii cayäädx te jıu'lu loj xcälrbınee Dios.

Sas rutru bıajxhđı gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús nen guidoro, rájpní:

—¿Xho mood rnii rebejn ni najn leii Crist najc xi'n David? ³⁶ Sprit Dxan xten Dios basnii David che bacuaani:

Rájp Dios loj Dad xtená:

“Gurej ladbee xtená, che gudzugáli reni rdxe'ch lojlu.”

³⁷ Palga lagajc David rájp: “Dad, xtená”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lałni caguseedni rebejn, rájpní lojreni:

—Col̄susin, na'c gu'chtu loj rebejn ni ruluii leii. Laareni rlaǰ sanáj relad-siool xtenreni. Rdxaglaǰzreni rnii bejn lojreni nez lo reguii. ³⁹ Rlaǰzarení cuereni cadro rbej renani sajcrú nen reguidoo náǰza cadro ru' relanij. ⁴⁰ Rudzucajzarení xhixten rebiuud, rniizarení xhidalduxh diidx che rolreni le', te rusáuurení loj rebejn. Castigwróru gac redee.

Gojn xten te biud prob

(Lc. 21:1-4)

⁴¹ Dxejcti gurej Jesús cuá' caj cadro rusäl bejn gojn. Cahuiini cagusäl rebejn meel nen cajga. Xhidajl reni rajp cagusäl xhidajl meel nenga. ⁴² Che biäd te biud prob, basälni tiop melbáz ni saj c si'cti tej centaab. ⁴³ Dxejcrú gurejdx Jesús rexpejn pacni, rájpní lojreni:

—Rniliápac lojtu, biud proobre basäl xhidajlrú lo guiraa renani basäl nen cajre, ⁴⁴ sa'csi guiraarení abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunájni.

Gunii Jesús sibijl guidoo

(Mt. 24:1-2; Lc. 21:5-6)

13 Cheni sariireni nen guidoro, rájp tej rexpejn pacni lojni:

—Dad, bahuíi lacti reguij, lacti reyu'.

² Dxejcti rájp Jesús lojni:

—¿La rhuíilu loj reyu're? Nicla tej guij dijia'n dzuub yejc sa'ni, guiraliireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³ Dxejc sobga' Jesús yejc dajne' ni laa dan Oliib, cahuiini nez ro' guideoga. Che sugaxhtebreni, gunabdiidx Pedr náǰ Jacoob náǰza Juan náǰza Andrés lojni, rájpní:

⁴—Gunii loonu, ¿guc gac dee? ¿Xhi guihuiinu te gabeenu asiäddzungajxh soob guiraa rediidxre?

⁵ Dxejcti gusloj gunii Jesús lojreni, rájpní:

—Col̄huii, te rut gusgueedi la'tu, ⁶ sa'csi xhidalduxh bejn jíäd con laä, gäbreni: “Nará nacá Crist”, luxh rniisireni si'c, susguezarení xhidajl bejn.

⁷ Che jiejn diajgtu yu' guer náǰ yäl̄nadxeeb xten guer, na'c guidxeljbtu. Nanabpac gacni; et dxejcdi nitloj guedxliuj. ⁸ Säjs nación yejc sanaciónni, náǰ yäl̄rnibee yejc sayäl̄rnibeeni. Xhidajl lajt saj c xu, siliaanza bejn, luxh säjs rebejn yejc sa'ni. Redee najc ni guisloj guidxelj b, gachuinza laǰzni.

⁹ Dxejc la'tu col̄susin sa'csi suteedreni la'tu ladznáa reguxhtis, siguijnzarení la'tu nen reguidoo. Sacrejdxtu lo regubíeer náǰza loj rereii xcäl̄nasa'c nará, te si'c gac guiniitu xtidxä lojreni. ¹⁰ Nanabpac guirechxgaa xtidx Dios loj guiraa reben guedxliuj. ¹¹ Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jíäjtis yejctú dxejc, sa'csi

xhet la'ditu ni guinii, Sprit Dxaan xten Dios ni guinii. ¹²Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiiux yejc rexcusajnni te guet reguzajnga. ¹³Sidxechlajz guiraa rebejn lojtu sa'csi najctu xpenä; nani ted guiraa retrabajwre, ni'c gudeed Dios xcäl'nabajnni.

¹⁴Che fiitu loj nani najc yälrdxechlajz, nani najc yälrunitloj, nani gunii Daniel ni gunii xtidx Dios. Che fiitu nani suga' cadro di nunyäj suuni, dxejcti suguxun renani yu' nez Judea chääreni nez nen redajn. (Nani gol guijtzre sugacbeenini.) ¹⁵Bejn nani suga' yejc yu' na'c jiajtni jiu'ni nen te yu' xca'ni gaii xhixtenni. ¹⁶Nani yu' loj niaa, di gal jiajt te xca'ni xhablajzni. ¹⁷¡Aii! Xhiza nalas chu regunaa ni nuu báz, luxh renani rusiä' xi'nni, nen redxejga. ¹⁸Colnab loj Dios na'c sactu scree nen rebäinajl. ¹⁹Nen redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. ²⁰Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexejnni nani aguleni.

²¹Dxejc palga yu' chu naa lojtu: "Colhuii, aree Crist", o "Colhuiire, ani suga' rec", na'c chalilajztuni. ²²Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlanjzreni gusgueelireni renani agule Dios. ²³Ni'cni la'tu colsusin; agunixgää lojtu guira'ti ni gac.

Xho gac che jiaäd Xi'n Dios ni gujc Niguii

(Mt. 24:29-35, 42-44; Lc. 21:25-36)

²⁴Nen redxejga, cheni luux retrabajwduxhga, sicäy lo gubijdx, luxh diru bäi gusanij. ²⁵Sitejb reba'lxhaguibaa, sinibsejs recos nani nasnä rebalxhaguibaa. ²⁶Dxejcti suhuii rebejn

loä, Xi'n Dios nani gujc Niguii, siälä nen reza guideb yäl'nibeduxh xtenä, näjza xcäldimbicha'ä. ²⁷Dxejcti guxhalgacä rexanglä jiaätojpreni renani guleä guideb lo guedxliuj, cat nalooli guedxliuj näjza cadro nalooli guibaa.

²⁸Colguiseed nani ruluii yagiigw. Cheni rii rebäte' lojni luxh che rcaj balajz lojni, acaxhnajntu bäi gusguij asadzungajxh. ²⁹Sigajcza, che fiitu acayajc recosre, sacbeetu asiädgaxhä, ameer guidzunä. ³⁰Rniliäpac lojtu, rebejn ni nabajn dxejc, direni nitloj, fixgaareni gac recosga. ³¹Sinitloj guibaa näjza guedxliuj, rextidä di nitloj.

³²Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

³³Colhuii, colsusin, colnab loj Dios, sa'csi ditu gan guc guidzujn redxejga. ³⁴Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canä rolä'. ³⁵Si'cza colsusin, sa'csi ditu gan guc jiaäd baxhuaan yu'ga, la jiaädni gudxej, o la jiaädni garol yääl, o la cäy, o la jiaädni rsil. ³⁶Colsusin, te di guiga'tu nagayejstu che guidzujnni. ³⁷Rediidx nani rniä lojtu, loj guiraa rebejn rniäni: colsusin.

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn. 11:45-53)

14 Riäädx tiop dxej guidzujn lanij, dxej ni ruzaa lajzreni gulaareni ladznaa reEgipto. Nen redxejga rajwreni yätxtiil nani di saguij. Rebixhojz nani rnibee nen guidoo xten rexejnni Israel näj rebejn ni ruluii lei rlanjzreni niniaazreni Jesús con yälrusguee, te nugu'trenini. ²Dxejcti räjpreni lo sa'reni:

—Na'c jiennu scree nen redxelanij, te na'c gun benguejdx biey.

**Te gunaa ni basäl se't
yejc Jesús Betania**

(Mt. 26:6-13; Jn. 12:1-8)

³ Yu' Jesús Betania, rolijz Simón, nani guyu' guejch ni raĵ tiejxhni. Che sobga'ni lo mex, biääd te gunaa ca' te bo'tguij yu' setnard nenñi. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. ⁴ Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga?

⁵ Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Colsaanni, ¿xhicuent rudxoju'ntu nani cayujn gunaare? Cos sacduxh dee benäjni narä. ⁷ Guideb ni guibajntu, su' rebejn nani xhet rajpdi lojtu, luxh che rla-jztu sajč gacnäjtüreni. Narä et xchejdi chu'ä lojtu. ⁸ Gunaare abejnni nani gujctis bejnni. Abaslanexhxgaani tiejhä, te chää tiejhä nen baa. ⁹ Rniliápac lojtu, cadrotis guidzujn xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

Rlajz Judas guto' Jesús

(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejn pac Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguiil Judas xho guto'ni Jesús.

Gudauxchej Dad con rexpejn pacni

(Mt. 26:17-29; Lc. 22:7-23;

Jn. 13:21-30; 1Co. 11:23-26)

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni guĵaareni ladznaa reEgipto. Räjp rexpejn pacni loj Jesús:

—¿Caro rlaizlu chosucheenu te gauulu nadxej, dxelanij?

¹³ Dxejc baxhalni tiop rexpejn pacni, räjpni lojreni:

—Colchäj nen guejdx, ro'c guidxaagtu te niguii ni nuu te re' nis. Colchanajl niguiiga. ¹⁴ Cadro jiu'ni colye'tz loj bejn ni najc rolijzni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejn pacni nadxej, dxelanij?” ¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexгаа nenñi. Colyujn xhi guidaunu ro'c.

¹⁶ Sas huij rexpejn pacni, bidzujn reni nen guejdxga. Bidxälreni te yu' si'cni räjp Jesús lojreni. Ro'c bejnreni xhi guda-jwreni dxelanij.

¹⁷ Che huääz gubijdx, bidzunnäj Jesús guitzubitio'p xpejn pacni. ¹⁸ Laĵni sobga'reni lo mex cayajwreni, räjp Jesús lojreni:

—Rniliápac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räjpni lojreni:

—La tej retzubitio'p, tej ni cayajw loj xpla'tä. ²¹ Sa'csi narä Xi'n Dios nani gujč Niguii, sia'ä, si'c pacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

²² Laĵni cayajwreni, cua' Jesús yätxtiil, badeedzani xquixhtiooz loj Dios dxejc guĵa'nini, badeednini lojreni. Dxejcti räjpni:

—Colca' yätxtiilre. Dee najc si'c tiejhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen basga. ²⁴ Dxejcti räjp Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn. ²⁵ Rniliápac lojtu, diruna yä'ä bin

nani rii yejc uub, dxejli yä'äni stehuält loj xcälrnibee Dios.

Gunii Jesús sinii Pedr dini gumbeeni

(Mt. 26:30-35;

Lc. 22:31-34; Jn. 13:36-38)

²⁶ Che gulujx bilreni te dij xten Dios, biriireni, sääreni nez dajne' ni laa dan Oliib. ²⁷ Dxejcru räjp Jesús lojreni:

—Guiraatu sibälaztu narä naguxhijn, sa'csi si'c cajni lo guijtz: “Sugu'tä baxhtoor luxh suxun rexiiil.” ²⁸ Che guibansacä loj rebengut, ganidä cha'a Galilee, dxejcti jiaädttu.

²⁹ Dxejc räjp Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgaii cuedxa' tiop huält, luj aguiniilu choñ huält dilu gumbee narä.

³¹ Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejnpacni gunii si'c.

Gunab Jesús loj Dios che yu'ni Getsemaní

(Mt. 26:36-46; Lc. 22:39-46)

³² Dxejcti bidzujnreni te lajt cadro laa Getsemaní. Dxejc räjpni loj rexpejnpacni:

—Colcuej ree lañi chanabä lo Dios.

³³ Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh. ³⁴ Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nid-decaj nani sacni dxejc. ³⁶ Räjpni:

—Abba, xtadä, luj rajc rujnlu guira'ti: badzucaj retrabajwre loä. Xhet si'cni rlazädi narä, bejn si'cni rlazzlu luj.

³⁷ Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal?

³⁸ Coltie'ch bacal, colnab lo Dios, te na'c guntu dojl. Lastootu rrajz gutie'chtu bacal, luxh tiejxhtu abadxajg.

³⁹ Huij Jesús stehuält, binabni loj Dios, guniini lagajc rediidx ni guniini galoo.

⁴⁰ Dxejcti biädsacni cadro tre'neni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. ⁴¹ Ni riojn huält biäädni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguii ladznaa rebendojl. ⁴² Colchastie, colcho'. Asiäddzungajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujn Judas, ni najc te retzubitio'p xpejnpacni, siäd-näni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leii, näjza rebejn-gool nani najc guxhtis. ⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵ Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, gulää xs-paadni, gudilguijdxni xmos bixhojz nani sajercu, batiu'ni diajgni. ⁴⁸ Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? ⁴⁹ Guiraa dxej guyu'ä lojtu nen guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰ Dxejcru rexpejn^upacni gulälazrenini, baxuntireni.

Bi'n nani baxun

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini.

⁵² Dxejcti baxunni, libasa'nⁿⁱ bariaadga, sä'tini xhabäälⁿⁱ.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biäd^{nä}reni Jesús loj bixhojz ni sajcru. Bidoj^p rebixhojz nani rnibee, näj rebengool ni najc guxhtis, näjza rebejn ni ruluüi leii. ⁵⁴ Luxh Pedr zijt zijt sanajlni Jesús. Che bidzujntini lo xle' bixhojz ni sajcru, gurenäjⁿⁱ rebejn nani rajp ro'c, cagucha' lajzⁿⁱ lo bajl.

⁵⁵ Rebixhojz nani rnibee, näjza guiraa rebengool ni najc guxhtis, caguiilreni xhi tej xquej Jesús nidxälreni, te nugu'treni Jesús, xhet bidxäldireni. ⁵⁶ Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gaii bejn ni guniireni stee didxxhii xcuent Jesús, räjpreni:

⁵⁸ —Nuunu biejn diaagnu guniini: “Sutiexhä xyu' Dios ni guc-chee con naa rebejn, luxh choñtis dxej guncheä steeni, ni nac-chee et con naadi rebejn.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajcru galäi guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niä^uutis ro'ni, xhet guniidini. Dxejcti gunabdidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nⁿⁱ, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza neñ reza ni tre' xhaguibaa.

⁶³ Dxejcru bixhojz ni sajcruga, batiäjsni tla' xhajnⁿⁱ, räjpni:

—¿Xhi jienrunu guidiilnu diidx xcuentni? ⁶⁴ Abiejn diajgtu xho guniyajni Dios. Naja', ¿xhi najtu?

Dxejcti guiraa^{reni} räjp nungäjl^{pac} guetni.

⁶⁵ Dxejc yu' reni gusloj cagutiobxhejn lojni, luxh basä^uureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjⁿⁱ gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biäd te xcriaad bixhojz ni sajcru. ⁶⁷ Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siäd Nazare't.

⁶⁸ Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii. ⁶⁹ Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beñ Galileelu, luxh guyasi riejn miiilu si'c mii reben Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

⁷² Dxejcti barojp huält guredxa' guidgaii. Dxejc banalajz Pedr nani räjp Jesús lojni: “Che gajdli guidgaii cuedxa'

tiop huält, luj gacla chon huält aräjplu dilu gumbee narä.”

Dxejc guslojni cayoonni.

Suga' Jesús loj Pila't

(Mt. 27:1-2, 11-14;
Lc. 23:1-5; Jn. 18:28-38)

15 Che bara yääl bidxaag sa' rebixhojz ni rnibee, näj rebeḅgool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Bali-ibreni Jesús, sanätirenini, niluxh badeedrenini loj Pila't. ²Dxejc gunabdiidx Pila't loj Jesús räjpni:

—¿La luj ni najc reii xten rexepejn Israel, ä?

Räjp Jesús lojni:

—Si'cni guniilu, si'c najcni.

³Dxejc gusloj rebixhojz nani rnibee cabe'c rexquej Jesús. ⁴Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'ceni.

⁵Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25;
Jn. 18:38–19:16)

⁶Dxelaniypac ruslaa Pila't tej rebejn ni yu' latzguiib. Ruslaani chutis te ni rniab rebejn. ⁷Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäj gubieer. ⁸Dxejc bidojp xhidajl bejn loj Pila't, gunabreni lojni gunni si'ctis rujnni casob lanij. ⁹Dxejc gunabdiidx Pila't lojreni, räjpni:

—¿La rlanjtu guslaa reii xten rexepejn Israel, ä?

¹⁰Sa'csi gucbegajcni rdxechlajz rebixhojz loj Jesús, ni'c bateedrenini lojni.

¹¹Ni'cni baquiilza rebixhojz ni rnibee rebeḅxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹²Dxejc räjp Pila't lojreni stehuält:

—¿Xhini'c rlanjtu gunnäá nani rniitu reii xten rexepejn Israel?

¹³Dxejcru guredxa'reni:

—¡Bacuaani lo cruju!

¹⁴Dxejc räjp Pila't lojreni:

—¿Xhini'c xhet laati bejni?

Dxejcti laareni rbedxa'urenini:

—¡Bacuaani lo cruju!

¹⁵Baslaati Pila't Barrabás, sa'csi rlanjni nuspaani lajz rebeḅxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruju.

¹⁶Dxejc huinä rexsoldaadni Jesús nen Pretoor, yu' cadro rujnreni yälguxhtis, ro'c batojpreni guiraa resa'reni. ¹⁷Dxejcti bashuajcwreni Jesús te lad moraad, bencheereni te coron guejch basäl'reni yejcnini. ¹⁸Guslogajc caguxhi näjrenini, caniireni lojni:

—¡Colguiliä'p xpala'n reii xten rexepejn Israel!

¹⁹Batiäjl'reni te yabixhijl yejcnini, batiobxhejnreni lojni, luxh guzuxhijbreni te rajnrenini. ²⁰Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpacni. Gulägajc'reni Jesús te cuaarenini lo cruju.

Bacuaarenini Jesús loj cruju

(Mt. 27:32-44;
Lc. 23:26-43; Jn. 19:17-27)

²¹Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcruju Jesús.

²²Dxejcti huinäreni Jesús cadro laa Gólgota, nani säloj: dan Calabeer. ²³Ro'c badeedreni lo Jesús bin nani nu'ch mir lojni, dxejc laani naaddini niä'ni binga. ²⁴Che gulujxti bacuaarenini Jesús loj cruju, gudzujtreni yejc rexhajbni, te don xhini'c xca' tejjarenini.

²⁵ Agujc chon or gulejn gubijdx che bacuaareni Jesús lo cruzj. ²⁶ Letreer cadro bacuaareni xtojlni scree bejnrenini: “Reii xten rexpejn Israel.” ²⁷ Bacuaazareni lo stiop cruzj tiop gubaan, tejni xladbee Jesús, xtee xladbäjgwni. ²⁸ Dxejc guzobj diidx ni caj loj guijtz nani rni: “Loj rebenguijdx bigabni.”

²⁹ Luxh renani sadejd nejzga guniyajreni Jesús, cagusniibreni yejcreni, räjpreni lojni:

—¡Jaa! Luj nutiejxhlu guidoo luxh chontis dxej niunchesacluni. ³⁰ Naj baslaa lagajc luj, biäjt loj cruzjga.

³¹ Näjza rebixhojz ni rnibee, näj rebejn ni ruluu leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani. ³² Naj sujiäjt Cristre, reii xten rexpejn Israel, lo cruzj te guihuiinu, te chalilaaznu.

Näj regubaan ni caj lo cruzj guniyazareni Jesús.

Xcälgujt Jesús

(Mt. 27:45-56;

Lc. 23:44-49; Jn. 19:28-30)

³³ Che gojl läidxej, bicäjy si'cti chon or.

³⁴ Che gudejd chon orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

³⁵ Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxun tejni, bahuajdxni te sponj loj binagr. Dxejcru basäl'nini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruzj.

³⁷ Dxejcru guredxaduxh Jesús, gujtini. ³⁸ Dxejc lajd ni najl nen guidoro biräjsni, gujcn tiop la', jiaali lo yujli.

³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxeloren. Lojreni Jacub' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹ Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädnajl Jesús che biädni Jerusalén.

Biga'tz Jesús

(Mt. 27:57-61;

Lc. 23:50-56; Jn. 19:38-42)

⁴² Biu' gudxhijn, luxh najcni dxe bispr che rusucheereni par sabd, dxej ni rusilajz rexpejn Israel. ⁴³ Biäd José ni siäd Arimatea, najcni te rebejn ni sajc loj reguxhtis. Näjza laani cabäjzni xcälrnibee Dios. Guideb yäl'nabajn gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. ⁴⁵ Che räjp capitángä lojni agujt Jesús, dxejc badeed Pila't tiexh Jesús loj José. ⁴⁶ Agusii José te bariaad, luxh che gulätni Jesús lo cruzj, batejbnini nen bariaadga. Dxejc gudixhni Jesús nen te biliää ni caj cuä' te guilaj, dxejcru batzugni te guiro ro' biliääga. ⁴⁷ Bahuii Marii Magdalen näj Marii xnan José cadro biga'tz Jesús.

Huäjz Jesús loj rebengut

(Mt. 28:1-10; Lc. 24:1-12; Jn. 20:1-10)

16 Che gudejd sabd, dxej ni rusilajz rexpejn Israel, Marii Magdalen näj Marii xnan Jacoob näjza Salomee gusii setnejxh te chatääbreni se'tga tiexh Jesús. ² Che biu' xmaan, rsildooru, che calejn gubijdx, biädreni ro' xpaani. ³ Cayäjp loj sa'reni:

—¿Chu gudzucay guiroga ro' xpaani te jiu'nu?

⁴Che gudixhlojreni, bahuiireni alagubicaĵ guijĵa, luxh najcni te guiroduxh. ⁵Che biu'reni nen biliääga, bahuiireni lo te bi'n sobga' ladbee nen biliääga. Najcw bi'nga te ladnol ni najc siool. Dxejĵ bidxejĵ regunaaga. ⁶Dxejĵti räjp bi'nga lojreni:

—Na'c guidxejĵbtu. Caguiiltu Jesús ni siääd Nazare't, nani cuaj lo cruzj. Rutiruni ree. Agubajĵni lo rebengut, coltahuii cadro gudixhreni tiejxhni. ⁷Colchäj, colchaye'tz lo rexpejnĵpacni, loj Pedr, ganidla Jesús guidzujĵ Galilee, dxejĵti guidzujĵntu. Ro'c fiitu lojni, si'cni guniini lojtu.

⁸Biriitireni ro' biliääga, racejslireni sa'csi cadxejĵbreni. Rut lojdi guniidireni sa'csi cadebduxhreni.

Baluiloj Jesús loj Marii Magdalen

(Jn. 20:11-18)

⁹Gubajĵ Jesús loj rebengut rsildooru che biu' xmaan. Baluilojĵni galoo loj Marii Magdalen, nani agacgulääni gajdz bendxab nen lastooni. ¹⁰Dxejĵti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni. ¹¹Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

Baluiloj Jesús loj tiop xpejnĵpacni

(Lc. 24:13-35)

¹²Ste'ca najc Jesús baluilojĵni loj tio'p renani sasaj sääreni lo nejz. ¹³Dxejĵti

gubi'reni, huiye'tzreni loj sĵaaiĵa, luxh nicla xtidx reni'c di lajzreni nilii.

Baxhaĵ Jesús repost

(Mt. 28:16-20;

Lc. 24:36-49; Jn. 20:19-23)

¹⁴Lult baluilojĵni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut. ¹⁵Räjp Jesús lojreni:

—Colchäj guideb lo guedxliuj, colnii xtidx Dios lo guiraa rebejn. ¹⁶Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. ¹⁷Niluxh remilagwre jiannäj renani chalilajz: sibääreni bendxab xcuentä; siniireni ste'ca diidx; ¹⁸guiniaazreni bäl con naareni; masque yäreni xhicos ni rugu't bejn, xhet gacdireni; susujreni naareni yejĵ rebenracxhuu luxh siajĵ rebenracxhuu.

Huä'p Jesús xhaguibaa

(Lc. 24:50-53)

¹⁹Gulujxĵi gunii Dad Jesús si'c lojreni. Dxejĵ huäjsni sääni xhaguibaa. Ro'c huicueni cuä' Dios ladbee. ²⁰Dxejĵti laareni bire'chreni, guniireni xtidx Dios guiranejz. Lagajĵ Dadga gucnäjreni, bejnĵni milagwr te gucbee bejn laapac xtidx Dios ni caniireni. Sugacni si'c.

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

1 Xhidajl bejn abacuaa lo guijtzcuent guiraa redzuun ni gujc nez loonu te cuäxnejzreni redzuunga ²si'cpac ni biääd rediidxga loonu. Rebejn nani bahuiloj guiraa recosre cheni guslojireni, näjza reni gucnäj basule' xtidx Dios najc renani basule' rediidxga loonu. ³Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴te gacbesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. ⁶Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. ⁷Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸Te dxej, laj ni cayujn Zacarías dzuun nen guidoro si'c bixhojz nez loj Dios, ⁹dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰Laj ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. ¹¹Dxejcti baluiloj te xangl Dios lo Zacarías, suliini ladbee lo dxan cadro cayejc guxhyaal. ¹²Che bahuii Zacarías lo xangl Dios, di jien xhi gunni, lacti

bidxebduxhni. ¹³Sas xangl Dios räjp lojni:

—Na'c guidxejblu, Zacaríi, sa'csi Dios abiejn diajgni xtiidxlu, luxh su' te xi'n chääl, Elisabe't; cuälajluni Juan. ¹⁴Sibalazduxhlu, siroob lastoolu; xhidajl bejn sibalajz sa'csi gaalni, ¹⁵sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dyan xten Dios nen lastooni cheni gaallini. ¹⁶Sujni gusiechajz xhidajl rexpejn Israel, guibi'reni lo Gueb Dios. ¹⁷Juanre sinijdni loj Dad, sujni lagajc xhigab, sajpni lagajc yälrnibee ni gojp profe't Elías, te che jiejn diajgreni xtiidxni susiechajz redad, susiäjlzaren diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jäädsucheeni lastoo rebejn te chalilajzreni xtidx Dad ni jääd.

¹⁸Gunabdiidx Zacaríi loj anglga, räjpni:

—¿Xho mood gacbeä guliilu? Sa'csi anacä bengol, sigajcza chälä.

¹⁹Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jäädnää didxhueenre lojlu. ²⁰Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojb che guidzujn dxej che riäjł gacni.

²¹Lajni cayajc dee, cadxeloj rebejn ni suga' nez ro' yudxan cabäjzreni guirri Zacaríi sa'csi cayaclaani nen yudxan. ²²Che birri Zacaríi, di najcediru niniini loj rebejn; dxejc gucbeereni yu' xhi cosro bahuiini nen yudxan xten guidoo. Dxejc con seen guninäjni rebejnğa, sa'csi xheti xse'ni te niniini.

²³Che gulujx bejnne dzuun nen guidoro, gubi'ni rolizjni. ²⁴Che gudejd redxej dxejcti bazen nuu Elisabe't, chäälni, báz, gaii bäii diruni nirri rolizjni. Bejnne xhigab, räjpni: ²⁵“Si'c

bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäii, baxhaļ Dios xanglni Gabriel lo te guedx Galilee ni laa Nazare't, ²⁷ te chahuiini te dxapxteeb ni laa Marii. Agojt xtiidxni te guchnaani te dade' ni laa José. Dade're najc xagdoo to'reii David. ²⁸ Biu' angre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlju. Abenle' Dioslu loj guiraa regunaa.

²⁹ Luxh che bahuini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?” ³⁰ Dxejc räjp xangl Dios lojni:

—Na'c guidxeyblu, Marii; agule Dios luj. ³¹ Bacuadiajg diidx. Suulu báz, su' te xi'nlu. Che gaalni guirilajni Jesús. ³² Laani sajni te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujc toxtadgoldooni David, ³³ te tejpas guinibeeni loj rexi'n Israel, luxh dipac xcälrnibeeni nitloj.

³⁴ Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

³⁵ Badzu' xangl Dios diidxre lojni, räjpni:

—Sprit Dxaan xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajni te bejdxan, sibälaj bejnni Xi'n Dios. ³⁶ Näjza sa'lu Elisabe't su' te xi'nni luxh anajcni te bengool; ni'cni gunaa nani najreni digacdi chu xi'nni agujc xho'p bäii nuuni báz. ³⁷ Xheti te cos ni naganduxhtej nez loj Dios —räjp Xangl Dios.

³⁸ Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

³⁹ Neñ redxeyga, basquejn Marii sääni lo te guejdx ni tre' neñ redajn xten Judea. ⁴⁰ Biu'ni rolizj Zacarí, guniini xtidxbee loj Elisabe't.

⁴¹ Che bejn diajg Elisabe't guniini, biniib xi'nni xque'ni, gudxaj Sprit Dxaan xten Dios lastoo Elisabe't. ⁴² Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. ⁴³ ¿Chu narä te siädhuui xnan Xtioozä narä? ⁴⁴ Biejntis diagä xtiidxlu, bibalazgajc xi'nä, biniibni xque'ä. ⁴⁵ Sibaa lajzlu, luj ni huililajz sisiojbpac nani gunii Xtadnu Dios.

⁴⁶ Dxejc räjp Marii:

Xaimä rliä'p xpala'n Xtadnu Dios.

⁴⁷ Rbalazduxhza lastoä xcuent Dios ni ruslaa narä lo dojl.

⁴⁸ Sa'csi agule Dios narä, nacä te mos gunaa ni xhet sajcdi, luxh najli sinii rebejn näjza reni churu chu lo guedxliuj, chicbaani loj guiraa regunaa.

⁴⁹ Sa'csi Gueb Dios ni rajp guiraa yälrnibee abejn xhidajl cosro loä, dxanduxh najc lajni.

⁵⁰ Dini cuäaz gulaslajzni guiraa rebejn ni riu xtiidxni, reni rajnni.

⁵¹ Xhidajl cosnagajn abejnni con lagajc naani,

abatie'chni renani rustioob lastooreni rliä'p lagajc xpala'nreni.

⁵² Abasajbni reni rnibee, per rebennadolajz bejnni gacreni benro.

⁵³ Bachajni xque' reni calaan, badeedni ganax cossa'c, niluxh badzu'ni rebejn ni yu' xhixtenreni xhet badeed dini lojreni.

⁵⁴ Gucnäjni naciõn xten xpejn Israel, ni najc xmos Dios.

Di lajzni niäl nulaslajznireni

⁵⁵ sa'csi si'c bia'nni diidx con retoxtagoldoonu,

sinuu gulazlajzni toAbram näjza rexagdooni par tejpas.

⁵⁶ Dxejc bia'n Marii roliz Elisabe't si'cti choñ bäii, dxejc gubisacni rolizjni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te báz niguiini. ⁵⁸ Dxejc bidzujñ rexpisinni näjza resa'ni biädhuiireni guiro'preni che gacbeereni lacti hueen gujc Dios con laani. Bibalaznäjrenini.

⁵⁹ Che gudejd xhujñ dxej, huinäreni baze'ga chuni bee. Rlajz rebejn nirilaj baze'ga si'c laa xtadni, Zacaríi. ⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamiļlu ni laa si'c.

⁶² Dxejcti gunabdiidxreni con seen lo xtad baze'ga te gacbeereni xho rlajzni guirilaj baze'ga. ⁶³ Xtadni gunab te la' guijt, dxejc bacuaani: “Lajni najc Juan.” Dxejc guiraareni bidxelojreni. ⁶⁴ Luxh la-gajc dxejc gujc gunii Zacaríi stehuält, dxejc guslojni calä'pni xpala'n Dios. ⁶⁵ Bidxeloduxh rexpisinnireni xhini'c gujc ro'c. Luxh bire'ch diidx xcuent recosre guideb neñ redajn xten Judea. ⁶⁶ Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni biļ Zacaríi

⁶⁷ Dxejcti biääd Sprit Dxan xten Dios neñ lastoo xtadni Zacaríi, gusloj caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejn Israel,

sa'csi abiädhuiini loonu, ni najcnu rexpejnni,

te siädguslaani nuurnu neñ dojl.

⁶⁹ Abaxhañni loonu te bejn ni rajp yälrusladuxh bejn neñ dojl.

Najcni te rexagdo toxmosni David.

⁷⁰ Lagajc si'cni badeed Dios gunii redade' ni bacuaa xtiidxni lo guijt galoo:

⁷¹ Suslaani nuurnu loj reni rdxe'ch loonu,

näjza ladzñaa rebejn ni gulälaz nurnu.

⁷² Te gulaslajzni retoxtagoldoonu, te soob diidx ni bia'nni con rebejnğa.

⁷³ Scree bia'nni diidx con toxtadgoldoonu, Abram:

⁷⁴ Suslaani nuurnu ladzñaa rebejn ni rdxe'ch loonu,

te na'c guidxeebnu chunu lojni gusoobnu xtiidxni,

⁷⁵ con yälñabansa'c näjza yälguxhtis guiraa redxej ni guibajñnu.

⁷⁶ Luxh luj, baze', sirilajlu dade' nani rnii xtidx Gueb Dios ni yu' xhaguibaa, sa'csi sinijdlu lo Dad te gusucheelu rexnezyulajzni,

⁷⁷ te gunlu gacbee rexpejnni xho gac laani lo dojl,

te gac guibicaj xtojlreni.

⁷⁸ Sa'csi Dios sanälajz bejn,

näjza rulaslajzni bejn ni'cni xhaguibaali suxhañni xi'nni te jädnäni te dxecoob,

⁷⁹ te gusanijni lo rebejn ni nabajn lo yälxcäjy xten dojl,

näjza rebejn ni nabajn lo xpalaa yälgujt, te guluiini xho sánu lo xnez yälrbecdxilajz.

⁸⁰ Dxejc gunís biuxe'ga, guyuduxh xcäriejnni xcuent recos xten Dios. Gubajñni nez loj reyubijdz cheni bidzujñli dxej che baluilojni loj rexpejn Israel, che gusloj cagusule'ni xtidx Dios.

Che gojl Jesús

(Mt. 1:18-25)

2 Neñ redxejga, gunibee Augusto César xcaj laj rebejn guideb guedxliuj lo xquijtzni. ²Ni'c nacobgujic yälbigabre cheni najc Cirenio gobernadoor xten Siria. ³Guiraa rebejn nanab chääreni lagajc lajdxreni te ro'c guigabreni. ⁴Ni'cni birii José guedx Nazare't Galilee, te huijni Judea, lo guedx Belén, cadre gojl toDavid, sa'csi najc José xagdoo toDavid. ⁵Huinäni Marii, nani guchnaani, huijreni guedx Belén te ro'c guigabreni. Luxh nuu Marii báz. ⁶Lalsi yu'reni guedx Belén, bidzujñ dxej ni gaal xi'n Marii. ⁷Ro'c gojl xi'n galooni, dxejc batejbnini te xzuudni. Dxejc gudixhnini cadre rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios näjza rebaxtoor

⁸Gajxh guejdxga guyu' gaii baxtoor cayajpreni xhiilreni lo niaa guxhijñ. ⁹Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhreni. ¹⁰Sas anglga räjp lojreni:

—Na'c guidxejbtu, narä siädnää lojtu te didxsa'c ni suspalajz guiraa beñ guedxliuj. ¹¹Nadxej gojl neñ guejdx xten toDavid, tej ni gusläa bejn neñ dojl, laani najc Crist ni najc Dad. ¹²Dee najc te seen lojtu, sidxäلتu baze'ga nadejbni neñ te xzuudni, naga'ni cadre rusälreni guijxh rajw reguidxaa.

¹³Lagajc dxejc guideb gabi anglga baluiloj naclejñ xangl Dios, gulä'preni xpala'n Dios, räjpreni:

¹⁴Collä'p xpala'n Dios ni yu' xhaguibaali. Suchu yälrbecdxilajz lo reben guedxliuj ni balazlajzni.

¹⁵Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohunii ni guzajc ro'c ni gunii Xtadnu Dios loonu.

¹⁶Rusquenduxhreni sääreni, dxejc bidxälreni Marii näjza José näjza baze' ni naga' neñ cadre rusälreni guijxh rajw reguidxaa. ¹⁷Cheni bahuiireni loj rebejnğa, bijreni diidx xhi räjp rexangl Dios lojreni xcuent baze'ga. ¹⁸Niluxh guiraa reni biejn diajg rediidxre bidxeloduxhreni xtidx rebaxtoorga. ¹⁹Niluxh Marii gulucheeni guiraa rediidx ni biejn diajgni neñ lastooni, rujntisni xhigab xcuent rediidxga. ²⁰Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

Cheni huinäreni Jesús chuni bee

²¹Che gudejd xhujñ dxej, huinäreni baze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bázga.

²²Che basa' redxej ni gac naya te nan si'cni gunibee toMoisés loj xquijtzni, huinäjreni baze'ga guedx Jerusalén, neñ guidoro gunabreni gacnäj Diosni par tejpas. ²³Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios. ²⁴Bidzujñreni ro'c ca'reni te gojn si'cni rnibee rexquijtz Dios: “Tio'p gugue' o tio'p palombáz.”

²⁵Neñ redxejga, neñ guedx Jerusalén rbäjz te dade' ni laa Simeón. Najcni te beñsacduxh, randuxhni Dios, cabäjzni jiaäd te bejn ni gusläa rexpejn Israel. Rbäjz Sprit Dxañ xten Dios neñ lastoo Simeón. ²⁶Sprit Dxañ abejñ gacbeeni dini guet ansde fiini loj Crist ni guxhal Dios. ²⁷Dxejcti räjp Sprit Dxañ xten Dios lojni chääni guidoro. Lañni yu'ni neñ guidoo, bidzujñ José con Marii, biäd-näreni báz Jesús, te gunnäjreni Jesús nani rnibee xtidx Dios gunreni. ²⁸Dxejc

gudääz Simeón bäze'ga, gusloj calä'pni xpala'n Dios, räjpni:

²⁹Dad, asajc gusaanlu guetä con yälrbexilajz,

sa'csi abasooblu nani bia'n diidx gunäjlü xmoslu.

³⁰Sa'csi abahuiloä nani siädgusläa nuurnu neñ dojl,

³¹ni abasujlu nez loj guiraa reben guedxliuj.

³²Laani najc bianij ni susanij loj rebejn ni di gac xpejn Israel, näjza nani gac xpala'n rexpejnlu guedx Israel, lajdxlu.

³³Bidxeloj José näjza xnan Jesús redidx ni canii Simeón xcuent bäze'ga.

³⁴Dxejc benle' Simeón yejczeni, dxejc räjpni lo Marii xnan Jesús:

—Bahuii gan; bäze're biääd te loj rexpejn Israel chu reni sibälaz xtiidxni, te chuzä reni sililajz xtiidxni. Laani gacni te seen nani sibälaz bejn, ³⁵te si'c jienloj xhi xhigab rujn cade tej rexpejn Israel neñ lastooreni. Dxejcti par luj sajcnä asdoo chääz te spaad lastoolu, sa'csi gac huinduxh lastoolu.

³⁶Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famiļ xten Aser. Anajcni bengolduxh. Bachnaani che najcni dxaphuin, luxh gajdzis iyz guläznäjni chäälni che bia'nni biuud. ³⁷Najcni te gunabiuud ni yu' tajbitajp iyz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbex-rniab lo Dios. ³⁸Che gubigni lojreni lagajc dxejc, badeedni xquixtios lo Dios sa'csi abidzujn tej ni gusläa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälrusläa xten Jerusalén.

Che gubi'reni guedx Nazare't

³⁹Che gulujx bejn xcuzajnni guiraa recos ni caj lo xquijtz Dios gunreni, gu-

bisacreni Galilee, lo guedx Nazare't, lajdxreni. ⁴⁰Gunís biuxe'ga, guc nadaanni, guc nasinruzani sa'csi cayacnäjä Diosni.

Che biu' Jesús guidoro

⁴¹Casob iyz rij rexuczajnz Jesús guedx Jerusalén te rinäreni te gojn xten lanij pascw. ⁴²Che basa' Jesús tzubitio'p iyz, huij guiraareni guedx Jerusalén si'c najc costumbr gac lanijga. ⁴³Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. ⁴⁴Bejnreni xhigab pet siädsanäjni rebensa'ni. Si'c guzajreni tebdxex, dxejc gudiilrenini loj resa'reni, näjza loj reni rumbeereni, ⁴⁵direni nidxälmi. Dxejc gubisacreni guedx Jerusalén te huitiilrenini ro'c.

⁴⁶Chon dxej gudiilrenini dxejc bidxälrenini neñ guidoro, sobga'ni nez galäii rebejn ni najn leii, cacuadiajgni xtiidxreni, cayujnzani yälgunabdiidx lojreni. ⁴⁷Luxh guiraareni cacuadiajx xtiidxni, cadxeloduxhreni yäl'najnz xtenni, näjza rediidx ni cagudzu'ni lojreni. ⁴⁸Che bahuii rexuczajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtdlu cayunduxhnu xhigab caguuilnu luj nezree, nezre'c.

⁴⁹Dxejcti räjp Jesús lojreni:

—¿Xhicuent caguuiltu narä? ¿La ditu gan riäjļ gunä xtzn Xtdä, ä?

⁵⁰Luxh laareni direni niacbee rediidx ni guniini lojreni.

⁵¹Dxejcti gubinäjnirenini guedx Nazare't, sanuuni rusooobni xtiidxreni. Luxh Marii gulucheetisni guiraa recos neñ lastooni. ⁵²Duurtis gunís Jesús, caroobruza xcäl'najnni. Sanälajz Diosni, sanälajzza guiraa rebejnni.

Yälrusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

3 Neñ redxex cheni agujc tzuun iyz najc Tiberio César rei, Poncio Pila't najc

gubernadoor xten Judea; Herodes najc gubernadoor xten Galilee; Felipe, bejtz Herodes najc gubernadoor xten Iturea najza Traconite; Lisantias najc gubernadoor xten Abilinia. ²Lagajc nen redxejga Anás najza Caifás najc rebixhojzro xten guidoro guedx Jerusalén. Nen redxejga biääd xtidx Dios lo Juan, xi'n Zacarí cheni rbäjzni nez lo reyubijdz. ³Ni'c canzaj Juan guideb nez reyuj xten gueu Jordán, ro'c basule'ni xcuent yälrusiechljaz, yälrobnis ni nanab gunreni te gudzucaj Dios xtojłreni. ⁴Si'cni caj lo xquijtz Isaías, dade' ni gunii xtidx Dios, cadro räjpni:

Riejn xse' te ni rbedxa' nez loj reyubijdz: “Colyunsa'c xnezyuj Dad, colslüi rexnezyulajzni.”

⁵Guiraa cadro sojb gueed sidxe'ni, guiraa relom sibicajreni, guiraa renezyuj ni xhet naliidi, siliireni, guiraa renezyudxuudx, sacsa'creni.

⁶Dxejcti guralii bejn suhüi loj nani guxhal Dios.

⁷Che bahüi Juan siääd xhidalduxh bejn te guirobnisreni, räjpni lojreni:

—La'tu benguijdx ni najc si'c bälñialajz! ¿Chuni'c balijdxtu guxuñtu loj xcälrdxe'ch Dios ni siädgajxh, ä?

⁸Colguchaa xmoodtu te si'c fii bejn gulliini abasiechljaztu. Na'c cuentis rniitu lagajc nen lastootu “Abram najc xtadnu”, sa'csi narä rniä lojtu, sajz xca' Dios reguijre te con laareni guncheeni bejn gac rexagdo to Abram. ⁹Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

¹⁰Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹Dxejz badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gunreni rajp xhi gaureni, quisrenini loj ni xheti xhi gauni.

¹²Näjza gaii bejn nani rusquijx xcuent reimpuet bidzujñ lojni te guirobnisreni, dxejz gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³Räjp Juan lojreni:

—Na'c gusquijxtu bejn maazdi ni nungäjł quixreni.

¹⁴Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejz räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznaj nani rujntu gaan.

¹⁵Cadxejoj rebejn, cayujnreni xhigabduxh, naareni, “pet Juan najc Crist ni jääd.” ¹⁶Dxejz badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajzru loä, nani nicla gac surloä, cuää xcura'chni. Laani sutiobnisni con Sprit Dxañ xten Dios te cuääzni nen lastootu najza con guiboo, sa'csi rajpruni yälrnibee loä. ¹⁷Aca'ni pal te gusiani triuu te cuääni triusa'c lo guijxh te cucheeni triuu nen ngodx xtenni, dxejcti reguixhtriuuga suze'cnini lo bajl ni rejz par tejpas.

¹⁸Rediidxre najza xhidajł yälrulijdx gunii Juan te basule'ni redidxcoob loj rebejn. ¹⁹Näjza lo Herodes ni najc gubernadoor basule' Juan diidx, gudilñajnini sa'csi xhet laadi cayujñni, sa'csi rbäznäjni Herodías, chääl bejtzni Felipe, najza xcuent sgaii dojł ni bejñni. ²⁰Di Herodes niu xtidx Juan, alga bejñni stee dojł, basälñi Juan nen latzguuib.

Ché gurobnis Jesús

(Mt. 3:13-17; Mr. 1:9-11)

²¹Che batiobnis Juan rebejn, najza Jesús birobnis. Cheni cabedx-canabni lo Dios, bixal xhaguibaa, ²²dxejz biäjł Sprit Dxañ xten Dios si'c te palom, bidzu-

jñni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

²³ Yu' Jesús galbitzuu ijz che gusloj cayujni dzuun ni badeed Dios gunni. Rchalo rebejn najcni xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaf. Isaf gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber

gujc xi'n Sala. ³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

Che biricaj bendxab loj Jesús

(Mt. 4:1-11; Mr. 1:12-13)

4 Jesús, sa'csi rbäjz Sprit Dxan xten Dios lastooni, biunejzni gueu Jordán, dxejc huinä Sprit Dxan xten Diosni lo reyubijdz. ² Ro'c bia'nni tiuu gubijdx, tiuu guxhijn. Ro'c bidzujn bendxab ni rnibee te rlajzni gunni gusoob Jesús xtiidxni. Luxh calaan Jesús, sa'csi gajdni gau guiraa nen redxejga. ³ Dxejc räjp bendxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajn bejn, näjza guiraa diidx nani rnii Dios sujn guibajn bejn.”

⁵ Dxejcti huinä bendxab Jesús jiaa yejc te dajn. Teratbäztis baluilojni guiraa reguedxro ni tre' lo guedxliuj. ⁶ Dxejc räjp bendxab lojni:

—Narä sunidxä guiraa yälrnibee näjza reyälñasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rlazä. ⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidx, räjpni lojni:

—Acaj loj xquijtz Dios: “Dad Xtioistislu ganlu, luxh lojtisni chulu gunlu dzuun.”

⁹ Dxejcti huinä bendxabni lo guedx Jerusalén, huinänini jiaa yejc xques guidoro. Dxejc räjp bendxab lojni:

—Palga guliilu najclu Xi'n Dios, gutiäjs lo yuj ¹⁰ sa'csi si'c caj loj rexquijtz Dios:

SuxhaĴ Dios rexanglni te ga'preni luj,
 11 guiniaazreni luj didi jiajblu lo guij.

12 Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

13 Che baluux bendxab rextiidxni, gubicajni lo Jesús sa'csi dini niujn gaan nusoob Jesús xtiidxni. Guläjzni guidzujn stee dxej te gusacsruni Jesús.

Gusloj Jesús cayujn xtzuunni

(Mt. 4:12-17; Mr. 1:14-15)

14 Dxejc gubi' Jesús lo rexyuj Galilee räjpni yälrmibee xten Sprit Dxan. Bire'ch diidx xcuentni guiraa nen reguejdx ni tre' nejzga. 15 Ruluini nen reguidobáz luxh guiraa rebejn rliä'p xpala'nni.

Jesús guyu' guedx Nazare't

(Mt. 13:53-58; Mr. 6:1-6)

16 Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni nen guidobáz sigajc ni rujnpacni, dxejc huisuliini te bilni 17 reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxälmi cadro rni scree:

18 Sprit Dxan xten Dios suganäj narä, sa'csi agule Dios narä te gusule'ä xtidx-coobni lo rebenprob.

Baxhalni narä te gusiacä lastoo renani di lastooreni cuedxi,

te gusule'ä yälrusläa lo rebejn ni yu' lo dojl,

te gusiacä baloj reben lotiä'p, te guslää reben ni cadejd trabajw,

19 te gusule'ä abiu' ijzsa'c che rulaslajz Dios rebejn.

20 Dxejc basäu Jesús reguijtzga, badeednini loj bejn ni cayacnäj nen guidooga, dxejc gurejni. Sa'csi guiraa rebejn ni sobga' nen guidooga cahuidzu'tzreni lojni, 21 gusloj guniini, räjpni lojreni:

—Lagajc nadxej guzobj rediidx ni caj lo reguijtzre nez loj guiraatu.

22 Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

23 Dxejc räjp Jesús lojreni:

—Siniipactu rediidxre loä: “Doctoor, basiajc lagajc luj”; siniizatu loä: “Recos ni biejn diajgnu bejnlü nez guedx Capernaum, lagajc recosga bejn nez ree cadro najc lajdxlu.”

24 Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rni xtidx Dios, di reben lajdxreni jiu xtiidxni. 25 Luxh rniliä lojtu, che gubajn Elías lo guedxliuj, guyu' xhidajl gunabiuud guedx Israel che di nisguij ni-ajb chon ijz garol, dxejc guyu' yälrianduxh guideb guejdxga. 26 Luxh di Dios nuxhaĴ Elías rolijz nicla tej regunabiuud ni guläjz guedx Israel, alga baxhalnini lo benzijz, rolijz te gunabiuud ni rbäjz Sarepta, gajxh guedx Sidón. 27 Sigajcza che gubajn Eliseo lo guedxliuj, guyu' xhidajl ben racxhuu ni raĴ tiejxhrene guedx Israel, luxh dini nusiajc nicla tejreni, alga basiajcnide' ni laa Naamán, ni siääd te guedxzijz ni laa Siria.

28 Che biejn diajg reni sobga' nen guidoo rextidx Jesús, bidxechduxhrene, 29 huisuliireni, guläarenini nen guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlazjzreni nustejbrenini. 30 Dxejc Jesús sigaj gudejdnide galäiireni, sä'tini ste'ca lajt.

Gulää Jesús bendxab lastoo te dade'

(Mr. 1:21-28)

31 Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexpejn Israel. 32 Bidxelo-

duxhreni xtiidxni sa'csi rusule'ni si'c te beɲnajn, si'c te ni rnibee.

³³ Neɲ guidooga suga' te dade' ni rbäjz te beɲdxab neɲ lastooni. Guredxa'ni ³⁴ räjpni:

—¡Aii! ¡Basaan nurnu! ¿Xhicuent riäd-chu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxan Dios.

³⁵ Gudidxa' Jesús lo beɲdxabga, räjpni lojni:

—Basäu ro'lu, birii lastoo niguiire.

Dxejcti beɲdxabre basäl niguiiga lo yuj nez loj guiraareni, dxejc biriini neɲ lastoo dade'ga, per xhet beɲdini dade'ga. ³⁶ Bidxeloduxh rebeɲnga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebeɲdxab con yälrnibee, luxh rusoob rebeɲdxab xtiidxni, riireni lastoo beɲ.

³⁷ Dxejc gusäab xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr

(Mt. 8:14-15; Mr. 1:29-31)

³⁸ Birii Jesús guidobäz, huijni rolizj Simón. Dxejc naga' xnan sueerg Simón, cayacxhuuni, yu'ni xliaduxh. Sas gun-abduxhrene lojni te gusiajcnini. ³⁹ Gubig Jesús loj nane'ga, gudidxa'ni xli-aaga, luxh lagajc orga biriini xliaa. Dxejc huistiegajcni, gusloj cayujcni mandaad, cahuiinireni.

Rusiajc Jesús xhidajl yälracxhuu

(Mt. 8:16-17; Mr. 1:32-34)

⁴⁰ Laɲ ni cayäz gubijdx, guiraa reni rajp beɲracxhuu ni rajc garen garen yälracxhuu biädnärene rebeɲnga lo Jesús. Dxejc laani batzuubni naani yejc tejgareni, dxejc biajc rebeɲracxhuuga. ⁴¹ Loj rebeɲracxhuuga, yu'reni birii rebeɲdxab neɲ lastooreni, rbedxa'reni räjpreni:

—Luj najclu Xi'n Dios.

Luxh Jesús gudiɲnäjni rebeɲdxab, dini nusaa niniireni sa'csi laareni najnreni najcni Crist ni cabäjzreni.

Rusule' Jesús xtidx Dios

(Mr. 1:35-39)

⁴² Che bianij, biriini lo guejdx, huijni te lajt cadro rut rbäjzdi. Niluxh gudiil re-beɲni, dxejc bidzujcni cadro suga'ni. Rlajzreni nuscuääzrenini te di nuini. ⁴³ Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruga guejdx, ni'cni baxhalpac Dios narä.

⁴⁴ Dxejc si'ctis cuanzaj Jesús basule'ni xtidx Dios neɲ guiraa reguidobäz neɲ reguejdx xten Galilee.

Che gunaazreni xhidajl bäjł

(Mt. 4:18-22; Mr. 1:16-20)

5 Cheni suga' Jesús ro' nis ni laa Gene-sare't, gubig xhidajl beɲ lojni te jiejn diajgreni xtidx Dios. ² Dxejc bahuii Jesús tio'p barcw ni suga' ro' niska, rud yu'di neɲreni sa'csi rebeɲ ni rniaaz bäjł abiri-ireni neɲ rebarcw te caguiibre ni xqui-jxhrene ro' niska. ³ Dxejc biu' Jesús neɲ te barcw ni najc xten Simón, dxejc gunab Jesús chää barcwga lo nis te la', te guibi-cajni ro' yuj. Dxejc gurej Jesús neɲ bar-cwga, ro'cli guslojni caguluuini rebeɲ. ⁴ Che gulujx xtiidxni, räjpni loj Simón:

—Huinä barcw cadro jätru, colcuua xquijxhtu lo nis te guiniaaztu bäjł.

⁵ Räjp Simón lojni:

—Mastr, guideb yäl biennu dzuun, luxh dinu niniaaz nicla tej bäjł, niluxh ɲaj agunibeelu gusälsacnu guijx lo nis.

⁶ Cheni basälreni xquijxhrene lo nis, gunaazreni xhidalduxh bäjł, dxejc gus-lojli caräjs xquijxhrene. ⁷ Dxejc beɲnreni seen loj resa'reni ni yu' neɲ stee bar-cwga te jädyacnäjreni. Bidzujcni tirenireni, bachajreni guiro'p barcw. Gudxaduxh rebarcw, ameer niääzreni neɲ nis. ⁸ Che

bahui Simón Pedr recosre, bazuxhijbni nez loj Jesús, dxejc räjpni:

—Gubicaĵ loä Dad, sa'csi narä nacä te bendojl.

⁹Si'c gunii Simón sa'csi bidxejb laani näjza guiraa rebejn ni yunäjni sa'csi gu-naazreni xhidalduxh bäjl. ¹⁰Näjza Jacoob näjza Juan, rexi'n Zebedeo, ni run-näj Simón dzuun, näjzarenii bidxejbreni. Per Jesús räjp lo Simón:

—Na'c guidxejblu, najli guisloj cuedxlu bejn lacuaa ni guiniaazlu bäjl.

¹¹Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

Basiajc Jesús te bejn ni ral tiejxhni

(Mt. 8:1-4; Mr. 1:40-45)

¹²Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

¹³Dxejc batzuub Jesús naani yejcnii räjpni lojni:

—Rlazä jiajclu. Susiacälu.

Che guniini rediidxre, biacgajc ben racxhuuga. ¹⁴Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

¹⁵Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojpza xhidalduxh bejn te gucudiajgreni xtidx Jesús näjza te gusiajcnii yälracxhuu xtenreni. ¹⁶Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

Basiajc Jesús te bejn ni digacdi guiniib

(Mt. 9:1-8; Mr. 2:1-12)

¹⁷Te dxej lajni caguluuini rebejn, nejzga sobga' gatii farisee näjza gatii bejn ni ruluii leii garen-garen reguejdx, siäädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluijoj suganäj xcälrnibee Dios Jesús te rajc russiajcnii rebenracxhuu. ¹⁸Dxejc bidzujn gatii dade' nuurenii lo te lonbäz te bejn ni digacdi guiniib, rlajzreni gusiu'renini nen yu' te quixhrenini nez loj Jesús. ¹⁹Niluxh direni nidxäl canejz niu'renii sa'csi nadäduxh ro'c sa'csi tre' xhidajl rebejn. Dxejc huäpnäjrenini yejc yu'ga, badzucajrenii gatii tej, dxejc basajbrenii xloon benracxhuuga yejcli yu'ga te gujc bidzujnii nez loj Jesús. ²⁰Che bahuii Jesús yälrlililajz xtenreni, räjpni loj benracxhuuga:

—Dade', agubicaĵ xtojllu.

²¹Dxejc rebejn ni ruluii leii näjza refarisee gusloj cayujnrenii xhigab, naarenii: “¿Chucha niguiire ni caniyajni Dios con rextiidxni? Ruti te bejn ni sajc gudzucaĵ xtojł rebejn, Diostis rudzucaĵ dojl.”

²²Dxejc gucbee Jesús xhi xhigab cayujnrenii, ni'c räjpni lojrenii:

—¿Xhicuent rujntu xhigab si'c nen las-tootu? ²³¿Xhini'c najc guyasiru guiniini: “Agubicaĵ rextojllu”, o guiniini: “Huistie, guzaj”, ä? ²⁴Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yäl'nadip lo guedxliujre te gudzucaĵni xtojł rebejn.

Dxejc räjpni lo bejnnga ni digacdi guiniib:

—Lojlu rniä, jhuistie, guläs xloonlu, huij rolijzlu!

²⁵Lagajc dxejc nez lojrenii huistiegajc bejn ni digacdi guiniib, guläsni xloonni cadro naga'ni, dxejc siini rolijzni, calä'pni xpala'n Dios.

²⁶ Guiraareni rdxeloduxhrenei recosga, dxejc guslojreni calä'preni xpala'n Dios, rdxejblireni räjpreni:

—Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸ Dxejc huisu Leví, basa'nni guiraa recosga, dxejc sanajlni Jesús.

²⁹ Dxejc bejn Leví te lanij rolizjni par Jesús. Biääd xhidajl bejn ni rusquijx xcuent impuest näjza sgaii bejn; sobganäjnireni lo mex. ³⁰ Dxejcti refarisee näjza rebejn ni ruluui lei guslojreni cayeinäjreni rexpejn pac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebendojl, ä?

³¹ Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiinreni te doctoor. ³² Dina niädtedxä rebensa'c, narä biädtedxä rebendojl te gusiechlajzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³ Dxejc gunabdiidx rebejn ga loj Jesús, räjpreni:

—¿Xhicuent lacti rucua'n rexpejn Juan näjza rexpen refarisee, lacti rbedx-rniabreni loj Dios; niluxh rexpejn pacu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajg gucua'n rebejn ni yu' lo te sa' la'ni yunäjreni bi'n, ä? ³⁵ Niluxh sidzujn

dxej cheni sibicaj bi'n lojreni, dxejc sii sucua'nreni.

³⁶ Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. ³⁷ Di gacdi gusalni bincoob nen te guidbiejw sa'csi bincoobga sutiäsa'ni guidbiejwga dxejc sixe' binga, sixijnza guidbiejwga. ³⁸ Ni'cni nanab gusalni bincoob nen guidcoob si'c sigucheeza guiro'preni. ³⁹ Luxh nicla tej bejn ni agu' bin ni yu' agujc xchej rlanj ya bincoob, sa'csi säjbni: “Bin ni yu' agujc xchej najc huenru.”

Rutie' rexpejn Jesús triuu dxej nani rusilajzreni

(Mt. 12:1-8; Mr. 2:23-28)

6 Te dxej ni rusilajz rexpejn Israel sasaj Jesús näjza rexpejn pacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini. ² Dxejc gunabdiidx gaii refarisee ni najc benguidoo, räjpreni lojreni:

—¿Xhicuent rujntu dzuun ni di nungäjł guntu che rajl dxej ni rusilajznu?

³ Dxejc räjp Jesús lojreni:

—¿La gajdtu goł loj reguijtz xhi bejn toDavid cheni calannäjni rebejn nani sanäni, ä? ⁴ Biu'ni nen xquidoo Dios, gudajwni yätxtiil nani di nungäjł gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguii, mibeä dxej ni rusilajznu.

Niguii ni nabijdz naani

(Mt. 12:9-14; Mr. 3:1-6)

⁶ Che gojl stee dxej ni rusilajz rexpejn Israel, biu'ni nen te guidobäz, dxejc gus-

lojni caguluiini rebejn. Lagajc ro'c sobga' te dade' ni nabijdz naani ladbee. ⁷Dxejc remastr xten leii nájza referisee cagula'tzreni te don la susiajcní bejnnga dxej ni rusilajzreni, sa'csi caguuilreni xho gucuaquijreni Jesús. ⁸Niluxh laani najnni xhi xhigab cayujnreni, dxejc guniini lo dade' ni nabijdz naani, rájpní:

—¡Huisulii! ¡Gudaa nez galáaire!

Dxejc huisulii bejnnga, gubigni lojni. ⁹Dxejc rájpní Jesús lojreni:

—Rlazá guiniabdidxá lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnájnu bejn laa xcálnabajnni o la gudzucajnu yálnabajnni, ä?

¹⁰Che gulujx bahuii Jesús loj guiraa rebejn ni tre' guideb gabini, rájpní loj bejn ni nabijdz naani:

—¡Baslii naalu!

Dxejc bejnni si'c, luxh biacgajc naani.

¹¹Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnájreni Jesús.

Gule Jesús guitzubitio'p rexpejn'pacni

(Mt. 10:1-4; Mr. 3:13-19)

¹²Neñ redxejga, huij Jesús loj te dajn te huininájni Xtadni Dios. Ro'c gudejdní yáäl cabedx-canabni lo Dios. ¹³Che bianij lo yuj, gurejdxni rexpejn'pacni. Gulälajnnireni reapost. ¹⁴Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé; ¹⁵Mateo; Tomás; Jacobo xi'n Alfeo; Simón ni nagab loj rexpeñ cananista; ¹⁶Judas, bejtz Jacob; nájza Judas Iscariote ni guto' Jesús loj rebixhojz.

Ruluii Jesús xhidajl bejn

(Mt. 4:23-25)

¹⁷Che biät'náj Jesúsreni yejc dajnga, guzudxireni yejc te danbáz sa'csi suga'

xhidajl bejn ro'c. Siäädreni guiraa nez reguedx Judea, nájza guedx Jerusalén nájza reguejdx ni tre' gajxh nisdoo Tiro con Sidón. Rebejnnga bidzujnreni te gucuadaijgní xtidx Jesús, te gusiajczanireni xcäl'raxhuureni. ¹⁸Guiraa ni rdejdzá trabajw yu' beñdxab neñ lastooreni nájza reni'c biac. ¹⁹Guiraa rebejn r'rajz caan Jesús, sa'csi rusiajcní guiraareni con xcäl'rniibeeni.

Balijdx Jesús rebejn

(Mt. 5:1-12)

²⁰Dxejc bahuii Jesús loj rexpejn'pacni rájpní lojreni:

—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.

²¹'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäj'l Dios lajztu dxejcru suxhijztu.

²²'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii. ²³Colguibalajz neñ redxejga, na'c gac-huin lastootu sa'csi sunidduxh Dios xhi xtentu xhaguibaa. Sigajza basacsí retoxtadgoldooreni rebejn nani gunii xtidx Dios galoo.

²⁴'Probe'zatu, la'tu beñrajp, sa'csi agojptu xcäl'nasa'ctu, xcäl'rbalajztu lo guedxliujre.

²⁵'Probe'tu nani rajp guiraloj xhixtentu naj, sa'csi sidejdtu yäl'rliiaan.

'Proobzatu ni ruxhijztu naj, sa'csi sonduxhtu sidejdtu yäl'huinuxh, yäl'nalas.

²⁶'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

Chanälajzni rebejn nani rdxe'ch lojni*(Mt. 5:38-48; 7:12)*²⁷ Räjpszani:

—La'tu ni cacuadiajgtu rextidä rniä diidre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxe'ch lojtu. ²⁸ Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu. ²⁹ Palga yu' chu rlajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. ³⁰ Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. ³¹ Sigajc ni rlajzlu gunnäj bejn la'tu, si'cza la'tu colyennäj bejn.

³² Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojl. ³³ Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nen dojl. ³⁴ Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendojl rudedlaazareni loj rebejn ni najreni siguixsac ni nasääbreni. ³⁵ La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani gusalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojl. ³⁶ Colgulasajz resa'tu si'c rulasajz Xtadnu Dios guiraa rebejn.

Colgulasajz sa'tu*(Mt. 7:1-5)*³⁷ Räjpszani:

—Na'c guntu yälguxhtis nani rujn bejn, naatu xhet laadi rujnni; te na'cza gun Dios yälguxhtis rextojltu. Na'c gucuaquijtu bejn te sigajcza di Dios gu-

cuaquij la'tu. Colgusiäj-lajz dojl ni rujn sa'tu, te si'cza gusiäj-lajz Dios rextojltu. ³⁸ Colgudeed loj bejn ni rquiinreni te si'cza gusalajz Dios ni rquiintu. Sunidxreni xca'tu te mediid guidxadoo, si-betijp ni yu' nenni, cupe'tlini gusalreni nen xpolstu. Dios sunidx lojtu lagajc con mediid ni ruedeetu loj rebejn.

³⁹ Guniiza Jesús stee cuent räjpszani:

—¿La sajc guluii te bejn lotiä'p nez yuj lo stee bejn lotiä'p, ä? ¿La di guiro'preni guitejb nen te gueed, ä? ⁴⁰ Te bejn ni casieed di gacdi guisiedruni loj ni najn xmastrni. Te bejn, che agulujx bisieedni, sajcnii si'cni najc mastr xtenni.

⁴¹ ¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? ⁴² O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? ¿Benguijdx! Guläxgaa yagro ni yu' balojlu, dxejc sajc fisa'clu te cuäalu guixhbäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg*(Mt. 7:17-20; 12:34-35)*⁴³ Räjpszani:

—Xheti te yagsa'c ni ruedeed ninejxh ni xhet sajcdi, xhetiza te yajg ni xhet sajcdi ni ruedeed ninexhsa'c. ⁴⁴ Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrej. ⁴⁵ Rebensa'c mii didxsa'c, sa'csi xhigabsa'c yu' nen lastooni. Niluxh rebenguijdx mii ganax didxguijdx sa'csi xhigabguijdx yu' nen lastooni, sa'csi ro'ni mii nani yu' nen lastooni.

Tio'p bejn ni benchee tio'p yu'*(Mt. 7:24-27)*⁴⁶ Räjpszani:

—¿Xhicuent miiitu loä: “Dad, Dad,” luxh ditu gun nani rniä guntu? ⁴⁷ Guiniä lojtu chuni'c najc si'c bejn ni riääd

loä, rucudaijgni xtidxä luxh rusobni xtidxä. ⁴⁸ Najcni si'c te bejn ni benchee rolijzni, ganid gudäänni jäät, dxejcti bejnii cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzut'z yejc te guilaj. ⁴⁹ Niluxh reni rcudaijg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujn cimient xten yu'ga. Dxejcti biäjt nisro, bidijnni cuä' yu'ga, dxejc li gurebän yu'ga, gunitlojtini.

Basiajc Jesús xmos te bejn roman ni rnibee

(Mt. 8:5-13)

7 Che gulujx gunii Jesús loj rebejn, huijni te guejdx ni laa Capernaum. ² Ro'c yu' te bejn roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³ Che biejn diajg capitán cagusätreni Jesús, baxhalgajcni gaii bengool lo rexpejn Israel te chagajntreni Jesús jäädni te gusajcni xmos dade'ga. ⁴ Che gubigreni loj Jesús, gusloj gunabduxhrene lojni, räjpreni lojni:

—Dade're najc bensa'c, nungäjł gacnäjluni ⁵ sa'csi sanälajzni lajdx rexpejn Israel, luxh lagajc laani gunibee guchee xquidobäznu.

⁶ Dxejcti huinä Jesúsreni. Cheni siädzungajxhrene royu', baxhal capitán ga gaii xamiigwni, gäbrene loj Jesús:

—Si'c naj capitán: “Di rlazä gutalä xtzuunlu. ¿Chu narä te jiu'lu rolizä? Xhet sacädi. ⁷ Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. ⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädäni; che gäpä loj xmosä: Bejn dee, rungajcni.”

⁹ Che biejn diajg Jesús rediidxre, bidxeloduxhni, gubiréni loj rebejn ni siädna-
jlui, räjpni lojreni:

—Rniliápac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús rolijz capitán, bahuiireni abiajc xmosni.

Baspansac Jesús xi'n te gunabiuud

¹¹ Nejn redxejga, huij Jesús te guejdx ni laa Naän. Huinäni rexpejn pacni näjza xhidajl bejn ni sanajlni. ¹² Che bidzujnni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzreni. ¹³ Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

¹⁴ Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga: —¡Bi'n!, narä rniä lojlu; ¡Huistie!

¹⁵ Dxejc huistie bengutga, sobga'ni guslojni caniini. Dxejc badeed Jesúsni lo xnanni. ¹⁶ Che bahuiireni xhini'c gujc, bidxejbreni, bidxeloduxhrene, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujn nez loonu.

Caniizaren:

—Lagajc Guejb Dios abiädhuii rexpejnii.

¹⁷ Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

Xpejn Juan ni rutiobnis huinabdiidx loj Jesús

(Mt. 11:2-19)

¹⁸ Rexpejn pac Juan ni rutiobnis bij rediidxga lojni che yu'ni latzguiib. ¹⁹ Dxejc baxhalni gaiireni lo Jesús te sanabdiidxreni: “¿La guliipac najclu Crist ni jääd o sibäjznu chu stee bejn, ä?”

²⁰ Dxejcti gubig rexpejn Juan loj Jesús, räjpreni:

—Juan ni rutiobnis baxhaļ nuurnu te guiniabdiidxnu lojlu: “¿La luļ najc Crist ni jiaäd o la sibäznu chu stee bejn?”

²¹ Lagajc dxejc che bidzujñreni, basi-ajc Jesús xhidajļ bejn ni rajc garen-garen yälguijdx, ni yu'za rebeñxab lastooreni, basiajczani baloj ni di fii. ²² Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejñ diajgtu. Colye'tz lojni: “Relotiä'p ruhuisac; rebeñcoj rsiasac; rebeñ ni raļ giejdx tiejxhni, abiajc tiejxhni; rediagcua't riensac diajgreni; rebeñgut, agubansacreni; luxh loj rebeñproob nani cabäz xcälracnäj Dios riejn diajgreni rsiule' xtidx Dios xcuent xho laa bejn lo dojl. ²³ Chicbaa nani rumbee narä, nani di cuälaz narä.”

²⁴ Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? ²⁵ ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabansa'c, rolijz rerei yu'reni. ²⁶ ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios. ²⁷ Juan najc niguii ni ruzä't rexquijtz Dios cadro caj scree:

Narä guxhaļä te niguii nani guinii xtidxä, te nidni lojlu, te laani guzucheeni xnezyujlu nez lojlu.

²⁸ Rniliäpac, loj guiraa rexingaan regu-naa, nicla tejni gajd guiricaj ni najc te beñsacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiaäd, sajcruni loj Juan.

²⁹ Che biejn diajg rebejn näjza reni rusquijx impuest rextiidxni xcuent Juan,

gucbeereni rujn Dios yälguxhtissa'c, sa'csi abatiobnis Juanreni. ³⁰ Niluxh refarisee näjza rebejn ni ruluii leii gulälazreni nani niujñ Dios par laareni, sa'csi direni nicäjb nutiobnis Juanreni.

³¹ Räjpza Jesús lojreni:

—¿Xhocha guiniä najc rebejn nani tre' naj? ³² Najreni si'c rebiuxbäz nani rguijt nez lo guii cadro rdo', rbedxa'reni loj sa'reni, miiireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” ³³ Sa'csi che biääd Juan, dini niauxha't, dizani niä' bin, luxh räjpту: “Yu' beñdxb lastooni.” ³⁴ Dxejcti biälä narä, Xi'n Dios ni gujc Niguii, rauä, rä'ä. Dxejc räjpту: “Bahuiilaare, dade're rauxha't, rä'zani, najcni xamiigw rebeñdojl näjza rebejn ni rusquijx reimpuet xten gubier.” ³⁵ Ni'cni xcälñajn Dios huenliisi rienloj loj dzuun ni rujn rebejn ni najn.

Jesús huij rolijz Simón ni najc farisee

³⁶ Dxejc tej refarisee gunii loj Jesús, räjpni:

—Jiäädлу rolizä te guidaunu.

Dxejc huij Jesús rolijzni, ro'c gurejni lo mex. ³⁷ Rbäz te gunagubejxh lo giejdxga. Che biejn diajgni satajw Jesús rolijz fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. ³⁸ Che biu' gunaaga, bidzujñni lo ni' Jesús, guslojni cayoonni. Con nisbee caguiibni ni' Jesús, dxejc caguspijdzni ni'ni con xquidxejñi. Dxejc bachagro'ni ni'ni bazaazani setnejxhga ni' Jesús. ³⁹ Che bahuii farisee ni gurejdx Jesús rolijzni, recosre, bejnñi xhigab: “Palga gulii najc niguiire Xi'n Dios, sacbeeni chu najc näjza xho najc gunaare ni cagajn ni'ni, sacbeezani najcni te gunadoļduxh.” ⁴⁰ Dxejc gunii Jesús loj fariseega, räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad mastr.

⁴¹ Dxejc räjp Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel. ⁴²Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

⁴³Badzu' Simón diidxre lojni, räjpni:

—Rchaloä bejn ni nazääbru lojni.

Dxejc räjp Jesús:

—Laaca niilu.

⁴⁴Dxejc gubiré Jesús, bahuini loj gunaaga. Dxejc räjpni loj Simón:

—¡Bahuii loj gunaare! Che biu'ä roli-jzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidx-ejcn. ⁴⁵Dilu nuchagro' narä, luxh laani cheli biu'ä ree, gajdni cuäaz guchagro'ni ni'ä. ⁴⁶Dilu nusäl se't yecä, niluxh laani basälni se't ni rlianexhduxh ni'ä. ⁴⁷Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojlneni, guxiiza sanälajzreni Dios.

⁴⁸Dxejcti räjpni loj gunaaga:

—Agubicaj rextojllu.

⁴⁹Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtojlni bejn, ä?

⁵⁰Räjp Jesús loj gunaaga:

—Aguläalu lo xtojllu sa'csi ahuililajzlu; huij naj, bascuexi lajzlu.

Regunaa ni gucnäj Jesús

8 Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluini xcuent xcälrnibee Dios loj rebejn. Sanäni rexejnpacni ²näjza gaii gunaa ni abasajcni, agulääni rebendxab lastooreni, näjza basiajcn

xcälguijdxreni. Tejni laa Marii ni laaza Magdalen, ni gulää Jesús gajdz bendxab nen lastooni. ³Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c ruedeed lagajc xhixtenreni te rio' recos ni rquiinreni.

Xcuent bejn ni rbe'c binij

(Mt. 13:1-9; Mr. 4:1-9)

⁴Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpni:

⁵—Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudajwrenini. ⁶Yu'za lajt bitejb binijga nen reguij cadre xheti xhidajl yuj. Che gulejn binijga, gubidzgajcni sa'csi xheti xcojp ro'c. ⁷Yu'za lajt bitejbni nez nen reyaguejch. Che gulejnni, di reyaguejch nusaan niroob gäjlgä. ⁸Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuardiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹Dxejcti gunabdiidx rexejnpacni lojni räjpreni:

—¿Xhi säloj cuentre?

¹⁰Dxejc räjpni lojreni:

—Lojtu ni najc rexejpnä suniidx Dios yälajn te gacbeetu reyälxhiga'tz xten xcälrnibeeni. Loj chutis stee bejn, siniä recuent lojreni te mase cadxelojreni, di-reni fisa'c, luxh mase cacuardiajgreni, di-reni gacbesa'c.

Rusule' Jesús xcuent ni rbe'c binij*(Mt. 13:18-23; Mr. 4:13-20)*¹¹ Räjpszani:

—Scree säloj cuentre, rebinij najc si'c xtidx Dios. ¹² Binij ni biajb lo nezyuj najc si'c rebejn ni rucuadiajg xtidx Dios. Dxejc riääd bendxab, riäddzucajni redid-xga lastooreni te na'c chailajzreni xtidx Dios, te na'c za laareni lo dojl. ¹³ Binij ni biajb nen reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, näla-jznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. ¹⁴ Binij ni biajb nen reyaguejch najc si'c rebejn ni rucuadiajg xtidx Dios, per lał ni sanuureni xnejzreni, rijia'nreni lo recos guedxliuj, lo yäl'nasa'c ni ruhuiireni, näjza rujnreni si'tis ni rlajz tiejxhrene. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵ Binij ni riajb lo reyusa'c najc si'c rebejn nani rucuadiajg xtidx Dios, ni rililajz diid-xga guideb te lastoya ni najc hueen. Randzu'tzreni xtidx Dios, dxejc rudeedreni te yäl'nasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas*(Mr. 4:21-25)*¹⁶ Räjpszani:

—Ruti te bejn ni rucuaguij te bajl dx-
ejc rusäuni te caj yejc bajlga, dizani
gusujnini dejtz te loon. Alga rusoobnini
nen candilieer loj te mex te guzanijni
guideb nen yu'ga te reni jiu' fiireni lo
bajlga. ¹⁷ Xhet yu'di ni yuchetzu'tzdi ni
di guidzujn dxej guiluini; xhet yu'diza
ni naga'tz naj ni di guidzujn dxej gacbee
bejn.

¹⁸ Ni'cni colcuadiagsa'c diid-x; sa'csi
guiraa rebejn ni rajp yälracbee,

sajprureni yäl'najn. Luxh reni di ninuu
nucuadiajg xtidx Dios, lojni sibicaj näj
ni abacuadiajgni, ni rchaloni najnni.

Xnan Jesús con rebejtzni*(Mt. 12:46-50; Mr. 3:31-35)*

¹⁹ Dxejc bidzujn xnan Jesús näjza re-
bejtzni cadro suga'ni, niluxh di niajcdi
nibigreni lojni sa'csi tre' xhidalduxh bejn
ro'c. ²⁰ Dxejcti huisa'n te bejn diid-x loj
Jesús, räjpn:

—Xnan guejblu näjza rebejtz gue-
jblu suga' rolä', luxh rlajzreni fiireni lo
guejblu.

²¹ Badzu' Jesús diid-xre lojreni, räjpn:

—Xnanä näjza rebetzä najc rebejn ni
rucuadiajg, ni ruzoobza xtidx Dios.

Basiacdxí Jesús te beduxh*(Mt. 8:23-27; Mr. 4:35-41)*

²² Te dxej biu' Jesús näjza rexpelj-
pacni nen te barcw. Dxejc räjpn lojreni:

—Colcho' stelaad ro' nisre.

Basyu'reni barcw lo nis, sä'tireni.

²³ Cheni sadejdreni galäii nisga, gudiejs
Jesús nen barcw. Dxejc gubi' te beduxh
lo nisga, luxh sa'csi lacti nadip ro' bejga,
gusloj cayu' nis nen barcw, ameerli jääz
barcwga lo nis. ²⁴ Dxejcti huicuäänreni
Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajnni, huistieni, dxejc gu-
didxa'ni lo bejga näjza lo nis ni cayäsjaa.
Dxejc guläjz bejga, guredxiza nisga.

²⁵ Dxejc räjpn lojreni:

—¿Con xcälrililajztu, ä?

Per laareni bidxebreni, bidx-
eloduxhrene, canabdiid-xreni lo
sa'reni:

—¿Chuni'c najc niguiire te rnibeeni
bej näjza nis, luxh rusobdiajg bej näjza
nis xtiid-xni?

**Te beñ Gadara ni guyu'
rexsprit bendxab lastooni**

(Mt. 8:28-34; Mr. 5:1-20)

²⁶ Bidzujntireni lo yuj xten Gadara ni tre' stelaad ro' nis nez loj reyuj xten Galilee. ²⁷ Cheni biäjt Jesús neñ barcw baläjni lo yuj, gubig te beñ ni siääd guejdxga lojni. Agujc xchej yu' rebendxab neñ lastooni. Dini gacw xhajnbn, dizani cuääz neñ yu', alga rbäjzni cadro yu' rebaa. ²⁸ Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsilu nuurnu.

²⁹ Guniini rediidxre sa'csi canibee Jesús guirii rebendxabga neñ lastoo beñre. Agujc xchero cazob rniaaz rebendxabga bejnga ruliib rebeñ ni'ni, naani con cadenguuib te guilibdzu'tzni, te xhet gundini beñ. Niluxh laani rutiugya'ni recaden, dxejc rebendxabga rinärenini nez lo reyubijdz. ³⁰ Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni. ³¹ Dxejc gunabduxhrene loj Jesús na'c guxhalsacnireni cadro biriireni. ³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjb Jesús, ³³ birii rebendxabga neñ lastoo dade'ga, biugajczeni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxun reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo re-

beñ rench. ³⁵ Dxejc biädhuui rebeñ xhini'c gujc ro'c. Che bidzujnreni cadro suga' Jesús, bahuiireni loj beñ ni birii bendxab lastooni. Sobga'ni cuä' ni' Jesús, najcwni xhajnbn, luxh xhetru rajcni yejcn; dxejc bidxebduxh rebeñga. ³⁶ Sas reni bahuiloj xho gujcn, bijreni diidx xho basiajc Jesús beñ ni guyu' rebendxabre lastooni. ³⁷ Dxejc guiraa rebeñ Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhrene. Ni'cni biu' Jesús neñ barcw te gubisacni nejz cadro siäädni. ³⁸ Dade' ni birii rebendxab lastooni gunabni lo Jesús gusaanni chanajlnini, niluxh Jesús gumibee jia'nini, räjpni lojni:

³⁹—Gubi' rolijzlu te güilu diidx recosro ni beñ Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

**Xindxa'p Jairo näjza te gunaa ni
gudajñ xhajn Jesús**

(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebeñ gubi'ni, sa'csi cabäjzpacreni guibisacni. ⁴¹ Dxejc bidzujñ te beñ ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni ⁴² sa'csi yu' tejtis xindxa'pni. Yu'ni tzubito'p ijz, luxh cayacxhuuni, ameerli guetni. Lalsi säa Jesús rolijzni, birinajl xhidalduxh beñni, cataälireneni.

⁴³ Loj rebeñga nadxaag te gunaa ni agujc tzubito'p ijz cayacxhuuni, caya-jcni yälguidxbäi. Xlia'si abanijtni guiraa xhixtenni cua' renani rujn remeed. ⁴⁴ Gubig gunaaga dejtz Jesús te gudajñni ro' xhajnbn. Lagajc dxejc biacgajcni.

⁴⁵ Dxejcti gunabdiidx Jesús räjpni:

—¿Chuni'c najc ni gudajñ narä, ä?

Guiraa rebeñ räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälireni luj. ¿Xhicuent rniab-diidxlu: “¿Chu gudajn narä?”

⁴⁶ Räjppac Jesús lojni:

—Yu' chu gudajn narä, sa'csi gucbeä yu' chu basiajc xcalrnibeä.

⁴⁷ Che gucbee gunaaga anajn Jesús gudajnni xhajbni, bidxejbni, racejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajbni näjza xho biacgajcni.

⁴⁸ Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹ Lałni canii Jesús si'c bidzujn te bejn ni siääd rolijz Jairo, ni rnibee te guidobäz. Räjpmi loj Jairo:

—Agujt xindxa'plu. Na'cru gutajllu xtzuum Dad Mastr.

⁵⁰ Che biejn diajg Jesús rediidxga, räjpni loj Jairo:

—Na'c guidxejblu. Huililajzti te jiac xindxa'plu.

⁵¹ Che bidzujnreni rolijzni, xtebtis Pedr, Jacob, Juan näjza xczuzajn dxape'ga biunäjni nen yu'ga. Peta rebejn ni siädnajlni bia'nreni rolä'.

⁵² Cayonduhx guiraa rebejn ni sobga' nen yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

⁵³ Alga baxhiznäjrenini, sa'csi anajnreni agujt dxape'ga. ⁵⁴ Dxejcti gunaaz Jesús naa dxape'ga, dip guniini, räjpni lojni:

—jDxape', huistie!

⁵⁵ Dxejc gubansac dxape'ga, huistiega-jcni. Dxejc gunibee Jesús gudeedreni xhi gauni.

⁵⁶ Bidxeloduxh rexcuzajnni. Per gunibee Jesús na'c güireni diidx xhini'c gujc ro'c.

Ruxhal Jesús guitzubitio'p rexpejn-pacni

(Mt. 10:5-15; Mr. 6:7-13)

9 Batie' Jesús guitzubitio'p rexpejn-pacni te badeedni yälrnibee lojreni te cuääreni reben~~dx~~ab lastoo rebejn, näjza te gusiajcreni rebenracxhuu. ² Baxhalnireni te gusule'reni diidx xcuent xcalrnibee Dios näjza te gusiajcreni rebenracxhuu. ³ Dxejc räjpni lojreni:

—Xhet chanäditu lo nejz, nicla baston, nicla bols, nicla yäxtiil, nicla meel; na'cza chanätu tio'p xhajbtu; tejtisni chanätu. ⁴ Chutis rolijz bejn cadro guidzujntu, ro'c coljia'n cheni guiriilitu lo guejdxga. ⁵ Palga direni gusaan jiu'tu rolijzreni, che jiunejztu lo guejdxga, colcuib guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

Xho gujt Juan ni rutiobnis

(Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu'reni canii laa Juan ni agubansac lo reben~~gut~~. ⁸ Sgaiireni canii abaluiloj Elías. Yu'zarenini canii pet laa stee niguii ni gunii xtidx Dios galoo ni agubansac. ⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diağ xhidajl didxro xcuentni?

Dxejc rlanjpac Herodes fii lojni.

Bayaan Jesús gaii mił bejn

(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejn-pacni, bijreni diidx loj Jesús xhini'c bejnreni. Sas huinä Jesúsreni te lajt cadro ruti bejn, gajxh te guejdx ni laa Betsaida. ¹¹ Che gucbee re-

bejn caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

¹² Che gusloj cayäaz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jiireni te chatiilreni xhi gaureni, näjza cadre tedreni guxhijn lo rerench, neñ reguedxbáz, sa'csi ree xhet yu'di.

¹³ Dxejcti räjp Jesús loj rexpejnpacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'tcis yu' palga dinu chasiiru xhi gau rebeñ xhidajlre.

¹⁴ Luxh najc rebejnnga si'cti gaii mil niguii. Dxejc räjp Jesús loj rexpejnpacni:

—Colyejtz lojreni cuereni xcua-xcuaareni, si'cti tiuubitzugajreni te cuaa.

¹⁵ Si'c bejnrenini, sas gurej guiraa rebejnnga si'c. ¹⁶ Dxejc cua' Jesús gaii yätxtiilga näjza tio'p bäjlga, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjlgga, dxejc sanuutis badeednini loj rexpejnpacni te gudisrenini loj rebejnnga. ¹⁷ Guiraa rebeñ xhidaalga gudajw, gudxaj xque'reni. Dxejcti batojpreni ni bia'n bachajreni tzubutio'p dxijm yätxtiilbiujy näjza bälbiujy ni bia'n.

Gunii Pedr Jesús najc Crist

(Mt. 16:13-19; Mr. 8:27-29)

¹⁸ Te dxej lałni cabedx-canab Jesús lo Dios, xtebni näjza rexpejnpacni, gunabdiidxni lojreni, räjpni:

—¿Chuni'c rnii rebejn nacä?

¹⁹ Dxejc räjpreni lojni:

—Yu'reni rnii najclu Juan ni rutiobnis; yu'zarenii rnii najclu Elías; sgaiireni rnii najclu stee niguii ni gunii xtidx Dios galoo ni agubañsac.

²⁰ Dxejc gunabdiidxni lojreni, räjpni:

—¿La'tu a? ¿Chuni'c rniiu nacä?

Dxejc räjp Pedr lojni:

—Luj najclu Crist Xi'n Dios ni cabäaznu.

Jesús rnixgaa xho guetni

(Mt. 16:20-28; Mr. 8:30-9:1)

²¹ Dxejc gunibee Jesús lojreni, räjpni:

—Na'c gäbtu si'c lo rebejn.

²² Räjpzani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluui xlei Moisés sibälazreni narä, naareni dina gacä Crist ni cabäaznu. Sugu'treni narä Xi'n Dios ni gujc Niguii, niluxh sibansacä ni riojn dxej.

²³ Dxejc räjpni loj guiraaareni:

—Palga chu tejturu rlanj guirinajl narä, nanab jällajzni xhixtenni, te guixeguixee guntisni nani gudedä gunni.

²⁴ Sa'csi nani rlanj guiniazdzu'tzni xcälñabajjni, sunijtni yälñabajn lo Dios; luxh nani runijt xcälñabajni xcuent xtidxä, sica'ni yälñabajn par tejpas. ²⁵ Sa'csi ¿xhi gaan gun te bejn palga xca'ni guideb guedxliuj, luxh gunijtni xcälñabajni lo Dios? ²⁶ Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäazani cheni jällä si'c rei guideb yälrdimbicha' xten Xtaä näjza rexanglni. ²⁷ Guliipac niä lojtu, yu' gaii reni suga' ree, ni di guet, suhuixgaareni xcälrnibee Dios.

Bachaa xho rluiloj Jesús

(Mt. 17:1-8; Mr. 9:2-8)

²⁸ Gudejdti xhujn dxej gunii Jesús didxre, dxejcru huinä Jesús Pedr näjza Jacob näjza Juan, huijreni jiaa yeje te dajn te guredx-gunabni loj Dios.

²⁹ Lałni cabedx-canab Jesús lo Dios, bidxaa xho ruluui lojni; dxej xhajbni gujc nolbäj, rdimbicha'lini. ³⁰ Biricajza tio'p dade' caninäjrenini. Redade'ga najc

toMoisés näjza Elías. ³¹ Rdimbicha'za redade'ga. Caninäjnreni Jesús xcuent xho guetni guedx Jerusalén. ³² Luxh Pedr näjza resa'ni guyuduxh bacal lojnreni; che bire'ch bacal lojnreni bahuiireni lo yärdimbicha' xten Jesús näjza loj guiro'p redade' ni caninäjni. ³³ Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ Lałni caniini si'c, bire' te za gusloj cayäjt yejcreni, dxejc bidxejbreni che biu'reni neñ zaga. ³⁵ Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, colcuadi-ajg xtiidxni.

³⁶ Che gulujx guniini rediidxga, bahuiireni sugaxteb Jesús. Dxejc niäutis ro'reni neñ redxejga, rut lojdi bijreni didix xcuent ni bahuiireni ro'c.

Basiajc Jesús te biuux ni guyu' bendxab lastooni

(Mt. 17:14-21; Mr. 9:14-29)

³⁷ Barayääl cheni biäjtreni yejc da-
jnga, xhidalduxh bejn cabäjz Jesús. ³⁸ Dxejcti te dade' ni nadxaag rebejnğa guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä.

³⁹ Luxh bendxab rniaazni, sas ruscuexa'nini, rajcni si'c yälguidxbej, rbääni bitzun ro'ni, rusacsiduxhnini, luxh dini gusaanni. ⁴⁰ Agunabä loj rexpejnpacku nibääreni bendxabga, luxh di niadjceni.

⁴¹ Dxejc badzu' Jesús diidxre, räjpni:

—iBejn ni di chalilajz, benguijdx! ¿Guclichi chunäätu, gucli gunä huant la'tu? iGudanä xi'nlu ree!

⁴² Dxejc che cabig biuuxga lojni, basälta' bendxabga biuuxga lo yuj, sas gusloj cayajcni si'c yälguidxbeduxh. Dx-

ejc gudidxa' Jesús loj bendxabga, basi-acgajcni biuuxga, dxejc badeednini lo xtadni. ⁴³ Guiraa rebejn bidxeloduxh yälrnibeduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

Lałni cadxeloj rebejn lo recos ni bejn Jesús, räjpni loj rexpejnpackni:

⁴⁴—Colcuadiajgsa'c rediidxre, na'cza jiällajztureni, sa'csi sutedreni narä Xi'n Dios ni gujc Niguui ladznaa rebejn.

⁴⁵ Niluxh di rexpejnpackni niacbee xhi säloj rextiidxni, sa'csi Dios bacua'tznini lojnreni te di niacbeerenini. Bidxejbzarenini niniabdiidxreni loj Jesús xhi säloj rediidxga.

Chuni'c sajcru

(Mt. 18:1-5; Mr. 9:33-37)

⁴⁶ Guslojza rexpejn Jesús canabdiidx lo sa'reni:

—¿Chuchani'c sajcru loonu?

⁴⁷ Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, ⁴⁸ räjpni lojnreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhal narä. Ni najc maazru nadolajz lojtu, ni'c najc ni sajcru.

Nani di guiniyaj nuurnu, xladnu yu'ni

(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää rexpendxab neñ lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojnreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacob näjza Juan

⁵¹ Che siäddzujn redxej ni chää Jesús xhaguibaa, bejnini xhigab chääpacni

guedx Jerusalén. ⁵²Baxhałni gaa bejn gunijd lojni chääreni te guejdx xten Samaria te satilreni cadro jia'nreni ro'c. ⁵³Luxh rebejn samaritan di rlazreni gudedlaareni te lajt cadro jia'nreni, sa'csi najnreni chääreni guedx Jerusalén. ⁵⁴Che biejn diajg Jacoob näj Juan, tio'p xpejn pacni, si'c, sas räjpreni loj Jesús:

—Dad, ¿La rlazlzu guinibeenu jiajt guiboo xhagduxga te guze'cni guiraa re-benguedxga si'cni bejn Elías?

⁵⁵Dxejc bahuii Jesús lojreni, gu-didxa'ni lojreni, räjpni:

—Ditu gaan chuni'c rnibee lastootu.

⁵⁶Sa'csi narä Xi'n Dios ni gujc Niguui dina niälä te gudzucaä xcäl'nabajn re-bejn. Narä biälä te guslaäreni lo dojl.

Dxejcti huijreni garenca guejdx.

Reni rlazj nirinajl Jesús

(Mt. 8:19-22)

⁵⁷Lałni sääreni lo nezyuj, biääd te bejn gunii loj Jesús, räjpni:

—Dad, narä rlazä jiadnalä guejblu cadrotis chää guejblu.

⁵⁸Dxejc badzu' Jesús diidre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguui, dina gapä nicla te lajt cadro guscugä yecä.

⁵⁹Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxxgää xtadä, dxejcru jiadnalä guejblu.

⁶⁰Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl'rnibee Dios.

⁶¹Dxejc räjp steeni lojni:

—Dad, rlazä jiadnalälu, niluxh basanxgaa chasadixä resa'a ni tre'rolizä.

⁶²Dxejc räjp Jesús lojni:

—Nani ruzuj naani yejc garaad, dx-
ejc rudzuré lojni ruhuiini nez dejtzni di
gacdi gunni dzuun lo xcäl'rnibee Dios.

Ruxhał Jesús regayonbitzoo

10 Che gulujx reni'c, gule Jesús gayonbitzoo bejn, baxhałnirenio'pgajreni te basnijdnireni lojni loj reguejdx cadro nanab tedni. ²Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuan xten cose'ch te guxhałni xhidajlru bejn ni gun dzuun gutie' xcose'chni.

³Colchäj la'tu; colhuii xho ruxhałä la'tu si'c xiil galäii recuyo't sa'csi sunnäjreni la'tu si'ctisni rlazreni. ⁴Na'c chanätu ngodx, niclaza guijxh, niclaza xcura'chtu, luxh na'c sudxitu guininäjt bejn lo nejz. ⁵Cheni jiu'tu rolizj te bejn, ganiddoo colye'tz: “Sucuedxilajz reni rbäjz ree.”

⁶Palga najcni te bejn ni rdxagajz yälrbecdxilajz sia'n xcäl'rbecdxilajz ro'c, luxh palga dini gac, sibi' xcäl'rbecdxilajz lojtu. ⁷Coljia'n lagajc rolizj bejn cadro guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäjł xca'ni xcuent dzuunga. Coljia'n tejtis lajt dxejtis ni chutu lo guejdxga.

⁸Xhitis te guejdx ni jiu'tu, palga jiu'reni la'tu, colgajw xhitis ni guniidxreni lojtu. ⁹Colgusiajz reberacxhuu ni yu' ro'c, colye'tz lojreni: “Abidzujngajxh xcäl'rnibee Dios.”

¹⁰Palga jiu'tu te guejdx cadro di rlazreni gucuadijgreni xtiidxtu, colrii lo nezyuj, ro'c colye'tz lojreni: ¹¹“Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzujngajxh xcäl'rnibee Dios lojtu.”

¹²Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist*(Mt. 11:20-24)*¹³ Rájpzani:

—;Probe'tu beṅ guedx Corazín! ;Probe'zatu beṅ guedx Betsaida! Paru nuhúii rebenzjít ni gubajṅ guedx Tiro nájza Sidón remilaagwr ni bená nez lojtu, pet gucli nusiechlajzreni, niajcwreni ladnagas, nibejzareni lo cobdáj si'c te seen abasiechlajzreni. ¹⁴ Che gun Dios fis rextojl rebejṅ guedxliuj, guxiiru gac xfis Dios lo rebenzjít ni gubajṅ guedx Tiro nájza Sidón. Fisroru gun Dios reguedx Corazín nájza Betsaida. ¹⁵ Luxh luṅ guedx Capernaum, rchalolu siájslu xhaguibaa, alga siajblu gabijlli, cadro gaclu fisro xten Dios.

¹⁶ Rájpzani lo rexpejṅpacni:

—Ni riu xtiidxtu, laa xtidxá ni riuni. Nani di jiu xtiidxtu, laa xtidxá ni dini jiu. Luxh ni di jiu xtidxá, laa xtiidx ni baxhaṅ nará ni dini jiu.

Rbi' regayonbitzúu

¹⁷ Che gubi' regayonbitzúu bejṅ nani baxhaṅ Jesús, rbaduxh lajzreni, rájpreni:

—Dad, nájza rebenṅxab rusobdiajg xtiidxnu che rusá'tnu lajlu.

¹⁸ Rájṅ Jesús lojreni:

—O'n. Ni'cni nará bahuiá che gu-nijt xcálrnibee benṅxab, bitejbni xh-aguibaa si'c bianij xten guzii. ¹⁹ Col-gacbee. Nará runidxá yálrnibee lojtu te gulájtu yejc báṅ nájza yejc naxejb; runidxáza yálrnibee te guntu gaan lo xcálrnibee benṅxab. Xhetliidi gun daan la'tu. ²⁰ Na'c guibalajztistu sa'csi rusob-diajg rebenṅxab xtiidxtu; colguibala-jzru sa'csi acuj lajtu lo xquijtz Dios xhaguibaa.

Bibalajz Jesús*(Mt. 11:25-27; 13:16-17)*

²¹ Lagajc dxejc bibalaznáj Jesús Sprit Dxan xten Dios, dxejc rájṅni lo Dios:

—Rliá'pá xpala'nlu Xtaďá ni rnibee xh-aguibaa nájza guedxliuj, sa'csi bacua'tzlu xnezyujlu lo rebeṅ nanduxh, per baluulu xnezyujlu loj rebejṅ ni najc nadolajz si'c te biuxbáz. O'n, Xtaďá, sa'csi si'c rlaizlu gunlu.

²² 'Guiraa recosre abaniidxlu loá Xtaďá. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtaďá, xtebtis nará ni najc Xi'nlu, con rebejṅ ni rlaiz gumbee luṅ.

²³ Dxejc bahuii Jesús loj rexpejṅpacni, rájṅni lojtisreni:

—Chicbaa la'tu nájza renani ruhuii guiraa nani cahuilojtu. ²⁴ Sa'csi rniliá lojtu, balti redade' ni gunii xtidx Dios galoo, baltiza rereii rlaiz nuhiiireni guiraa ni cahuilojtu, niluxh direni nuhiiini. Rlaizreni niejṅ diajgreni rediidxre ni cayejṅ diajgtu, luxh di diajgreni niejṅni.

Xcuent te beṅhuen ni siáď Samaria

²⁵ Dxejc huisulii te mastr xten leii, huinínájni Jesús, rlaizni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab guná te guibannáá Dios par tejpas?

²⁶ Sas rájṅ Jesús lojni:

—¿Xhini'c caj lo guijtz xten leii? ¿Xho rolluni?

²⁷ Dxejc badzu'ni diidxre, rájṅni:

—Chanálajzlu Dad, Xtioslu guideb las-toolu, guideb xaimlu, guideb xtijplu, nájza guideb xcáriejṅlu. Huinálajza resa'lu si'ctis ni sanálajzlu lagajc luṅ.

²⁸ Dxejc rájṅ Jesús lojni:

—O'n, laaca rudzu'lu diidx. Palga gunlu si'c, sajlpu yálnabajṅre.

²⁹ Per mastr xten leii, rlaĵzni nid-edbiani ni'cni gunabdiidxni loj Jesús räjpni:

—¿Chuni'c najc resa'ä?

³⁰ Dxejc räjp Jesús lojni:

—Te be_n laadxnu birii guedx Jerusalén, sääni guedx Jericó. Dxejc lo nezyuj biricaj gaaŋ gubaan, gulajnneni guiraa xhixtenni, näjli xhajbni ni najcwni. Sas gudijnreneni, basa'nreneni ro'c, guxii cayäädx nugu'treneni.

³¹ Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini.

³² Gudejdz te levita, be_n ni rujnza dzuun ne_n guidoo. Che bidzuj_nni cadro naga' bejnga, gudejdni stelaad, sä'tini.

³³ Dxejcti te be_n Samaria, la_ni sääni biaj, gudejdni nezyujga, bidzuj_nni cadro naga' bejnga. Che bahuiini lojni, balaslajznini. ³⁴ Gubigni loj bejnga, basäl_ni se't näjza bin loj be_n ni nadxälgujdx, dxejc batejbnini te la' lajd. Dxejc bascuibnini dejtz lagajc xmanni, huinänini cadro rudedlaareni yu', ro'c cuanäjnini. ³⁵ Che bara yääl, gulääni tio'p meel badeedni lo baxhuan yu'ga. Dxejc räjpni: “Cuanälaa bejnre; palga gunijtrulu, siguixätini lojlu che guibi'ä.”

Sä'tini.

³⁶ Dxejc räjp Jesús lo mastr xten leii:

—¿Chu tej lo guidxon rebejnga najc si'c sa' xten dade' ni biajb ladz_naa gubaan?

³⁷ Dxejc räjpni loj Jesús:

—Ni balaslajz bejnga.

Dxejc räjp Jesús lojni:

—Huij te sigajcza chayejnlu.

Bidzuj_n Jesús rolijz Mart näjza Marii

³⁸ La_ni huinuu xnezyujni, bidzuj_nni te guejdx. Ro'c bidxaagni te gunaa ni laa Mart ni huinänini rolijzni. ³⁹ Yu' te bäjl Mart ni laa Marii, luxh laani gurejni cuä' ni' Jesús te cacuadiajgni xtiidxni. ⁴⁰ Mart

cagusquej_nni cayuj_nni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¿Gojs lojni gacnäjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', rifulu xhidajl cos, ⁴² luxh yu' tejtis ni nan-abpac. Agule Marii ni najc huenru, rut sajcdi gudzucaj_nni lojni.

Rului Jesús xho guiniabni lo Dios

(Mt. 6:9-15; 7:7-11)

11 Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejn-pacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejn_npacni.

² Dxejc räjp Jesús lojreni:

—Che cuedx-guiniabtu lo Dios, scree col_nii:

Xtadnu ni yu' xhaguibaa, suchä'p xpala'nlu, sujiääd xcäl_nribeelu. Sugac si'ctisni rlaĵzlu gac lo guedxliuj si'cpac rajcni xhaguibaa.

³ Guira dxej baniidx xcu'nnu si'ctis ni rquiinnuni.

⁴ Basiäj_l laĵzlu redoĵ_l xtennu si'cni riäj_l laĵznu redoĵ_l ni rujn rebej_n loonu.

Na'c gusaanlu jiajbnu lo xcäl_nribeebendxab.

Bas_laa nuurnu lo doĵ_l.

⁵ Dxejc räjpza Jesús lojreni:

—Paru teĵtu yu' te xamiigwni, luxh guidzuj_nni rolijzni garol yääl, gäbni: “Xamigwä, banidxlaa cho_n yätxtiil, ⁶ sa'csi bidzuj_n te xamigwä rolizä ni bazaj biaj, luxh xhet ra'pädi te gudedä xhi gauni.” ⁷ Xhixh sinii ni naga' ne_n xyu'ni, gäbni: “Na'c riäd_ntie'chlu bacal loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.” ⁸ Rniliä lojtu, mase dini chastie te gudeednini sa'csi najcni xamiigwni,

sistieni, sudeedni nani rquiintisni te na'cru gutie'chni bacialni. ⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. ¹⁰ Sa'csi chutis ni rniab, rca'ni nani rniabni; chutis ni rguuil xhi cos, rdxälnini; nani rusejz rolä', suxhalzaren lojni.

¹¹ 'Paru tejtü ni najc dad, jääd te xi'ntu guiniabni te yätxtiil lojtu, çla sudeedtu te guij, ä? O palga guiniabni te bäjl, çla sudeedtu te bäj, ä? ¹² O palga guiniabni te tzutbejt, çla sudeedtu te naxejb, ä? ¹³ Palga la'tu, ni najc beñdojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

Rucuaquijreni Jesús, rniireni rajpni yälrnibee xten beñdxab

(Mt. 12:22-30; Mr. 3:19-27)

¹⁴ Gulää Jesús te beñdxabgop lastoo te bejn. Che birii beñdxabga lastoo bejnga, guslogajc canii bejnga, dxejc bidxelo-duxh reben xhidaalga. ¹⁵ Dxejc yu' reni räjp:

—Niguiire rbää rebeñdxab con yälrnibee xten Beelzebú ni rnibee loj rebeñdxab.

¹⁶ Sgairereni rrajz guquuilrenini, ni'c canabreni gunni te seen ni siääd xhaguibaali. ¹⁷ Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnäy te cuaani stee cuaaga, di gaçlaa sinijt gubierga lo guedxliuj. Palga te famil rdilnäy lagajc sa'ni, di gaçlaa sinitloj familga. ¹⁸ Palga guiliä' sa' rebeñdxab, çxho mood chanuu xcälrnibeereni? Dee rniä sa'csi la'tu rniitu narä rbää rebeñdxab con lagajc yälrnibee xten Beelzebú. ¹⁹ Palga si'c najcni, çchuni'c rudeed yälrnibee loj rexpejntu te rbääreni beñdxab? Lagajc laareni ruluii xhet laadi rujntu xhigab.

²⁰ Palga narä rbää rebeñdxab con xcälrnibee Dios, ni'cni rului loj abidzujn xcälrnibee Dios lojtu.

²¹ 'Cheni suga' te beñdaan, ca'ni guuib, canäjni rolizjni, rutliidi ruhualdi rexhixtenni. ²² Niluxh che jääd stee ni nadipru lo beñdaanga, rudxagdijlnini, rujnni gaanni, dxejc rudzucajni xquiiibni ni badeed yälbeñdaan lojni, dxejc saj chanäni guiraa rexhixtenni. ²³ Reni xhet yu'di xladä, rdx'e'chreni loä. Ni di gutop-näj narä, rutie'chni.

²⁴ Räjpzani:

—Cheni rii te beñdxab neñ lastoo te bejn, ricansajni nez lo reyubijdz, caguiilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.” ²⁵ Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni. ²⁶ Dxejcti rixiini sgajdz beñdxab ni rujnru latsiaj lojni. Dxejc riu'reni neñ lastoo bejnga, dxejc nalasru ria'n bejnga loj ni gujcn galoo.

Chicbaa renani riu xtidx Dios

²⁷ Laç ni canii Jesús rediidxre, te nane' ni yu' lo reben xhidaalga dipli guniini, räjpni:

—çChicbaa nan ni biädnälu guedxliuj! Chicbaaza nani baslaa luj.

²⁸ Luxh laani räjpni:

—Xhet si'c di najcni; chicbaaru rebejn ni rucua diajg xtidx Dios, ni ruzoobza xtiidxni.

Rebeñgijdx rniab te milagwr si'c te seen

(Mt. 12:38-42; Mr. 8:12)

²⁹ Sanuutis cadojp rebejn gabi Jesús, dxejc guslojni caniiini, räjpni:

—Rebejn ni yu' naj benguidxduxhreni, rniabzaren te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰ Lagajc si'c ni gujc Jonás te seen loj rebejn guedx Nínive, si'cza narä, Xi'n

Dios ni gujc Niguui, gacä te seen lo rebejn ni nabajn naj. ³¹Cheni guidzujn dxej ni gac fis sistie te nane' ni gujc rein lo reyuj ni tre' ladbäjgw, sucuaquijni rebejn ni tre' guedxliuj naj sa'csi laani biriini zitduxh te bacuadiajgpacni yäl-najn xten Salomón. Ree suga' galäiitu tej ni sacduxhru lo Salomón, ³²luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajn naj nen redxej ni gac fis. Dxejc sucuaquijreni rebejn ni nabajn naj sa'csi laareni, che huinäli Jonás xtidx Dios lojreni, basiech-lajzreni, basa'nreni xtojreni. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn

(Mt. 5:15; 6:22-23)

³³Räjpzani:

—Rut rucuaguijdi te bajl, te gusuynini te lat xhiga'tz, niclaza nen te caj. Susujni bajlga jiaa te rajc ruhuisa'c chutis ni riu' nen yu'. ³⁴Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäjy. ³⁵Gunatiro te di gac xpianijlu yälnacäjy. ³⁶Palga guideb xcäriejnlu yu' bianijtis, xheti te lajt nacäjy, sajc fisa'clu guira'ti, si'c najc che rusanij te bajl nen yu'.

Rucuaquij Jesús refarisee näjza rebejn ni najn leii

(Mt. 23:1-36; Mr. 12:38-40; Lc. 20:45-47)

³⁷Che gulujx gunii Jesús, biädgajn te farisee Jesús chääni rolijzni te chatajwni. Sä'tireni. Che biu' Jesús, gurejni lo mex. ³⁸Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. ³⁹Dxejcti räjp Jesús lojni:

—La'tu ni najc refarisee, rguiibtu nez dejtz te bas näjza te pla't, niluxh la'tu guidxa lastootu yälgubaaan näjza yällat-siaj. ⁴⁰¡Ben nadduxh! ¿La ditu gacbee? Nani benchee dejtzni, bencheeza nenni. ⁴¹Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

⁴²¡Probe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcälguhxhtis Dios näjza xcälrinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³¡Proobza la'tu reben farisee! Rchagljajztu rbejtu lo reyagxhil xten rebejn ni sajc nen reguidobäz; rchagljajztu saru rni rebejn “xchan Dad” lojtu che rijtu lo guii.

⁴⁴¡Probe'zatu! La'tu najctu si'c rebaa ni di guzen, rsiaj rebejn yejc cadro naga'reni luxh direni gan.

⁴⁵Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

⁴⁶Dxejc räjp Jesús lojreni:

—¡Probe'za la'tu rebejn ni ruluii leii! Sa'csi mibeetu gun rebejn recos nagan-duxh ni najc si'c te cargw naduxh ni di gacdi guu bejn. Luxh la'tu di rlajztu faltuni nicla con te bicuenabäztu.

⁴⁷¡Proobzatu! Sa'csi runcheetu xpa redade' ni gunii xtidx Dios galoo, luxh najctu rexajg renani bagu't redade'ga. ⁴⁸Ni'cni najnpactu xhi gusajcreni, rchagljajzatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹Ni'cni gunii Dios, sa'csi yuduxh xcälnajnni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.” ⁵⁰Loj rebejn ni nabajn naj siniab

Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj. ⁵¹ Guislojni xtiejn toAbel, näjza xtiejnli Zacarias ni bagu'treni galäii nez lodxan nen guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

⁵² 'Probe'za la'tu, rebejn ni ruluii lei! Sa'csi rniitu la'tistu rajptu yälajn, luxh di rlanjtu chalilajztu xtidx Dios, dizatu gusaan chalilajz rebejn ni rlanj chalilajz xtidx Dios.

⁵³ Cheni räjp Jesús rediidxre, bidxe'ch rebejn ni ruluii lei näjza refarisee lojni. Dxejc guslojreni canabdiidxreni xhidalduxh diidx, ⁵⁴ te cagula'tzreni don la sajc guiga'ni lo xhitis te diidx ni guiniini.

Jesús ruluii xcuent levaduur

12 Laḷ ni caniini, bidojp xhidajl miḷ bejn ro'c, calaro'li sa'reni. Dxejc gusloj canixгаа Jesús loj rexpejn pacni, räjpni lojreni:

—Colnati levaduur xten refarisee, rusgueereni rniitisreni xhidajl diidx luxh di-reni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu nen reyu' ni niäudzu'tz, sixedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴ Räjzpiani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. ⁵ Guiniä lojtu chuni'c nanab guidxejbtu. Colguidxejbn nani che abadzucajni yäl nabajn rajpni yäl rniabee gusäl ni la'tu gabijl lo bajl ni cayejc par tejpas. Ni'csii colguidxejbn.

⁶ 'Anajntu sajc jio' gaii mane' tio'p melbäz, luxh di Dios jiälajz nicla tej remane'ga. ⁷ Rexquidxejctu abigab tebga-

jni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjzpiani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. ⁹ Luxh reni di guicäjp rililajzni xtidxä nez loj rebejn, sigajcza sunnäáni nez loj rexangl Dios xhaguibaa.

¹⁰ 'Chutis ni guinii te didxnaj xcuentä, susiäjlajz Dios laani. Niluxh chutis ni guiniyaj Sprit Dxaan xten Dios, di Dios gusiäjlajz xtojlni.

¹¹ 'Cheni chanäreni la'tu nez loj rebejn guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹² sa'csi che guidzujn or ni guiniitu, Sprit Dxaan xten Dios suluini xhini'c guiniitu.

Reyäl'nasa'c rusajb bejn nen dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', ¿chuni'c gule narä gunä yäl guxhtis o gacä abogaad lojlu, ä?

¹⁵ Dxejc räjp sac Jesús lojreni:

—Colnatiro, colgantzu' te di rlanjtistu ga'ptu yäl'nasa'ctis sa'csi xcäl nabajn bejn dini gac yälrajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te bejn rapduxh. Racduxh cose'ch lo rexcäjl ni. ¹⁷ Dxejcti gusloj bejnni xhigab: “¿Xhocha gunä? Dina gapä cadre cucheä recose'ch.” ¹⁸ Sas bejnni xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.” ¹⁹ Dxejcti

siniä lo lastoä: “Lastoä, agulucheelu xhidajl xhi cos, sajlni xhidajl ijz. Basi-lajz naj, gudajw, gu', bibalajz.”²⁰ Dxejc räjp Dios lojni: “;Ben najd! Lagajc gux-hijpre siniabä xaimlu. ¿Dxejca? ¿Chu xca' guiraa recos ni gulucheelu?”²¹ Si'c sisiajc guiraa rebejn ni rguiltis xcäl-nasa'creni lo guedxliujre, niluxh xhet rajpdireni loj Dios.

Rcanäj Dios rexi'nni

(Mt. 6:25-34)

²²Che gojl stera't, räjp Jesús loj rexejnpacni:

—Ni'cni miä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu.²³ Yäl nabajn sajcruni lo yälrajw; tiejxhni sajcruni lo lajd ni rajcw bejn.²⁴ ;Colhui rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä?²⁵ Luxh ;Chu tejtü palga runduxhni xhigab sajc tioobruni sgarol metr?²⁶ Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

²⁷;Colhui xho rga' reguino'ch! Direni gun dzuun, dizareni gun lajd lo dzujb, luxh miä lojtu, nicla reii Salomón con guiraa xcäl'nasa'cni, dini nisiuchee si'c rsiuchee reguiiga.²⁸ Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubidjzni, rejcní lo däj, aticaxh Dios suniidx xhi gacw la'tu, ;bejn nani guxii rililajz!²⁹ Ni'cni miä na'c runtejtü xhigab xho quiltu xhini'c gautu, xhini'cza yätu, na'c chutistu yärsia'.³⁰ Si'ttis rujn re-benguedxliuj guideb xtijpreni rguilreni rehxicosre. Niluxh xtadtu ni yu' xh-aguibaa anajnni xhini'c rquiintu.³¹ La'tu colquiltis xcälrnibee Dios, dxejcti laani suniidxzani guiraa recos ni rquiintu.

Yäl'nasa'c ni yu' xhaguibaa

(Mt. 6:19-21)

³²Räjpzani:

—La'tu ni najc rexilä'ä, na'c guidx-ejbtu, sa'csi rbaali lajz Dios, aguleni la'tu te la'tu guntu yälguxhtis lo xcälrnibeeni.³³ Colguto' xhixtentu, colgudeedni loj rebejn ni caquinduxhni, te si'c guntu te bols ni di juijxh, te chu yäl'nasa'c nenñi xhaguibaa cadro di gubaan jiu' niclaza xcabäj rehxicos.³⁴ Sa'csi cadro rajptu xcäl'nasa'ctu, ro'cza yu' lastootu.

Nanab susiñtu

³⁵Räjpzani:

—;Colsusin! ;Colhualguij rebajl!³⁶ Colyujn si'c remos ni cabäjz guibi' xlamreni ni säa te sa', te cheni guibi'ni guxhalgajcreni rolä'.³⁷ Chicbaa remos ni susin che guibi' xlamreni. Rniliápac lojtu, lagajc xlamreni sajcwni xhajnbi sibe'cni rexmosni lo mex, dxejc lagajc laani sudeedni xhi gaureni.³⁸ Mase guidzujnni garol yäl, mase guidzujnni cäyru, palga guidxälni arexmosni susin, ;chicbaa remosga!³⁹ Colyacbeepac, paru gacbee baxhuaan xten yu' xhi or guidzujn gubaan rolizni, dini gusaan guxhalreni rolizni te cuanreni xhixtenni.⁴⁰ Näjza la'tu colsusin, sa'csi or ni ditu gun xhigab jiädni, sidzujn Xi'n Dios ni gujc Niguii.

Te mos guiidx

(Mt. 24:45-51)

⁴¹Dxejc gunabdiidx Pedr lojni, räjpni:

—Dad, ¿la lootisnu rujylu cuentre o la najcni par guiraa rebejn?

⁴²Dxejc räjp Jesús lojreni:

—¿Chuni'c najc mos hueen, mos nasin, ni rusannäj xlamni guiraa rexmosni te gudeedni xhi gaureni che gal oor, ä?⁴³ Chicbaa mosga palga laaca cayujnni che guibi' xlamni.⁴⁴ Rniliápac lojtu, lamga sudeed guiraa rehxixtenni

te xcanäj mosgani. ⁴⁵Per palga gun mosga xhigab nen lastooni: “Saclaa guibi' xlamä”, sas guislojni gusacsini resamosni, gunaa sigajc niguii, dxejc guisloj gauni, yäni, soozni; ⁴⁶sibi' xlamni te dxej ni xhet cabäjzdinini, or ni dini gun xhigab guidzujni. Dxejc sii sudeedni te castigwro lojni, sutiäjlni te duu dejtzni dxejc sinibeeni jiini, guidxaagni rebejn ni di gusbodiajg diidx.

⁴⁷Mosga ni najn xhini'c rlanj xlamni gac, luxh dini susin, dizani guzoob xtiidxni, sutiälduxhrene duu dejtzni. ⁴⁸Niluxh mos ni di gan xhi rlanj xlamni gac, ni'c rujni redzuun ni di xlamni guidxaglanj gac, guxiiru castiigw gacni. Reni rca' xhidajl, xhidajlza riäjł gudeedreni; loj reni rca' yälribeduxh, xhi-roobza siniabni lojni.

Rlia' Jesús bejn lo sa'ni

(Mt. 10:34-36)

⁴⁹Räjpza Jesús:

—Narä biälä te gucuaguä guedxliujre; imalaii alagusloj cayejcn! ⁵⁰Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini. ⁵¹¿La rujntu xhigab biälä te jiädnaä yälribedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. ⁵²Silia' sa' te famil; loj gaiireni, sidxe'ch chojnreni loj tio'preni, luxh tio'preni sidxe'chza lo chojnreni. ⁵³Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh guli-zga sidxe'ch lo xnansuegrni.

Reseen xten retiemp

(Mt. 16:1-4; Mr. 8:11-13)

⁵⁴Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, miiitu: “Siajb nisguij.” Luxh riabni.

⁵⁵Che rbi' bej nez lad danbägw, rni-itu: “Sacnalaa nadxej”, luxh si'c rajcni. ⁵⁶Bejn ni rusguee! La'tu racbeetu xhi säloj reseen ni rien lo guedxliuj näjza xhaguibaa, ¿xhicuent ditu gan xhi säloj retiemp ni dxunnu naj, ä?

Basiäjł diidx con rebejn ni rdxe'ch lojlu

(Mt. 5:25-26)

⁵⁷Räjpzani:

—¿Xhicuent ditu quuil lagajc la'tu xhini'c najc hueen, xhini'c najc laaca te guntuni? ⁵⁸Sa'csi palga yu' chuni'c chale'c xquejlu lo guxhtis, lałni sanäni luj ro jusgaad, basiäjł diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajg te gusaureni luj nen latzguuib. ⁵⁹Luxh rniä lojlu, dilu guirii ro'c hasta gusa'lu quixlu guiraa lojreni.

Colgusiejch lajztu te di guettu

13 Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siädna'reni si'c gojn lo Dios. ²Sas räjp Jesús lojreni:

—¿La rujntu xhigab si'c gusajc reben Galileega sa'csi najcurenen ben dojl lo rebejn lajdxreni? ³Narä rniä, dini gac si'c. Palga di'tu gusiechljaz sigajcza sejt guiragajctu. ⁴O xcuent guitzunbichon rebejn nani gujt che gubixh te or ni laa Siloé yejcreni, ¿La rujntu xhigab najcurenen ben dojl lo rebejn ni rbäjz guedx Jerusalén, ä? ⁵Narä rniä, dini gac si'c. Palga di'tu gusiechljaz, sigajcza sejt guiragajctu.

Xcuent te yag iigw

⁶Dxejcti gusloj bij Jesús te cuent ni ruluini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj nine-

jxh lojni. Luxh xhet ninejxhdi bidxälni. ⁷Dxejc räjpni loj bejn ni canäj xyujni, agujc choñ ijz siädtilä ninejxh lo yajgre, luxh xhetini. Batin yajgre. ¡Xliasi sujni lo yuj! ⁸Luxh xmosni räjp lojni: “Dad, basaanni steb ijz, gusläá yuj ni’ni, gusälä abonni. ⁹Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusiajc Jesús te gunaa

¹⁰Te dxej ni rusilajz rexpejn Israel caguluii Jesús nen te guidobáz. ¹¹Ro’c suga’ te nane’ ni agujc tzunbichon ijz racxhuuni. Bendxab caguscoodni, niluxh di gacdi suliini. ¹²Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälgujdxga luj.

¹³Che basujni naani yejcn, lagajc dxejc gujc gusulii nane’ga. Dxejc guslojni caläpni xpala’n Dios. ¹⁴Luxh dade’ ni rnibee guidobáz bidxe’chni sa’csi basiajc Jesús nane’ga che najcni dxej ni rusilajzreni, ni’c gusloj cayäjpni loj rebejn:

—Xho’p dxej sajz gun bejn dzuun; nen redxejga sajz jiäädte te jiajct, per na’c jiäädte dxej ni rusilajz rexpejn Israel.

¹⁵Dxejc badzu’ Jesús diidxre, räjpni lojni:

—¡Ben rusguee! ¿La di chutis tejtuguxhec xconni o xpurni te chanänini yäni nis, mase najcni dxej ni rusilajz bejn, ä? ¹⁶Luxh nane’re najc te xagdoo toAbram, nani numbee Dios, ni agujc tzunbichon ijz baliib bendxabni, ¿la digacdi guixecni lo xcälgujdxni mase najcni dxej ni rusilajz bejn, ä?

¹⁷Che gunii Jesús rediidxre, bianxtujy rebejn ni rdxe’ch loj Jesús, luxh reben xhidaalga cabalazduxhrene sa’csi cayujn Dios redzunro nez lojreni.

Xcuent bedz muxhtas

(Mt. 13:31-32; Mr. 4:30-32)

¹⁸Ni’cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj?

¹⁹Najcni si’c te bedz muxhtas ni rbe’c te bejn lo xyujni. Luxh che guiroobni, rajcni te yagro. Dxejc riääd remane’ ni rutajt siädynchee xpitiäazni loj rexhajcwni.

Xcuent cojb ni rusaguij

(Mt. 13:33)

²⁰Guniiza Jesús stehuält te gacbeereni xho guire’ch rextidx Dios. Räjpni lojreni:

—¿Xhicha cojn guntebloä xcälrnibee Dios? ²¹Najcni si’c levaduur ni rugu’ch te gunaa lo choñ mediid arin, luxh rusaguijni guiraa cojbga.

Dää rolä’ cadre jiu’ni xhaguibaa

(Mt. 7:13-14, 21-23)

²²Huinuu Jesús xnejzni sääni guedx Jerusalén. Lañni sadejdni reguejdx näjza rerench caguluiini rebejn. ²³Dxejc gunabdiidx te bejn lojni, räjpni:

—Dad, ¿la guxii najc rebejn ni calaa loj rextojlreni, ä?

Dxejc räjpni lojreni:

²⁴—Dää rolä’ cadre jiu’ bejn xhaguibaa. Ni’cni coltip lajzta te jiu’tu ro’c, sa’csi xhidajl bejn rlanj jiu’reni ro’c, niluxh direni gun gaan. ²⁵Cheni abasäu baxhwaan xten yu’ rolä’, dxejc la’tu ni suga’ detz yu’ guisloj gusejstu rolä’, guiniitu: “Dad, baxhal-laa rolä’”, dxejc laani sudzu’ni diidx, siniini: “Dina ganä caro siäädte.” ²⁶Dxejc guislojtu guiniitu: “Bidunnäanu, bidaunäanu, bidunnäanu luj, basedlu nuurnu lo xnezyuunu.” ²⁷Dxejc siniini lojtu: “Rniliä lojtu, dipacnä gumbeä la’tu. Coljij guiraatu, benlatsiaj.” ²⁸Dxejcti sonduxhtu, chubejli läjytu che fitu abiu’ toAbram, con toIsaac, con toJacoob, näjza guiraa redade’ ni gunii xtidx Dios, suga’reni lo xcälrnibee Dios xhaguibaa, luxh la’tu di gacdi jiu’tu. ²⁹Dxejga sidzujn xhidajl benzijt ni siääd ladjiaa, ladjjät, ladbäjgw, näjza ladbee, te jiu’reni lo xcälrnibee Dios xhaguibaa,

ro'c sibejzarenì lo mex. ³⁰Luxh yu' renì rujntu xhigab guxii sajcreni ñaj, sacduxhrenì dxejc. Yu'za renì rchalotu sacduxh ñaj, xhet sajcdireni dxejc.

Jesús biin xcuent guedx Jerusalén

(Mt. 23:37-39)

³¹Lagajc dxejga, bidzujñ gaii re-
farisee, räjprenì lojni:

—Huij, biunejz ree, sa'csi Herodes
rlajz ju'tlu.

³²Dxejc laani badzu'ni diidxre lojrenì,
räjpni:

—Gojz lo bájzga, beñ rusguee:
“¡Bahuii! cabää rebenḁxab lastoo
rebejn, cagusiaca rebejn ni racxhuu
nadxej nájza guixee, luxh huijdxli
guluxä xtzunä.” ³³Niluxh mase si'c
gacni nanab chanuä xnezyuä nadxej
nájza guixee, huijdx, sa'csi di gacdi guet
te dade' ni nrii xtidx Dios ste'ca guejdx,
guejdxitis Jerusalén sajc guetni.

³⁴¡Probe'tu, la'tu beñ Jerusalén!
Rugu'ttu redade' ni riädniì xtidx Dios
lojtu, rucuaazatu guij yejc rebejn ni
ruxhaḁ Dios lojtu. Balti huält rlazä
nuchagä sa'tu si'c ruchagsa' te guidco'c
rexquidbäzni lajd xhigani, niluxh
ditu nicäjp. ³⁵Bahuii xho bianxteb
xquidootu. Ni'cni arnixgää lojtu, dirutu
fii loä chenì guidzujñli dxej ni guiniitu
loä: “Chicbaa ni siädä xcuent Dios.”

Rusiajc Jesús te bejn ni guidxa guij

14 Che gojl te dxej ni rusilajz rex-
pejn Israel, huitajw Jesús rolizj
tej ni rnibee loj refarisee. Cagula'tz
gaii refarisee, guidon xhini'c gun Jesús,
²sa'csi nez loj Jesús suga' te dade' ni
guidxa guij tiejxhni. ³Dxejc gunabdiidx
Jesús lo rebejn ni ruluii leiì nájza lo re-
farisee, räjpni lojrenì:

—¿La sajc gusiajcnì te beñracxhuu
dxej ni rusilajz bejn o la di gacdinì?

⁴Per laareni dxitis suga'renì, niäutis
ro'renì. Dxejc cua' Jesús beñracxhuuga,

basiajcnini, gunibeezani biunejzni. ⁵Dx-
ejc räjpni loj refarisee:

—Chu la'tu ni rajp te bur o te gon,
palga jiajbni neñ te bisie, ¿la ditu chalä-
gajcnì mase najcni dxej ni rusilajz bejn,
ä?

⁶Dxejc di niajcnì nudzu'renì diidx
lojni.

Reni bidon chää sa'

⁷Cheni bahuii Jesús xho rchaglaiz re-
bejn rbereni latsa'c te cuereni cuä' re-
bejnro, bijni te cuent ni ruluii lojrenì,
räjpni:

⁸—Cheni guidontu chäätu te sa',
na'c guntu te cuetu cuä' rebenro, te
di guidzujñ te benroru lojlu, ⁹dxejc
jiäd bejn ni cayujñ lanij, naani lo-
jlu: “Badeed cue dade're ro'c.” Dxejc
situujylilu chacuelu ste'ca lajt lo le'li.

¹⁰Maazru hueen, chenì guidonlu chäälu
te sa', huicue lo mex ni zuj lo le' te
che guidzujñ bejn ni cayujñ lanij, naani
lojlu: “Xamigwä, gudaä cuelu neñ yu'
cadro rbej rebenro.” Si'c sä'p xpala'nlu
nez loj guiraa rebejn ni sobganäjlu lo
mex. ¹¹Sa'csi ni rlanj chä'p xpala'nni nez
loj rebejn, sianxtuujyni nez lojrenì. Luxh
bejn ni najc nadolajz, sä'p xpala'nni nez
loj guiraa rebejn.

¹²Räjpzani loj bejn ni cagudeed xhi
gaurenì:

—Cheni gunlu te lanij o guteedlu bejn
lo xmexlu, na'c cuedxtislu reexamigwlu
con rebejtzlu, con resa'lu, niclaza rex-
pisiñlu ni najc ri'cw, sa'csi laareni sigaj-
zcza sibejdxrenì luj che gunrenì te lanij,
luxh si'c agudijxrenì ni badeedlu lojrenì.

¹³Che gunlu te lanij, alga gurejdx re-
benproob, rebencoj, nájza rebenlotiä'p,
¹⁴dxejcti sibaa lajzlu sa'csi laareni di
gacdi gunidxsacrenì ni badeedlu lojrenì;
luxh si'c siguixsac Dios ni bejnlu che gal
dxej ni guibansac rebejn loj rebengut.

Xcuent te laniro

¹⁵ Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadro rnibee Dios.

¹⁶ Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jiädtaunäjreneni. ¹⁷ Che bidzujn or ni gauren, baxhal dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.” ¹⁸ Dxejc guiragajcreni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” ¹⁹ Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” ²⁰ Steeni räjp: “Entis bachnaä ni'cni di gacdi jiälä.” ²¹ Che gubi' mosga, badeedni diidx lo xlamni xhi räjp rebejnga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj, rebenlotiä'p, rebenatiujnc.” ²² Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” ²³ Dxejc räjp lamga lo xmosni: “Huij lo renezyuj ni sii loj reguedxzijit, gudanäj rebejn ni guidxaaglu nejzga, te cha bejn rolizä. ²⁴ Rniliä lojtu, nicla tej reni bidon ganid di gau xhuej nani benä.”

Ni nanab gunni te chanajlni Crist

²⁵ La_l sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

²⁶ —Palga yu' chu tej ni jiäd loä, ni di cuälaz xtadni, xnanni, chäälni, rexi'nni, rebejtzni, näjza rebisajjni, nägajcza xcäl_nabajjni, di gacdi gacni te rexpenä. ²⁷ Palga yu' chutis tej ni di rlanj tedni trabajw te jiädnajlni narä, di gacdi gacni te rexpenäp. ²⁸ Chu tejt

ni rlanj gun te yuro, ni di gunxgaa xhigab lacti meel chanä yu'ga, te guidon la sajc guluuxnini. ²⁹ Didi cheni abejjni recimient, di gacdi guluuxnini, dxejc guiraa reni fii lojni suxhiznäjreneni, ³⁰ säjpreni: “¡Bahulaare! Bejnre gusloj bencheeni te yu' per di niajcdi nuluuxnini.” ³¹ ¿Chu te reii ni gun xhigab chachagdijlni stee reii, ni di gunxgaa xhigab don laa sajc gunni gaan con tzuu mi_l soldaad loj stee reii ni siäd con gaj_l mi_l soldaad, ä? ³² Palga di gacdi gucuanäjnni, che gacbeeni zijtli siäd stee reiga, suxhalni te xpejn_ni chanab yäl_rbedxi lojni. ³³ Ni'cni palga chutis tejt_u di gusaan rexhixt_{en}ni te jiädnajlni narä, di gacdi gacni te rexpenäp.

Che diru sejd gac nadzujy

(Mt. 5:13; Mr. 9:50)

³⁴ Räjzp_zani:

—Huen najc sejd. Per cheni diruni gac nadzujy, ¿xho gacru gac nadzujyni? ³⁵ Xhetru sajcdini, nicla te chääni loj yuj, niclaza te chääni lo abon. Gusäl_tis bejn sejdga. Reni rlanj gucua diajg xtidxä, sucua diagsa'creni.

Xcuent xiil ni gunijt

(Mt. 18:10-14)

15 Guiraa reni rusquijx impuest näjza rebendoj_l cabigreni loj Jesús, te cuadiajg_{reni} rextiidxni. ² Refarisee näjza rebejn ni ruluii leii gusloj camojm_{reni}, räjpreni:

—Bejnre rusaan rbig rebendoj_l lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴ —Chutejt_u ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä? ⁵ Luxh che guidxällinini siba_{du}xh lajz_{ni}, dxejc sutzuub_nini ro xhajc_wni. ⁶ Che guidzuj_ni rolijz_{ni} sutoj_pni rexamiig_wni näjza

rexpisinni te gäbni lojreni: “Colguibal-
 aznä j narä sa'csi abidxälä xile' ni gu-
 nijt.” ⁷Rniä lojtu, sigajcza su'ru yäl-
 balajz xhaguibaa xcuent tejtis bejn ni
 guibig lo Dios ni gusiechlajz xtojlni
 quela xcuent tapbitzubigaa bejn ni di
 quiquin gusiechlazreni xtojlni.

Xcuent meel ni gunijt

⁸Räjpzani:

—Sigajcza te gunaa ni rajp tzuu
 meel, palga chasälni tejni, äla dini
 gusanij te bajl te guloobni nen yu'
 hasta guidxälhini, ä? ⁹Luxh che guidxäl-
 nini, sutojpnini rexamiigwni näjza rex-
 pisinni, säjpnini lojreni: “Colguibalaznä j
 narä sa'csi abidxälä meel ni gunijt.”
¹⁰Rniäza lojtu, sigajcza sibalajz rexangl
 Dios xhaguibaa xcuent te bendojl ni
 rusiechlajzni.

Te bejn ni baxun te xi'nni

¹¹Dxejc bijza Jesús cuentre lojreni:

—Guyu' te dade' ni yu' tio'p xin-
 gaanni. ¹²Dxejc xi'nni ni najc huin-
 ruga, räjpni lo xtdadni: “Dad, bani-
 idx yälhasa'c nani nungäjil xca'a.” Sas
 badeed xtdadni xerensni. ¹³Di niac-
 laa, balsi dxej gudejd, chela bato' xinhuinni
 guiraa xhixtenni, dxejc sääni, bidzu-
 jnni te guedxzijt. Ro'c banijtni guiraa
 xmeelni lo recosguijdx. ¹⁴Che abanijtni
 guiraa xhixtenni, biääd te gubinduxh
 guedxzijtga cadro yu'ni. Sas guslojzani
 calaanni. ¹⁵Dxejc huitiilni dzuun lo te
 benguejdxga. Baxhal bejngani te huiga-
 jpnini cuch lo xyuj dade'ga. ¹⁶Luxh ca-
 landuxhni bejnini xhigab malaii saj-
 gauni recuaan ni najc si'c lia ni cayajw
 recuch, niluxh rut badeedi xhi nia-
 jwni. ¹⁷La j cadejdnini trabajwga, bianij
 xcäriejnini bejnini xhigab, naani: “Balti
 rexmos xtdä rausa'c, ria'nru xhi gau-
 reni. Luxh narä ree calanduxhä, ameerli
 guetä. ¹⁸Guibi'älis ladxä, rolizj xtdä,

gäpä lojni, Dad, banitä lo Dios näjza lo-
 jlu. ¹⁹Diru nungäjil guirilaä xi'nlu. Cua'
 narä si'c te xmoslu.” ²⁰Dxejc gunazga-
 jeni nejz te gubi'ni rolizj xtdadni.

'Cheni zijtru siäädni, bahuii xtdadni
 lojni. Dxejc balaslajznini, ruxunlni,
 huichaglojnini, sas gudäznini, bacha-
 gro'ni lojni. ²¹Dxejc räjp xi'nni lo-
 jni: “Dad, abanitä lo Dios näjza lo-
 jlu. Diru nungäjil guirilaä xi'nlu.” ²²Per
 räjp xtdadni loj rexmosni: “Coltanä te
 ladsa'c, colshuajcwnini xi'nä, colgusäl te
 niil bicuenaani, xcajza te gura'ch ni'ni.
²³Coltanä te bisej ni guro' colgu'tni.
 jColsquejn te guidaunu, jiennu te lanij!
²⁴Sa'csi xi'näre abenä xhigab gujtni,
 luxh naj si'cni agubansacni, gunijtni
 niluxh naj abidxäjlni.” Dxejc guslojreni
 bejnreni te lanij.

²⁵'La j ni cayajc dee, xingangalooni
 cayujn dzuun lo niaa. Che gubi'ni, siäd-
 dzungajxhni rolizjzini, che biejn diajgni
 cayel rolizjzini, caguya'zarenini. ²⁶Dxejti
 gurejdxni te mos, gunabdiidxni lojni xhi
 cayajc royu'. ²⁷Dxejc räjp mosga lojni:
 “Gubisac bejtzlu, luxh xtdadlu gunibee
 gujt te bisej guro' te gac lanij sa'csi
 nadaanni gubi'ni.” ²⁸Dxejc bidxe'ch xin-
 gangalooni. Naadtini jiu'ni rolizjzini. Che
 gucbee xtdadni naadtini jiu'ni, bihuii
 xtdadni te gunabni jiu'gani. ²⁹Dxejc
 räjpni lo xtdadni: “jBahuilare! Agujc
 xchej cayunä dzuun lojlu, luxh rusobdi-
 agä guiraa xtiidxlu, per nicla tej huält
 gajdlu guniidx nicla te dxibe' loä te
 gunä te lanij con rexamigwä. ³⁰Luxh naj
 ni abidzujn xi'nlu, ni banijt xmeellu
 con regunadxab, xhoxh bagu'tlu te bisej
 guro' te cayujnlu xlanijni.” ³¹Dxejc räjp
 xtdadni lojni: “Xi'nä, sugagajclu loä, luxh
 guiraa ni rapä najc xtenlu. ³²Niluxh naj
 riäjlpac jiennu lanij, guibalaaznu, sa'csi
 bejtzlu ni benä xhigab agujt, agubi'ni
 naj, najcni si'cni gubansacni; gunijtni,
 naj abidxäjlni.”

Xcuent te ni rnibee loj remos

16 Dxejc cayujyza Jesús stee cuent loj rexpejn^{pacni}, räjpni:

—Guyu' te beⁿraj^p ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: “Bejn ni rnibee loj rexmoslu xhetlaadi cayujⁿⁿⁱ cagunij^tni rexhixtenlu.”² Dxejcti gurejdx xlamⁿⁿⁱ, räjpni lojni: “¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.”

³ Dxejc bejn^{ga} bejn xhigab: “¿Xhichani'c gunä naj ni gudzucaj xlam^a dzuun loä? Dina ga'pä yälrstijp te gunä dzuun lo niaa, luxh situjyä chanabä gojn.”⁴ Ananä xhini'c gunä te che dirunä ga'pä dzuun, sibejdx rexamigwä narä rolizjreni.”⁵ Dxejcti gurejdxni tebgajreni rebejn ni nazäab lo xlamⁿⁱ, dxejc räjpni loj ni bidzunx^{gaa}: “¿Lac nazääblu lo xlam^a?”

⁶ Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtzre, bacuaa tiubitzuutis baril nazääblu lojni.”⁷ Dxejc gunabdiidxni loj steeni, räjpni: “¿Luj a'? ¿Lac nazääblu lo xlam^a?” Dxejc räjpni lojni: “Te gayuu dxim^{ro} triuu.” Dxejc räjpzani: “Aree xquijtzlu; bacuaa tajtis dxim^{ro}.”⁸ Bidxeloj xlamⁿⁱ, gulä'pni xpala'n benguijdxga ni gunibee sa'csi bisinni bejnⁿⁱ recosga. Dxejc räjpza Jesús, rebejn ni di gumbee xtidx Dios nadxällajzrurenⁱ lo rextzuunreni con sa'reni loj rebejn ni arumbee xtidx Dios.

⁹ Rniä lojtu, colquuil rexamiigwtu con reyäl^{nasa}'c ni räjp^tu loj guedxliujre, te che abaraj xhixtentu, sica' Diostu xhaguibaa cadro yu' rolizjtu par tejpas.

¹⁰ Renani runsa'c dzuun lo te dzunbäz, sajcaz gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdi^{za} gunsa'creni dzuun lo te dzunro. ¹¹ Ni'cni palga xhetlaadi cuaräl^{najtu} reyäl^{nasa}'c xten guedxliuj,

ixho guniidx Dios reyäl^{nasa}'c xtenni lojtu! ¹² Palga xhetlaadi cuaräl^{najtu} xhixten bejn, ¿chu guniidx lojtu ni gac xtenpactu, ä?

¹³ Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzⁿⁱ o susobdiajg^{pacni} xtidx tejni, sibälazni steeni. Di gacdi gun bejn xtzun Dios la^l ni sanälajztisni xcäl^{nasa}'cni.

¹⁴ Mbaj naj, refarisee, sa'csi rchaglazd^{uxh}reni meel, cacuadiagdzu'tzreni xtiidxni, dxejc caguxhisnäjreni Jesús.

¹⁵ Dxejcti räjp Jesús lojreni:

—La'tu najctu bejn ni ruhuii rebejn lojtu, naareni beⁿsacdu^{xhtu}, niluxh acanajⁿ Dios xhi xhigab rujntu neⁿ las^{tootu}. Sa'csi guiraa ni rchalojtu najc yäl^{nasa}cd^{uxh}, guiraa ni'c rbixhlajz Diosni.

Xleii Moisés con xcäl^{rnibee} Dios

¹⁶ Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcäl^{rnibee} Dios, ni'cni xhidajl bejn cagusutijp lajzⁿⁱ te jiu'reni loj yäl^{rnibee}ga.

¹⁷ Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

Ruliii Jesús xcuent ru^o'n sa' bejn

(Mt. 19:1-12; Mr. 10:1-12)

¹⁸ Räjpzani:

—Palga gu^o'n te bejn chäälⁿⁱ, dxejc guch^{naani} stee gunaa, rujⁿⁿⁱ dojl, luxh nani ruch^{naa} te gunaa ni abar^o'n chäälⁿⁱⁿⁱ, niguiiga rujnzani dojl.

Te beⁿraj^p näjza Lázaro

¹⁹ Räjpzani:

—Guyu' te beⁿraj^p ni rchaglajz rajcwni ganax reladsacdu^{xh}, luxh guixe-guixee rujⁿⁿⁱ laniro. ²⁰ Guyu'za te

benproob ni laa Lázaro ni rniab gojn, ricueni ro xlá' benrajpğa, yu' guejdx ni rgaadz tiejxhni. ²¹Rlajzni maläii xho gunni gauni nani rtejb loj xmex benrajpğa, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni. ²²Guyu'ti te dxej gujt benproobğa, biädläs rexangl Dios xaimni, huinärenini cadro yu' Abram xhaguibaa. Dxejcti näjza benrajpğa gujt, huicua'tztireneni. ²³Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro. ²⁴Dxejcti guredxaduxh benrajpğa, räjpni lo Abram: “ǀXtadä Abram! Balazlajz narä, baxhal Lázaro guhuajdxni yejc bicueñaani nis te gusiälyujni ludxä, sa'csi ree cadedä trabajwduxh lo guiboo.” ²⁵Luxh räjp Abram lojni: “Xi'nä, basaa lajzlu che gubajnlulu lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdlu trabajwduxh. ²⁶Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirri ree te tedreni lojlu ro'c, di gacdini. Di gacdiza ted reni yu' ro'c te jäädreni loonu.” ²⁷Dxejcti räjp benrajpğa lojni: “Rniabduxhä lojlu, xtadä, baxhallaa Lázaro chääni roliz xtadä, ²⁸sa'csi ro'c yu' gaii betzä, te chalijdxni laareni, te gusiechlazreni, te di näjza laareni jäädreni ree cadro rdejd bejn trabajwduxh.” ²⁹Dxejc räjp Abram lojni: “Arajpreni guijtz cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.” ³⁰Luxh benrajpğa badzu' diidxre, räjpni lojni: “Gulii dad Abram, per palga chäs te bejn loj rebengut, chanii lojreni, dxejc sii pet susiechlazreni.” ³¹Dxejc räjp Abram lojni: “Palga direni

gusobdiajg xtidx toMoisés näjza xtidx redade' ni gunii xtidx Dios, dizareni chalilajz xtidx te bejn ni guibansac loj rebengut.”

Riesgw jiajbni lo dojl

(Mt. 18:6-7, 21-22; Mr. 9:42)

17 Räjp Jesús loj rexpejnpacni: —Siäädpac recos ni gun jiajb bejn lo dojl. Proobza bejn ni rujn ri-ajb bejn lo dojl. ²Maaz guliibni te guij xten molin guejnni, gusal bejnni lo nisdoo cadro jäatro quela gunni jiajb rexi'nä ni ahuililajz xtidxä. ³ǀColusun!

'Palga gun bejtzlu dojl lojlu, baliidxni. Palga gusiechlazjni, basiäj! diidx con laani. ⁴Masque gajdz huält nen teb dxej gunni dojl lojlu, palga jäädniini lojlu gajdz huält, naani: “Xhet laadi benä, basiäj! lajzlu”, basiäj! lajz con laani.

Bastioob xcälirililaaznu

⁵Gunii rexpejnpacni lo Jesús, räjpreni: —Dad, baniidxru yärlirilajz loonu.

⁶Dxejc räjp Jesús lojreni:

—Palga rajptu yärlirilajz, mase najcni si'cti te bedzbäz xten muxhtas, sajz gäbtu lo yagro rec: “Biliädxä' ro'c, guzuj galäii nisdoo”, susobdiajg yajgga xtiidxtu.

Ni riäj! gun te mos

⁷Räjpzeni:

—ǀChu tejtlu ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? ⁸Dini gäb si'c. Niluxh säjpnii lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajz gauzalu, yäzalu.” ⁹Dini gudeed xquixtios lo mosga sa'csi rujnni recos ni gunibeeni sa'csi si'c riäj! gunni. ¹⁰Sigajcza la'tu, che luux guntu guiraa redzuun ni guniä guntu, riäj! guiniitu lo Dios: “Najcnu mos ni xhet sajcdi, nani riäj! jiennu, ni'ctis biennu.”

Basiajc Jesús tzuu bejn ni raĵ tiejxhreni

¹¹Laĵ ni sasaj Jesús nez guedx Jerusalén, gudejndi loj región Samaria näjza región Galilee. ¹²Che biu'ni tej reguejdxga, huichagloj Jesús tzuu bejn ni rajc te yälgujdx ni raĵ tiejxhreni, niluxh zijtru guzujreni. ¹³Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁴Che bahuii Jesús lojreni, räjpni lojreni:

—Colchäj, te fii rebixhojz abiajctu.

Laĵ ni sääreni, bia tiejxhreni. ¹⁵Dxejc tejreni, che bahuiini abiajctni, gubiguxumni, cabedxa'ni calä'pni xpala'n Dios. ¹⁶Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te benzijt, te ben Samaria. ¹⁷Dxejcti räjp Jesús lojni:

—¿La et tzuudi najc reni biajc, ä? ¿Con sgaareni? ¹⁸¿La rutru gubi'di loä te guiliä'preni xpala'n Dios, xtebtis benzijtre, ä?

¹⁹Dxejc räjp Jesús loj bejnre:

—¡Huisulii, huij! Abiajclu sa'csi huililajzlu.

Xho guidzujn xcälrnibee Dios

(Mt. 24:23-28, 36-41)

²⁰Dxejc, sa'csi agunabdiidx refarisee loj Jesús guc guidzujn xcälrnibee Dios, badzu'ni diidxre, räjpni lojreni:

—Di xcälrnibee Dios guidzujn con seen ni sajc fiitu. ²¹Diza bejn naa: “Bahuii, aniree”, o “Anirec”, sa'csi abidzujn xcälrnibee Dios lojtu.

²²Dxejc räjp Jesús lo rexpejn pacni:

—Sidzujn dxej rlanjgatu fiitu te dxej sa' ni chu che jiädsac Xi'n Dios ni gujc Niguii, luxh ditu fiini. ²³Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii. ²⁴Sa'csi sigajc ni rien che rdinya' te laad xhaguibaa hasta stelaad xhaguibaa,

si'cza gac che jiälä narä, Xi'n Dios ni gujc Niguii, che gaĵ dxej guibi'ä. ²⁵Luxh ganiddoo sidedä trabajwduxh, sa'csi sibälaz reben guedxliuj ni tre' naj narä. ²⁶Si'cni gujc nen redxej cheni gubajn toNoé, si'cza gac nen redxej che jiälä narä, Xi'n Dios ni gujc Niguii. ²⁷Nen redxej ni gubajn toNoé gudajwreni, gu'reni, bachnaareni, badeedzaren i xindxa'preni guchnaa bejn, bidzujnli dxej cheni biu' toNoé nen barcwro ni bencheeni. Dxejc biääd nisguiduxh, gujt guiraa reben dojl, guzääbreni lo nis. ²⁸Sigajcza gujc nen redxej ni gubajn toLo't: gudajwreni, gu'reni, gusiireni, bato'reni, gule'creni binij, bencheezaren i rolizreni. ²⁹Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojt i guiraa rebejn dojl, huejcreni. ³⁰Sigajcza gac nen redxej cheni jiälä narä, Xi'n Dios ni gujc Niguii.

³¹'Dxejga, palga yu' chu niä'p yejc yu', diru galđi jiajtni te chalääni rehxixtenni ni yuchee nen yu'; palga yu' chu suga' nezjiät, di galđiruni guibi'ni rolizjni. ³²Colgusnaj lajztu xhi gujc chääl toLo't. ³³Ni rlanj ga'p xcäl'nabajn i lo guedxliujre, sunijtnini, nani guniyt xcäl'nabajn i lo guedxliujre xcuent rextidxä, xcäl'nabajn i rajpni xhaguibaa.

³⁴'Rniä lojtu, guxhijnga ni jiälä lo tio'p reni naga' lo te da', chää tejni, steeni jia'n. ³⁵Lo tio'p gunaa ni cayot', chää tejni, steeni jia'n. ³⁶Lo tio'p bejn ni yu' lo niaa, chää tejni, steeni jia'n.

³⁷Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

Xcuent te gunabiuud con te juejz

18 Bijza Jesús te xcuent ni ruluii lojreni, te guisieedreni xho riajz

cuedx-guiniabreni lo Dios lacuaa gac-huin lajzreni, ²räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn. ³Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni. ⁴Balti dxej naadti juejzga gun yälguxhtisga. Dxejcti bejnri xhigab, naani: “Mase dina guidxebä Dios, dizana jiuä rebejn, ⁵sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädgusieedni narä.”

⁶Dxejc räjp Jesús lojreni:

—Riejn diajgtu xtidx juejguijdxga, ⁷Naj çxho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni. ⁸Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, çla sidxälmi bejn ni rililajz xtiidxni lo guedxliuj?

Xcuent te farisee con te ni rusquijx impuest

⁹Bij Jesús stee cuent ni ruluii loj rebejn ni rluiisi najc bensa'c, ni rchalo xhet sajcdi resabejnreni. Räjpni:

¹⁰—Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹Sulii fariseega läl ni canabni lo Dios, räjpni: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc bejn nadiplajz, ni najc bendojl, dizana gacä si'c najc bejnre ni rusquijx impuest. ¹²Rucua'nä tio'p huält nen te xmaan, luxh rudedä te tzuu lo te beex loj guiraa ni runä gaan.” ¹³Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälnaatisni lastooni, caniini lo Dios, räjpni: “Dad, Dios, jbalaslajz narä, nacä te bendojl!”

¹⁴Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextojlni, niluxh di Dios nudzucaj rextojl bejn farisee. Sa'csi guiraa rebejn ni rlanj guiliä'p lagajc xpala'nni, susanxtiuj Diosreni, dxej reni di rlanj guiliä'p lagajc xpala'nreni, siliä'p Dios xpala'nreni.

Benle' Jesús yejc rebiuxbäz

(Mt. 19:13-15; Mr. 10:13-16)

¹⁵Yu'reni siädnä repxiuxbäzreni loj Jesús te guzujni naani yejcreni. Che bahuii rexpejnpacni si'c, gosloj cadildidixreni con rebejn te na'c jiädnäreni rebiuxe'. ¹⁶Dxejc gurejdx Jesúsreni, räjpni lojreni:

—Colgusaan jiäd rebiuxe' loä, na'c gudxojtureneni, sa'csi xcälrmibee Dios najc xten reni najc nadolajz si'c rebiuxbäze're. ¹⁷Rniliäpac lojtu, chutis ni rlanj jiu' lo xcälrmibee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcälrmibee Dios.

Te bi'n ni rajp xhidajl xhixtenni

(Mt. 19:16-30; Mr. 10:17-31)

¹⁸Te bi'n ni rmibee gunabdiidx loj Jesús, räjpni:

—Dad, mastrsa'c, çxhini'c nanab gunä te xca'ä yäl'nabajn par tejpas?

¹⁹Dxejc räjp Jesús lojni:

—ÇXhicuient rniilu narä: “Mastrsa'c”? Rutru najcdi bensa'c, xtebtis Dios. ²⁰Anajnlu xho najc remandamient ni caj lo xleii Moisés: “Na'c guesnäjlun gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtadlu, xnanlu, bahuiizareni.”

²¹Dxejc räjp bi'nga lojni:

—Guiraa remandamientre rusobä cheni gucäli biuux.

²²Che biejn diajg Jesús xtiidxni, räjpni lojni:

—Tejtis cayäädx gunlu. Bato' guiraa rexhixtenlu, gudisni loj rebejn ni xhet rapdi dxejc sajplu xcäl'nasa'clu xhaguibaa. Dxejc gudanajl narä.

²³Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh. ²⁴Dxejc rdxelojtis Jesús lojni, guc-huinza lajzni räjpni:

—Naganduxh jiu' rebenrajp lo xcäl'rnibee Dios. ²⁵Guyasiru ted te cameii ni' te guux lo ni jiu' rebenrajp lo xcäl'rnibee Dios.

²⁶Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

²⁷Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

²⁸Dxejc räjp Pedr lojni:

—Dad, nuurnu abasa'nnu guiraa rexhixtennu te siopnalnu luj.

²⁹Dxejc badzu' Jesús diidxre lojni, räjpni:

—Rniliápac lojtu, chutis ni gusaan rolijzni näjza rexcuzajnni, rebejtzni, chäälni, xi'nni xcuent xcäl'rnibee Dios, ³⁰sica'ni xhiroobru lo guedxliujre, luxh sica'ni yäl'nabajn par tejpas.

Rusule' Jesús stehuält xho guetni

(Mt. 20:17-19; Mr. 10:32-34)

³¹Gurejdx Jesús rexpejn pacni te laad, te räjpni lojreni:

—Naj chonnu guedx Jerusalén cadro nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii. ³²Sutedrenini ladznaa rebenzajt, suxhiznäjrenini, susacsírenini, sutiobxhejnlireni lojni, ³³luxh che luux quinenrenini, dxejc sugu'trenini, luxh ni riojn dxej sibansacni loj rebengut.

³⁴Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gabeereni.

Rusiajc Jesús te beñ lotiä'p

(Mt. 20:29-34; Mr. 10:46-52)

³⁵Cheni sadzujñ Jesús te guejdx ni laa Jericó, sobga' te beñ lotiä'p ro' nezyuj, canabni gojn. ³⁶Che biejn diajgni cadejd xhidajl bejn lo nezyujga, gunabdiidx beñ lotiä'pga xhini'c cayajc. ³⁷Dxejc räjpreni:

—Jesús ni siääd Nazare't cadejdni nezga.

³⁸Dxejc guredxa'ni räjpni:

—¡Jesús, xi'n toDavid, balaslajz narä!

³⁹Rebejn ni nijd lojreni gudilnäjreni beñ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

⁴⁰Dxejc guzudxi Jesús ro'c, gunibeeni jiadnäreni bejnga lojni. Che bidzujñni lojni, gunabdiidx Jesús lojni, räjpni:

⁴¹—¿Xhini'c rlanjlu gunnäá luj?

Badzu' beñ lotiä'pga diidxre, räjpni:

—Dad, rlazä jien löä.

⁴²Dxejc räjp Jesús lojni:

—¡Sujien balojlu! Abiajclu sa'csi huililajzlu.

⁴³Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

Huij Jesús rolijz te beñ ni laa Zaqueo

19 Dxejc biu' Jesús guedx Jericó, sadejdzani guejdxga. ²Ro'c rbäjz te benrapduxh, ni laa Zaqueo, ni rnibee lo reni rusquijx xcuent impuest. ³Rlanj Zaqueo fiini loj Jesús te gumbeenini, per digacdi fiini lojni sa'csi najcni te benxhate', luxh xhidajl bejn siädsaj guideb gabi Jesús. ⁴Ni'c baxunni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús. ⁵Che gudejd Jesús nejzga, guläsni lojni jiaa, bahuiini cadro sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxey rlazä chajia'nä rolijzlu.

⁶Dxejcti biätguxun Zaqueo lo yajgga, rbalazduxhni huinäni Jesús rolijzjni. ⁷Che bahuii guiraa rebejn xhi gujyc, gusloj camojmreni, direni jiuilajz, räjpreni:

—Jesús sajjia'n rolijz te beñdojl.

⁸Dxejcti huisulii Zaqueo, räjpni loj Jesús:

—Bahuilaa, Dad, gala' xhixtenä gudeda loj rebenproof; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

⁹Räjp Jesús lojni:

—Lagajc nadxey gubicaj xtojllu näjza xtojll reni rbäjz rolijzlu, sa'csi guliipac najclu te xagdo toAbram. ¹⁰Pues Xi'n Dios ni gujyc Niguii biädtil rebendojl te guslaani rebejnnga ni gunijt neñ dojl.

Xcuent tzuu meel

¹¹La_l ni cagucua diajgreni xtidx Jesús, bijzani te cuent ni ruluii, sa'csi asiäddzujngajxhneni guedx Jerusalén, luxh laareni rujnreni xhigab sisloj guinibee Jesús si'ctisni guidzujnni guejdxga. ¹²Dxejc räjpni lojreni:

—Guyu' te bejn, beñräjpni, huijni te guejdx zijtro te gacni reii, dxejc guibisacni. ¹³Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujn dzuun con meelre che guibisacäli.” Sä'tini. ¹⁴Per reben lajdxni dipacreni guichagljaz bejnnga, ni'c baxhalreni gäii bejn te saye'treni: “Di rlanjz dinu gacni xreiinu.” ¹⁵Luxh empac gujcnii reii, dxejc gubisacni lajdxni. Che bidzujnni gurejdxni rexmosni ni badeedni meel cua'reni, te gacbeeni lac bejn tejjareni gaan. ¹⁶Ni bidzujn ganid räjpni lojni: “Dad, xmeellu bejn gaan stzuu meel.” ¹⁷Dxejc räjp reii lojni: “Hueenca, luj najclu te mossac, sa'csi laaca bejnlu dzuun lo te dzunbäz, naj

sunidxä guinibeelu loj tzuu guejdx.”

¹⁸Bidzujn stee mos lojni, räjpni: “Dad, xmeellu bejn gaan gäii meel.” ¹⁹Dxejcti räjpni lojni: “Luj guinibeelu loj gäii guejdx.” ²⁰Bidzujnti stee mos lojni, räjpni: “Dad, aree xmeellu, guluchedzu'tzäni neñ te baii ²¹sa'csi bidxebä guejblu, sa'csi najc guejblu te beñ nadiplajz, rutojtp guejblu cadro di guejblu nuzuj, luxh rliäs guejblu cose'ch cadro di guejblu nibe'c.” ²²Dxejcti räjp reii lojni: “iMosguidx! lagajc ro'lu birii diidx ni gunälu yälguxhtis. Palga najnlu nacä te beñ nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, ²³¿xhicuent dilu nisa'n xmelä neñ te bancw te che nibi'ä nica'a xmelä nägajc xi'n meelga?” ²⁴Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.” ²⁵Laareni räjpreni: “Dad, per laani arajpni tzuu meel.” ²⁶Dxejc badzu' reii diidxre lojreni, räjpni: “Ni'cni miä, reni rajp, sica'rurenii, niluxh reni di gap lojreni sibicaj guiraa recosbäz ni rajpreni. ²⁷Luxh xcuent reni rdxe'ch loä, ni di rlanjz niacä reii lojreni, coltanäreni ree, colgugu'treni nez loä.”

Che biu' Jesús guedx Jerusalén

(Mt. 21:1-11; Mr. 11:1-11; Jn. 12:12-19)

²⁸Che gulujx guniini guiraa rediidxre, huinuuni xnejzni, sääni nez lo guejdx Jerusalén. ²⁹Che asadzujngajxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejn-pacni, ³⁰räjpni lojreni:

—Colchäj lo guejdx' ni suga' lad rec. Che guidzujntu, guidxältu caduu te bur huin ni gajd bejn cuib. Colguxhecnii, coltanäni ree. ³¹Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

³²Sä'ti rexpejn-pacni nani baxhalni, bidxälreni manga sigajctisni räjp Jesús.

³³Cheni caguxhecreni bure'ga, rexpax-huaan bure'ga räjp lojreni:

—¿Xhicient caguxhectu bure'ga, ä?

³⁴Dxejc badzu'reni diidxre, räjpreni:

—Sa'csi caquiin Dadni.

³⁵Sas huinäreni bure'ga loj Jesús, gudixhreni xhajbreni dejtzni, te gubijb Jesúsni. ³⁶Guideb cadro gudejd Jesús gudixhreni xhajbreni lo nezyuj cadro tedni. ³⁷Cheni ameer guidzujjni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnini. ³⁸Räjpreni:

Chicbaa reii ni siäd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹Dxejc gaii refarisee ni suga' galäii rebejn, räjpreni loj Jesús:

—Mastr, gudidxa' lo rebejn ni siädna-jllu te na'cru guiniireni si'c.

⁴⁰Dxejc Jesús räjp lojreni:

—Rniliá lojtu, palga redee gusäu ro'reni, sibedxa' reguijre.

⁴¹Che bidzujjni gajxh, che bahuiini guedx Jerusalén, biin Jesús xcuent guedjdxga, ⁴²räjpni:

—¡Maläii gacbeelu, masque neñ redxejre, xhini'c sajc guniidx yälrbedxilajz lojlu! Per naj naga'tzni, luxh digacdi fiilu lojni. ⁴³Sidzujñ dxejga lojlu, cheni jääd reni rdxe'ch lojlu sujnreni si'c te guralyuj guideb gabilu, nez lojlu sigajc nez dejtzlu sisiujreni. ⁴⁴Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biäd Dios biädhuuilu.

Rusia Jesús neñ guidoro

(Mt. 21:12-17;

Mr. 11:15-19; Jn. 2:13-22)

⁴⁵Dxejcti biu' Jesús neñ guidoro, guslojni cabääni rebejn ni caguto' najza reni casii. ⁴⁶Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadro jäädnabtu lo Dios”, niluxh la'tu abejntuni si'c te biliää xte gubaan.

⁴⁷Guixe-guixee caguluii Jesús neñ guidoro, luxh reni rnibee loj rebixhojz najza rebejn ni ruluii leii, najza rebeñgool xte guejdxga caguiilreni mood te ju'trenini, ⁴⁸luxh direni nidxäjl xho ni-ujnrenini sa'csi guiraa rebejn cacuadi-agdzu'tzreni xtiidxni.

Xcäl'rnibee Jesús

(Mt. 21:23-27; Mr. 11:27-33)

20 Te dxej suga' Jesús neñ guidoro, caguluiini rebejn, cagusule'zani diidx xcuent xho guibicaj xtojlni, che bidzujñ reni rnibee loj rebixhojz najza rebejn ni ruluii leii najza rebeñgool, ²räjpreni lojni:

—¿Xhi yäl'rnibee rujnlu recosre? ¿Chu baniidx yäl'rnibeega lojlu?

³Dxejcti räjp Jesús lojreni:

—Narä sigajcza gunä te yäl'gunabdiidx lojtu, colgudzu' diidxre loä, ⁴¿chuni'c baxhal' Juan te gutiobnisni rebejn? ¿La Dios o la rebejn, ä?

⁵Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhal'ni, dxejc naani loonu: “¿Xhixhcient ditu ninilajz xtiidxni?” ⁶Palga jie'tznu: “Rebejn baxhal'ni”, guiraa rebejn sucuaa guij yejcnu, ju'tlireni nuurnu sa'csi laareni rujnpareni xhigab gunii Juan xtidx Dios.

⁷Dxejc badzu'reni diidxre, räjpreni:

—Dinu guidon chuni'c baxhal' Juan te biäd'tiobnisni.

⁸Dxejc räjp Jesús lojreni:

—Dizana guiniä xhi yäl'rnibee rapä te runä recosre.

Xcuent remosgüjdx*(Mt. 21:33-44; Mr. 12:1-11)*

⁹Dxejc gusloj canii Jesús loj rebejn, binuli cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn cháäreni meed, sä'tnini zijt, gucladuxhni ro'c. ¹⁰Che bidzujn dxej ni guidojpc cose'ch, baxhalni te xmosni sanab cose'ch ni riäjł xca'ni. Per laareni gudijnreni mosga, xhetliidi badeedreni chanäni lo xpaxhwaan yujga. ¹¹Dxejcti baxhalni stee mos lojreni. Dxejc sigajcza gudilnäjrenini, gudijnrenini, luxh xheta badeedireni lojni, ganaxni gubi'ni lo xlamni. ¹²Dxejcti baxhalni ni riojn mos lojreni, per sigajcza gudinduxhrenini, barilaagwrenini.

¹³Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” ¹⁴Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu.” ¹⁵Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnä xpaxhwaan yujga reben gujdxre, ä? ¹⁶Sidzujnni, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—jNa'c gusaan Dios gacni si'c!

¹⁷Bahuii Jesús lojreni, dxejc räjpni:

—¿Xhixhni'c caj lo guijtzi ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu', ni'c agujc guisa'c ni guzuj galoo.

¹⁸Chutis ni jiajb yejc gujga, sianduxhni, per nani jiajb gujga yejcnii siujypacni, li däj gacni.

Xcuent reimpuest*(Mt. 21:45-46; 22:15-22; Mr. 12:12-17)*

¹⁹Reni rnibee loj rebixhojz, näjza reni ruluii leii rlajzreni guiniaazreni Jesús la-gajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn. ²⁰Dxejc cagula'tztisrenini, baxhalreni gaii bejn te gunsireni si'c ni najcreni bendxan, te gucua diajgreni xtiidxni don gaxäjssi guiga'ni lo te diidx te guteedrenini lo yälguxhtis, yälrnibee xte gubernadoor. ²¹Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixgaa la yu' chu najc bejn, ruluisa'c guejblu xnez lo Dios. ²²Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtü narä scree?

²⁴Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo xtiidxni, biäuti ro'reni, guzudxireni.

Rniabdiidxreni xcuent yälrbansac lo rebengut*(Mt. 22:23-33; Mr. 12:18-27)*

²⁷Dxejc huij gaii resaduceos huihui-ireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, ²⁸räjpreni:

—Dad, Mastr, basa'n Moisés guijtzi loonu, lojga caj: “Palga guet te bejn, gusaanni cháälni ruti xi'nni, nanabpac

xca' bejtzni gunaaga te chu xi'nni con laani xcuent tobejtzni.”²⁹ Guyu' gajdz niguii, bejtz najcreni. Sas cua' niguigalooga cháälni. Che gujtni ruti xi'nni.³⁰ Dxejcti cua' ni rojppa gunaaga. Che gujtni, rutiza xi'nni.³¹ Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'.³² Dxejcti näj gunaaga gujct. ³³Guigajdzreni guläsnäjreni gunaare, ni'cni, che guibansacreni lo rebengut, ¿chu cháäl gacni, ä?

³⁴Dxejcti räjp Jesús lojreni:

—Lo guedxliujre ruchnaa rebejn, rudeedzareni xindxa'preni ruchnaa.³⁵ Niluxh rebejn ni agule Dios te cháäreni xhaguibaa, näjza te guibansacreni lo rebengut, di reni'c guchnaa, dizareni gudeed xindxa'preni guchnaa, ³⁶sa'csi diru gac guetreni, anajcreni si'c najc rexangl Dios. Laareni najc xi'n Dios sa'csi abaspansac Diosreni.³⁷ Moisésli basule' xcuent ni rbanasac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacoob”, ni'cni nabajnpacreni lo Dios.³⁸ Sa'csi di Dios gac Xtios rebengut; najcni Xtios rebejn ni nabajn par tejpas, sa'csi par laani guiraa rebejn nabajn.

³⁹Dxejcti gaii reni ruluii lei badzu'reni diidxre, räjpreni lojni:

—Mastr, laaca guniilu.

⁴⁰Sa'csi dirureni ni ajx niniabdiidxrueni lojni.

Chu xi'n najc Crist

(Mt. 22:41-46; Mr. 12:35-37)

⁴¹Dxejcti räjp Jesús lojreni:

—¿Xho mood rniireni Crist najc xi'n toDavid, ä? ⁴²Ni lagajc toDavid bacuaa lo reguijtz ni laa reSalmo: Dad Dios räjp lo Xtadä:

⁴³“Gurej xladbeä cheni guidzujnli dxejcti ni gudzugä guiraa ni rdxe'ch lojlu te gacbeereri luj rnibeelu guira'ti.”

⁴⁴¿Xho mood gacni xi'nni palga rni toDavid lojni “Dad”?

Rucuaquij Jesús reni ruluii lei

(Mt. 23:1-36; Mr. 12:38-40;

Lc. 11:37-54)

⁴⁵Guiraa rebejn cagucuaadiajg che räjp Jesús loj rexpejn pacni:

⁴⁶—Colyajp cuidaad reni ruluii lei, sa'csi rdxagljazreni rajcwreni lajd siol, rlazreni saru guinii guiraa rebejn “xchan” lojreni, rlazreni jiu bejnreni nez loguii, rlazreni cuereri lo reyagxhilsa'c nen reguidobäz, näjza cadro rajc lanij. ⁴⁷Rudzucajzreni rexhixten regunabiuud, dxejcti rojreni rele' siolduxh che rniabreni lo Dios te fii rebejn, te naa bejn najcreni bendxan, luxh lojreni suxhał Dios te castigwroru.

Gojn xten te gunabiuud

(Mr. 12:41-44)

21 Nen guidoro bahuii Jesús cagusäl rebenrajp gojn nen te guijn cadro rdojp gojn. ²Bahuiizani lo te gunabiuud, lacti proobni. Basälni xcojnni nen guinjnga, tio'ptis melbäz basälni. ³Dxejcti räjp Jesús:

—Rniliäpac lojtu, gunabiuud proobga basälruni loj guiraa reni casäl gojn, ⁴sa'csi guiraa reded ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejcti gunii Jesús lojreni, räjpni:

⁶—Sidzujñ dxej sibijl guiralii ni cahui-itu, nicla tej guij di jia'n yejc sa'ni, guiragajcni sibijl.

Reseen ni chu che nitloj guedxliuj

(Mt. 24:3-28; Mr. 13:3-23)

⁷Dxejc gunabdiidx rexpejn̄pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸Räjp Jesús lojreni:

—¡Col̄susiñ te na' gusgueereni la'tu! Sa'csi xhidajl reni jiäd sinii: “Narä nacä Crist”, o “Asiädgajxh redxej che jiädni”, per na'c chalilajztu xtiidxreni, na'cza chanajltureni. ⁹Luxh che jiejn diajgtu cayajc guer cadilñäj sa' bejn, na'c guidxejbtu, sa'csi ganid recosga gac, luxh gad gal̄di nitloj guedxliuj.

¹⁰Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn̄ sucuanäj stee lajdx bejn̄. ¹¹Sajcza xuro, su' gubijn, su'za yäl̄guijdx nez ree nez rec. Luxh xh-aguibaali sien̄ guiraloj ni ruchejb̄ näjza seenro.

¹²Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben̄ guidobäz, susäl̄zarenı la'tu nen̄ latzguiib, sinäzarenı la'tu nez loj reii näjza gubernadoor sa'csi rinälajztu xtidxä. ¹³Luxh guiraa dee sajctu te gac gusule'tu xtidxä lojreni. ¹⁴Na'c gunxgaatu xhigab nen̄ lastootu xhini'c guiniitu lojreni, ¹⁵sa'csi narä sunidxä diidx guiniitu, sunidxäza yäl̄najn lojtu te digac gudzu'reni diidx lojtu niclaza gacdi guiniyajreni xtiidxtu. ¹⁶Näjza rexuczajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. ¹⁷Guiraa rebejn̄ guedxliuj sibälaz la'tu sa'csi rinälajztu xtidxä. ¹⁸Niluxh ni'cla tej xquidxejctu di nitloj. ¹⁹Luxh palga sutijtpis lajztu, sajptu yäl̄nabajn̄ par tejpas.

²⁰'Che fiitu tre' xhidajl soldaad guideb gabi guedx Jerusalén col̄yacbee abidzujñ dxej ni guibijl̄ni. ²¹Dxejc reni yu' guedx Judea, nanab guxun̄reni chacuatzlojreni nen̄ redajn; reni yu' guedx Jerusalén, nanab jiunejzreni ro'c; reni suga' lo nıaa, na'c guibi'reni lo guejdxga, ²²sa'csi nen̄ redxejga sujñ Dios fis lo guejdxga te soob rediidx ni caj lo reguijtz xten Dios. ²³Probe'za regunaa ni nuu báz nen̄ redxejga, näjza regunaa ni ca' báz, sa'csi su' yäl̄huinduxh lo guedxliuj, näjza fis ni gun Dios loj rebejn̄ga. ²⁴Yu'reni guet lo guer, yu'zarenı chää pres, sijreni balti guedxzijt. Dxejc reben̄zıjt sinıbee guedx Jerusalén che guiza'li redxej ni gusaan Dios guinıbee rebejn̄ ni di gac xpejn̄ Israel.

Cheni jiäd Xi'n Niguii

(Mt. 24:29-35, 42-44; Mr. 13:24-37)

²⁵Räjpzani:

—Dxejc su' seen lo gubijdx näjza lo bäii, näjza loj rebajle' ni yu' xh-aguıbaa. Luxh lo renacion̄ guedxliuj su' rebejn̄ yärsia', di jien̄ xhi gunreni, sidxebduxhreni sa'csi siejn diajgreni chubeduxh lo nıdoo, säsduxh nis ni räjs lo nıdoo. ²⁶Sitiol̄ rebejn̄ xcuent yäl̄rdxebduxh che gunreni xhigab xhıcharuni'c gac lo guedxliuj, sa'csi näj guideb guıbaa sinıbsejs. ²⁷Dxejcti suhuiireni lo Xi'n Dios ni gujc Niguii, siädni lo te za guideb xcäl̄rnıbeeni, näjza yäl̄rdımbıchaduxh. ²⁸Che guisloj gac recosre, col̄sutıj̄p lajztu, col̄guiliäs yejctu, col̄guıbalajz sa'csi asadzujñ dxej gusilajztu.

²⁹Guniizani stee cuent lojreni, räjpni:

—¡Col̄huii lo yagiıgw näjza lo guiraa reyajg! ³⁰Che fiitu acabääni be'n, col̄yacbee lagajc la'tu, abidzıngajxh bäii nis-guij. ³¹Sıgajcza che fiitu agusloj cayajc recosre, col̄yacbee asiädzujñ xcäl̄rnıbee Dios.

³²ʔniliápac lojtu, guiraa recosre sajc ansde guet rebejn ni yu' naj. ³³Guibaa nájza guedxliuj sinitloj, rextidxá dini nitloj.

³⁴ʔCol̄susin lagajc la'tu! Na'c gusaantu cha lajztu yálrausa'c, yálrá', yálga'ptu xhixtentu, dxejc ditu gacbee che bidzujñ dxejga. ³⁵Sa'csi si'c sidzujñ dxejga loj guiraa reben guedxliuj. ³⁶Col̄susin, col̄bejdx, col̄guiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

³⁷Rdxee rului Jesús nen guidoro dxejc guxhijn sa'ia'nni yejc dan Oliib. ³⁸Rsilru ristie rebejn te rdzujñreni lo Jesús nen guidoro casob rsil, te gucuadiajgreni rextiidxni.

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

22 Siáddzungajxh dxe lanij che rajwreni yátxtiil ni di säguij, laaza lanijga pascw. ²Dxejc reni rnibee loj rebixhojz nájza rebejn ni rului lei caguiilreni xho gunreni te ju'treni Jesús, sa'csi rdxejbreni rebenguejdx.

³Dxejc biu' bendxab lastoo Judas ni laaza Iscariote, ni najc tej retzubitio'p xpejnpacni. ⁴Dee huininäjni dade' ni rnibee loj rebixhojz nájza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni. ⁵Dxejc bibalajzreni, bia'nreni diidx gudeedreni meel lojni. ⁶Cuájbtu Judas, dxejcnu guslojni caguiilni xho gunni guteedni Jesús ladzñaareni che rut bejn̄di suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷Bidzujñ dxe lanij che rajwreni yátxtiil ni di säguij, che rugu'tzaren̄ni te xiil

si'c ni caj lo xleii toMoisés. ⁸Dxejc baxhał Jesús Pedr nájza Juan, rájpn̄ni lojreni: —Col̄chayejn xchej xten pascw te guidaununi.

⁹Dxejc laareni gunabdiidxreni lojni, rájpn̄reni:

—¿Caro rlaizlu choyennuni?

¹⁰Rájp̄ Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Col̄chanajlni, col̄jiu' rolijz bejn̄ cadro jiu'ni laani. ¹¹Dxejc col̄ye'tz lo bejn̄ ni najc rolijzni ro'c: “Si'c naj Dad Mastr: ¿Con yu' cadro sajc gauxchenáá rexp̄enā naj pascw?” ¹²Dxejc guluini lojtu te yu' ni sojb jiaa yejc stee yu'. Asuchexгаа yu'ga. Ro'c col̄yejn xhi guidaunu.

¹³Sä'tireni. Si'ctis ni rájp̄ Jesús lojreni, si'cpac bidxälreni. Dxejc bejn̄reni xchej xte lanij pascw gaureni.

¹⁴Che bidzujñ or, gurenäj Jesús rexp̄ejn̄pacni lo mex. ¹⁵Dxejc rájpn̄ni lojreni:

—Guyuduxhá gaan gaunááactu xchej xten pascw ansde tedä trabajwduxh. ¹⁶Sa'csi rniä lojtu, diruna gaunáá la'tu pascw cheni guidzujñli dxej ni gacni lo xcäl̄rnibee Dios.

¹⁷Dxejc cua'ni te co'p, badeedni xquixtios lo Dios, rájpn̄ni:

—Colyä' dee, col̄gudeedni lo sa'tu.

¹⁸Sa'csi rniä lojtu, diruna yä'a nis ni rii yejc uub stehuält cheni guidzujñli xcäl̄rnibee Dios.

¹⁹Dxejcti cua'ni yátxtiil, badeedni xquixtios loj Dios, gula'nini, gudisnini lojreni, rájpn̄ni:

—Dee najc si'c tiexhá ni gudedä ju'treni xcuenttu. Col̄yejn screeza te guinalajztu narä.

²⁰Si'cza bennäjni co'p che gulujx gadajwreni, rájpn̄ni lojreni:

—Ni yu' nen̄ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn̄ ni aguleni.

²¹ 'Per bahuilaare, bejn ni guto' narä sobganäj narä lo mexre. ²² Guliipacni, Xi'n Dios ni gujc Niguii sinuu tedni loj nezyuj ni abaluii Dios lojni. Luxh proobza bejn ni guto' narä.

²³ Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc beñroru

²⁴ Sas gusloj cayejyreni, don chuni'c guibee gac beñro lojreni.

²⁵ Dxejcti räjp Jesús lojreni:

—Rerei ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rnii lacti hueen najc rerei-iga. ²⁶ Per la'tu na'c gactu si'c. Nani najc bengoolru lojtu, ni'c riäjł gacni si'c najc ni huinru lojtu. Luxh nani rnibee riäjł gacni si'c mos. ²⁷ ¿Chuni'c sajru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸ La'tu najctu ni gusunäj narä guideb ni gudedä retrabajw ni gudedä. ²⁹ Ni'cni narä runidxä yälrnibee lojtu sigajc ni baniidx xtd yälrnibee loä, ³⁰ te gautu, yätu lo xmexä xhaguibaa, te cuzatu lo yaxhil cadre guntu yälğuxhtis loj rexpejn guitzubitio'p rexagdoö Israel.

Räpxgaa Jesús di Pedr guicäjñ numbeeni

(Mt. 26:31-35;

Mr. 14:27-31; Jn. 13:36-38)

³¹ Räjp Jesús loj Simón:

—Simón, Simón, agunab bendxab ni laa Satanás luj te gusniibni luj si'c rusniib bejn xob te jiani. ³² Narä agunabä lo Dios xcuentlu te na'c jiaädx xcälřililajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räjp Simón lojni:

—Dad, narä sirinalälu; mase gusäureni luj latzguib, näjza narä siäunäälu; mase ju'treni luj, näjza narä setnäälü.

³⁴ Dxejcti räjp Jesús loj Simón:

—Pedr, rniä lojlu, nicla gajd guidgäi cuedxa' nadxej niluxh luj alaräjplu choñli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejc gunabdiidx Jesús lojreni räjpni:

—Che ganaxtu baxhalä la'tu, xhet bolsdi sanätu, nicla carteerdi, niclaza stee gura'chdi, ¿la yu' xhi biquintu, xhi biäädx lojtu, ä?

Dxejc räjpreni:

—Xheti.

³⁶ Dxejc räjpni lojreni:

—Luxh naj rniä lojtu, ni räjp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. ³⁷ Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajł reni'c.

Rbedx-rniab Jesús loj Dios

(Mt. 26:36-46; Mr. 14:32-42)

³⁹ Dxejcti birii Jesús, si'cni rujnpacni, sääni nez dajn ni laa Oliib. Dxejc sanajł rexpejnpacni. ⁴⁰ Che bidzujñreni ro'c, räjpni lojreni:

—Colcuejdx, colnab lo Dios te na'c jiajbtu lo dojl.

⁴¹ Dxejc gubicaj Jesús lojreni, huijni te lajt zite' cadre suga'reni, si'cti cadre rdzujñ te guij che rucuaanini. Ro'c bazuxhijbni, gurejdx-gunabni lo Dios, ⁴² räjpni:

—Xtadä, palga rlaizlu, basläa narä loj trabajwduxhre. Niluxh na'c gacni si'c ni rlazä narä. Bejn si'cni rlaizlu gunlu.

⁴³Dxejc biricaj te xangl Dios lojni te badeedni yälrutiplajzni. ⁴⁴Lałni cadejđni trabajwduxh, cayac-huinduxh lajđni, cabedx-canabrui lo Dios. Guzunislini gusloj catejđ lo yuj biniduxh si'c rejn lojni.

⁴⁵Cheni huisuni, gulujx gurejđx-gunabni lo Dios, huijni cadro suga' rexpejđpacni. Ro'c bidxälñireni nagayejs guiraareni sa'csi cayac-huin lajzreni.

⁴⁶Dxejc räjpni lojreni:

—¿Xhicuent nagajejstu? ¡Colchastie! ¡Colnab lo Dios te na'c jiajbtu lo dojl!

Che gunaazreni Jesús

(Mt. 26:47-56;

Mr. 14:43-50; Jn. 18:2-11)

⁴⁷Lał ni canii Jesús lojreni, bidzujđ xhidajł bejđ. Tej rexpejđpacni ni laa Judas, nijđni nez loj rebejđga. Dxejcti gubigni loj Jesús, te bachagro'ni loj Jesús.

⁴⁸Dxejc räjp Jesús lojni:

—Judas, ¿la con te yälřuchagro' ru-teedlu Xi'n Dios ni gujč Niguii ladzđnaa rebejđre, ä?

⁴⁹Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰Sas tej rexpejđ Jesús gudilñäj te mos xten ni rnibee loj rebixhojz, batiu'ni diajđni ladbee. ⁵¹Dxejc räjp Jesús lojreni:

—¡Agujc! ¡Colgusaanreni!

Dxejc gudajđ Jesús diajđ mosga, basi-ajcni. ⁵²Gunigajc Jesús loj reni rnibee loj rebixhojz näjza reni najc guixhajđ xten guidoo näjza rebengool, guiraa reni siädxiinini, räjpni:

—¿La siädñätu spaad näjza garo't, as-toocanu siädxiitu te gubaan, ä? ⁵³Cheni suga'a lojtu guixe-guixee neđ guidoo,

ditu nuhuał narä. Per dee najc xortu, luxh arnibee yälñacäjy la'tu.

Di Pedr guicäjđ numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴Dxejcti gunaazreni Jesús huinärenini roliz bixhojz ni rnibee lo guiraa rebixhojz. Siädñäjł Pedrni zit-zijt. ⁵⁵Che bidzujđreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. ⁵⁶Dxejc te gunaa ni ruđ dzuun ro'c, che bahuii sobga' Pedr ro'c, rdxelojtisni lojni, räjpni:

—Näj niguiire guyunäj Jesús.

⁵⁷Dxejc basuni' Pedr räjpni:

—Nan, dina gumbeäni.

⁵⁸Che gojł stera't, che bahuii stee bejđ lojni, räjpni lojni:

—Näj luj najclu te rexpejđni.

Per Pedr räjp lojni:

—Gurniälojlu, Dad, dina gacä xpejđni.

⁵⁹Che gudejđ si'cti teb or, räjp stee bejđ lojni:

—Guliipacni, näj bejđre guyunäjni, sa'csi laani najczani te beđ Galilee.

⁶⁰Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lałni canii Pedr rediidxre, guredxa' te guidgaii, ⁶¹luxh gubirėza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: “Che gajđ guidgaii cuedxa', abazuni'lu chođ huält, räjpłu dilu gumbee najrä.” ⁶²Dxejcti guc-huin lajz Pedr, biriini ro'c, ronduxhni.

Rniyajreni Jesús

(Mt. 26:67-68; Mr. 14:65)

⁶³Rebejđ ni canäj Jesús, gusloj caguxhisnäjrenini, caguijnzarenini.

⁶⁴Dxejc basäurenini lojni, gudajpreni lojni, räjpreni lojni:

—ĵGunii chuni'c gudijnlu!

⁶⁵Luxh guiraloj cayĵbreni lojni, caniyaduxhrenini.

Bidzunnĵreni Jesu's nez loj rebixhojz

(Mt. 26:59-66;

Mr. 14:55-64; Jn. 18:19-24)

⁶⁶Che bara yĵĵal, bidojpb rebengool ni rnibee, nĵza reni rnibee loj rebixhojz, nĵza rebejn ni ruluii leii, huinĵreni Jesu's te suuni nez lojreni nen yu' cadro rujnreni yĵlguxhtis. Dxejcti rĵjpreni lojni:

⁶⁷—Palga luj najclu Crist, bicĵjpmi loonu.

Dxejc badzu' Jesu's diidxre lojreni, rĵjpmi:

—Palga guicĵpmi, ditu chalilajz.

⁶⁸Luxh palga gunĵ te yĵlgunabdiidx lojtu xcuent Crist, ditu gudzu' diidxga loĵ. ⁶⁹Per nĵjli sibej Xi'n Dios ni gujc Niguii xladbee Gueb Dios ni yu' xhaguibaa.

⁷⁰Dxejc gunabdiidx guiraareni lojni, rĵjpmi:

—Mbaj pues, ĵla luj najclu Xi'n Dios, ĵ?

Dxejc badzu' Jesu's diidxre lojreni, rĵjpmi:

—Nacĵni, si'cni najtu la'tu.

⁷¹Dxejc rĵjpmi lo sa'reni:

—ĵXhirucxhamaaz rlajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

Jesu's nez loj Pila't

(Mt. 27:1-2, 11-14;

Mr. 15:1-5; Jn. 18:28-38)

23 Dxejc huisu guiraareni, huinĵreni Jesu's nez loj Pila't. ²Ro'c guslojreni cabe'creni xquejni, rĵjpmi:

—Bidxĵlnu bejnre cayujnni bieju lo rexpejnnu. Rĵjpmi xhet nanabdi qui-

ixnu impuest lo reii Cĵsar. Caniizani laani najcni Crist, nalajznu najczani reii.

³Dxejc gunabdiidx Pila't lojni, rĵjpmi:

—ĵLa luj ni najc reii xten rexpejn Is-rael, ĵ?

Sas badzu' Jesu's diidxre rĵjpmi:

—Najcni lagajc si'c ni guniilu.

⁴Dxejc rĵjpmi Pila't loj reni rnibee loj rebixhojz nĵza loj guiraa rebejn:

—Dina guidxĵla nicla tej dojl xten bejnre.

⁵Niluxh laareni sanuutis caniireni, dipru caniireni, rĵjpmi:

—Guiraa reben Judea cayu' yĵrsia' xcuent xcĵlruluiini. Guslojni guedx Galilee, luxh reeli sanuu caguluiini.

Jesu's nez loj Herodes

⁶Che biejn diajg Pila't rediidxre, gunabdiidxni: “ĵLa Galilee siĵĵad bejnĵa?”

⁷Cheni rĵjpmi ro'c siĵĵadni, baxhalnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalĵn. ⁸Che bahuii Herodes loj Jesu's, bibalajzni sa'csi agujc xchej rlajzni fiini lojni, sa'csi abiejn diagni diidx xcuent ni cayujnni. Luxh rlajzni fiini gunni te milaagwr. ⁹Xhidajl yĵlgunabdiidx bejn Herodes, luxh xhet guniidi Jesu's. ¹⁰Ro'c suga'za reni rnibee loj rebixhojz nĵza rebejn ni ruluii leii, cabecduxhreni xquejni. ¹¹Dxejc gulĵlaz Herodes nĵj rexsoldaadni Jesu's, baxhiznĵrenini, ni'c bashuajcwrenini te ladsa'c sa' ni rajcw reii, dxejcti baxhalsacrenini loj Pila't. ¹²Lagajc dxejga, Pila't nĵza Herodes gujcreni amiĵgw, luxh galoo bidxe'ch lo sa'reni.

Gunibeereni guet Jesu's

(Mt. 27:15-26; Mr. 15:6-15;

Jn. 18:39-19:16)

¹³Dxejc gurejdx Pila't reni rnibee loj bixhojz, nĵza rebengool ni najc guxhtis, nĵza rebenguejdx. ¹⁴Dxejc rĵjpmi lojreni:

—La'tu biädnätu bejnre loä, najtu caguquĩni rebejn gunreni bieju, luxh narä agunabdiidkä guiraloj lojni nez lojtu, luxh abahuiitu dina nidxälä nicla tej dojl ni cagucuaquijituni. ¹⁵ Niclaza Herodes di nidxälä nicla tej dojl, ni'cni baxhaľsacnini loonu, luxh abahuiitu xhet dojldi bejnri te guetni. ¹⁶ Ni'cni quinäni, dxjecti guslaäni.

¹⁷ Najc costumbr ruslaa Pila't te bejn ni yu' nen latzgüiib casob rajc lanijre. ¹⁸ Per guiraareni guredxa'reni si'c tejsi bejn, räjpreni:

—¡Bagu't bejnre, baslaa Barrabás!

¹⁹ Barrabás najc ni basälreni latzgüiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. ²⁰ Rlajzpac Pila't guslaani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—¡Bacuaani lo cruju, bacuaani lo cruju!

²² Riojn gunisac Pila't lojreni, räjpni:

—¿Xhi doľduxh bejnri? Xhetlidi dojl rdxälä bejnri te guetni. Ni'cni siguinäni dxejc suslaäni.

²³ Luxh laareni sanuutis guredxa'reni, gunabreni xcajni lo cruju. Luxh sa'csi guredxa'tisreni, bejtireni gaan gujc si'c ni rlajzreni. ²⁴ Dxejc cuäjb Pila't gunibeeni gac si'c ni gunabreni. ²⁵ Dxejc baslaani bejn ni yu' latzgüiib sa'csi bejnri bieju, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

Che cuaj Jesús lo cruju

(Mt. 27:32-44;

Mr. 15:21-32; Jn. 19:17-27)

²⁶ Cheni sanäreni Jesús xcaj lo cruju, gunaazreni te bejn ni laa Simón ni siääd guedx Cirene; basaj bejnga lo niaa. Dxejc basguurenini cruju, siädnajltini dejt Jesús.

²⁷ Siädnajlza xhidalduxh bejn, näjza xhidajl gunaa ni cayonduxh,

cabedxa'reni sa'csi cayac-huinduxh lajzreni xcuent Jesús. ²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. ²⁹ Sa'csi sidzujn dxejc gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” ³⁰ Dxejc guisloj rebejn gäb loj redajn: “Coljiajb yejnu”, säjbzarenini loj relom: “Colgucua'tz nuurnu.” ³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzarenini tio'p benguijdx xcajzarenini loj recruju, guetnäjrenini Jesús. ³³ Che bidzujnreni te lajt ni laa Calabeer, ro'c bacuaarenini Jesús lo te cruju, bacuaazarenini guiro'p rebenguijdxga lo stio'p cruju, tejni xladbee, steeni xladbäjgwni. ³⁴ Cheni cagucuaa rebejn reni lo cruju, gunii Jesús, räjpni:

—Xtadä, badzucaj xtojł rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisreni xhajbni cua'renini. ³⁵ Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigreni lojni te badeedreni bin-nii yäni. ³⁷ Dxejc räjpreni lojni:

—Palga gulii najclu rei xten rexpejn Israel, baslaa lagajc luj.

³⁸ Luxh bacuaarenini gaii diidx loj te baräjd ni cuaj yejc cruju. Con didx griegw, con didx latın, näjza didx hebreo, bacuaarenini scree: “Dee najc Reii xten rexpen Israel.”

³⁹ Te reben guijdx ni najl lo te cruju ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

⁴⁰ Per benguijdx ni najl lo cruzj ste-laadga gudidxa'ni loj stee benguijdx ni caniyaj Crist, räjpni:

—¿La dilu guidxejb Dios? ¡Ni caya-jczalu tejsi castiigw! ⁴¹ Per nuurnu caya-jcnu castiigw ni riäjł gacnu te guidixnu redojl ni biennu. Luxh laani xhet dojlđi bejnni.

⁴² Dxejc räjpni loj Jesús:

—Bazalajzlu narä che guidzujnlu lo xcälrnibeelu.

⁴³ Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xhaguibaa.

Che gujt Jesús

(Mt. 27:45-56;

Mr. 15:33-41; Jn. 19:28-30)

⁴⁴ Agojl si'cti läidxej. Dxejc bicäyj guideb guedxliuj, si'c bianxcäyj si'cti re-chonti. ⁴⁵ Bicäyj lo gubijdx, luxh ladró ni najl neñ yudxanro xten guidoro, biräjsni gucni tio'p la'. ⁴⁶ Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttni.

⁴⁷ Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojlđi bejn bejnre.

⁴⁸ Guiraa rebejn ni suga' ro'c ni bahuii guiraa ni guzajc ro'c, gubi'reni rolizjzeni, cayäazzeni lagajc lastooreni. ⁴⁹ Luxh guiraa reni rumbee Jesús, näjza regu-naa ni biädnajlni che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61;

Mr. 15:42-47; Jn. 19:38-42)

⁵⁰ Guyu' te bejn ni laa José, lacti huen najcni, luxh laaca rujnni guira'ti.

Siädni guedx Arimatea, región Judea. Nadxaagzani loj reni rnibee neñ guidoro xten rexpejn Israel. ⁵¹ Cabäjzza José jiäd yälrnibee xten Dios, ni'cni dini nidxaglazj nani bejn resa'ni. ⁵² Dxejcti huijni lo Pila't, gunabni tiejxh Jesús. ⁵³ Che gulätnini lo cruzj, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gjad guiga'tz ro'c. ⁵⁴ Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhrene togoogla neñ baa. ⁵⁶ Che gubi'reni rolizjzeni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

Che gubansac Jesús lo rebengut

(Mt. 28:1-10; Mr. 16:1-8; Jn. 20:1-10)

24 Dxej ni gusloj xmaanga, rsil-dooru huinä regunaaga robaa recuaan ni rlianejxh ni bencheereni. ² Che bidzujnreni, bahuiireni agubicaj guij ni rusäu ro' baa. ³ Dxejc che biu'reni neñ baaga, direni nidxäl tiejxh Jesús. ⁴ Lał ni cadxelojreni, di jien xhi gunreni, biricaj tio'p dade' gusuj cuä'reni. Rdim-bichaduxh xhajnreni. ⁵ Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiiltu te bejn ni nabajn lo rebengut, ä? ⁶ Rutini ree. Agubansacni. Colgusnaj lajztu rediidx ni guniini cheni guyusijcni Galilee, ⁷ che najni lojtu: “Riäjł jiajb Xi'n Dios ni gujc Niguii ladzña rebendojl, xcajzani lo cruzj, dxejc ni riojn dxejga sibansacni loj rebengut.”

⁸ Dxejc banaj lajz regunaa xtidx Jesús, ⁹ biriireni robaa, gubi'tireni te bijreni di-

idx lo retzubiteeb rexpejn̄pacni nájza loj rebejn̄ ni yunäjreni. ¹⁰ Reni huisa'n diidx loj rexpejn̄pac Jesús najc redee: Marii Magdalen̄, nájza Xuan, nájza Marii xnan Jacoob, nájza sgaii gunaa. ¹¹ Niluxh rexpejn̄pacni bejn̄ xhigab didxnayäälni, direni nililajz xtidx regunaaga.

¹² Dxejc huisu Pedr, ruxun̄lini huijni ro' baa. Che gudixhlojni, bahuiini nen̄ baaga, ganaxtis bariaad dzuub te laad. Dxejc gubi'ni rolizni, rdxelojtisni xcuent ni gujc.

Ni guzajc lo nezyuj ni sii guedx Emaús

(Mr. 16:12-13)

¹³ Lagajc dxejga, tio'p rexpejn̄pacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. ¹⁴ Laḷ ni sasajreni lo nezyujga, cayujyreni diidx xcuent reni gujc ro'c. ¹⁵ Laḷ ni caniireni gubig Jesús lojreni, gusloj sasanäjniren̄i. ¹⁶ Luxh mase cahuiireni lojni, yu' xhi badxojn̄ niembeer̄enini. ¹⁷ Dxejc gunabdiidx Jesús lojreni, räj̄pni:

—¿Xhini'c rujytu laḷ ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räj̄pni:

—Guiraasi bejn̄ najn̄ xhi gujc nen̄ guedx Jerusalén. ¿La lujtis bia'nlu nen̄ guejdxga ni di gan xhi gujc ro'c, ä?

¹⁹ Dxejcti räj̄p Jesús lojreni:

—¿Xhini'c gujc ro'c?

Dxejc räj̄preni lojni:

—Recos xcuent Jesús ni siääd guedx Nazare't, ni gujc te niguii ni gunii xtidx Dios, rajpni yäl̄rnibeduxh xten Dios loj redzuun ni ruj̄nni nájza loj rediidx ni rniini, nez loj Dios nájza nez loj rebejn̄. ²⁰ Nájza xho bejn̄ reni rnibee loj rebixhojz nájza rex̄cuxhtisnu, bateedrenini ladz̄naa reni gunibee guetni, dxejc bacuaarenini lo cruju. ²¹ Niluxh nuurnu cabääznu laani gacni nani nus̄laa rexpejn̄ Israel ladz̄naa rebenz̄ij̄t. Naj̄ agujc

chon̄ dxej ni gujc recosre. ²² Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xt̄enni, ²³ direni nidxäl tiejxhni. Biädsan̄reni diidx loonu najreni bahuiireni lo tio'p xangl Dios ni räj̄p lojreni, agubansac Jesús lo rebengut. ²⁴ Dxejcti huihuii gaii sa'nu robaa, bahuiizaren̄i najcni si'ctis ni naj regunaaga loonu, niluxh direni nuhuii loj Jesús.

²⁵ Dxejc räj̄p Jesús lojreni:

—¿Lacti nayääl tre' xcäriejntu! Lacti nen̄ rililajztu xtidx redade' ni gunii xtidx Dios xcuent Crist. ²⁶ ¿La di nungäj̄l tedxgaa Crist retrabajwduxhre dxejcti jiu'ni lo xcäl̄rdimbicha' Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäj̄ni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzuj̄n̄reni guejdx cadro sääreni, bejn̄ Jesús si'cni chanuuni chääni lo nezyuj. ²⁹ Dxejc laareni bascuääzrenini te jiannäj̄n̄reni, räj̄preni lojni:

—Biannäj̄ nuurnu, sa'csi acayajc gudx̄ej, agojl̄ jiu' guxhij̄n̄.

Dxejcti biu' Jesús te jiannäj̄n̄reni. ³⁰ Cheni sobganäj̄n̄reni lo mex, cua'ni yätxtiil, benle'nini, dxejc gula'nini, gudisnini lojreni. ³¹ Lagajc dxejc, baxhal Dios balojreni, biembeer̄eni Jesús, dxejc laani gunitlojni lojreni. ³² Dxejcti räj̄preni lo sa'reni:

—¿La di lastoonu nibeguiboo cheni siäd̄niini loonu lo nezyuj, che cagusule'ni xtidx Dios?

³³ Dxejc diruren̄i nibäjz ro'c, alga gunasgajc̄reni nez, gubi'reni guedx Jerusalén. Ro'c bidxäl̄reni abidojp̄ xpejn̄pac Jesús nájza sgaii bejn̄. ³⁴ Dxejcti bijreni diidx loj guiro'preni bidzuj̄n̄, räj̄preni:

—Guliipac gubansac Jesucrist, luxh baluilojni loj Simón.

³⁵ Dxejc guiro'p reni bidzujñ bijzareni diidx ni gusajcreni lo nezyuj, näj xho biembeezareni Jesús che gula'ni yätxtiil.

Baluiloj Jesús loj rexpejn̄pacni

(Mt. 28:16-20;

Mr. 16:14-18; Jn. 20:19-23)

³⁶ Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Col̄cuedxi lajztu!

³⁷ Per laareni rdxeløjreni bidxiejbreni, naareni cahuiireni lo te sprit. ³⁸ Dxejc räjp Jesús lojreni:

—¿Xhicuent cadxajtbtu? ¿Xhicuent rac tio'p lastootu? ³⁹ ¡Col̄huui renaä, näjza reni'ä! Lagajc naräni. Col̄cayn narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

⁴⁰ Che guniini rediidxga, baluigajcni renaani näjza reni'ni. ⁴¹ Laḷ ni cadx-eløjreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', näjza te la' seer ni yu' tzujn. ⁴³ Ni'c cua'ni gudajwnini nez lojreni. ⁴⁴ Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäjḷ soob guiraa redidix xcuentä ni caj lo xleii Moisés, näjza

lo rexquijtz redade' ni gunii xtidx Dios näjza ni caj lo rexquitz Salmos.

⁴⁵ Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. ⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn̄ dxej, guibansacni loj rebengut. ⁴⁷ Sire'chza diidx xcuent xho rusḷaa Crist rebejn̄ neñ doḷḷ che rusiejchreni lajzreni, che rililajzreni xtidxni. Guedx Jerusalén guislojni, dxejc sire'ch diidx guideb guedxliuj. ⁴⁸ La'tu najtcti testiigw guiraa recosre. ⁴⁹ Narä suxhaḷä Sprit Dxan xten Dios lojtu, ni'c col̄jia'n guedx Jerusalén cheni jiädḷäzlini neñ lastootu, guniidxni yäl̄rnibee ni siääd xhaguibaali.

Huäjs Jesús xhaguibaa

(Mr. 16:19-20)

⁵⁰ Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni naani, benle'ni yejcreni.

⁵¹ Laḷ ni cayujnni si'c, gubicajni lojreni, huäjsni xhaguibaa. ⁵² Peta laareni gulujx gojnrenini, dxejc cabalazduxhreni gubi'reni guedx Jerusalén. ⁵³ Ro'c guixeguixee guyu'reni neñ guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuaa San Juan

Xtidx Dios najc te Niguii

1 Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ²Che gajd gac-cheeli guedxliuj, yunäjni Dios. ³Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. ⁴Laani gojp yäl**na**baj**n**. Yäl**na**baj**n**ga najc bianij xten rebej**n**. ⁵Luxh bianijga rdimbicha' nez lo yäl**cä**jy, niluxh yäl**cä**jyga di nia-jc**di** nusui**ini**.

⁶Guyu' te niguii birilaj Juan, ni baxha**l** Dios. ⁷Laani biäd**ni** te basule'ni diidx. Biädsule'ni diidx xcuent bianij te nililajz guiraa rebej**n** diidx xcuent bianij. ⁸Laani dini gac bianij, laani biädsule'ni diidx xcuent bianij. ⁹Laa bianijpacga ni rusanij lastoo guiraa rebej**n**, luxh **naj** abiäd**ni** lo guedxliujre.

¹⁰Nani najc Diidxga guyu' lo guedxliujre, xcuent laazani guc-chee guedxliujre, luxh di rebe**n** guedxliujre nililajz chu naj**ni** naj**ni**. ¹¹Biäd**ni** loj rexp**e**n Israel, niluxh rexp**e**j**n**ni direni nicä**j**b niu'ni lojreni. ¹²Dxej**c** loj guiraa reni cuä**j**b guyu'ni lojreni, loj renani huililajz xtiid**x**ni, loj reni'c badeedni yäl**r**nibee gacreni xi'n Dios. ¹³Laa reni'c ni di gac si'c xi'n be**n** guedxliuj, ni goj**l** sa'csi r**l**ajz te biniet chu xi'n**ni**, dee najc**pac**reni Xi'n Dios sa'csi sudeedni yäl**na**baj**n** par tejpas lojreni.

¹⁴Diidxga guj**c** te be**n** guedxliuj. Gulä**j**z**ni** lo guedxliujre, bahuilo**z**zanu xcäl**r**rdimbicha'ni, si'c yäl**r**rdimbicha' xten xingan x**te** x**ta**d**ni**, laani najc**pac**ni nani sanälajz nuurnu, nani r**ni**i didxlii loonu. ¹⁵Juan gunii xcuent Jesús. Guredxa'ni, rä**j**p**ni**:

—Laa dee ni r**ni**ä, nani siäd detzä sajcruni loä, sa'csi laani ganidni naba**j**ni loä.

¹⁶Sa'csi guiraanu cua'nu xcäl**na**sac-duxhni, yäl**r**rac**nä**j detz yäl**r**rac**nä**j. ¹⁷Leii xten Dios biäd**na** toMoisés, niluxh yäl**r**rac**nä**j näjza redidxlii biäd**na** Jesucrist. ¹⁸Rut chu te**jd**i abahuii lo Dios, xinx**te**bni ni yunä**j**pac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist

(Mt. 3:11-12; Mr. 1:7-8; Lc. 3:15-17)

¹⁹Dee najc diidx nani gunii Juan ni rutiobnis che baxha**l** rexp**e**j**n** Israel rebixho**j**z näjza rexp**e**j**n** guidoo ni laa levitas, biriireni guedx Jerusalén te sanabdiidxreni lo Juan, rä**j**p**ni** lojni:

—¿Luj chu najclu?

²⁰Dxej**cti** bicä**j**p**ni** lojreni, xhet bacua'tz**d**ini lojreni, rä**j**p**ni**:

—Et narädi nacä Crist ni jääd.

²¹Dxej**cti** gunabdiidxreni lojni, rä**j**p**ni**:

—¿Chuxhni'c najclu? ¿La lujni najc Elías?

Rä**j**p**ni**:

—Dina gacäni.

Rä**j**p**ni**:

—¿La najclu te dade' ni gunii xtidx Dios ni cabä**ä**znu jääd?

Dxej**c** rä**j**p**ni**:

—Dina gacäni.

²²Rä**j**p**ni**:

—¿Chuxhni'c najclu? Te chonänu diidx loj reni baxha**l** nuure. ¿Xhi r**ni**ilu, chuxhni'c najclu?

²³Rä**j**p Juan:

—Narä nacä nani rbedxa' nez lo reyu**bi**dz si'c ni gunii Isaías, ni gunii xtidx Dios scree: “Co**l**yensa'c xnezyuj Dad.”

²⁴Rebej**n** ni baxha**l** redee najc reni r**ni**ireni “farisee”. ²⁵Dxej**c** gunabdiidxreni stee, rä**j**p**ni** lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabääznu jiääd, ä?

²⁶ Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbec. ²⁷ Laa dee ni siääd detzä niluxh di nungäjł nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuii Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucaj xtojł reben guedxliuj. ³⁰ Lagajc xcuent dee ni rniä cheni guniä lojtu: “Detzä siääd te niguii ni sajcruloä, sa'csi ganidli narä agac nabajñni.”

³¹ Luxh dina niembeäni, per biädtiobnisä con nis te guluiä lo rexpejn Israel chu najcni.

³² Guniiza Juan stee diidx xcuentni, räjpni:

—Narä bahuiä biäjt Sprit Dxiän xten Dios xhaguibaa si'c te palom guzudxini yejcní. ³³ Dina niembeäni, per nani baxhal narä gutiobnisä con nis, laani najni loä: “Cheni fiilu jäjt Sprit Dxiän xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxiän xten Dios.” ³⁴ Narä abahuiä lojni, ni'cni miliä: “Dee ni najc Xi'n Dios.”

Reni gujc xpejn Jesús ganiddoo

³⁵ Che bara stee yääl, sugasac Juan ro'c, suganäjni tio'p rexpejñni. ³⁶ Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiil xten Dios!

³⁷ Biejn diajg guiro'p rexpejñpac Juan diidxga, dxejc sanajlreni Jesús. ³⁸ Che gubiré Jesús bahuiini siädñajlreni, dxejc räjpni:

—¿Xhi caguiiltu?

Räjp rebejnnga:

—Mastr, ¿caro rbäjzlu?

³⁹ Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojł si'cti rcatajpc gudxer.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjłni Jesús. ⁴¹ Ganiddoo huitiilni bejtzni, dxerc räjpni lojni:

—Abidxälnu Mesías nani sälojza Crist ni cabääznu jiääd.

⁴² Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe näjza Natanael

⁴³ Bara yäälga rlaiz Jesús chää nez Galilee. Dxejc bidxaagni Felipe, räjpni lojni:

—Gudanajł narä.

⁴⁴ Felipe siääd guedx Betsaida, guedxro ni najcza lajdx Andrés näjza Pedr. ⁴⁵ Felipe bidxaag Natanael räjpni lojni:

—Abidxälnu bejn nani bacuaa to-Moisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

⁴⁶ Räjp Natanael:

—¿La sajc guirii te bensa'c guedx Nazare't, ä?

Räjp Felipe lojni:

—Gudaa, te fiilu.

⁴⁷ Che bahuii Jesús siääd Natanael nez lojni, räjpni:

—Colhuii te ben Israelpac nani dipacni gusguee.

⁴⁸ Räj̄p Natanael:

—¿Xho numbeelu narä?

Badzu' Jesús diidxre lojni räj̄pni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räj̄pni:

—Mastr, luj najc Xi'n Dios, luj najc Reii xten rexp̄n Israel.

⁵⁰ Räj̄p Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

⁵¹ Dxejcti räj̄pzani:

—Rniliäpac lojtu, suhuiitu guixal xhaguibaa, näjza räp riäjt rexangl Dios yejc Xi'n Dios ni gujc Niguii.

Te sa' ni guyu' guedx Caná xten Galilee

2 Che gudejd chon̄ dxej, guyu' te sa' guedx Caná xten Galilee. Ro'c guyu' xnan Jesús. ² Huijza Jesús näjza rexpejn-pacni, sa'csi bidon̄reni chääreni lo sa'ga. ³ Gubijdz bin. Dxej räj̄p xnan Jesús lojni:

—Dirureni ga'p bin.

⁴ Dxej badzu' Jesús diidxre räj̄pni:

—¿Xhicuent rniilu si'c loä, xnanä? Gajd xhorä guidzuj̄n.

⁵ Niluxh räj̄p xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib naa rexpejn Israel te racnayareni te si'c guisa' xlei to Moisés. Neñ tejga guesguijga ru' si'cti te gayuu litr nis. ⁷ Räj̄p Jesús loj remos:

—Colguchaj reguesguijre nis.

Dxejcti bachadoo rebejn̄gani. ⁸ Dxejcti räj̄p Jesús lojreni:

—Colca' che'n̄ni naj te colchanäni lo nani cahuii cayajc sa're.

Dxej huinä remosga che'n bin lojni.

⁹ Che gu' dade'ga che'n nis ni gubixhloj bin (luxh dini gan caro siäädni, remostis

ni gulä'p nis, ni'ctis najn). Dxejcti gurejdx dade'ga bi'n. ¹⁰ Dxejcti räj̄pni:

—Guiraa rebejn̄ rudeedreni binsa'c räxгаа rebejn̄, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejn̄nini neñ guedx Caná xten Galilee. Seenga bazäbdiidx yäl̄nibee xtenni luxh ni'cni huililajz rexpejn̄pacni xtiidxni.

¹² Che gudejd sa'ga, huijni guedx Capernaum con xnanni, rebejtzni näjza rexpejn̄pacni. Ro'c bia'nreni tio'p-chon̄ dxej.

Basia Jesucrist guidoro

(Mt. 21:12-13;

Mr. 11:15-18; Lc. 19:45-46)

¹³ Sa'csi abidz̄ngajxh lanij pascw xten rexpejn̄ Israel cheni rnalajzreni guxhij̄n ni gudejd guixhajx xten yäl̄gujt neñ Egipto, ni'c sää Jesús guedx Jerusalén.

¹⁴ Neñ guidoro bidxäl̄ni xhidajl bejn̄ nani ruto' gon, xiil, palom näjza reni sobga' caguchaa melzijt. ¹⁵ Dxej bejn̄ni te chico't con gaii duu, gulääni regon con rexiiil neñ guidoo. Batie'chni xcoobr rebejn̄ nani ruchaa melzijt, barexh-xhätni rexmexreni. ¹⁶ Räj̄pzani loj reni caguto' repalom:

—Colcuää redee, na'c rujntu rolijz xtadä si'c te guii cadro rdo' guiraloj.

¹⁷ Dxejcti banajlajz rexpejn̄pacni xhi caj lo reguijtz ni bacuaa redade' ni gunii xtidx Dios: “Gucnaj lazä xcuent ni runnäjreni rolijzlu.”

¹⁸ Dxejcti gunabdiidx reni najc xpejn̄ Israel lojni, räj̄preni:

—¿Xhi seen guluiilu loonu naj te fiinu arajplu yäl̄nibee te abejnlu recosre?

¹⁹ Badzu' Jesús diidxre räj̄pni:

—Colgutzuj̄l guidoore, luxh narä neñ chontis dxej sunchesacäni.

²⁰ Räj̄p rexpejn̄ Israel lojni:

—Tiubixho'p ijz guclaa ni guc-chee guidoore, ¿xhixh sajc gunchesacluni nen chontis dxej, ä?

²¹ Niluxh laani caniini xcuent guidoo ni najc lagajc tiejxhni. ²² Ni'cni cheni gubansacni loj rebengut, banajlajz rexpejn pacni rediidxre ni guniini, dxejc huililajzreni nani caj lo rexquijt Dios näjza rediidx ni gunii Jesús.

Numbee Jesús guiraa rebejn

²³ Cheni guyu' Jesús guedx Jerusalén cadro cayajc lanij pascw, laḷ ni cayajc lanijga, xhidajl rebejn huililajz xtiidxni, bahuiizareni remilagwr ni bejn. ²⁴ Luxh di Jesús nililajz xtidx rebejn, sa'csi arumbeeni xho najc rebejn. ²⁵ Niluxh dini niqiiin chu gäb lojni xho najc bejn, sa'csi lagajc laani anancheeni xho najc lastoo tejga bejn.

Jesús con Nicodem

3 Guyu' te niguii lo rexpejn refarisee ni laa Nicodem, najcni te benroro loj reni mibee rexpejn Israel. ² Te guxhijñ biädxhiga'tzni nez loj Jesús, räjpni lojni:

—Mastr, nadonnu lo Dios siäädlu si'c te ni ruluii, sa'csi rut rajcni rujn sa' remilagwr nani rujnlu palga di Dios sunäjni.

³ Dxejcti räjp Jesús lojni:

—Rniliápac lojlu, nani di gaal stehuält, di gacdi fiini xcälrnibee Dios xhaguibaa.

⁴ Dxejcti räjp Nicodem lojni:

—¿Xho gac gaal te bejn stehuält niluxh anajcni bengool? ¿Xhixh sajc chusacni xque' xnanni stehuält te galsacni, ä?

⁵ Badzu' Jesús diidxre räjpni:

—Rniliápac lojlu, nani di gaal con nis, näjza con Sprit Dxan xten Dios, di gacdi jiu'ni lo xcälrnibee Dios xhaguibaa. ⁶ Nani rajl xi'n beñ guedxliujre, ni'c najctisni bejn guedxliuj, luxh nani rajl por Sprit Dxan xten Dios, Spritza najcni. ⁷ Na'c rdxelojlu sa'csi rniä: “Nanab-

pac gaallu stehuält.” ⁸ Rbi' bej cadrotis rlajzni; riejn diajglu rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxan xten Dios.

⁹ Badzu' Nicodem diidxre, räjpni:

—¿Xho mood sajc gac recosre?

¹⁰ Räjp Jesús lojni:

—¿La najclu te mastr xten rexpejn Israel luxh dilu gan recosre, ä? ¹¹ Rniliápac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. ¹² Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guniinu xcuent recos xhaguibaa?

¹³ Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. ¹⁴ Lagajc si'cni guläsjiiaa toMoisés bäl guiib lo yajc nen reyubijdz, sigajcza nanab chäs Xi'n Dios ni gujc Niguii jiaa; ¹⁵ te guiraa renani chalilajz xtiidxni direni nit lo Dios, sica'reni yäl nabajñ par tejpas.

Xho huinälajz Dios reben guedxliuj

¹⁶ Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl nabajñ par tejpas. ¹⁷ Sa'csi di Dios nuxhal xi'nni te gusnijtni rebejn guedxliuj, alga baxhalnini te laa rebejn nen xtojreni xcuentni.

¹⁸ Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. ¹⁹ Ni'cni dee najc yäl nijtga: abiääd bianijga loj guedxliuj, biädnä Xi'n Diosni, niluxh rebejn guedxliuj bidxagljazruren yäl nacäy cadro tre'reni, gulälazreni bianijga sa'csi xhet laadi najc xtzuunreni.

²⁰ Guiraa reni rujn dzunguijdx, rbälaz bianijga, dizareni guibig loj bianijga, didi guluiloj bianijga rextzunguijdxreni. ²¹ Luxh reni rusoo didxlii, rbigreni loj bianijga, te bianijga ruluiløj najc rextzuunreni redzunsac xten Dios.

Rnisac Juan ni rutiobnis xcuent Jesús

²² Dxejcti biääd Jesús näjza rexepejn-pacni nez lo reyuj xten Judea. Ro'c guyunäjniren, batiobnisza rexepejn-pacni rebejn. ²³ Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijl nis. Ro'c sää rebejn lojni te cagutiobnisniren. ²⁴ Dxejc gajdreni gusäu Juan nen latzguib.

²⁵ Dxejcti gusloj rexepejn Juan cayujy diidx con gaii xpejn Israel xcuent yälrdiib naareni ni najc xcostumbr rexepejn Israel. ²⁶ Dxejc biädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

²⁷ Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni. ²⁸ Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädnijd lojni.” ²⁹ Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuentni. ³⁰ Nanab gacni laani benruru, bensajcru, biädla narä riajl gacä benhuinru, ni guxiiru sajc lojni.

Nani siääd Xhaguibaa

³¹ Nani siääd jiaali, ni'c rnibee guiralii, niluxh nani najc ben guedxliuj ni'c rnii xcuent recos guedxliuj. Nani

siääd xhaguibaa ni'c rnibee guiralii. ³² Nani bahuiini, nani biejn diajgni, ni'c rusule'ni niluxh guxii rililajzreni xtiidxni. ³³ Nani rililajz diidx ni rusule'ni, bejnga ruluiløj guliipac najc xtidx Dios. ³⁴ Nani baxhal Dios, ni'c rnii xtidx Dios sa'csi che ruedeed Dios Sprit xtenni, dini gudeed guxiini. ³⁵ Dad Dios sanälajzni xingaanni, abadeedzani guiraliiti chu ladznaani. ³⁶ Nani rililajz xtidx xingaanni arajp yäl nabajn par tejpas, luxh ni di chalilajz xtidx xi'nni, dini fii yäl nabajn, siääd xcälrdxe'ch Dios yejcni, sujn Dios castigwni.

Rdxaag Jesús te gunaa Samaria

4 Che gucbee Jesús abiejn diajg refarisee xhidajlru bejn sanajl Jesús luxh guxiiru sanajlreni Juan, luxh cagutiobnisreni, ² (niluxh xhet Jesúsdi cagutiobnis. Rexepejni ni catiobnis), dxejc ³ biriini Judea gubisacni nez Galilee.

⁴ Laļ ni sasajni, nanab tedni nez Samaria. ⁵ Ni'c bidzujjni te guedxro xten Samaria ni laa Sicar, gajxh nejz loj te la' yuj ni badeed toJacooob lo xi'nni toJosé. ⁶ Ro'c sojb te bisie ni rniireni “xpisie Jacooob”. Sa'csi abadxajg Jesús siädsajni, gurejni ro bisiega. Agojl läidxej. ⁷ Bidzujn te gunaa siädlä'pni nis, dxejc räjp Jesús lojni:

—Baniidx che'n nis yä'a.

⁸ Sa'csi rexepejn-pacni asääreni guejdxga sasiireni xhi gauren.

⁹ Räjpni guna samaritanğa lo Jesús:

—¿Xho mood rniablu nis loä, luj ni najc te ben Israel luxh narä nacä gunaa samaritanğ?

(Sa'csi di rexepejn Israel chanä sa'reni rebejn Samaria.) ¹⁰ Räjp Jesús lojni:

—Paru najnlu xhini'c najc yäl rulaslajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajn lojlu.

¹¹ Räjpni gunaaga lojni:

—Dad, xhet ca'dilu te guiliä'plu nis, luxh bisiere najc jätduxh. ¿Caxh chaca'lu nisnabajnga, ä? ¹²¿La beñrorulu lo toxtadgoldoonu Jacoob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

¹³Badzu' Jesús diidxre lojni, räjpni:

—Guiraa reni rä' nis bisiere, siojreni stehuält. ¹⁴Luxh nani yä nis nani gudedä, diruni jiojl, sa'csi nis nani gudedä neñ lastooni sajñni si'c te bisie nani rdatis nisni te gudeedni yälñabajñ par tejpas.

¹⁵Dxejcti räjp gunaaga lojni:

—Dad, baniidx nisga yä'ä, te na'cru jiolä, te na'cruza guibi'ä jäädlä'pä nis ree.

¹⁶Räjp Jesús:

—Huij, huitejdx chäälu gudanäni ree.

¹⁷Räjp gunaa loj Jesús:

—Ruti chälä.

Räjp Jesús lojni:

—Laaca guniilu, ¹⁸sa'csi aguyu' gaiili chäällu. Luxh nani rbäznäjlu naj dini gac chäällu; guliica najlu.

¹⁹Che biejn diajg gunaaga si'c, räjpni:

—Dad, rchaloä najclu te niguii ni nii xtidx Dios. ²⁰Retoxtdadgoldoonu gojñreni Dios lo dajñre, luxh la'tu rniitu guedx Jerusalén najc cadro nanab ganni Dios.

²¹Räjp Jesús lojni:

—Gunaa, huililajz xtidxä, sidzujñ or cheni nicla lo dajñre, niclaza guedx Jerusalén ditu chagajñ Dad Dios. ²²La'tu rajñtu Dios nani ditu gumbee, nuunu rajñnu Dios nani rumbeenu; sa'csi yälñruslaa bejn lo dojl siääd xcuent rexpejñ Israel. ²³Niluxh sidzujñ or, luxh albidzujñni, che reni guliipac rajñ Dad, reni'c neñ lastooreni, lo xcäriejñreni sajñreni Dios. Sa'csi sa' bejñre rguuil Dad Dios te ganrenini. ²⁴Dios najc te Sprit. Reni rajñ Dios nanab ganrenini neñ lastooreni, lo xcäriejñreni, guideb xtijpreni sa'csi rumbeerenini.

²⁵Räjp gunaa lojni:

—Ananä siääd Mesías ni laaza Crist. Cheni jäädni, laani susule'ni guiraliiti loonu.

²⁶Räjp Jesús lojni:

—Narä ni caniä lojlu, nacä laani.

²⁷Dxejç bidzujñ rexpejñpacni, bidx-elojreni sa'csi gunii Jesús lo gunaaga, niluxh rut gunabdiidxdi xhi rlanjñi, niclaza rut gunabdiidxdi xhini'c caninäjñi gunaaga. ²⁸Dxejcti basa'n gunaaga xti'e'ni, sä'tini guedxroga. Dxejcti räjpni loj rebejñ:

²⁹—Coltaa, fiitu te niguii ni gunii loä guira'ti nani abenä. ¿La et laadi dee Crist ni cabääznu jääd, ä?

³⁰Dxejç birii rebejñguejdxga, bidzujñtirenini lojni. ³¹Reni najc rexpejñpacni canabduxhreni gau Jesús, räjpreni:

—Mastr, gudajw.

³²Laani räjpni:

—Narä rapä xhi gauä nani ditu gumbee.

³³Dxejcti räjp rexpejñpacni lo sa'reni:

—¿Xhaa yu' chu abiädñä xhi guda-jwñi, ä?

³⁴Räjp Jesús:

—Yälrajw xtenä najc gunä si'cni rlanj nani baxhal narä, näj guluxä xtzuumni.

³⁵La'tu rniitu riäädñ tajp bäii te guire' cose'ch. Narä rniä colguiliäs lojtu, colfisa'c loniaa, abiquijtñ regäjñ, agojñ guire' cose'ch. ³⁶Nani rujñ dzuun rutie' cose'ch rca'ni xcuentni, luxh ni caca'ni najc par yälñabajñ par tejpas, te tejsi guibalazñäj nani gule'c binij näj nani batie' cose'ch. ³⁷Sa'csi guli najc diidx nani nii bejn, rniireni: “Tejñi rbe'c binij, ste'cani rutie'ni.” ³⁸Narä abaxhalä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejç la'tu jiu'tu gutie'tu cose'ch loj xtzuumni.

³⁹Xhidajñ rebeñ Samaria huililajz xtidx Jesús xcuent rediidx ni räjp gunaaga lojreni che räjpni: “Guniini loä guiralii nani abenä.” ⁴⁰Ni'cni, che biääd rebeñ guedx Samaria lojni gunabreni

loj Jesús jia'nni lajdxreni. Dxejc bia'nni ro'c tio'p dxej. ⁴¹Dxejc xhidajlrureni huililajz xtiidxni ni guniini lojpacreni. ⁴²Dxejcti räjpreni loj gunaaga:

—Dirunu chalilajz ganaxtis xcuent didix ni guniilu loonu, sa'csi lagajc nuure abiejn diajgnu xtiidxni, ni'c nancheenu dee najcpac ni ruslaa rebejn guedxliuj loj dojl. Laani najc Crist ni cabääznu jiaäd.

Basiajc Jesús xi'n te bejn ni rujn xtzuun gubier

⁴³Che gudejd tio'p dxej, biriini guedx Samaria, huinuuni xnezyujni nez Galilee. ⁴⁴Sa'csi lagajc Jesús gunii, räjpmi: Te bejn nani rnii xtidx Dios di reben lajdxpacni chanälajz xtiidxni. ⁴⁵Che bidzujpmi rexyuj Galilee, reben Galilee huichaglojrenini sa'csi naj laareni huijreni lanij pascw guedx Jerusalén, ro'c bahuiireni guiraa redzuun nani bejnmi.

⁴⁶Gubisacni, bidzujpmi guedx Caná xten Galilee cadro bejnmi bidxaa nis gujcnj bin. Dxejcti guyu' te dade' nani rujn xtzuun reii. Guedx Capernaum naga' te xi'nni cayacxhuu. ⁴⁷Che biejn diajg dade'ga abirii Jesús Judea, abidzujpmi nez Galilee, huijmi lo Jesús, gunabduxhni lojni cháani te gusiajcnj xi'nni nani naga' cuentro, ameerli guetmi. ⁴⁸Dxejcti räjpmi Jesús lojni:

—Paru ditu fii resean, remilagwr, ditu chalilajz chuni'c nacä narä.

⁴⁹Dade' ni rujn xtzuun reii, gunii lojni, räjpmi:

—Do'o Dad, te di guet xi'nä.

⁵⁰Räjpmi Jesús lojni:

—Huij. Di xi'nlu guet.

Huililajz dade'ga, sä'tini. ⁵¹Che gubi'ni rolizjni, birii rexmosni, huichaglojni, badeedreni diidx nabajm xi'nni.

⁵²Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

⁵³Dxejcti gucbee dade'ga lagajc orga ni räjpmi Jesús lojni: “Di xi'nlu guet.” Dxejc dade'ga najza guiraa rebejn ni yu' roli-jzni huililajzreni Jesús najc ni cabäjzreni jiaäd.

⁵⁴Dee barojpmi seen ni bejn Jesús cheni biriini Judea, biu'ni Galilee.

Bejn Betesda nani naxu'n

5 Che gujcti recosre, guyu' te lanij xten rexpejm Israel, dxejc huij Jesús guedx Jerusalén. ²Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. ³Ro'c naga' xhidajl bejn racxhuu, yu' bejn ni di fii, bencoj, naj bejn nani bixu'n tiejxhni. Cabäjzreni guiniib nisga ⁴sa'csi guctiguc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcnj lo xhitis yälgujdx ni rajcni. ⁵Ro'c guyu' te bejn racxhuu nani agujc galbitzubixhujm ijz cayacxhuuni. ⁶Cheni bahuii Jesús naga'ni, badeedzani cuent lacti xchero raxchuuni, räjpmi lojni:

—¿La rälzlu jiajclu?

⁷—Dad —räjpmi bejn racxhuuga lojni—, dina gapä chu gusal narä nen nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

⁸Räjpmi Jesús lojni:

—Huistie, guläs xta'lu, gusaj, huij.

⁹Lagajc dxejc biajc bejnga, guläsni xta'ni, gusloj gusajni. Niluxh dxejga najc dxej nani rusilajz rexpejm Israel, ¹⁰ni'c räjpmi rexpejm Israel lo bejn ni biajcgca:

—Nadxej najc dxej ni rusilajz bejn. Di gacdi guulu xta'lu.

¹¹Laani räjpmi:

—Nani basiajc narä, laani naj loä: “Guläs xta'lu, gusaj.”

¹²Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

¹³ Dxejcti beŋ racxhuu ni biajca dini gaan, sa'csi gunitloj Jesús, biriini ro'c laĵ ni tre' xhidajl beŋ lajtga. ¹⁴ Che bidxaagni Jesús stehuält neŋ guidoro, räjp Jesús lojni:

—Ahuii, ŋaj ni abiajclu, na'c gunlu dojl stehuält, didi sajclu xhi stee ni najc cuentruru.

¹⁵ Sä'ti bejnga, huiye'tzni loj rexpejŋ Israel laa Jesús ni basiajčni. ¹⁶ Ni'cni gusloj rexpejŋ Israel carinajlreni Jesús, rla-jzreni guiga'ni te ju'trenini, sa'csi rujnni redzuunga dxej ni rusilajzreni. ¹⁷ Luxh räjp Jesús lojreni:

—Xtadä Dios najli cayujnni dzuun, ni'cni näjza narä cayunä dzuun.

¹⁸ Ni'cni rlaizru rexpejŋ Israel ju'tni, xhet ganaxdi sa'csi rujnni dzuun dxej ni rusilajzreni, per näjza sa'csi räjpni Dios najc Xtadni, rniizani tebloj najčni con Dios.

Yälŋribee xten Xi'n Dios

¹⁹ Badzu' Jesús diidxre räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixгаа rujn Xtadni dzuunga, sa'csi guira'tis dzuun ni rujn Xtadni, dzuunga rujnza Xi'nni sigajc rujn Xtadni. ²⁰ Sa'csi rinälajz Dad xi'nni, ruluini lo xi'nni guiraa redzuun nani rujnni, luxh dzunroruza suluini lojni gunni, te guidxelojtu. ²¹ Sigajc ni rliäs Dios rebengut, rudeedni yälŋabajŋ lojreni, sigajcza sudeed xi'nni yälŋabajŋ lo renani rlaiztisi. ²² Nicla Dad di gun yälŋuxhtis, alga badeedni guirali yälŋuxhtis gun Xi'nni, ²³ te guiraa beŋ guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhaĵni biäädni.

²⁴ Rniliä, rniliäpac lojtu, nani rucua-diajg xtidxä, ni chalilajzzani nani baxhaĵ narä, ni'c rajpni yälŋabajŋ par tejpas; niluxh dini ted lo yälŋuxhtis, alga abiriini lo yälgujt, agudejdni lo yälŋabajŋ.

²⁵ Rniliä, rniliäpac, sidzujŋ or, luxh al-abidzujŋni, cheni siejn diajg rebengut xse' Xi'n Dios, luxh reni riejn diajg ni diidxga sibansacreni lo rebengut. ²⁶ Si'cni rajp Dad Dios yälŋabajŋ lagajcsi laani, sigajcza badeedni lo Xi'nni ga'pni yälŋabajŋ lagajcsi laazani. ²⁷ Badeedzani lojni yälŋribee te gunni yälŋuxhtis, sa'csi najčni Xi'n Dios ni gujc Niguii. ²⁸ Na'c rdxelojtu rediidxre, sa'csi sidzujŋ or cheni guiraa reni yu' neŋ baa siejn diajgreni xse'ni ²⁹ siriizarenini neŋ baa. Reni beŋ dzunsa'c siriireni te guibansacreni loj yälŋabansa'c, niluxh reni beŋ dzun-guijdx, siriireni te guibansacreni te tedreni lo xcälŋuxhtis Dios.

Nani ruluiloj yälŋribee ni rajp Jesús

³⁰ Xhet rajc di runä lagajcsi narä. Sigajc ni riejn diagä, sigajcza runä yälŋuxhtis. Luxh yälŋuxhtis ni runä laaca najčni sa'csi dina quilä gunä nani rlaizätis, rguilätis gunä si'c ni rlaiz Dad nani baxhaĵ narä. ³¹ Palga narätis rniä diidx lagajc xcuentä, xhet sajcdi diidxga. ³² Yu' stee nani rniliä diidx xcuentä, luxh nancheä diidx ni rniini xcuentä sacduxhni, guliipacni. ³³ La'tu abaxhaĵtu chu huij loj Juan, huinabdiidxreni lojni “chu najc bejnga”, niluxh badzu'ni diidx lojreni guniini diidx guliipac xcuent chu nacä. ³⁴ Narä dina jiuä diidx nani rniä rebejŋ xcuentä luxh canisacä rediidxre te laatu lo xtojĵtu. ³⁵ Juan gujc si'c te bajl ni ralguj, basanijzani. Luxh la'tu huihuituni bialajztu lo xpianijni balsi dxej. ³⁶ Luxh narä rapä xhi ruluilojru chu nacä lo diidx ni guni Juan; sa'csi lagajc dzuun nani baniidx Xtadä gunä, lagajc redzuun ni runä, huenliisi ruluilojreni Xtadä Dios baxhaĵ narä. ³⁷ Xtadä ni baxhaĵ narä lojtu agunilii chu nacä. Gajdpactu jiejn diajg xse'ni, gajdzatu fii lojni. ³⁸ Dizatu ga'p xtiidxni neŋ lastootu, sa'csi di lajztu chalii xtiidx nani baxhaĵ narä. ³⁹ La'tu rolduxhtu reguijtz xten

Dios sa'csi rchalotu si'c sidxäلتو yäl'n-abajñ par tejpas, luxh lagajc reguijtzga rusule' chu narä. ⁴⁰Naadditu jïäädту loä te ga'ptu yäl'nabajñ par tejpas.

⁴¹'Narä dina quilä chu bejñ guiliä'p xpala'nä nez loä. ⁴²Luxh narä anum-beäту, ananä ditu chanälajz Dios nen las-tootu. ⁴³Narä biälä xcuent Xtäädä, luxh ditu gucudiajg xtidxä; paru jïääd чу stee bejñ xcuentcani, ni'c sii sucuadia-jgtu xtiidxnä. ⁴⁴Xho gac chalilajzту, ni rliä'ptu xpala'n lagajc sa'tu. Ditu quuil xho gac guiliä'p Gueb Dios xpala'ntu. ⁴⁵Di naatu pet narä ni chale'cä xque-jtu lo Xtäädä. ToMoisés ni chale'c xque-jtu, luxh rujntu xhigab lagajc xleiini gacnäy la'tu. ⁴⁶Paru la'tu nililajzпactu xtidx toMoisés, dxejc niliiza lajzту xtidxä sa'csi xcuentä bacuaa toMoisés lo reguijtz. ⁴⁷Palga ditu chalilajz nani bacuaani lo reguijtz, ¿xho chalilajzту rediidx nani cania lojtu, ä?

Bayaan Jesús gaii mił niguii

(Mt. 14:13-21; Mr. 6:30-44; Lc. 9:10-17)

6 Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. ²Sanajl xhidajl bejñni sa'csi rhuiireni remilagwr ni rujñni lo rebenracxhuu. ³Dxejcti huä'p Jesús yejc te dajn, ro'c gurenäjni rexpejñpacni. ⁴Niluxh ameer gac lanij pascw xten rexpejñ Israel, cheni rudeedreni xquixhtios lo Dios xcuent dxej ni biriireni Egipto. ⁵Cheni guläs Jesús lojni, bahuiini siääd xhidalduxh bejñ, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejñre?

⁶Dxejc räjpzani si'c te don xhi xhigab gun Felipe, luxh laani anajñni xho gunni.

⁷Räjp Felipe lojni:

—Di tio'p gayuu beex yätxtiil gal te gaureni tlagaj.

⁸Tej rexpejñpacni ni laa Andrés, bejtz Simón Pedr, räjp lojni:

⁹—Ree suga' te biuux ca' gaii yätxtiil con tio'p bäjl, ¿xhixh sajł ni'c gau reben xhidajlre?

¹⁰Dxejcti räjp Jesús:

—Colyejtz loj rebejñre cuereni.

Yuduxh guixa' ro'c. Dxejcti gurej reniguii. Si'cti gaii mił najc reniguii.

¹¹Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejñpacni. Dxejcti rexpejñpacni gudisrenini loj rebejñ nani sobga'. Sigajcza gudisreni rebäjl si'ctisni rrajzreni gaureni. ¹²Che gulujx gudajwreni, gudxaj xque'reni, dxejcti räjp Jesús loj rexpejñpacni:

—Colgutie' guiraa reyätxtilbiujy nani bia'n te xhet nitdi.

¹³Batie'tireni reyätxtilbiujy, guläsreni tzubitio'p dxijm yätxtilbiujy nani bia'n lo gaii yätxtiilga nani gula' gudajwreni. ¹⁴Che bahuii rebejñga reseem, remilagwr nani bejñ Jesús, dxejc räjpreni:

—Guluiipacni, laa dee ni najc niguii ni rnii xtidx Dios nani cabäaznu jïääd lo guedxliuj.

¹⁵Sas che gucbee Jesús cayujñreni xhigab jïädnaazrenini te niujñreni gacni reii te guinibeeni lojreni, biriini ro'c, xtebni gubisacni nen dajn.

Gusaj Jesús lo nisdoo

(Mt. 14:22-27; Mr. 6:45-52)

¹⁶Che gojl guxhijñ, bidzujñ rexpejñpacni lo nisdoo. ¹⁷Biu'reni nen te barcw te tedreni lo nisdoo nez guedx Capernaum. Abicäjy lo yuj niluxh gajd Jesús guibi' lojreni te chääni. ¹⁸Gusloj cayäys nisdoo xcuent te beduxh nani cabi'. ¹⁹Ni'cni che gusajreni si'cti gaii o xho'p kilómetro, bahuiireni siäädzungajxh Jesús lo barcw, lo nisdoo siäadsajni. Bidxebduxhreni. ²⁰Luxh laani räjpni lojreni:

—Naräni. Na'c guidxejbtu.

²¹ Dxejcru cuäjbreñi biu'ni neñ barcw. Dxejcti bidzungajcreni stelaad lo yuj cadro sääreni.

Caguiil rebejn̄ Jesús

²² Che bara yääl, rebejn̄ nani bia'n stelaad ro' nisdoo, bahuiireni asanä rexejñpacni barcwäz nani suga' ro'c, niluxh di Jesús nij, xtebsireni sääreni. ²³ Luxh bidzungajc sgaai barcw nani birii guedx Tiberias, te lajt ni tre' gajxh cadro guda-jwreni yätxtiil che gulujx badeed Jesús xquixtios lo Dad. ²⁴ Che bahuii rebejn̄ ruti Jesús ro'c, niclaza rexejñni, biu'reni neñ rebarcw, sääreni guedx Capernaum satiireni Jesús.

Jesús najc yätxtiil xten yälñabajn̄

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujñlu ree?

²⁶ Badzu' Jesús diidxre, räjpni lojreni:

—Rniliá, rniliápac lojtu, caguiiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä. ²⁷ Na'c guntu dzuun ganax par yälrajw nani rnitloj. Colyejn̄ dzuun par yälrajw nani di nitloj, ni runiidx yälñabajn̄ par tejpas. Yälrajwre suniidx Xi'n Niguii, sa'csi loj rebejn̄ baluii Xtadni, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnu dzuun ni rlanj Dios?

²⁹ Räjp Jesús lojreni:

—Dee najc ni rlanj Dios guntu: chalilajztu xtidx narä, nani baxhañni.

³⁰ Räjpreni lojni:

—¿Xhi seen gunlu te guihuiinu xcälñribeelu te cholilajznu xtiidxlu? ¿Xhi dzuun rujñlu? ³¹ Retoxtadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biäjb xhaguibaa gudajwreni.”

³² Räjpa Jesús:

—Rniliá, rniliápac lojtu, xhet to-Moisédi ni badeed yätxtiil ni biäjb xhaguibaa. Xtaä ni suniidx yätxtiil nani siäädpac xhaguibaa. ³³ Sa'csi yätxtiil xten Dios najc bejn̄ ni siääd xhaguibaa, niluxh laani rudeedni yälñabajn̄ par tejpas loj reben̄ guedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yälñabajn̄ nani riäjñl jiaäd; chutis ni jiaäd loä diruni guiliaan, niluxh chutis ni rililajz xtidxä diruni jiojñl par tejpas. ³⁶ Aguniä lojtu, la'tu ditu chalilajz, luxh abahuiitu loä. ³⁷ Guiraa renani abaniidx Xtaä loä, siäädni loä, niluxh chutis ni jiaäd loä dina cuälazäni. ³⁸ Sa'csi narä siälä xhaguibaali te gunä si'c ni rlanj Xtaä, xhet si'cni ni rlazädi. ³⁹ Dee najc ni rlanj Xtaä nani baxhañ narä: na'c nit nicla tej renani baniidxni loä, te guspansacä guiragajcreni che gal dxej lult ni riäjñl jiaäd. ⁴⁰ Scree rlanj nani baxhañ narä: guiraa renani fii lo Xi'n Dios, näj chalilajzreni xtiidxni, xca'reni yälñabajn̄ par tejpas niluxh narä suspansacäreni che gal dxej lult ni riäjñl jiaäd.

⁴¹ Rediidxre bejn̄ gusloj casiey rexejñ Israel xcuent Jesús sa'csi räjpni: “Narä nacä yätxtiil ni biäjñt xhaguibaa.”

⁴² Dxejcti räjpreni:

—¿La et Jesúsdi, xi'n José dee, ä? Nure numbeenu xtaäni, xnanni, ¿xhoxh rniini xhaguibaa biäjñni?

⁴³ Dxejc räjp Jesús lojreni:

—Na'c rusieinäj sa'tu. ⁴⁴ Rut rajcädi riääd loä palga di Xtaä ni baxhañ narä jiaädni loä, te guspansacäni che gal dxej lult ni riäjñl jiaäd. ⁴⁵ Loj reguijtz ni bacuaa redade' ni gunii xtidx Dios caj scree: “Sului Dios guiraareni.” Ni'cni guiraa reni rucuaiajg xtidx Xtaä, reni rsieed lojni, reni'c ni jiaäd loä.

⁴⁶ Dinä guiniä yu' chu abahuii lo Dios; tejtis ni abahuii lojni: nani baxhañ Dios,

ni'ctis abahuii lojni. ⁴⁷Rniliä lojtu che rniä: nani chalilajz xtidxä, ni'c rajp yälñabajñ par tejpas. ⁴⁸Narä nacä yätxtiil nani rudeed yälñabajñ. ⁴⁹Retoxtadtu gudajw mana ni bastejb Dios lo reyubijdz, dxejcti gujtzareni. ⁵⁰Dee najc yätxtiil ni siääd xhaguibaa, te chutis ni gau yätxtiilga dini guet. ⁵¹Narä nacä yätxtiilbajñ ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' rebeñ guedxliuj yälñabajñ najc lagajc bältiexhä.

⁵²Dxejcti gusloj casiejy rexpejñ Israel räjpreni:

—¿Xho gac guniidx dee bältiejxhni guidaunu, ä?

⁵³Räjp Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejñni, digacdi ga'ptu yälñabajñ. ⁵⁴Nani gau bältiexhä, nani yäza xtienä, ni'c rajp yälñabajñ par tejpas, niluxh suspansacäni che gaļ redxej lult. ⁵⁵Sa'csi bältiexhä najc te yälrausa'cpac, xtienä najcza te yälräsa'cpac. ⁵⁶Nani gau bältiexhä, nani yäza xtienä, ni'c yu'pac con narä, luxh narä yu'äza con laani. ⁵⁷Xtadä ni baxhaļ narä rajp yälñabajñ par tejpas. Narä nabañä xcuent laani. Sigajcza nani rajw narä, sibajñzani xcuent narä. ⁵⁸Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibajñni par tejpas.

⁵⁹Recosre baluii Jesús neñ te guidobäz laļ ni guyu'ni guedx Capernaum.

Diidx xten yälñabajñ par tejpas

⁶⁰Che biejn diajgreni si'c, xhidajl rexpejñpacni räjp:

—Naganduxh najc rextiidxni. ¿Chu laa nani gac cuadiajgni?

⁶¹Dxejcti gucbee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä? ⁶²¿Xhicha guntu paru fiitu chäp Xi'n Dios ni gujc Niguii cadro guyu'ni galoo? ⁶³Sprit xten Dios najc ni rudeed yälñabajñ; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yälñabajñ par tejpas. ⁶⁴Luxh laļtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladzñaa reben dojl. ⁶⁵Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtadä jiädñäni loä.

⁶⁶Lagajc dxejc gusloj cabicaj xhidajl rebejñ ni agujc xchej gusanäj Jesús, dirureni nisanäj Jesús. ⁶⁷Dxejcti räjp Jesús loj guidzubitio'p rexpejñpacni:

—¿La nägajcza la'tu rļajztu jiitu, ä?

⁶⁸Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yälñabajñ par tejpas. ⁶⁹Nuure abiolilaaznu, anajñnu najclu Crist Xi'n Dios nani nabajñ.

⁷⁰Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtü najc bendxab.

⁷¹Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejñpac Jesús.

Di rebejtz Jesús chalilajz

7 Che gujcti recosre, cansaj Jesús nez reyuj xten Galilee, di rļajzni jia'nni nez reguedx Judea sa'csi rļajz rebeñ ro'c ju'tni. ²Luxh ameer gaļ lanij xten cose'ch xten guidoguijd, te relanij xten rexpejñ Israel. ³Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejñpacu fii redzunro nani rujnlu. ⁴Sa'csi rut rujndi xtzuunni xhiga'tz palga rļajzni gacbee bejñ xhi dzuun rujñni, te gumbee bejñni. Palga rujñpacu redzunnre, baluiini lo guiraa rebeñ guedxliuj.

⁵Guniireni si'c lojni sa'csi nicla rebejtzni di chalilajz xtiidxni. ⁶Dxejcti räjp Jesús lojreni:

—Gajd xhorä guidzujn, niluxh par la'tu xhitis or najc hueen. ⁷Di gacdi guidxe'ch reben guedxliuj lojtu, luxh rdxe'chreni loä sa'csi narä nmlia xcuentreni: dzunguijdx najc xtzuumreni. ⁸La'tu colchäj lanij; narä dina cha'a lanijga sa'csi gajd xhorä gal.

⁹Che gulujx guniini si'c lojreni bia'ntini nez Galilee.

Huij Jesús lanij xten retabernaculos

¹⁰Dxejcti che asää rebejtzni lanij, dx-
ejc näjza laani sääni lanij, luxh dini
nusäbdiidx, si'c xhiga'tz sääni. ¹¹Dxe-
jcti caguiil rexpejn Israelni lo lanijga,
räjpreni:

—¿Concha niguiiga?

¹²Lo rebejn xhidaalga yu' xhidajl bejn
ni cagusieyreni xcuentni. Yu'reni räjp:
“Hueen najcni”, per sgaiireni räjp: “Dini
gac hueen. Cagusgueeni rebenguejdx.”

¹³Nicla tejreni xhet casäbdiidxdiren
xhini'c caniireni. Diren guinii dip sa'csi
rdxejbreni rexpejn Israel nani rnibee.

¹⁴Agurojl lanij, che biu' Jesús nejn
guidoro. Dxejcti gusloj caguluiini. ¹⁵Dx-
ejcti rdxelox rexpejn Israel nani rnibee,
räjpreni:

—¿Xho najn dee giralox, niluxh dini
nisieed xleii toMoisés?

¹⁶Badzu' Jesús diidxre, räjpni:

—Yälrlului nani caluiyā et xtenädini,
xten nani baxhal naräni. ¹⁷Palga yu' chu
rlajz gun nani rlajz Dios, sacbeeni la xten
Dios najc reyälrlului xtenä, o la laga-
jcsi narä rbää diidx ni caguluiä. ¹⁸Nani
rusule'ni diidx nani lagajc laani rbääni,
ni'c rniini diidxga te guiliä'p rebejn
xpala'nni, luxh nani rguuil chä'p xpala'n
nani baxhalni, ni'c ni rni didxlii, xheti
yälrusguee nejn lastooni. ¹⁹¿La di toMoi-
ses nuniidx lei lojtu, ä? Niluxh nicla

tejtu di gusoob xtidx leiiga. ¿Xhicuent
rlajztu ju'ttu narä, pes?

²⁰Badzu' reben xhidajlga diidxre,
räjpreni:

—¿Xpriet bendxab yu' lastoolu!
¿Chuni'c rlajz ju'tlu?

²¹Badzu' Jesús diidxre lojreni, räjpni:

—Tejtis dzuun benä con xcälrmibeä,
dxejc guiraatu cadxelojtu sa'csi benäni
dxej ni rusilajztu. ²²Ni'cni baniidx to-
Moisés lojtu yälru'tu bee, luxh etlaa-
dini guläxtiejnini, agac guläxtiej retox-
tadgoldootuni. La'tu rusälto bee rebiuux
mase najcni dxej nani rusilajztu. ²³Mbaj
pes, palga rajc rusälto bee bejn te dxej
nani rusilajztu didi nit xleii Moisés,
¿xhicuent rdxe'chtu loä sa'csi basiacä-
pac te bejn te dxej nani rusilajztu, ä?
²⁴Na'c rujntu yälguxhtis si'ctis ni rlajztu.
Colyejn yälguxhtis con yälguxhtis xten
Dios.

Rusule' Jesús casiädni

²⁵Dxejcti gusloj gaii bejn Jerusalén
cayujn yälgunabdiidx, räjpreni:

—¿La etlaadi dee ni caguilreni te
ju'trenini, ä? ²⁶Ani asuga', caniini nez
loj guiraa rebenguejdx, niluxh rut rudxo-
jndini. ¿Xhaa ahuililajz reguxhtis, regu-
bier laani najcpacni Crist, ä? ²⁷Niluxh
nuure nadoncheenu caro siäd niguiire,
niluxh che jääd Crist, rut gacbeedi caro
siädni.

²⁸Caguluii Jesús nejn guidoo che biejn
diajgni rediidxre, dxejc dipduxh guniini,
räjpreni:

—La'tu numbeetu narä, najntu caro
siälä; luxh dina niälä lagajcsi narä; nani
baxhal narä guliipac nabajnni, luxh la'tu
ditu gumbeeni. ²⁹Luxh narä numbeäni,
sa'csi lojni biriä, laani baxhalzani narä.

³⁰Dxejc rlajzreni niniaazrenini,
niluxh rut gunaazdini, sa'csi gajd xhorni
gal. ³¹Xhidajl bejn lo reben xhidajlga
huililajz xtiidxni, dxejcti räjpreni:

—Cheni jiääd Crist, ¿xhixh sujnruni milagwr loj nani rujn dee, ä?

Ruxhal refarisee guixhajg guiniaaz Jesús te jiäuni

³² Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhalreni guixhajg te guiniaazreni Jesús te jiäuuni.

³³ Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä. ³⁴ Siguiiltu narä, niluxh ditu guidxäl narä, sa'csi cadro cha'ä digacdi jiäädtu.

³⁵ Ni'c gunii rexpejn Israel lo sa'reni; räjpreni:

—¿Cacharo chääni ni'c di gacdi guidxälunni? ¿Xhaa sijni loj rexpejn Israel nani nare'ch nez lajdx regriegos te guluini regriegos? ³⁶ ¿Xhi säloj diidxre nani guniini loonu: “Siguiiltu narä, niluxh ditu guidxäl narä, sa'csi cadro cha'ä di gacdi jiäädtu”?

Regueu nisnabajn

³⁷ Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiäädni loä te yäni. ³⁸ Nani chalilajz xtidxä si'cni caj lo rexquijtz Dios nen lastoolini siliejn nisnabajn.

³⁹ Rediidxre guniini xcuent Sprit Dxan nani churu jäädläjz nen lastoo reni rililajz xtidxni, sa'csi gajd Sprit Dxan jiääd, sa'csi gajd Jesús guibansac lo rebengut.

Gucgala' rebejn

⁴⁰ Lo reben xhidajlga yu' reni biejn di-ajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

⁴¹ Yu'zaren i räjp:

—Dade're najc Crist ni cabääznu.

Yu'za sgaii ni räjp:

—Gurniälojtu jiääd Crist nez Galilee. ⁴² Ni loj rexquijtz Dios caj riäjlpac gac Crist te rexagdoo toreei David, jiäädzani guedx Belén, lagajc guejdx cadro siääd toreei David.

⁴³ Dxejcti gucgala' rebejn xcuent Jesús. ⁴⁴ Yu'reni rlanj chääni pres luxh rut biajxdi gunaazni.

Di reguxhtis chalilajz biääd Crist

⁴⁵ Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

⁴⁶ Badzu' reguixhajg diidxre, räjpreni: —¿Gajdpac te bejn guinii si'cni rnii bejnga!

⁴⁷ Dxejc räjp refarisee:

—¿La näj la'tu abasgueeni, ä?

⁴⁸ ¿Xhixh loj regubier o loj refarisee yu' chu tej ni ahuuililajz xtiidxni, ä? ⁴⁹ Reben xhidajlre ni di gan xleii toMoisés, reni'c agunijtpac.

⁵⁰ Nicodem, nani huij lojni te guxhijn, najc te refarisee. Laani räjpni lojreni:

⁵¹ —Lo xleiiu caj: digacdi guntu yälguxhtis te bejn palga gajdgu gucuadi-agxga xtiidxni, te don xhi bejnii.

⁵² Badzu'reni diidxre räjpreni lojni:

—¿La näjza luj siäädlu Galilee, ä? Biłsa'c xhi caj lo xquijtz Dios, suhuilu nicla tej niguii nani rnii xtidx Dios di jiääd nez Galilee.

Gunaa nani biga' carälguijxh con te niguii

⁵³ Dxejc cade tejreni sii rolizreni.

8 Dxejcti huij Jesús nez dan Oliib. ² Rsilru gubi'ni, bui'ni nen guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj cagului- inireni. ³ Dxejcti biääd refarisee näjza reben najn, biädnäreni te gunaa nani biga' carälguijxh con te niguii. Basujrenini galäi reni suga' ro'c. ⁴ Räjpreni loj Jesús:

—Mastr, gunaare biganäj te niguii carälguijxhreni, niluxh yu' chäälni. ⁵Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

⁶Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani. ⁷Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojlñi, ni'c ganiddoo sugucuaani guij yejc gunaare.

⁸Basabsac lojni lo yuj sanuutis cagucuaani con bicueñaani lo yuj. ⁹Luxh laareni che biejn diajgreni diidxga, sa'csi yu' xtojlreni, gusloj biriireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaa ni suga' galäiireni. ¹⁰Dxejc gusulii Jesús, luxh sa'csi rutru lojdi bahuiini, xtebtis gunaaga, räjpni lojni:

—Gunaa, ¿con reni cabe'c xquejlu? ¿La rut bacuaquijdiru luj, ä?

¹¹Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹²Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jädnajl narä dini sa lo yälñacäy, sica'ni bianij ni rudeedpac yälñabajn.

¹³Dxejcti räjp refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

¹⁴Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵La'tu rujntu yälguxhtis si'c

najctis rehxigab xten beñ guedxliuj. Narä rut lojdi runä yälguxhtis. ¹⁶Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtadä ni baxhañ narä riennuni. ¹⁷Luxh lo xleiitu caj diidxre: “Che rniä tio'p beñ tejsi diidx, didxliini, colchalilajzni.” ¹⁸Narä rniälapac diidx lagajc xcuentä, dxejcti Xtadä nani baxhañ narä rniilizani diidx xcuentä.

¹⁹Räjpreni loj Jesús:

—¿Caro yu' xtaclu?

Räjp Jesús lojreni:

—Ditu gumbee nicla narä, niclaza Xtadä; paru niembeetu narä, niembeezatu Xtadä.

²⁰Rediidxre gunii Jesús cadro re' gojn, lañ ni caguluiini neñ guidoro niluxh rut gunaazdini sa'csi gajd xhoñni guidzujñ.

Cadro cha'ä, la'tu digacdi jäädttu

²¹Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojlñtu sejtto. Cadro cha'ä di gacdi jäädttu.

²²Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadro chääni?

²³Räjp Jesús lojreni:

—La'tu najctu beñ lo yuj. Narä nacä beñ ni siädäd jiaa. La'tu najctu beñ guedxliujre. Luxh narä dina gacätis beñ guedxliujre. ²⁴Ni'cni guniä lojtu, sejtto lo xtojlñtu sa'csi palga ditu chalilajz nacä chu nacä, sejtpectu lo xtojlñtu.

²⁵Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli?

²⁶Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhañ narä najc beñ guliipac; nani biejn diagä guniini, rediidxga rniä loj rebeñ guedxliuj.

²⁷ Luxh laareni direni niacbee la xcuent Dad Dios ni caniini. ²⁸ Ni'cni räjp Jesús lojreni:

—Cheni guiliästu Xi'n Niguui jiaa, dx-
ejc sacbeetu laa narä ni baxhałni, luxh
xhetliidi runä lagajcsi xcuentä. Si'cni
baluui Dad narä, si'ctis rniä. ²⁹ Nani
baxhał narä suganäjni narä. Gajd Dad
gusanxteb narä, sa'csi runätis ganax
redzuun nani rchaglajzni.

³⁰ Lał ni caniini si'c, xhidajlreni
huililajz xtiidxni.

Rexi'n Dios con remos xten dojl

³¹ Dxejcti räjp Jesús lo rexpejn Israel
nani huililajzga:

—Palga la'tu sutijptu, guzoobtu
xtidkä, dxejc guliipac najctu xpenä.
³² Sumbeezatu nani najc didxgului,
niluxh didx guliiga susłaa la'tu lo
xtojłtu.

³³ Räjpreni lojni:

—Rexagdoo toAbraham najcnu, rut
chu lojdi gudo'nu si'c mos. ¿Xho mood
naalu “siliaatu”?

³⁴ Räjp Jesús:

—Riniliá, rniliápac lojtu, chutis ni rujn
dojl najc mos xten dojl. ³⁵ Nani najc mos,
dini jia'n rolizj xlamni guideb guibajjni,
niluxh nani najc xi'n lamga, ni'c sii sia'n
rolizj xtdni guideb guibajjni. ³⁶ Ni'cni,
palga rusłaa xi'nni la'tu lo dojl, dxejc-
sii apac gulaatu. ³⁷ Ananá najctu xagdoo
toAbraham, luxh la'tu rłajztu ju'ttu narä
sa'csi di xtidkä jiu' lo xcäriejntu. ³⁸ Narä
rniä nani abahuiä con Xtdä; luxh la'tu
rujntu nani biejnza diajgtu lo xtdadu.

³⁹ Badzu'reni diidxre, räjpreni lojni:

—Xtdadnu najc toAbraham.

Dxejc räjp Jesús lojreni:

—Palga la'tu najcpactu xi'n toAbra-
ham, sujntu sa' dzuun ni bejn toAbra-
ham. ⁴⁰ Luxh naj rłajztu ju'ttu narä,
sa'csi rniliä rediidx nani baluui Dios loä.
ıDi toAbraham niujn si'c! ⁴¹ La'tu rujntu
xtzuun xtdadu.

Dxejc räjpreni lojni:

—Nuure dinu gac xi'n chälbejnđi; nu-
ure tejtis xtdadnu yu', laani najc Dios.

⁴² Dxejcti räjp Jesús:

—Paru guliini najc xtdadu Dios,
ninälajztu narä sa'csi loj Dios biriä siälä
ree. Xhet lagajcsi xcuentä siäläđi; Dios
baxhał narä. ⁴³ ¿Xhicuent ditu gacbee
rediidx ni rniä lojtu? Sa'csi di rłajztu
gucuadiajgtu rextidkä. ⁴⁴ Xtdadu najc
beñdxab. La'tu najctu xi'nni, rłajztu
guntu nani rłajztisni guntu. Xtdadu
galooli najcni te ni rugu't, dini suu
xlaad didxlii, sa'csi xheti didxlii neñ
lastooni. Che rniini didx-xhii, si'c rniini
sa'csi si'cpac najcni, sa'csi najcni beñ
didx-xhii, najczani xtdad didx-xhii.
⁴⁵ Niluxh narä rniä didxlii, ni'c ditu
chalilajz xtidkä. ⁴⁶ ¿Chu tejtı sajc guluii
te dojl ni benä? Narä rniä didxlii.
¿Xhicuent ditu chalilajz xtidkä, ä?
⁴⁷ Nani najc xpejn Dios, ni'c rucuadiajg
xtidx Dios. Sa'csi la'tu ditu gac xpejn
Dios, ni'cni ditu gucuadiajg xtidkä.

Ansde toAbraham, agac nabajn Crist

⁴⁸ Dxejcti badzu' rexpejn Israel di-
idxre, räjpreni lojni:

—Laaca rniinu luj najclu te bejn ni
siääd Samaria, beñdxab yu' lastoolu.

⁴⁹ Räjp Jesús lojreni:

—Xhet beñdxabdi yu' lastoä. Nani
runätis rliä'pä xpala'n Xtdä, luxh la'tu
alga rbälaztu narä. ⁵⁰ Luxh narä dina
quilä chu guiliä'p xpala'nä, yu' chu rguuil
guiliä'p bejn xpala'nä, niluxh laani ru-
jnıni yalguxhtis. ⁵¹ Rniliápac lojtu, nani
riu, nani rusoob xtidkä, dipacni guet.

⁵² Dxejcti räjp rexpejn Israel lojni:

—Naj agucbeepacnu yu' beñdxab las-
toolu. ToAbraham näjza reniguii nani
gunii xtidx Dios, guiraareni agujt. Luxh
luj rniilu: “Nani riu, nani ruzoob xtidkä,
dipacni guet.” ⁵³ ¿Xhixh sajcrulu lo tox-
tdadnu Abraham, ä? Ni laani gujtni, gu-

jtza renigui ni gunii xtidx Dios. ¿Chuxh rchalolu najclu?

⁵⁴Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtiostu. ⁵⁵Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. ⁵⁶ToAbraham toxtadgoldootu, bibalajzni sa'csi nuhuiini dxej nani jlä, niluxh bahuiinini dxejc bibalazduxhni.

⁵⁷Dxejcti räjp rexpejn Israel lojni:

—Nicla gajdlu chu tiubituu ijz, ¿xho naalu abahuiilu lo toAbraham?

⁵⁸Räjp Jesús lojreni:

—Rniliäpac lojtu, che gajdli guibajn toAbraham, agac nabañä narä.

⁵⁹Dxejcti cua'reni guij te nucuaareni yejc Jesús, per di Jesús niga', biriini nen guidoro, gudejndi galäiireni. Sä'tini.

Basiajc Jesús te bejn ni natiä'p balojni che gojllini

9 Che cadejd Jesús te lajt, bahuiini sobga' te bejn ni che gojlli bejnğa agajc natiä'p balojni. ²Dxejc gunabdiidx rexpejn pacni lojni, räjpreni:

—Mastr, ¿chuni'c bejn dojl, la bejnre o la xcuzajnni, ni'c natiä'p balojni che gojlni, ä?

³Räjp Jesús:

—Nicla laani, niclaza xcuzajnni di niujn dojl. Si'c gojlni te xcuent ni sajce bejnre suhuii bejn xho najc xtzuum Dios. ⁴Nanab gunä xtzuum nani baxhal narä naj ni najc rdxee, sa'csi cheni guidzujn guxhijn rut gacdi gun dzuun. ⁵Lañni yu'a lo rebejn guedxliuj, nacä xpianij guedxliuj.

⁶Che gulujx guniini si'c, batiobxhejnmi lo yuj, bejnmi bajn con xhejnmi, gudäabnini con bicuenaani lo rebaloj lotiä'pga. ⁷Dxejcti räjpni:

—Huij, huitiib lojlu nen nis ni laa Siloé. Laj nisga sälojza “baxhalni”.

Dxejcti huijni. Huitiibni lojni. Che gubi'ni, aruhuiini. ⁸Dxejcti rexpisin lotiä'pga, naj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

¹⁰Räjpreni lojni:

—¿Xho mood arien balojlu?

¹¹Dxejcti räjp dade'ga nani gujc lotiä'p:

—Dade' ni laa Jesús bejn bajn, gudäabnini baloä, dxejcti najni: “Huitiib lojlu nen te nis ni laa Siloé”, dxejcti che huitibä loä, lagajc dxejc bien loä.

¹²Dxejcti räjpreni lojni:

—¿Con dade'ga naj?

Räjpni bejnğa:

—Dina ganä.

Reben farisee bejn yälgunabdiidx lo dad lotiä'p nani biajc lojni

¹³Huinäreni nani gujc lotiä'pga nez loj refarisee. ¹⁴Luxh sa'csi najcni dxej ni rusilajzreni che bejn Jesús bajn ni gudäabni loj lotiä'pga te biajc balojni, ¹⁵gunabdiidxsac refarisee loj dade' nani biajc balojni, xho mood arien balojni naj.

Laani räjpni lojreni:

—Bajn gudäabni loä, dxejc gudibä loä, naj aruhuiä.

¹⁶Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni beñ dojl?

Ni'cni gula' sa'reni, gujcreni tio'p gala'.
¹⁷Dxejcti gunabdidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn nani rniil xtidx Dios.

¹⁸Luxh rexpejn Israel naaddireni chalii lajzreni gujcpacni te lotiä'p ni abien balojni, dxejcti gurejdxreni xcuzajn dade' ni gujc lotiä'pga. ¹⁹Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien lojni naj?

²⁰Badzu' rexuczajnni diidxre, räjpreni:

—Nadonnu laa xi'nnuni, luxh che gojlni natiä'p lojni. ²¹Niluxh dinu guidon naj xho mood arien lojni, dizanu guidon chu basiajc balojni. Colguiniabdiidx lojni, anajcni bengool, lagajc laani sajc guiniini xhi gusajcni.

²²Si'c gunii xcuzajnni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' nen guidoo chutis te bejn ni naa Jesús najc Crist nani abiääd. ²³Ni'cni räjp rexuczajnni:

—Anajcni bi'n ni ayu' xcäriejnini. Lojni colguiniabdiidx.

²⁴Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu ben dojl najc dade'ga.

²⁵Dxejcti badzu' dade'ga diidxre, räjpni:

—Dina ganä la najcni ben dojl o la dini gac. Tejtis nanä: gucä lotiä'p, luxh naj arien balaä.

²⁶Stehuält gunabdiidxreni, räjpreni lojni:

—¿Xho bennäjni luj? ¿Xho bejnini basiajcni balojlu?

²⁷Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlanjtu guinisacäni? ¿Xhixh naj la'tu rlanjtu gactu xpejnpacni, ä?

²⁸Dxejc gudilnäjrenini, räjpreni:

—Luj najclu xpejnini, per nuure najcnu xpejn toMoisés. ²⁹Anadonnu guninäj Dios toMoisés, niluxh dade're dinu guidon casiäädni.

³⁰Dxejcti räjp dade' lojreni:

—Dee najc te cos ni guidxeloj bejn: la'tu ditu gan casiäädni, niluxh laani basiajcni balaä! ³¹Nadoncheenu di Dios cuadiajg xtidx reben dojl; palga yu' chu rajn Dios, ni rusoobza xtiidxni, rucua diajg Dios xtidx sa' bejnnga. ³²Che guslojli guedxliuj gajd diajgnu jiejn xcuent te bejn nani rusiajc baloj te ben lotiä'p nani natiä'p lojni cheni gojllini. ³³Palga xhet lo Diosdi siääd dade're, xhet sajcdi gunni.

³⁴Badzu'reni diidxre räjpreni lojni:

—Luj, lo dojlpac gojllu, ¿xho jiadluiuilu nuure?

Dxejcti guläärenini nen guidoro, barilaagwrenini.

³⁵Biejn diajg Jesús guläärenini nen guidoro, che bidxälnini, räjpni lojni:

—¿La rililajzlu xtidx ni najc Xi'n Dios ni gujc Niguii, ä?

³⁶Badzu'ni diidxre, räjpni:

—¿Chuni'c najcni, Dad, te chalilazä xtiidxni?

³⁷Räjp Jesús:

—Abahuilu lojni, lagajcza laani caninäjlu naj.

³⁸Dxejcti räjpni:

—Rililazä Dad.

Dxejcti bazuxhibni te gojnnini.

³⁹Räjp Jesús:

—Par yälguxhtis biälä lo guedxliujre, te fii renani di lojni jien, niluxh reni rien lojni sajcreni lotiä'p.

⁴⁰Refarisee nani suganäjreni, che biejn diajgreni diidxre, räjpreni:

—¿Xhixh najczanu ben lotiä'p, ä?

⁴¹ Räj̄p Jesús:

—Paru najctu lotiä'p, rut gucuaqui-
jditu xtojltu, naj sa'csi miitu rien lojtu,
sicaquijtu rextojltu.

Jesús najc te baxtorsa'c

10 'Rniliá, rniliápac lojtu, nani di jiu'
ro' gurajl xte rexiil, alga richu'ni
stelaad, rá'pni cuá' gurajl, ni'c najcni
te gubaan. ²Nani riu' nez ro' gurajl
xten rexiil, laani najc xpaxtoorreni. ³Che
guidzuj̄n baxtoor, ruxhal nani rcanäj ro
lá', te jiu'ni. Rexiilga numbeereni xse'
baxtoor, dxejctiru laani rbejdxni rexi-
ilga, tebgaj xiilga yu' lajni, rināzanireni
cadro naga' guixasa'c. ⁴Che rii rexi-
ilga neñ gurajl, sanā baxtoorgareni, luxh
numbee rexiilga xse'ni, ni'c rsianājreni
baxtoorga. ⁵Luxh dipacreni chanā te
baxtoor nani direni gumbee, ruxunreni
lojni sa'csi direni gumbee xse' garenca
bejn.

⁶ Bij Jesús rediidxga lojreni, niluxh di-
reni niacbee xhi säloj ni guniini.

⁷ Dxejcti gunisac Jesús diidx lojreni;
rāj̄pni:

—Rniliá, rniliápac lojtu, narā nacā si'c
roxlá' xcurajl rexiil. ⁸ Guiraa reni abiääd
galoo, najcreni ganax gubaan luxh di
rexiil nucuadiajg xse'ni. ⁹ Narā nacā si'c
rolá' xten gurajl, nani jiu' nejzga, silāani
loj xtojlni, siu'ni, siriini te guidxäl̄ni
guixasa'c gauni.

¹⁰ 'Ni najc gubaan riäädtsi te cuanni,
te ju'tni, te guxhinzani, niluxh narā
siälā te ga'ptu yäl̄nabansa'c, yäl̄nabaj̄n
par tejpas. ¹¹ Narā nacā baxtorsa'c; luxh
baxtorsa'c sudeed lagajc xcäl̄nabaj̄n
xcuent rexiilni. ¹² Niluxh te mos ni rajxh,
di gac baxtoorpac, ni xhet xtendini najc
rexiil, che rhuini siääd te cuyo't, ruxu-
n̄ni, li rbälazni rexiil. Dxejc rniaaz cuyo't
rexiil, rutie'chzani rexiil. ¹³ Mosga ruxun
sa'csi najcni mostis, luxh dini jiu xhi rsi-
ajc rexiil.

¹⁴ 'Narā nacā baxtorsa'c; numbeä reni
najcpac rexilä; rexilä numbeezareni narā
¹⁵ sigajc numbee Xtaďä narā, sigajc num-
beäza Xtaďä; luxh sudeďä xcäl̄nabañä
xcuent rexiilga. ¹⁶ Rapäza ste cuaa xiil,
ni di gac xten gurajlre; näjza laareni
nanab chaxiä, te gusbodiajgreni xtidxä,
te guidxagsa' guiro'p cuaareni, gacreni
tejtis gurajl, tejtisza baxtoor.

¹⁷ 'Narā siguixäza xcäl̄nabañä, guetä,
te dxejcr̄u siliässacä xcäl̄nabañä,
guibansacä, ni'cni sanälajz Xtaďä
narā. ¹⁸ Rut sajcdi ju't narā, lagajc
narā gudedä xcäl̄nabañä, guetä. Rapä
yäl̄rnibee te gudedä xcäl̄nabañä, guetä,
rapäza yäl̄rnibee te xcasacä xcäl̄nabañä
te guibansacä, sa'csi dee najc yäl̄rnibee
ni baniidx Xtaďä löä.

¹⁹ Xcuent rediidxre gula' sa' rexpejn̄ Is-
rael, gujcreni tio'p gala'. ²⁰ Xhidajlreni
canii:

—¿Xhicuent riutuni? ¿La ditu gan te
beñdxab yu' lastooni? Yejcni rajc. Xhigac
rcuadiajgtu xtiidxni.

²¹ Dxejc ste cuaareni:

—Dini gac. Di rediidxre gac xtidx te
beñdxab. ¿Xhixh sajc rusiaj̄c beñdxab
baloj relotiä'p, ä?

Rdx'e'ch rebejn̄ loj Jesucrist

²² Lagajc neñ redxejga gujc lanij xten
xquidoo rexpejn̄ Israel guedx Jerusalén.
²³ Najcni bäi najl. Biu' Jesús guidoro,
sasajni nez neñ cordoor ni laa xten Sa-
lomón. ²⁴ Gubig rexpejn̄ Israel guideb
gabi Jesús, rāj̄preni lojni:

—¿Gucli gucua'tzlu loonu chu najclu?
Palga luj najclu Crist ni cabäāznu jiääd,
guiniliini loonu tejpas.

²⁵ Dxejc badzu' Jesús diidxre, rāj̄pni
lojreni:

—Aguniä lojtu si'c, niluxh ditu
nililajz. Redzuun nani runä xcuent
xcäl̄rnibee Xtaďä, huenliisi ruluilojreni
chuni'c nacā. ²⁶ La'tu ditu chalilajz
sa'csi ditu gac rexilä. ²⁷ Rexilä numbee

xse'ä, luxh narä numbeäzareni, riädnajlzareni narä. ²⁸Narä rudedä yäl'nabajñ par tejpas loj rexilä, luxh direni nitloj par tejpas. Rutza laadi nani sajc gudzucajreni ladzñaä. ²⁹Xtadä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladzñaä Xtadä. ³⁰Narä näjza Xtadä najcnu tejsi.

³¹Dxejc gulässac rexpejn Israel guij, te nucuaareni yejc Jesús. ³²Dxejcti räjp Jesús lojreni:

—Xhidajl dzuun xten Xtadä abaluiä lojtu, ¿lo redzuunga, xhi tej dzuun rujn gucuaatu guij yecä?

³³Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beñ guedxliujlu, luxh najlu najclu tejsi con Dios.

³⁴Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”?

³⁵Nancheenu digacdi guidxaa xquijtz Dios. Palga gulalajni redios rebejn nani bejn yälguxhtis loj rexpejn Israel, dxejc ³⁶naj ¿xhicuent guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre. ³⁷Palga dina gunä redzuun xten Xtadä, na'c chalilajztu rextidxä. ³⁸Luxh palga runnäni, mascä ditu chalilajz xtidxä, colchalilajz ni ruluii reyälmilagwr nani runä, te gacbeetu par tejpas, Xtadä yunäj narä, narä yunäáza laani.

³⁹Che rlanjreni niniaazrenini stehuält, laani biriini ladzñaareni.

⁴⁰Dxejcti sääni, gubisacni nez stelaad gueu Jordán, nejzga huijia'nni, cadro gusloj batiobnis Juan. ⁴¹Xhidajl bejn bidzujñ lojni ro'c, räjpreni:

—Di Juan niujñ nicla tej yälmilagwr luxh guiraa rediidx ni gunii Juan xcuent dade're najc didxliipac.

⁴²Xhidalduxhreni huililajz xtiidxni ro'c.

Gujt Larz

11 Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnñi Marii näjza Mart. ²Mariire, bisiajn Larz, najc nane' ni basäl setnejxh ni Jesús, batiaazani ni'ni con xquidxejcti. ³Ni'cni baxhal guiro'p bajlre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcäl'rnibee Dios. Te guluilojza yälracxhuure xcäl'rnibee Xi'n Dios.

⁵Sanälajz Jesús Mart, bajlñi, näjza Larz, ⁶che räjpreni lojni cayacxhuu Larz, bia'nni stio'p dxej cadro yu'ni. ⁷Dxejcti räjpni loj rexpejn pacni:

—Colcho', chonnu stehuält región Judea.

⁸Räjp rexpejnñi lojni:

—Mastr, gajd gac xchej rlanj rexpejn Israel ni rnibee nucuaa guij yejclu te nugu'treni luj, luxh naj rlanjzlu chäsaclu ro'c.

⁹Dxejcti räjp Jesús lojreni:

—¿La xhet tzubitio'p orđi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. ¹⁰Palga chasajni guxhijñ, siliaro'ni, sa'csi xheti bianijga.

¹¹Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹²Dxejc räjp rexpejn pacni lojni:

—Dad, palga agudiesni, pet siajcti.

¹³Jesús canii lojreni agujt Larz, niluxh rexpejn pacni bejn xhigab caniiini xcuent yälrejs xten bacałtis.

¹⁴Ni'cni guniliipac Jesús räjpni lojreni:

—Agujt Larz. ¹⁵Rbalazä sa'csi rutinu ro'c, te chalilajztu xtidxä. Colcho' te chohuiinuni.

¹⁶Dxejcti Tomás ni rniizareni “cua'ch”, räjpni loj resa'ni:

—Colcho' te guetnāzanuni.

Jesús najc yälrbansac lo yälgujt

¹⁷Che bidzujn Jesús lo guejdxga, agujc tajp dxej biga'tz Larz. ¹⁸Guedx Betania tre' gajxh lo guedx Jerusalén, si'cti tio'p garol kilómetro. ¹⁹Xhidajl rexpejn Israel abidzujn, siädhuiireni Mart, näjza Marii, te di gac-huin lajzreni sa'csi gujt bisiajnreni. ²⁰Che gucbee Mart abidzujn Jesús, biriini huichaglojnini; niluxh Marii bia'n rolizjreni. ²¹Dxejcti räjp Mart lo Jesús:

—Dad, paru suga'lu ree, di bisianä niejt. ²²Narä nanä suniidx Dios guiraa nani guiniablu lojni.

²³Jesús räjpni lojni:

—Sibansac bisiajnlu.

²⁴Räjp Mart lojni:

—Acananä sibansacni che guidzujn dxej ni guibansac bejn loj rebengut dxej lult che gun Dios yälguxhtis.

²⁵Dxejc räjp Jesús lojni:

—Narä nacä yälruspansac bejn loj rebengut, näjza yäl nabajn par tejpas. Nani rililajz rextidxä, masä agujtni, sibansacni. ²⁶Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

²⁷Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhāl Dios lo guedxliujre.

Biin Jesús cuä' xpaa Larz

²⁸Che guluux gunii Mart, huitejdxni bājlni Marii, xhiga'tz räjpni lojni:

—Abidzujn Mastr. Cabejdxzani luj.

²⁹Che biejn diajg Marii rediidxga, huisugajcni, sahuiini Jesús. ³⁰Gajd Jesús jiu' guejdxga, laltis suga'ni cadro

bidxaagni Mart. ³¹Rexpejn Israel nani biädquenäj Marii, ni cahuii didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

³²Ni'cni che bidzujn Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.

³³Che bahuii Jesús cayoon Marii, näjza rexpejn Israel ni siädnajl Marii, guc-huin lastooni, biäd te rsliajz lastooni. ³⁴Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te fiilu.

³⁵Dxejcti biin Jesús. ³⁶Ni'cni cayäjp rexpejn Israel:

—Colhuii, lacti sanälajznini.

³⁷Yu'zareni räjp:

—Dade're basiajc bejn lotiä'p. ¿Xha di niajcdi nusiajcn bejnre te di niejtni, ä?

Gubansac Larz

³⁸Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni. ³⁹Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

⁴⁰Dxejc räjp Jesús lojni:

—¿Et rniä lojlu, palga rililajztu, suhuiilu xcälrnibee Dios, ä?

⁴¹Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. ⁴²Narä nanä guliica rucua diajglu xtidxä, luxh naj caniäni xcuent rebejn ni tre' ree, te chalilajzreni luj baxhällu narä.

⁴³Che gulujx guniini rediidxga, guredxa'ni räjpni:

—¡Larz! ¡Gudaa ree!

⁴⁴Dxejc birii bengutga nen biliää. Naliib renaani, reni'ni, niäuu te baii lojni. Dxejcti räjp Jesús lojreni:
—Colguslaani, colgusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

⁴⁵Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. ⁴⁶Yu' reni huihui loj rexpejn Israel ni laa farisee, bijreni diidx xhi bejn Jesús. ⁴⁷Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzaren:

—¿Xho jiennu? Niguiire cayujn xhidajl milagwr. ⁴⁸Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rnibee, gudzucajreni xcälrnibeenu, sudzujlzaren lajdxnu.

⁴⁹Dxejc Caifás, bixhojzro ni riäj gu-nibeeni lo rebixhojz ijzga, räjpni lojreni:
—La'tu xhetliidi najnditu. ⁵⁰Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

⁵¹Niluxh Caifás dini ninii diidxre xcuentcani. Sa'csi ijzga rnibeeni lo rebixhojz, lagajc Dios badeed diidxga gu-niini. Ni'c gunixgaani guet Jesús xcuent nación xten rexpejn Israel. ⁵²Luxh xhet ganaxtis xcuent nacionga, näjza te guire' guiraa rexpejn Dios nani nare'ch loj guideb guedxliujre. ⁵³Ni'cni dxejliga bachaag rebejnga diidx te don xho gunreni gugutreni Jesús.

⁵⁴Ni'cni diru Jesús nisaj nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejnpacni.

⁵⁵Guxii dxej cayäädx guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni

lanij xten pascw. ⁵⁶Cansajreni caguuilreni Jesús; che yu'zaren ni guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

⁵⁷Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

Gudäab te gunaa se't ni' Jesús

(Mt. 26:6-13; Mr. 14:3-9)

12 Che riäädx xho'p dxej gal lanij pascw, huij Jesús guedx Betania cadro rbäjz Larz nani baspansac Jesús loj rebengut. ²Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejnpacni lo mex. ³Dxejcti bidzunnäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäabni se'tga lo reni' Jesús, baspijdzni ni'ni con xquidxejcti. Guideb nen yu'ga gulanejxh se'tga. ⁴Dxejcti räjp Judas Iscariot, xi'n Simón, ni najc te rexpejnpac Jesús, lagajc ni abejn xhigab guto'ni Jesús, räjpni:

⁵—¿Xhicuent di se'tre nido' chon gayuu denar te nidis meelga loj rebenproob? (Chon gayuuga najc si'cti ni xca' te niguii paru gunni dzuun tzubiteb bäii.)

⁶Guniini si'c, xhet sa'csi riadini reprob, per sa'csi laani najcni te gubaan, luxh laani ca'ni bols cadro rucnee meel, luxh rbääni meel lojga te rca'nini. ⁷Ni'cni räjp Jesús lojni:

—Na'c gudxojnuni; subasälxgaanini, che gajd guidzujn dxej nani guiga'tzä. ⁸Dxej-yääl yu' rebenproob lojtu, luxh narä dina chuä lojtu xchej.

Laareni rlajzreni nugu'tzaren Lanij

⁹Dxejc che gucbee xhidajl xpejn Israel yu' Jesús rolijz Larz ni gubansac lo rebengut, bidzujnreni, xhet xcuentis

Jesús. Biäädreni te fiizareni loj Larz nani baspansacni lo rebengut. ¹⁰Dxejcti rebixhojz ni rnibee bachaagzareni diidx te ju'tzareni Larz, ¹¹sa'csi xhidajl rexpejn Israel salilajzreni xtidx Jesús sa'csi bahuiireni gubansac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹²Che bara yääl, rebejn xhidajl ni bidzujn lanij biejn diajgreni asiäd-zujn Jesús guedx Jerusalén, ¹³dxejcti batiu'reni naa reyagzijñ, biriireni neñ guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc reii lo rexpejn Israel!

¹⁴Bidxäl Jesús te burbäz, gubijbnini, si'cni caj lo reguijtz:

¹⁵Na'c guidxejbtu, bejn ni rbäjz neñ guedx Sión.

¡Colhuui! Reii xtentu asiääd, bijbni dejt te burbäz.

¹⁶Di rexpejn pacni niacbee recosga che gujcreni, niluxh che gubansacni loj rebengut, dxejc banaj lajzreni recos nani caj lo guijtz xcuentni, näjza guiraa recos ni bejn rebejn lo Jesús te guzojrb rediidxga.

¹⁷Reben xhidajl ni suganäjni che gurejdxni Larz te biriini neñ baa che baspansacnini lo rebengut, bijzareni diidx xcuent guiraa ni bahuiireni. ¹⁸Ni'cni biädchagloj reben xhidajlgani, sa'csi abiejn diajgreni laani bejnmi milagwrre.

¹⁹Ni'cni räjp refarisee lo sa'reni:

—Aruhuiitu xhet sajcdi jiennu. ¡Colhuui! Empac sanajl guideb guedxliujni.

Riädtil regriegw Jesús

²⁰Yu' gaii bengriegw nadxaag lo rebejn ni biädted lanij guedx Jerusalén.

²¹Rebejnre bidzujn loj Felipe nani siääd

guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²²Biääd Felipe, räjpni loj Andrés, dxejcti guiro'preni huiye'tzreni lo Jesús. ²³Dxejcti räjp Jesús lojreni:

—Abidzujñ or ni chä'p xpala'n Xi'n Dios ni gujc Niguii. ²⁴Rniliäpac lojtu, palga di te xob binij jiajb lo yuj, neñ xhurec cadro cueni, te rianxtebni, guetni, dini guiliejn. Luxh palga guetni, siliejñni, rajcza te nisro lojni, rajc xhidajl xob binij. ²⁵Nani sanälajz xcäl'nabajñni, sunijtnini, luxh nani rbälaz xcäl'nabajñni lo guedxliujre, sica'ni yäl'nabajñ par tejpas. ²⁶Palga yu' chu tej ni rlaiz chu loä, sujiaädnajlñi xnezyuä, te cadro yu'ä, ro'cza cuäaz ni ru' loä. Palga yu' chu gunxtzunä, siliä'pza Xtaäd xpala'nini.

Rnixgaa Jesús guetni

²⁷Räjpzani:

—Naj cayac-huin lastoä. ¿Xhichani'cza gäpä lo Xtaäd? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre.

²⁸Xtaäd, bejn si'cni riälj gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guziñ.

Guyu'zareni räjp:

—Te xangl Dios ni gunii lojni.

³⁰Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini. ³¹Naj abiääd xcäl'guxhtis Dios lo guedxliuj. Naj sibi-caj xcäl'rnibee nani rnibee lo guedxliujre. ³²Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni. ³⁴ Räj̄p rebejn lojni:

—Nuure biejn diajgnu bilreni lo leii, Crist ni jiäd sibajn par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵ Dxejcti räj̄p Jesús lojreni:

—Stera'tsi yu' bianij lojtu. Col̄saj laḷ ni rajptu bianijga, te di guiniaaz yälxcäy la'tu, sa'csi ni rsiäj loj nacäy, dini gan caro chääni. ³⁶ Laḷ ni rajptu bianij, col̄chalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatzojni.

Xhicuent di rexpejn Israel nililajz xtidx Jesús

³⁷ Xhidajl remilagwr bejn Jesús nez loj rexpejn Israel, niluxh direni nililajz xtidxni, gulälazreni nani baxhaḷ Dios lojreni. ³⁸ Ni'cni guzobj diidx nani gunii Isafas, ni gunii xtidx Dios galoro, räj̄pni: Dad, ¿chuni'c huililajz xtiidxlu?

¿Chuloj baluuilu xcäl̄rnibeduxhlu, ä?

³⁹ Ni'cni di niajcdi nililajzreni, sa'csi gu-niiza Isafas, räj̄pni:

⁴⁰ Abascäjyni lojreni,
abennajdni lastooreni,
te di rebalojreni fii,
te di lastooreni gacbee,
te di gusiejch lajzreni,
te di gusiäcäreni.

⁴¹ Rediidxre gunii Isafas, sa'csi bahuiini xcäl̄rdimbicha' Jesús xhaguibaa, dxejcti guniini xcuentni.

⁴² Dxejcti gaii rebejn ni rnibee huililajz xtiidxni che räj̄pni abaxhaḷ Diosni, niluxh bidxjebreni reben farisee, ni'c direni nicäj̄p ahuililajzreni, te di gurilaagwreni laareni, gudxojnreni jiu'reni nen̄ guidoo. ⁴³ Sa'csi rdxagajzruren̄i guiliä'p rebejn xpala'nreni luxh guxiiru rrajzreni guiliä'p Dios xpala'nreni.

Xtidx Jesús sigubee rebejn

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni caniaä rililajzni, näjza xtidx Xtaä nani baxhaḷ narä rililajzni. ⁴⁵ Nani ruhuii loä, ruhuiizani loj ni baxhaḷ narä. ⁴⁶ Narä biälä si'c bajl lo guedxliujre, te guiraa renani chalilajz xtidxä, diruren̄i chu lo yälcäy. ⁴⁷ Nani riendiajg xtidxä, luxh dini gusoob rediidxga, dina gunä yäl̄guxhtis lojni, sa'csi dina niälä te gunä yäl̄guxhtis rebenguedxliuj, biälä te guslaä reben̄ guedxliuj lo dojl. ⁴⁸ Nani rbälaz narä, ni di gusoob xtidxä, yu' chu gun yäl̄guxhtis xtojlni; lagajc redidx nani guniä gun yäl̄guxhtis xtojlni che gal lult dxej. ⁴⁹ Sa'csi narä dina niädniä lagajc xcuentä, lagajc Dad ni baxhaḷ narä, lagajc laani gunibeeni xhini'c guiniä, xhini'c guluiä. ⁵⁰ Luxh nancheä gunibeeni chu yäl̄nabajn par tejpas. Ni'cni rediidx nani rniä, rniäreni si'cpacni gunii Xtaäni loä.

Jesús gudiibni ni' rexpejnpacni

13 Che gajd gal̄ dxe lanij ni laa pascw, najn Jesús asiäddzungenajx xorni, or̄ ni jiunejzni lo guedxliujre te chääni lo Xtaäni. Luxh sa'csi agajc sanälajzni rexpejnpacni nani yu' lo guedxliujre, sinälajznanireni par tejpas.

² Ni'cni laḷ ni cayauxchejreni biu' ben̄dxab nen̄ lastoo Judas Iscariote, xi'n Simón, te guto'ni Jesús. ³ Sa'csi agucbee Jesús abateed Xtaäni guira'ti ladznaani, gucbeezani loj Dios biriini, lo Dios guibi'zani, ⁴ ni'c huisu Jesús lo xchejga, gulääni xhablojiaani, gudojbn̄i te tuäi, batejbn̄i xque'ni. ⁵ Dxejcti cua'ni nis nen̄ te chaa, guslojni gudiibni ni' rexpejnpacni, baspijdzni ni'reni con tuäiiga. ⁶ Che bidzuj̄nni loj Simón Pedr, räj̄p Pedr lojni:

—Dad, ¿xhixh luj siguiiblu ni'ä?

⁷ Dxejcti räj̄p Jesús lojni:

—Nani cayunä dilu gacbeeni naj, guixee-huijdx sacbeeluni.

⁸ Räjpedr lojni:

—¡Dipaclu quiib ni'ä!

Räjpedr lojni:

—Palga dina quibä ni'lu, digacdiru gaclu xpenä.

⁹ Räjpedr lojni:

—Dad, na'c quiiblu ni'ätis näjza naä näjza yecä gudiib.

¹⁰ Räjpedr lojni:

—Nani agojz di guiquiin gacsacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajni chu guto'ni, ni'cni guiniini: “Xhet guiraaditu naya.”

¹² Ni'cni che gulujx gudiibni ni' rexpejñni, gotsacni xhajbni, guresacni lo mex, räjpni:

—¿La najntu xhini'c benä lojtu, ä?

¹³ La'tu rniitu narä, Mastr näjza Dad. Luxh laaca rniitu sa'csi nacäni. ¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjł quiibtu ni' resa'tu. ¹⁵ Sa'csi abaluiä lojtu xho gacni, te chanuu guntu sigajc ni benä lojtu. ¹⁶ Rniliä, rniliäpac lojtu, di te mos gac beñroru lo xlamni; diza te ni rij xmandaad beñ gac beñroru loj nani baxhalni. ¹⁷ Palga najntu recosre, chicbaazatu palga si'c guntu.

¹⁸ Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijztni. Scree najc rediidxga: “Nani rajw xcuxtilä, ni'c agubiréni, agulälazni narä.” ¹⁹ Ni'cni agunixgaäni, che gajdni gac, te che gacni chalilajztu nacä chu rniä nacä. ²⁰ Rniliä, rniliäpac lojtu, nani riu xtidx nani ruxhalä, riuazani xtidxä; luxh nani riu xtidxä, riuazani xtidx nani baxhal narä.

Räjpedr Jesús chuni'c guto'ni

(Mt. 26:20-25;

Mr. 14:17-21; Lc. 22:21-23)

²¹ Che gulujx gunii Jesús rediidxre, gac-huinduxh lastooni, dxejc guniliini:

—Rniliä, rniliäpac lojtu, tejtu suto' narä.

²² Dxejc gusloj cadxeloj rexpejñni lo sa'reni, di jien chuchani'c cagusa'tni.

²³ Tej rexpejñni nani sanälajzruni sobga' cuä'ni. ²⁴ Dxejcti bejn Simón Pedr seen lojni te guiniabdiidxni loj Jesús chu xcuent caniini. ²⁵ Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' bendxab lastooni. Dxejcti räjp Jesús lojni:

—Ni rlanjlu gunlu, bejngani.

²⁸ Nicla tej reni sobga' lo mex direni ni-acbee xhicuent räjpni lojni si'c. ²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. ³⁰ Che gudajw Judas yätxtiilga, birigajcni, luxh abiu' guxhijñ.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguii, luxh lojni sienloj xcälrnibee Dios. ³² Palga suluiloj Xi'n Dios ni gujc Niguii xcälrnibee Dios, dxejc suluilojza Dios xcälrnibee Xi'n Dios ni gujc Niguii, luxh siojb gunnini. ³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä

lo rexpejn Israel si'cza rniä lojtu naj: Di gacdi jiäädto cadre cha'a. ³⁴ Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵ Palga rinälajz sa'tu, si'c sacbee guiraa benguedxliuj najcpectu rexpenä.

Xhini'c gun Pedr loj Jesús

(Mt. 26:31-35;

Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro cháälu?

Räjp Jesús lojni:

—Cadro cha'ä digacdi jiädnaillu narä naj; niluxh sidzujn dxej jiädllu ro'c.

³⁷ Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

³⁸ Räjp Jesús lojni:

—¿La guliilu guetlu xcuentä, ä? Rniliápac lojlu, nicla gajd guidgani cuedxa' chon huält, säjblu dilu gumbee najrä.

Jesús najc nezuj lo Dad

14 Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzta xtidxä. ² Yu' xhidalduxh yu' cadre rbäjz Xtaädä. Palga xhet si'cdi najcni, dizana niniä lojtu si'c. Sia'ä chasucheä reyu' par la'tu. ³ Luxh palga chasucheä cadre cuääztu, che gulusäni, sibisacä, te chanäätu ro'c, te cadre yu'ä, ro'cza chutu. ⁴ La'tu anajntu caro cha'ä, anajnzatu nezuj ni cháätu.

⁵ Dxejcti räjp Tomás loj Jesús:

—Dad, dinu guidon caro cháälu, ¿xho guidonnu nezujga, ä?

⁶ Räjp Jesús lojni:

—Narä nacä nezuj. Narä nacä didxliipac, nacäza yäl nabajn. Por narätis sajchää bejn cadre rbäjz Xtaädä. ⁷ Palga la'tu niembeetu chuni'c nacä, niembeezatu Xtaädä. Luxh najli abiembeepactuni sa'csi acahuiitu lojni.

⁸ Räjp Felipe loj Jesús:

—Dad, basaan guihuiinu loj Xtaadlu; ni'ctis rlaaznu.

⁹ Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhui loä, abahuiinu lo Xtaädä. ¿Xhicuent rniablu fiilu lo Xtaädä, ä? ¹⁰ ¿La dilu chalilajz najrä yunää Xtaädä, luxh Xtaädä yunäjzani narä, ä? Rediidx nani miä dina guiniäni lagajc xcuentä, sa'csi Xtaädä ni yunäj narä laani rujn lagajc rextzuunni. ¹¹ Colchalilajz xtidxä, che rniä narä yunää Xtaädä, luxh Xtaädä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. ¹² Rniliápac lojtu, nani chalilajz xtidxä, sajgunni redzuun nani runä, luxh sujnni dzunroru sa'csi sia'a cadre yu' Xtaädä. ¹³ Luxh guiraa ni guiniablu lo Xtaädä xcuentä, narä sunäni, te guluiloä xcäl rniabee Xtaädä. ¹⁴ Narä sunä xhitis ni guiniabtu por laä.

Ria'n diidx guxhal Jesús Sprit Dyan

¹⁵ Räjpzani:

—Palga sanälajzta narä, susoobtu xtidxä. ¹⁶ Dxejc siniabä lo Xtaädä, te guiniidxni stee nani gacnäjt te chunäjni la'tu par tejpas. ¹⁷ Nalajznu, Xpriet Dyan xten Dios, ni rnili. Di gacdi xca' reben guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni nen lastootu. ¹⁸ Dina gusanbisiabä la'tu; sibisacä jiädhuiä la'tu. ¹⁹ Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabanä, la'tu nabanjzatu. ²⁰ Nen redxejga, dxejc sacbeetu yunää Xtaädä, la'tu yunäjtu narä, luxh narä yunääza la'tu. ²¹ Nani numbee Xtaädä, nani rusoobza xtidxä, ni'c ruluini sanälajzpacni narä. Luxh Xtaädä sinälajzta nani sanälajz narä, najza narä chanälazä bejnga, luxh suluiiloä lagajc narä lojreni.

²² Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben̄ guedxliujdi, ä?

²³ Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jiopläznäänuni guiro'pnu Xtradä. ²⁴ Nani di chanälajz narä, dini jiu xtidxä. Luxh rediidx nani biejn diajgtu, et xtidxädini; xtidx Xtradäni ni baxhal narä.

²⁵ 'Caniä guiraa rediidxre lojtu lajni yu'ä lojtu, ²⁶ per Sprit Dxañ xten Dios nani jädyacnäjtu, nani guxhal Xtradä xcuentä, laani suluini lojtu guira'ti, näjza susnajni lajztu guiraa rediidx nani aguniä lojtu. ²⁷ Yälrbecdxilajz rusa'nä lojtu, xcälrbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. ²⁸ Abiejn diajgtu ni guniä lojtu: Sia'ä luxh siälsacä lojtu. Paru ninälajz pactu narä, sibalajztu xcuentä che guniä sia'ä lo Xtradä, sa'csi Xtradä najc beñroru loä. ²⁹ Scree agunixgaäni lojtu, te che soobni, dxejcu chalilajztu xtidxä.

³⁰ 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; ³¹ riäj] gac recosre te gacbee reben̄ guedxliuj sanälazä Xtradä, rusobäza xtidx Xtradä, runä nani gunibeeni. Colchastie, colcho' jiuñejznu ree.

Jesús najc si'c te yaguub

15 Rämpzani:
—Narä nacä si'c te yaguub. Xtradä najc si'c nani rusuj yajgga. ² Rebejn̄ najc si'c reñaa yajgga. Guiraa reñaa yajgga nani xhet cajdi lojni rutiugnini. Luxh guiraa reñaa yajgga ni caj ninejxh lojni, rusianini te xcajru ninejxh lojreni. ³ La'tu anajctu beñnaya xcuent rediidx nani aguniä lojtu. ⁴ Colguibannäj narä, sigajc ni nabannää la'tu. Digacdi xcaj

ninejxh lo te ñaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

⁵ 'Narä nacä si'c yaguub. La'tu najctu si'c reñaa yajgga. Nani riannäj narä, naräza riannääni, ni'c sajc runduxhni xtzunä, sa'csi che guibicajni loä, xhet sajc di chupac loä, sibicajni si'c reñaa yajg nani rdin sa'csi xhetru rcajdi lojni, dxejcti rbijdzni, rusäl bejnreni lo däj te checni.

⁷ 'Palga chupactu loä, palgaza chupac xtidxä lastootu, colnab nani rla-jztistu, luxh narä sunidxäpacni. ⁸ Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtradä, Dios. ⁹ Si'cpacni sanälajz Xtradä narä, sigajcza sanälazä la'tu. Colchanuu lo xcälrinälazä. ¹⁰ Palga jiutu rextidxä, sinuutu lo xcälrinälazä, sigajc ni abasobä xtidx Xtradä, luxh rinuä lo xcälrinälajz Xtradä.

¹¹ 'Rniä rediidxre lojtu te guibalaznäjtu narä, te si'c guibalazduxhpactu. ¹² Dee najc diidx ni rnibeä guntu: colchanälajz sa'tu si'cni sanälazätu. ¹³ Xheti te yälñanalajz ni guroobru lo yälñanalajzre, gudeed te bejn xcälñabajñni, guetni lacuaa resa'ni. ¹⁴ La'tu najctu resa'ä palga gusoobtu diidx nani guinibeä guntu. ¹⁵ 'Diruna cuälä "mos" la'tu, sa'csi di remos gan xhi rujn xlamreni. Luxh narä agulälä la'tu "rexamigwä", sa'csi guira'ti rediidx ni biejn diagä lo Xtradä aguniäza rediidxga lojtu. ¹⁶ Et la'ditu gule narä, narä guleä la'tu. Guleä la'tu te guntu xtzun Xtradä, te na'cza nitloj dzuunga. Te guira'tiza nani guiniabtu lo Xtradä por laä, ni'cza guniidxni lojtu. ¹⁷ Dee rnibeä guntu: colchanälajz sa'tu.

Rbälaz rebejn̄ guedxliuj Jesús näjza rexejñni

¹⁸ 'Palga cuälaz reben̄ guedxliuj la'tu, anajntu agulälazxgaareni narä. ¹⁹ Paru

najctu beṅ guedxliujre, sinälajzreni la'tu. Per ditu gac beṅ guedxliuj, sa'csi narä guleä la'tu te jiuu xtidx Xtaďä, ni'cni rbälaz reben guedxliuj la'tu. ²⁰ Coṣnaj lajztu diidx nani guniä lojtu, 'di te mos gac beṅroru lo xlamni'. Palga basacsiřeni narä, susacsızareni la'tu. Palga ru-soobreni narä, susoobzareni xtiidxtu. ²¹ Guiraa recosre sunnäjreni la'tu xcentä sa'csi direni gumbee nani baxhaḷ narä.

²² 'Paru dina niädniä lojreni direni niujn dojl xten xcälrđxechlajzreni loä, per naj di gacdi guiniireni direni gacbee yu' xtojłreni. ²³ Nani rbälaz narä, rbälaz-zani Xtaďä. ²⁴ Palga dina niunä nez lojreni remilagwrru, sa' nani rutru rajcđi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtaďä. ²⁵ Bejnreni si'c te guzojđ diidx nani cuaj lo guiłjt agujc xchero: "Gulälazreni narä, luxh xhetlidi benä."

²⁶ 'Che jiääd nani gacnäj la'tu, laani sinii xcentä, chu nacä. Laani najc Sprit ni yu' lo Xtaďä, siniini didxlii. Narä suxhaḷäni lojtu; lo Xtaďä guiriini jiäädni lojtu. ²⁷ Näjza la'tu siniitu diidx xcentä, chu nacä, sa'csi guyu'tu loä cheni gusloäli cagusule'ä diidxga.

16 'Rediidxre nixgaä lojtu, te didi yu' xhi gun jiajbtu te guniıttu lo xtidxä. ² Sidzujđ dxej sibääreni la'tu dirureni gusaan jiu'tu neṅ guidoro. Sidzujđ or chutis ju't tejtı, suchaloni cayacnäjni Dios. ³ Guiraa recosre sunjnreni sa'csi direni gumbeepac Xtaďä, niclaza narä. ⁴ Agunixgaä rediidxre lojtu, te che guidzujđ orga sinaj lajztu xcent rediidx ni guniä lojtu.

Redzuun ni rujn Sprit Dxan xten Dios

'Dina niniä rediidxre lojtu che gusloä cagusule'ä diidx, sa'csi suganää la'tu. ⁵ Naj agojl guibi'ä loj nani baxhaḷ narä, luxh nicla tejtı di guiniabdiidx: "¿Caro chäälü?" ⁶ Dxejc sa'csi aguniä recosre lojtu, ni'c cayac-huin las-

tootu. ⁷ Luxh rniliäpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaḷäni lojtu. ⁸ Luxh laani, che jiäädni lo guedxliujre, susanijni xcäriejn rebejn te gacbeereni xcent dojl, näjza xcent xcälñabannaya Dios, näjza xcent yälguxhtis xten Dios. ⁹ Guluiizani xcent dojl lojreni sa'csi direni chalilajz xtidxä. ¹⁰ Guluiini xcälñabannaya Dios lojreni sa'csi sibisacä lo Xtaďä, luxh dirutu fii loä. ¹¹ Guluiini xcent yälguxhtis xten Dios lojreni sa'csi abejn Dios yälguxhtis loj beṅdxab nani rnibee lo guedxliujre.

¹² 'Yu' xhidajlrı diidx rlazä guiniä lojtu, niluxh digacdi gacbeetureni naj. ¹³ Che jiääd Sprit xten didxlii xten Dios, laani susanijni xcäriejntu te gacbeetu guiraa redidxgulii, sa'csi dini guinii diidx xcentcani, siniitisi ganax rediidx nani gudeed Dios lojni te guiniini. Siniizani xcent recos nani churu gac. ¹⁴ Laani siliä'pni xpala'nä sa'csi sica'ni xhixtenä, suluiinini lojtu. ¹⁵ Guiraa ni rajp Xtaďä najc xtenä, ni'cni rniä suluiini xhixtenä lojtu.

Xcälřrac-huin lajztu sibixloj ni yälřbalajz

¹⁶ 'Sbale'si dxej, dxejc dirutu fii loä; dxejctıru sgaii dxej suhuisactu loä sa'csi narä sia'a lo Xtaďä.

¹⁷ Dxejctı räjp rexpejnıpacni lo sa'reni: —¿Xhini'c caniini loonu? Sbale'si dxej, dxejc dirutu fii loä, dxejctıru sgaii dxej suhuisactu loä, näjza: sa'csi sia'a lo Xtaďä. ¹⁸ Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gacbee xhini'c caniini.

¹⁹ Gucbee Jesús xhini'c rıajzreni guiniabdiidxreni lojni, dxejctı räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcrı sbale'si dxej, suhuisactu loä. ²⁰ Rniliäpac lojtu,

la'tu soontu, niluxh reben guedxliujre sibalazduxhrene. Sac-huinduxh lastootu niluxh yälrac-huinre sibixhlojni yälrbalajz. ²¹ Te gunaa che gaal xi'nni, rdejndi trabajw, dxejcti che aguyu' xi'nni, riäl lajzni gudejndi trabajw, dxejc arbaa lajzni gojl xi'nni te niguii lo guedxliujre. ²² Ni'cni, sigajcza rac-huin lastootu naj, dxejcti che jiädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

²³ Nen redxejga xhetiru xhi yälguini-abdiidxd i guntu loä. Rniliápac lojtu, nani guiniabtu lo xtadä xcuentä, laani suniidxnini lojtu. ²⁴ Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵ Aguniä guiraloj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtradä. ²⁶ Nen redxejga guiniabtu por laä. Luxh dizana guiniä siniabä narä loj Xtradä par la'tu, ²⁷ sa'csi lagajcza Xtradä sanälajzni la'tu, sa'csi la'tu sanälajztu narä, luxh ahuililajzatu loj Dios biriä biälä lo guedxliuj. ²⁸ Biriä lo Xtradä xhaguibaa, biälä lo guedxliujre, siunezáza lo guedxliujre, sibisacä lo Xtradä xhaguibaa.

²⁹ Räj p rexpejn pacni lojni:

— Naj sii caniilu guyasi, dini gac si'c redidx-xhiga'tz xten cuent ni ruluii.

³⁰ Naj sii gucbeenu racbeelu guira'ti rexhicos, xhetru nanabdi guiniabdiidrxunu lojlu; ni'cni ahuililajznu biriilu lo Dios ni yu' xhaguibaa.

³¹ Räj Jesús lojreni:

— ¿La rililajzactu naj, ä? ³² Asiäd-zungajxh teb or luxh ala bidzujn orga, che guire'chtu, cade tejt xnez-xnejztu, te gusanxtebtu narä, luxh dina jianxtebä sa'csi Xtradä suganäj narä. ³³ Aguniä redixre lojtu te cuedxi lastootu lo guedxli-

ujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan loj guedxliujre.

Gunab Jesús lo Dios xcuent rexpejn pacni

17 Che gulujx guniini loj rexpejn pacni rediidxga, guläsni lojni xhaguibaa, räj pni lo Dios:

— Xtradä, abidzujn or; gulä'p xpala'n xi'nlu te guiliä'pza xi'nlu xpala'nlu, ² sigajc ni badeedlu lojni yälrnibee loj guiraa reben guedxliuj, te gac gudeedni yäl nabajp par tejpas lo guiraa renani badeedlu lojni. ³ Redee rajp yäl nabajp par tejpas; numbeerene luj ni najc tejtis GuebDios, näjza narä Jesucrist nani baxhallu lo guedxliujre.

⁴ Narä gulä'pä xpala'nlu lo guedxliujre, abaluxä dzuun nani baniidxlu gunä ree. ⁵ Naj Xtradä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶ Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpacu najcreni, baniidxlureni loä, luxh rapdzu'tzreni xtiidxlu. ⁷ Naj agucbeerene guiraa rediidx ni guniä lojreni lojpacu siäädni. ⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhal narä.

⁹ Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. ¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ Narä diruna jia'nä lo guedxliujre, laareni sia'nruene lo guedxliujre. Luxh narä siälä lojlu. Xtradä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab

sigajcni riennu nurnu tejsi xhigab. ¹²Che guyunnääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijit te gusojb ni caj lo xtidx Dios.

¹³Luxh naj sibusacä lojlu. Caniä redidixre la_l ni yu'ä lo guedxliujre, sa'csi rlazä guibaa lajzreni si'c ni rbaa lazä. ¹⁴Abasule'ä xtiidxlu lojreni, luxh rebejn guedxliuj rdx'e'chreni lojreni sa'csi direni gac bejn guedxliujre sigajc ni dizana gacä bejn guedxliujre. ¹⁵Dina guiniabä cuääluren lo guedxliujre, rniabä gudzucajluren loj bejdxab. ¹⁶Direni gac bejn guedxliuj, sigajc ni dizana gacä narä bejn guedxliuj. ¹⁷Basyareni con xtiidxlu, sa'csi xtiidxlu najc didxguliipac. ¹⁸Sigajc ni baxhallu narä lo guedxliujre, sigajcza ruxhaläreni te chääreni guideb guedxliuj. ¹⁹Xcuentreni rudedä lagajc narä, te näj laareni gacnayareni con xtidxguliipaclu. ²⁰Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. ²¹Rlazä gun guiraareni tejsi xhigab, sigajc ni rujnlu, Xtadä, si'c runäza; te sigajc ni yu'äza con luj, sigajcza churen lo con nuurnu, te gacbee rebejn guedxliuj luj baxhallu narä. ²²Yäl'rnibee ni baniidxlu loä, lagajc yäl'rnibeega badedä lojreni te gunreni tejsi xhigab, si'cni riennu tejsi xhigab. ²³Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxhallu narä, luxh sanälajzluren lo si'cni sanälajzalu narä.

²⁴Xtadä, guiraa renani baniidxlu loä, rlazäza churen lo cadro chuä xhaguibaa, te fiireni xcäl'rnibeä nani baniidxlu, sa'csi huinälajzlu narä galooli che gajdli guirixtiej guedxliujre. ²⁵Xtadä ni rujn cossa'tis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä. ²⁶Aräpä lojreni chu najclu; säpäzaru lojreni te chu yäl'sanälajz sa' ni rajplu

par narä nen lastooreni, te cuäzäza nen lastooreni.

Xho gunaazreni Jesús

(Mt. 26:47-56;

Mr. 14:43-50; Lc. 22:47-53)

18 Che gulujx gunii Jesús rediidxga, huinäni rexpejn pacni dejtz gueu Cedron. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejn pacni. ²Anajn Judas, nani guto' Jesús, caro rij Jesús con rexpejn pacni sa'csi si'csi-si'c rdxaa'g sa'reni ro'c. ³Dxejcti Judas, che biääd lojni te cuaa soldad roman, näj rebixhojz ni rnibee, näjza referisee, huinätinireni ro'c, ca'reni balguejd näjza lintern, näjza spaad näjza lans. ⁴Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguuiltu?

⁵Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjniren lo.

⁶Che gunii Jesús lojreni: “Laa naräni”, biäxhanreni, biajbreni lo yuj. ⁷Dxejcti gunabdixsac Jesús lojreni:

—¿Chu rguuiltu?

Dxejc räjpzareni stehuält:

—Jesús nani siääd guedx Nazare't.

⁸Räjp Jesús lojreni:

—Aguniä lojtu, laa naräni. Palga narä rguuiltu, colgusaan jii redee.

⁹Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijit.”

¹⁰Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. ¹¹Dxejcti räjp Jesús lo Pedr:

—Guluchee spaad xtenlu nen xpaguinni. ¿La dina tedä trabajwduxh nani agunibee Xtadä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga nájza comandant, nájza reguxhtis ni rnibee rexpejn Israel, guṇaazreni Jesús baliibrenini. ¹³ Dxejcti ganid huinärenini lo Anás, sa'csi najcni xtadsueegr Caifás, luxh izjga biäjł najc Caifás bixhojzro ni rnibee lo rebixhojz. ¹⁴ Caifás najc nani balijdx rexpejn Israel nanab guet te niguii xcuent rebenguejdxga.

Cadro gunii Pedr dini gumbec Jesús

(Mt. 26:69-70;

Mr. 14:66-68; Lc. 22:55-57)

¹⁵ Simón Pedr nájza stee xpejnṇpacni huinajł dejtz Jesús. Luxh numbee bixhojzro bejnṇga, biunäjzani Jesús lo xle' bixhojzro. ¹⁶ Bia'nti Pedr rolä'ga. Dxejc birii xpejnṇpac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. ¹⁷ Dxejcti räjp mos gunaa ni rcanäj rolä', räjpni lo Pedr: —¿La et näjdi luj najclu te xpejnṇpac Jesús, ä?

Räjp Pedr loj gunaaga:

—¡Xho gacäni!

¹⁸ Dxejcti sa'csi cayacnalduxh, caguse'creni boo te cagucha'lajzreni. Nájza Pedr suganäjreni, cagucha'lajzni ro guibooga.

Bixhojzro cayujn yälgunabdiidix lo Jesús

(Mt. 26:59-66;

Mr. 14:55-64; Lc. 22:66-71)

¹⁹ Dxejcti gusloj cayujn bixhojzro yälgunabdiidix loj Jesús xcuent chuni'c najc rexpejnṇpacni nájza xcuent xhini'c rluuiini.

²⁰ Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidix neṇ rexquidobäztu nájza neṇ guidoro cadro re' guiraa rexpejn Is-

rael, nicla tej diidix dina ninixhiga'tzädi. ²¹ ¿Xhicuent cayujnlu yälgunabdiidixga loä? Gunabdiidix loj renani biejn diajg xhini'c guniä lojreni. Laareni najnreni xhini'c guniä.

²² Che gulujx gunii Jesús rediidixre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidix loj bixhojzro, ä?

²³ Dxejcti räjp Jesús lojni:

—Palga xhet laadi guniä, baluii narä xhi diidixga najc xhet laadi, niluxh palga laaca najc ni guniä, ¿xhicuent huääzlu loä?

²⁴ Dxejcti guideb naliibni baxhal Anásni lo bixhojzro lo ni laa Caifás.

Gunisac Pedr dini gumbec Jesús

(Mt. 26:71-75;

Mr. 14:69-72; Lc. 22:58-62)

²⁵ Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejnṇpac niguiiga, ä?

Badzu'ni diidixga räjpni:

—¡Xho gacäni!

²⁶ Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neṇ huert con laani, ä?

²⁷ Dxejcti räjp Pedr stehuält:

—Nicla gumbecäni.

Cuantis guniini si'c, guredxagajc te guidgaii.

Jesús nez loj Pila't

(Mt. 27:1-2, 11-14;

Mr. 15:1-5; Lc. 23:1-5)

²⁸ Dxejc birinäjreni Jesús rolijz Caifás, huinärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani

pascw. ²⁹Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

³⁰Dxejcti räjpreni lojni:

—Paru di niguiire niajc te beñ latsiaj, dinu niopnäni ladzṇaa guejblu.

³¹Räjp Pila't lojreni:

—Colchanäni, colhuii xho gunnäjtuni yälguxhtis con lagajc xleiitu.

Dxejc räjp rexpejn Israel lojni:

—Di xleiitu gusaan ju'tnu te bejn.

³²Guniireni si'c te guzobj diidx nani gunii Jesús xcuent xho guetni.

³³Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexpejn Israel, ä?

³⁴Dxejcti räjp Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

³⁵Dxejcti räjp Pila't lojni:

—¿Xhixh näj narä nacä te xpejn Israel? Lagajc reben lajdxlu näjza rebixhojz bateedlu ladzṇaa. ¿Xhi bejnlü?

³⁶Dxejcti räjp Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuaa rexpenä te di tedä ladzṇaa rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

³⁷Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuaiajgreni xtidxä.

³⁸Räjp Pila't lojni:

—¿Xhini'c najc didxlii?

—Che guniini si'c gunisacni loj rexpejn Israel:

—Dina guidxälä nicla tej xtojł bejnre.

³⁹Niluxh la'tu rajptu te costumbr, casob lani pascw, ruslaanu te bejn ni yu' neñ

latzguiib. ¿Xhi najtu? ¿La rlaiztu guslaá ni najc reii xten rexpejn Israel, ä?

⁴⁰Dxejcti guiragajcreni guredxa', räjpreni:

—¡Na'c guslaalu niguiiga! ¡Baslaa Barrabás!

Niluxh Barrabás najc te gubaan.

19 Ni'cni gunibee Pila't gudijreni Jesús con duu ni yu' guechguiib lojni. ²Bejn resoldaad te coronguejch, bazañrenini yejc Jesús. Dxejcti bahua-jcwrenini te ladmoraad. ³Dxejcti gusloj gubigreni lojni, te räjpreni lojni:

—¡Gubajn par tejpas Reii xten rexpejn Israel!

Dxejc huääzreni lojni.

⁴Dxejcti birisac Pila't, räjpni lojreni:

—¡Colhuii! Acabääni nez lojtu, te gacbeetu dina guidxäl nicla tej xtojłni.

⁵Dxejcti birii Jesús nez lojreni, yu' coronguejch yejcn, najcwzani ladmoraadga. Dxejcti räjp Pila't lojreni:

—¡Colhuii! ¡Aree niguiire!

⁶Ni'cni, che bahuii rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo cruzj! ¡Colgucuaani lo cruzj!

Räjp Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojłni.

⁷Dxejcti räjp rexpejn Israel lo Pila't:

—Nuurnu rajpnu te lei, luxh xcuent leiiga, nanab guetni sa'csi najni najcni Xi'n Dios.

⁸Che biejn diajg Pila't rediidxga, bidxejbruni, ⁹biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

¹⁰Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaalu lo cruzj, rapäza yälrnibee te guslaálu, ä?

¹¹Räjp Jesús lojni:

—Xhetliidi yäl̄rnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl̄ loj ni rajplu.

¹²Ni'cni gudiil Pila't xho nuslaani Jesús, niluxh rexpejn̄ Israel rbedxaduxhrueni, räjpreni:

—Palga luj guslaaluni, dilu gac xami-giw reīi César, sa'csi chutis ni rnii najcni reīi, najcni xcontraar César.

¹³Che biejn diajg Pila't rediidxre, gulääni Jesús, dxejcti gurej Pila't lo yagxhiil cadro rujni yäl̄guxhtis, cadro laa Litóstroros con didx-griegw sälojni naga' guisa'c, con didx-hebreo laani Gabata. ¹⁴Najcni dxej vispr lani pascw, si'cti läidxej, dxejcti räjpni loj rexpejn̄ Israel:

—Colhuiu, aree xreiitu.

¹⁵Ni'cni guredxa'reni räjpreni:

—¡Suguetni! ¡Suguetni! ¡Bacuaani lo cruzj!

Dxejcti räjp Pila't lojreni:

—¿La sucuaá xreiitu lo cruzj, ä?

Dxejcti räjp rebixhojz ni rnibee lojni:

—Rutru reīidi rajpnu, Césartis najc xreiinu.

¹⁶Ni'cni bateed Pila't Jesús lojreni te chacuaarenini lo cruzj.

Che bacuaarenini lo cruzj

(Mt. 27:32-44;

Mr. 15:21-32; Lc. 23:26-43)

¹⁷Dxejcti cua'reni Jesús, biriini ro'c guideb nuuni xcruzjni, cheni bidzuj̄lireni te lajt ni laa lajt xten Calabeer, con didx hebreo laani Gólgota. ¹⁸Ro'c bacuaarenini lo cruzj. Bacuaazareni tio'p niguii lo stio'p cruzj, teygani te laad cuä' Jesús. ¹⁹Dxejc bacuaa Pila't diidx ni chää yejc xcruzjni; rediidxga najc scree: “Jesús, bejn̄ Nazare't, Reii xten rexpejn̄ Israel.” ²⁰Xhidajl̄ bejn̄ bil̄ diidx ni caj yejc xcruzjni, sa'csi lajt cadro bacuaarenini lo cruzj najc gajxh ro' guejdxga, luxh didx hebreo, diidx griegw,

näjza didx latin̄ bacuaareni rediidxga. ²¹Dxejcti räjp rebixhojzro xten rexpejn̄ Israel loj Pila't:

—Na'c nucuaalu: “Reii xten rexpejn̄ Israelni”, laacaru nacuaalu: “Laani najni, najcni reīi xten rexpejn̄ Israel”.

²²Dxejcti räjp Pila't lojreni:

—Nani abacuaá, abacuaá. Si'c jia'nni.

²³Dxejcti resoldaad, che gulujx bacuaareni Jesús lo cruzj, cua'reni rexhablojiaani bejnrenini tajp la', te cade tejreni cua'reni te la'ni. Luxh yu' stee xhajbni ni laa tunica, nadijbni, guejni hasta lo yuj guc-cheeni. ²⁴Ni'cni räjpreni lo sa'reni:

—Na'c guitiäjnuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadro caj scree: “Batiäjsreni xhablojiaä; yejza xhabä ni bia'n gudzujtreni daad.”

Ni'cni bejn̄ resoldaad recosre. ²⁵Niluxh cuä' xcruzj Jesús suga' xnanni, con bäjl xnanni, ni laa Marii chäǟl Cleofas, näjza Marii Magdalen.

²⁶Che bahuii Jesús loj xnanni, dxejc bahuiizani loj xpejn̄pacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlu!

²⁷Dxejcti räjp Jesús loj xpejn̄pacni nani sanälazduxhni:

—¡Bahuii, aro'c xnanlu!

Ni'cni dxejcl̄i sinä nani najc xpejn̄pacni xnan Jesús rolizpacni.

Xho gujt Jesús

(Mt. 27:45-56;

Mr. 15:33-41; Lc. 23:44-49)

²⁸Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

²⁹Ro'c suga' te guejs vinagr, nenga bahujdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni. ³⁰Che gulujx gu' Jesús vinagr̄ga, räjpni:

—Agulujxni.

Dxejcti basajb yejcti, baslaani xaimni.

Xhi bejn te soldaad lo Jesús

³¹Dxejga najc dxe vispr xte lani pascw, che ru' mandaad par lanijga. Rexpejn Israel di rlanjreni nia'n rebejnğa lo recrujz, sa'csi dxe sabdga najc dxej ni rusilajzreni. Ni'cni gunabreni lo Pila't guxhalni chu qui'ch ni'reni te guetreni, te jiajtreni loj recrujz. ³²Dxejcti bidzujn resoldaad, gudi'chreni guiro'p ni' nani caj te laad, sigajcza bennajreni stee ni caj ste laadga. ³³Che gubigreni lo Jesús, bahuiireni alagujtni, direni nigui'ch ni'ni. ³⁴Tej soldaadga baqui'tzni te lans ro' xcustiini, dxejc bixe' rejn najza nis. ³⁵Lagajc narä Juan bahuiä recosga, ni'cni cania rediidxre, luxh diidxga guliipacni. Lagajc narä nanä didxguliipac cania, te chaliiza lajztu xcuentni. ³⁶Sa'csi si'c gujc guira'ti, te guzobj xtidx Dios cadro caj: "Nicla tej xtzujtni di guech." ³⁷Sigajcza lo stee guijtz caj diidxre: "Sidxelojreni loj nani biguijtz te lans."

Huicua'tzreni Jesús

(Mt. 27:57-61;

Mr. 15:42-47; Lc. 23:50-56)

³⁸Che gulujx recosga, dxejcti huij José, te bejn Arimatea, naxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätni Jesús lo cruju. Cuäjbza Pila't, dxejc biääd José gulätni Jesús, sanätini togoolga. ³⁹Najza Nicodem biääd dxejc, nani galoo huininaj Jesús te guxhijn. Biädnaäni si'cti tiuu kil te dänejh ni najc si'c yaal ni laa mirra najza áloes. ⁴⁰Dxejcti cua'reni Jesús batejbrenini te la' lad lino, basälzarenini däjga ni laa mirra con áloes, sa'csi si'c najc xcostumbr rexpejn Israel che rucua'tzreni te togool. ⁴¹Gajxh cadro cuaj Jesús lo cruju, yu' te huert,

nejn huertga yu' te bacoob si'c te biliäa, cadro nicla tej bejn gajd guiga'tz. ⁴²Sa'csi abidzujn dxej vispr lani pascw xten rexpejn Israel, luxh gajxh suga' biliäaga, nenga gudixhrene Jesús; si'c biga'tztini.

Gubansac Jesús loj rebengut

(Mt. 28:1-10; Mr. 16:1-8; Lc. 24:1-12)

20 Primer dxej xten xmaanga, cäyru, gajd lo guedxliuj jianij che huij Marii Magdalen lo baaga. Che bidzujnni ro' baaga, bahuiini agubicaj guij ni suga' ro' baaga. ²Dxejcti ruxunni gubi'ni te huiye'tzni lo Simón Pedr najza lo stee xpejnpac Jesús ni sanälazduxhni, räjpni lojreni:

—Ahuilääreni Dad nejn baa, luxh dinu guidon caro sanärenini.

³Dxejc biriguxun Pedr najza stee bejnğa, huijreni nez lo baa. ⁴Ruxun guiro'preni. Niluxh stee bejnğa ruxunduxhruni loj Pedr. Laani ganid bidzujnni lo baaga. ⁵Dxejcti guretänni te bahuiini nejn ba-biliäaga. Bahuiini te laad naga' relajdtis nani bidejb Jesús, luxh dini niu' nejn baaga. ⁶Dxejc bidzungajc Pedr, biugajcni nejn baaga, bahuiini naga' relajdga te laad. ⁷Bahuiizani lajd ni guyu' yejcti, ni'c nie'tni saru, naga'ni te laad. ⁸Dxejcti biu' stee bejnğa nani bidzujn ganid. Che bahuiini nejn baaga, huililajzni gubansac Jesús. ⁹Sa'csi gajdreni gacbee ni caj lo reguijtz, cadro caj nanab guibansacni loj rebengut. ¹⁰Dxejc gubisac guiro'p rexpejnpacni rolizreni.

Baluiloj Jesús loj Marii Magdalen

(Mr. 16:9-11)

¹¹Laltis suga' Marii cuä' baaga, cayoonni. Ni'cni laj ni cayoonni, basajb lojni te bahuiini nejn baaga. ¹²Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni. ¹³Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴Che gulujx guniini si'c, gubiréni, dx-ejc bahuiini loj Jesús suga' ro'c, niluxh dini niembee Jesús. ¹⁵Dxejc räjp Jesús lojni:

—Nane', ¿xhicuent roonlu? ¿Chu rguuillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsáni te chanääni.

¹⁶Dxejcti räjp Jesús lojni:

—¡Marii!

Dxejc gubiré Marii, räjpni nen xtidx hebreo:

—¡Raboni!

(Säloj diidxga “Mastr”).

¹⁷Dxejcti räjp Jesús lojni:

—Na'c guiniaazlu narä sa'csi gadna cha'a lo Xtaďä xhaguibaa. Huij loj rebetzä, huiye'tz lojreni, cha'a lo Xtaďä, näjza Xtadtu, loj Xtiozä näjza Xtiooztu.

¹⁸Dxejcti huij Marii Magdalen, bidzujni loj rexpejnpacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

Baluiloj Jesús loj rexpejnpacni

(Mt. 28:16-20;

Mr. 16:14-18; Lc. 24:36-49)

¹⁹Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejnpacni, sa'csi rdxejbreni rexpejn Israel. Chela bidzujn Jesús, guzujni nez galäiireni, räjpni lojreni:

—Suchu yälrbexi lastootu.

²⁰Che guniini si'c, baluigajcni renaani lojreni näjza cuä' xcustiini. Ni'cni bibaduxhlajz rexpejnpacni che

bahuiireni lo Dad Jesús. ²¹Dxejc räjp Jesús lojreni stehuält:

—Suchu yälrbexi lastootu. Si'c ni baxhal Xtaďä narä, si'cza ruxhalä la'tu.

²²Che gulujx guniini rediidxga, balejbn yejcreni, räjpni, lojreni:

—Suguibajn Sprit Dxan xten Dios nen lastootu. ²³Rextojl rebejn nani siällajztu, sibicajreni. Rextojl rebejn nani ditu jiällajz, siännajreni redojlga.

Tomás bahui lo Jesús ni gubansac

²⁴Tomás, ni laaza Didimo, najcni te retzubitio'p xpejnpac Jesús. Rutini che biäd Jesús loj rexpejnpacni. ²⁵Dxejcti räjp rexpejnpacni lojni:

—Abihuiinu loj Jesús, agubansacni loj rebengut.

Dxejcti laani räjpni lojreni:

—Palga dina fiä loj renaani cadro caj seen xten reclaab, palga dina guqui'tzä bicuenaä cadro guyu' claabga, guqui'tzäza naa cadro bixal cuä'ni, di lazä chalii gubansacni loj rebengut.

²⁶Che gudejd xhujn dxej, tresac rexpejnpacni nen yu', nadxaagza Tomás lojreni. Niäudzu'tz yu'ga, luxh chela gucbeereni abidzujn Jesús, guzujni galäiireni, räjpni lojreni:

—Suchu yälrbexi lastootu.

²⁷Dxejcti räjpni loj Tomás:

—Baqi'tz bicuenaalu ree loj patnaä, basälza naalu cuä'äre, na'c ractio'p lajzlu, huililajzpac gubansacä loj rebengut.

²⁸Dxejcti räjp Tomás lojni:

—¡Xtaďä, Xtioozä!

²⁹Dxejcti räjp Jesús lojni:

—Sa'csi abahuiilu lä, Tomás, huililajzlu. Chicbaa renani mase direni fii, rililajzreni xtidxä.

Xhicuent bacuaani reguijtzre

³⁰Xhidalroduxhru dzuun bejn Jesús nez loj rexpejnpacni, nani di nicaj lo gui-jtz. ³¹Redzuunre nani bejn Jesús nani cuaj lo gui-jtzre cuajni te chalilajztu di-

idxre: Jesús najc Crist, nani cabäjz re-bejn jïääd, Xi'n Dios. Luxh che chalilajz te bejn xtiidxni, sajpnï yäl nabajñ par tejpas.

Jesús baluilojñi lo gajdz xpejn pacni

21 Dxejcti baluiloj Jesús loj rexpejnñi ro' nisdoo ni laa Tiberias. Scree baluilojñi lojreni. ²Nadxaag sa' rebejnre: Simón Pedr, Tomás ni laaza Didimo, nájza Natanael, nani siääd Caná xten Galílee, rexi'n Zebedeo, nájza stio'p rexpejn pacni. ³Dxejcti räjp Simón Pedr loj resa'ni:

—Chanazä bäjł.

Räjpreni lojñi:

—Nájza nuure chonnu.

Dxejcti sääreni, huä'preni nen te barcw. Guideb guxhijnga xhet bäjłdi gunaazreni. ⁴Che acayanij loj guedxliuj, suga' Jesús ro' nisdoo, di rexpejnñi niembeeni. ⁵Ni'cni räjp Jesús lojreni:

—Rexi'nä, ¿la xhet bäjłdi rajptu, ä?

Räjpreni lojñi:

—Xhet rajpdinu.

⁶Dxejcti räjpñi lojreni:

—Colgusäl xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzutznï bäjł. ⁷Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäjł, dxejcti gutiäjsni lo nisdoo. ⁸Sgäi rexpejn pacni biädnäreni rebarcwga sa'csi ameer guidzujñreni ro' nisdoo, si'cti tegayuu metrtis cayäädx. Siädnazareni guijxh guidxa rebäjł. ⁹Che bidzujñreni ro' nisdoo, bahuiireni re' guiboo, ro'c dzuub te bäjł nájza yätxtiil cague'. ¹⁰Dxejcti räjp Jesús lojreni:

—Coltanä gäi bäjł nani entis gunaaztu.

¹¹Dxejcti huij Simón Pedr, guläani guijxhga, guidxani bälro. Guyu' si'cti te gayuu garol con chon bäjł nen guijxhga, niluxh dini niräsyä' mase guyu' xhidalduxh bäjł nenñi. ¹²Dxejcti räjp Jesús lojreni:

—Coltaa te gauxharejntu.

Nicla tej rexpejn pacni dini niabdiidx lojñi: “¿Chu luj?” sa'csi anajñreni laa Jesúsni. ¹³Dxejcti cua' Jesús yätxtiil, badeedni lojreni, sigajcza rebäjł.

¹⁴Dee najc ni riojn huält baluilojñi loj rexpejn pacni, che gubansacni loj rebengut.

Jesús rñinäj Simón Pedr

¹⁵Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpñi lojñi:

—O'n, Dad, luj najnlu sanälazä luj.

Räjp Jesús lojñi:

—Gojp rexilä'ä.

¹⁶Räpsacni lojñi ni rojp huält:

—Simón, xi'n Jonás, ¿la sanälajzlu narä, ä?

Räjpñi lojñi:

—O'n, Dad. Luj najnlu sanälazä luj.

Räjpñi lojñi:

—Gojp rexilä.

¹⁷Räpsacni lojñi ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojñi chon huält: “¿La sanälajzlu narä?” Dxejcti räjp Simón lojñi:

—Dad, luj najnlu guira'ti. Luj najnlu sanälazä luj.

Räjp Jesús lojñi:

—Gojp rexilä. ¹⁸Rñiliápac lojñi, che gujclu bi'nru, lagajc luj rajcwlu xhajiblu, rijlu cadrotis rñajzlu. Che anajclu

beṅgool, susgaatislu naalu te gushua-jcw ste'ca bejṅ xhajblu, te chanäreni luj cadre di rlajzlu.

¹⁹Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰Che gubiré Pedr, bahuiini loj stee xpejṅni, nani sanälajzru Jesús, siädna-jlñi dejtzeni. Lagajc bejṅre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?”

²¹Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

²²Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

²³Ni'cni bire'ch diidx lagajc loj resa'ni, di bejṅga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴Luxh bejṅga najc narä, xpejṅ Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

²⁵Yu'ru xhidalduxh dzuun ni bejṅ Jesús. Palga gucuaanu guiralii redzuun ni bejṅ Jesús, nicla lo guedxliujre di gal chu reguijtz cadre xcajni.

Redzuun Rexpejn Dios

Siääd Sprit Dxan xten Dios te cuääzni nen lastootu

1 Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejnpacni. Sprit Dxan xten Dios baluui Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubansacni lo rebengut, baluulojlojni lo rexpejnpacni. Tiuu dxej baluulojlojni loj rexpejnpacni balti huält te gacbeereni agubansacni. Guniizani lojreni xcuent xcälrnibee Dios.

⁴ Che gudejd tiuu dxejga, batojpe Jesucrist rexpejnpacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjpnj:

—Dee abiejn diajgtu guniä lojtu.

⁵ Juan batiobnis con nis, luxh naj guxii dxej cayäädx dxejcu siääd Sprit Dxan xten Dios te cuääzni nen lastootu. Si'c guirobnistu —räjpnj.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yälrnibee lo rexpejn Israel, ä?

⁷ Dxejcti räjpe Jesucrist loj rexpejnpacni:

—Di riäj] gacbeetu xcuent redxej näjza retiemp nani abasobxgaa Dios con xcälrnibeeni. ⁸ La'tu sica'tu yälrnibee che abiääd Sprit Dxan xten Dios nen lastootu. Dxejc chatie'chtu xtidxä näjza rextzunä nen guedx Jerusalén, nen guiraa reguedx Judea, nen guiraa

reguedx Samaria, näjza nen guideb guedxliuj —räjpnj.

⁹ Gulujxtis gunii Jesucrist rediidxga, luxh la]ni cahuii rebejn lojni huäjsni xhaguibaa, sa'csi gurejdx Diosni. Dxejc biääd te za, biu'ni nen zaga. Ro'cti diru rebejn nuhuii lojni. ¹⁰ La]ni cadxelodxi rebejn xhaguibaa cadro gunitloj Jesucrist, tiop angl xten Dios ni najcw ladnol suga' gajxh cadro suga'reni. ¹¹ Dxejc räjpe reangl loj rebejn:

—¿Xhi rajctu be] Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpreni.

Gulereni Matías ni najc apostcoob

¹² Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rni leii sajce sareni dxej ni rusilajzreni. ¹³ Che biu'reni Jerusalén, bidzujreni ro' yu' cadro rbázlaareni. Yu'ga najc jiaa yejc stee yu'. Ro'c rbázlaa Pedr näjza Jacob, Juan, Andrés, Felipe, Tomás, Bartolomé, Mateo, Jacob xi'n Alfeo, Simón nani laaza Zelote, näjza Judas bejtz Jacob. ¹⁴ Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gaj] bejn. Dxejcti huisulii Pedr galäireni, räjpnj loj rebejn:

¹⁶ —Caniä lojtu, resa'ä, nanabpac soob xtidx Sprit Dxan xten Dios ni bacuaa to-David lo guijtz xcuent Judas, nani bato' Jesucrist loj renani gunaaazni. ¹⁷ Gujc Judas sa'nu, bejnzeni lagajc dzuun ni biennu. ¹⁸ Cua' Judas meel ni badeedreni lojni che bato'ni Jesucrist. Che gulujx bejn ni dzunguidx ni bejn ni, badeedsacni meel lojreni. Gusiireni te la' yuj. Dxejcti lagajc Judas basäl duu guejn ni, guzäbnaj]ni lo bej, gujtni. Gusaguij ni, dxejcti

biräjs xque'ni birii guiraa reziini. ¹⁹Che biejn diajg rebejn Jerusalén si'c, gulälajreni yujre Acéldama, ni säloj yurejn. ²⁰Neñ guijtz ni laa Salmos abacuaa to-David rediidxre:

Sujianxteb rolizjni;
na'c cuääzru bejn rolizjni;
näjza:

Suxca'za ste'ca niguii xtzuumni.

²¹Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxey ni gyunäj Jesucrist nuunu, ²²dxejli ni gusloj batiobnis Juan hasta dxej ni huäjs Jesucrist xhaguibaa. Te gacnä j niguiire nuunu gusule'nu diidx gubansacpac Jesucrist lo rebengut.

²³Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, ²⁵te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

²⁶Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnä j Matías stzubiteeb reapost te gujreni tzubitio'p apost.

Biääd Sprit Dxan xten Dios

2Che bidzujn dxej ni rajc lanij xten Pentecostés, tre' guiraareni tejsi lajt neñ te yu', ²chela gusloj cayubej xhaguibaa si'c te beroduxh, bachajni guideb neñ yu' cadro suga'reni. ³Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c. ⁴Biu'ti Sprit Dxan xten Dios neñ lastoo guiragajreni. Dxejc gusloj caniireni garen-garen didxsaj si'ctisni badeed Sprit Dxan xten Dios guiniireni.

⁵Neñ redxejga, xhidajl rexpejn Israel ni sasanäjpac xtidx Dios bidzujn guedx Jerusalén. Xhidajl lajt biriireni siäädreni. ⁶Che biejn diajgreni guyubej

beduxhga, bidojp reben xhidaalga, bachaag sa'reni. Rdxeloduxh reben xhidalg sa'csi cayejn diajgreni canii reapost xtidxsajpac cade tejreni. ⁷Cadxelojreni räjpreni:

—¡Bahuilaa! ¿La et beñ Galileedi renani canii, ä? ⁸¿Xhoxh riejn diajgnu caniireni xtiidxpacnu si'ctis ni miinu laadxnu, ä? ⁹Najcnu beñ naciön Partia, beñ naciön Media, beñ región Elam, beñ Mesopotamia, beñ Judea, beñ estad Capadocia, beñ región Ponto, näjza beñ Asia. ¹⁰Najczanu beñ distrit Frigia, beñ estad Panfilia, beñ naciön Egipto, näjza bejn ni siääd stelaad Cirene, te estad neñ Africa. Loj rebejn ni siääd Roma yu'reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. ¹¹Yu'za beñ Creta. Yu'za beñ naciön Arabia. Guiragajcnu riejn diajgnu caniireni xtiidxpacnu si'ctis ni miinu laadxnu. Caniireni loonu xcuent recosroduxh ni cayujn Dios.

¹²Bidxeloduxh reben xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

¹³Dxejcti guyu' rebejn ni baxhiznä jreni, räjpreni:

—Agusojz redee.

Gunii Pedr loj rebejn

¹⁴Dxejcti gusulii Pedr näjza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rbä j distrit Judea näjza guedx Jerusalén. Colcuadiajg diidx nani guiniä. ¹⁵Xhet sojzdinu si'cni cayujntu xhigab. Rsilru naj, entis gojl rcagaa. ¹⁶Dxejc scree gunii Joel che guniini xtidx Dios agujc xchero. ¹⁷Räjp Dios:

Sidzujn dxej che guxhalä Xsprit Dxanä cuääzni neñ lastoo guiraa rebejn.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcał, rextadgoldootu suluiloj bacał recos nani guluiä lojreni.

¹⁸ Guxhalä Xsprit Dxañä loj guiraa reni siädñajl narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa näjza lo guedxliuj.

Reseno ni gac najc rejn con guiboo, luxh guxh sire' si'c te za.

²⁰ Sicäy loj gubijdx, sajc bäi si'c rejn.

Sajc guiraa recosre, dxejru sidzujñ dxeduxh che jiälsacä narä, Dios.

²¹ Dxejc guiraa rebejn nani cueedx guiniab gacñä Diosreni, reni'c siliaa lo dojl.

²² Räjpedr lojreni:

—Rexpejn Israel, colcuadiajg xtidxä. Dios baluii Jesucrist, beñ Nazare't, lojtu por recosro, remilagwr, reseen nani bejn ni nez lojtu. Lagajc Dios badeed yälñibee loj Jesucrist te bejn ni redzunroga. La'tu nancheetu dee. ²³ Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladzña rebenguidx te bacuaareni Jesucrist lo cruiz te bagu'trenini. ²⁴ Baspansac Dios Jesucrist, baslaa Diosni ladzña yälgujt, sa'csi di niajedi nica' yälgujtni par tejpas, sa'csi laani rnibee lo yälgujt. ²⁵ Che gubansac Jesucrist, guzobj diidx ni bacuaa David lo guijt xcuent Jesucrist. Räjpedr David lo Dios:

Guira dxej ruhuiä lojlu, Dios.

Suga'lu xladbeä cayacñajlu narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibanä par tejpas.

Sibalazduxhä sa'csi guibanääñ luj,

si'c räjpedr David xcuent Jesucrist.

²⁹ Räjpedr:

—Guyasi guiniä lojtu agujc xchero gujt David. Aguyutzut'zni neñ baa. Sajc guihuiinu baa cadre biga'tz David. ³⁰ Gunii David xtidx Dios. Che nabajñli David bia'n diidx gudeed Dios te xajni ni guirilaj Crist, luxh laani gacni reii si'cni gujc David. ³¹ Sa'csi baluixgaa Dios recosre lo David, ni'c räjpedr David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. ³² Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut.

³³ Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhał Jesucrist Sprit Dxañ lo guedxliuj. Jesucrist cayujñ guira'ti nani cahuiitu, nani cayejñ diajgtu nadxej.

³⁴ Di David nij xhaguibaa, sa'csi lagajc David räjpedr:

Gunii Dios lo Dad nani rnibee loä: “Gurej xladbeä

³⁵ che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

³⁶ Rñiliäpac lojtu —räjpedr—: La'tu bacuaatu Jesús lo cruiz. Ni'cni, colgacbee, guiraatu xpeñ Israel, abejñ Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo cruiz, guc-huinuxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, çhini'c jiennu naj?

³⁸ Dxejcti räjpedr lojreni:

—Colgusiech lajztu, colguirobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc sunidx Dios Sprit Dxañ cuääz neñ lastootu.

³⁹ Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn

nani cueedxni —si'c gunii Pedr lo rexpejn Israel.

⁴⁰ Dxejcru gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti guobnisreni sa'csi huililajzreni xtidx Dios. Lagajc dxejga huililajz si'cti choṇ miḷ bejn. ⁴² Sanuutis ruzoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunāj sa'reni si'c gudaunāj Jesucrist rexpejnpanci, bidojpreni tejsi lajt te gu-niireni lo Dios.

Xho gubajṇ rexpejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr.

⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni.

⁴⁶ Guixe-guixee bidojpreni neṇ guidoro xten Israel. Tejsi najc rexhigabreni. Gudaunāj sa'reni rolijz cadetejreni, guiraareni bibalaznāduhx sa'reni.

⁴⁷ Gulā'preni xpala'n Dios. Guiraa rebejn gunii rexpejn Jesucrist najc beṇsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

Biajc niguii nani racxhuu ni'ni

3 Guyu' te dxej sää Pedr nājza Juan nez loj guidoro si'cti rcachon gudxej.

² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacru'. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr nājza Juan neṇ guidoroga, gunabni te gojn lojreni. ⁴ Dx-

ejcti bahuii Pedr nājza Juan lojni. Rājṇ Pedr lojni:

—¡Bahuii loonu!

⁵ Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶ Rājṇ Pedr lojni:

—Xhetliidi meeldi rapā, nani rapātis sunidxā lojlu. Xcuent xcālrmibee Jesucrist, beṇ Nazare't, rniā lojlu: ¡Gusulii! ¡Gusaj! —rājṇni.

⁷ Dxejcti gunaaz Pedr naani, gulāsni. Biligajc ni'ni, gusutijp ni'ni. ⁸ Huisuyālṇi, gusajni. Biunājṇi Pedr nājza Juan neṇ guidoro. Rsiajṇi, rtiāsni, calā'pni xpala'n Dios. ⁹ Bahuii xhidajl bejn lojni neṇ guidoro, rsiajṇi, calā'pzani xpala'n Dios. ¹⁰ Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

Baluii Pedr xtidx Dios neṇ cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr nājza Juan, naztzu'tz niguiiga naareni. Ruxuṇ guiraa rebejn bidzujṇ neṇ cordoorga. Bidxelojreni sa'csi arsiaj niguii ni gucxhuu ni'ni. ¹² Che bahuii Pedr lo rebejn rājṇni lojreni:

—¿Xhicuent rdxeloy guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcālrmibee Jesucrist biajc ni' niguiire. ¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, nājza toxtadgoldoonu Jacob, lagajc Diosga abadeed yālrmibee loj Xi'nni Jesús. Niluxh la'tu bateedtuni ladzṇaa reguxhtis. Che rlaṇz Pila't ni rnibee nuslaa Jesucrist, ditu nicājṇ niriini, alga guniyajtuni nez loj Pila't. ¹⁴ Niluxh la'tu baro'ntu Xi'n Dxaṇ xten Dios nani rujṇ ganax dzunsa'c. Alga gun-abtu birii te niguii nani bagu't bejn.

¹⁵ Jesucrist rudeed yäl'nabajñ, luxh la'tu gunabtu bacuaareni Jesucrist lo cruzj. Gulässac Dios Jesucrist lo rebengut. Bahuiloonu nabajñ Jesucrist, najcnu testiigw gubansac Jesucrist lo rebengut.

¹⁶ Cahuiitu loj niguiire nani gucxhuu ni'ni, luxh rumbheetuni. Xcäl'rnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c bi-ajcni te najcni si'cni rhuiituni naj.

¹⁷ 'Rexpejñ Israel, narä nanä di'tu ni-acbee, diza rexcuxhtistu niacbee laa Xindxan xten Dios ni bacuaatu lo cruzj.

¹⁸ Scree gujc te guzobj xtidx Dios ni cuaj lo guijt agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni colsiechljajztu, colguibi' loj Dios te guibicaj xtojltu. Dxejc susiälyuj Dios lastootu, sujnni gac nacoob guira'ti, si'cni bia'n diidx gacni. ²⁰ Lojtu suxhałza Dios Jesucrist nani rnibee, nani aguleni galooli. ²¹ Naj nungäjł jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. ²² Scree gunii toMoisés lo retoxtadgoldoonu, räjpni: "Xtadnu Dios suxhał te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. ²³ Renani di gusoob rextiidxni, sinitlojreni, direni gac rexpejñ Dios."

²⁴ Räjpa Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siädnajłni, xcuent recos ni cayajc neñ redxejre. ²⁵ La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: "Jiädjiajł te xajglu ni gupalazduxh reben guedxliuj, sa'csi suslaanireni lo dojl." ²⁶ Dxejcti ganiddoo lojtu baxhał Dios Jesucrist

te guibaa lajztu che gusiejch lajztu, te na'cru guntu dojl —räjp Pedr.

Baluii Pedr näj Juan xtidx Dios loj reguxhtis

4 Lał ni caniireni lo rebejñ, ro'c bidzujñ rebixhojz xten Israel näjza nani rnibee lo resoldaad xten guidoro näjza resaduceos. ² Bidxe'chduxhrene sa'csi cagulijdxreni rebejñ, cayäjpreni:

—Sibansac rebejñ lo rebengut sa'csi gubansac Jesucrist lo rebengut.

³ Gunaaz reguxhtisreni, biäureni sa'csi agudxej luxh abiäu jusgaad. Neñ latzguuib barareni yääl. ⁴ Xhidajł reni biejn diajg xtiidxreni huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebengool, renani rnibee guedx Jerusalén, näjza rebejñ ni ruluii leii, ⁶ näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee. ⁷ Gunibeereni biääd Pedr näjza Juan gusuj galäiireni te gunabdiidxreni lojreni:

—¿Chu xcäl'rnibee rajptu? ¿Chu laj basä'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dxan xten Dios neñ lastooni, räjpni lojreni:

—Caniä lo guejbtu, reguxhtis näjza rebengool xten rexpejñ Israel, ⁹ palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basiajcnu niguiiga, ¹⁰ gusule'nu xcuent dee te gacbeetu te gacbeeza guiraa rexpejñ Israel. Xtidx Jesucrist najc yäl'rnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios guläsni lo rebengut. ¹¹ Di'tu ninälajz xtidx Jesucrist. Laani najc si'c te guij nani rbäcäjtu che runcheetu te yu'. Per Dios abejn najc Jesucrist si'c guij nani

maazru nacsac, nani guyu' squiin xte yu'.
 12 Xtebtis Jesucrist ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c rajp Pedr.

13 Che biejn diajgreni xtidx Pedr, bidx-elojreni sa'csi di Pedr najza Juan guidx-ejb, dizareni guituj. Dxejcti rajp rebixhojz ni sajcru lo sa'reni:

—Direni ganduxh guijt, bejntisreni.

Dxejcti gucbeereni gusanaj redee Jesucrist, lojni bisiedreni. 14 Bahuiiza rebixhojz lo niguii ni abiajc ni'ni, suganajni guiro'preni. Ro'cti xhetru gujcdi gunii rebixhojz sa'csi laaca bejnreni. 15 Dxejcti gunibee rebixhojz birii guidxojnreni telaad te bij rebixhojz diidx ensilaareni.

16 Rajpreni lo sa'reni:

—¿Xhi jiennäanu reniguiire? Guiraa reben Jerusalem anajn xcuent dzunroduxhre ni cayujnreni. Digacdi gucuat-zlaaznuni. 17 Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

18 Huixisac rebixhojzreni. Dxejcti rajpreni lojreni:

—Na'c guluirutu xtidx Jesucrist, na'cru guiniitu xtiidxni.

19 Dxejc gunii Pedr najza Juan, rajpreni lojreni:

—¿Colguinii loonu chu xtiidx sajcru guicuaadiaagnu? ¿Xtiidx la'tu, o xtiidx Dios? 20 Digacdi gusaunu ro'nu. Nan-abpac gusule'nu diidx xcuent recos nani abahuiinu najza rediidx ni abiejn diajgnu.

21 Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr najza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. 22 Sa'csi niguii ni basiajcreni xcuent yälmilagwr agudejdni tiuu ijj.

Guredx-gunab rexpejn Jesucrist lo Dios

23 Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz najza rebengool lojreni. 24 Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rajpreni:

—Xtadnu Dios, nani benchee xhaguibaa najza guedxliuj najza nisdoo najza guira'ti ni yu' lojreni, nenreni, 25 nani bejn basoob toDavid xtidx Sprit Dxaan te bacuaani xtiidxlu, rajpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

26 Bidxagsa' rerei lo guedxliuj najza reguxhtis xten reguejdx te gudxojnreni xtzun Dios najza xten Dad Crist nani baxhal Dios, si'c gunii toDavid.

27 'Aguzojb diidxre, sa'csi lo guejdxre bidxagsa' Herodes najza Poncio Pila't najza rexpejn Israel najza rebenzijt nani di gac xpejn Israel. Bidxechnajreni Xi'nlunani najc Crist ni baxhallu. 28 Naj abejnreni dzunguijdx si'cni galooli guniilu gac. 29 Naj Guejblu Xtiosnu, bahuui xho cagusacsfreni nuure, gucnaj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. 30 Baniidx xcälnibeelu loonu te guisajcnu rebejn, te jienzanu redzunro, remilajgwr con xcälnibee Xi'ndxaanlu Jesucrist.

31 Che gulujx gurejdxreni lo Dios, guloj canibsejz yu' cadro tre'reni, cayac si'c te xu. Dxejcti biääd Sprit Dxaan xten Dios basutijpruni lastooreni. Dxejc dirureni nidxejb guniireni xtidx Dios.

Rudeedreni xhixtenreni lo sa'reni

32 Guiraa renani huililajz xtidx Dios, tejsi xhigab bejnreni. Rut chu tejd-

reni bejn guinibexteb xhixtenni: bachaa-greni sa' rehxixtenreni te xca' guiraareni nani rquineni. ³³ Gucnäj Dios reapost, gusutzut'reni bijreni diidx bahuilojreni loj Jesucrist che gubansacni lo rebengut. Gucnäj Dios guiraa rexepejn Jesucrist, luxh gopduxh reben guejdx respe'treni. ³⁴ Ni'cla tejreni di niäädx xhixtenni sa'csi renani gojp xyujni, rolizni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil' levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

Ananías näj chäälni rujn dojl

5 Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dx-ejc sgala' meelga badeedni lo reapost si'c guiraa xcuent yujga luxh chäälni nanchee xhi cayujni. ³ Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo rebendxab, ä? ¿Xhicuent rlajzlu gusgueelu Sprit Dxan xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab nen lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, białbni lo yuj, gujtni. Bidxebduxh rebejn che biejn diajgreni xhi gusajcni. ⁶ Sas gubig gaii bi'n batejbreni Ananías nen lajd. Dxejcti sanärenini huicua'tzrenini nen baa.

⁷ Pet agujc choñ or gujtni chela bidzujñ chääl Ananías. Dini gan agujt chäälni. ⁸ Räjp Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjp Safira lojni:

—O'n, si'c huijni.

⁹ Dxejcti räjp Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlajztu gusgueetu Sprit Dxan xten Dios? Ro lä' siääd renani huicua'tz chäällu. Naj näjza luj chacua'tzreni nen baa.

¹⁰ Si'tcis białb Safira, gutgajczani. Dxejcti bidzujñ reb'i'n, bahuiireni agujtni. Dxejcti guläsrenini, biriireni huicua'tzga-jcneni cuä' baa cadro biga'tz chäälni.

¹¹ Bidxebduxh guiraa rexepejn Jesucrist, näjza guiraa rebejn nani biejn diajgni recosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebenguejdx. Nadxaag sa' rexepejn Jesucrist, caguchaagreni diidx nen cordoor ni laa Salomón. ¹³ Guyu' xhidajl bejn ni di nuchaag lo rexepejn Jesucrist sa'csi bidxebreni guchaagreni lojreni. Rebenguejdxga guläpduxhreni xpala'n rexepejn Jesucrist. ¹⁴ Nen redxejga xhidalduxh rebejn huililajz xtidx Jesucrist, niguii sigajc gunaa. ¹⁵ Dxejcti gulääreni lo nezuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpala' Pedr yejcreni che ted Pedr ro'c, te si'c jiajcreni. ¹⁶ Guedx Jerusalén bidzujñ xhidajl rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' bendxab nen lastooreni. Con xcälrnibee Jesucrist basiajc reapost reben racxhuu, guläazareni rebendxab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi caläp rebenguejdx xpala'n reapost

sa'csi basiajcreni reben racxhuu.¹⁸ Gunaazreni reapost. Basäurenini nen latzguiib.¹⁹ Niluxh yäälga, biääd te angl xten Dios, baxhalni ro' latzguiibga. Dxejcti gulääni reapost nen latzguiib. Räjpn lojreni:

²⁰—Colchäj guidoro. Ro'c colguinii lo rebejn xho gac guibannäjreni Dios par tejpas.

²¹Che biejn diajgreni si'c, rsildooru biu'reni nen guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jäädnä reguixhajg reapost nani biäu nen ladtguiib.²² Che bidzujn reguixhajg latzguiib, bahui reguixhajg nen latzguiibga, niluxh rut yu'di nen latzguiib. Che gubi'reni biädnäreni diidx, räjpreni loj reguxhtis:

²³—Che bidzunu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di nen latzguiib.

²⁴Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjpn lo sa'reni:

—¿Xhini'c gujc? ¿Xhoni gac naj? —räjpreni.

²⁵Dxejcti bidzujn te niguii, räjpn lojreni:

—Reniguii ni basäutu nen latzguiib, areni suga' nen guidoro, luxh caguluiireni rebejn —räjpn.

²⁶Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaareni guij yejcreni.

²⁷Che bidzunnäjreni reapost, räjpreni suuren ne z loj reguxhtis xten Israel, sas gunii bixhojz ni rnibee,²⁸ räjpn loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rlanjtu cuaquijtu nuure bagu'tnu Jesucrist.

²⁹Dxejc räjpn Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn.³⁰ Bagu'ttu Jesucrist che bacuaatuni lo crujz. Niluxh Xtios xtadgoldoonu guläsni lo rebengut.³¹ Naj agule'c Diosni xladbeeni cadro rnibeeni, abadeedza Dios yäörnibee loj Jesucrist te guslaani nuure, te si'c rlanjni guibicaj xtoj l guiraa rexpejn Israel nani gusiechlajzreni.³² Bahuiloonu xhi bejn Dios. Ni'c cagusule'nu. Nadoncheenu Sprit D xan xten Dios cayacnä j nuure te gusule'nu rediidxre. Badeed Dios Sprit D xan xtenni lo guiraa renani susoob xtiidxni.

³³Che biejn diajg reguxhtis rediidxga, bidxechduxhrenei, rlanjzreni nugu'treni reapost.

³⁴Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respet dade'ga. Gunibee Gamaliel guirii reapost nen yu'ga.

³⁵Dxejcti räjpn Gamaliel lo rebixhojz:

—Guejbtu rexpejn Israel, colyensa'c xhigab xhini'c rlanjtu gunnäjtu reniguiire.³⁶ Colzaa lajztu gajd gac xchej guyu' tej ni laa Teudas, räjpn ni rnibeduxhni. Dxejc huinajl tajp gayuu bejn. Che bagu'treni, bire'ch guiraa rexpejn, xhetru bejndireni.³⁷ Nen i jz ni guyu' cens, biriiza Judas ni siääd Galilee. Dxejc gurejdxni xhidajl bejn ni huinajlni. Bagu'tza bejn, dxejcti bire'chza guiraa reni huinajlni.³⁸ Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojni.³⁹ Palga xtzuum Dios ni cayujnreni, digacdi guscuääznu dzuunre:

unga, sa'csi guidilnu guidxe'ch Gueb Dios loonu.

⁴⁰Bichagljaz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. ⁴²Guixe-guixee lałtis baluiireni xtidx Jesucrist neñ guidoro nájza roliz bejn. Cagusule'reni diidx lo rexpen Israel:

—Jesús najc Crist nani cabäätzu jiaäd.

Gulereni reniguii ni gudeed yätxtiil lo rexpejn Jesucrist

6 Neñ redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

²Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. ³Ni'c nanab cuetu lo resa'tu gajtz niguii nani najntu najc bensa'c, nani rbäjz Sprit Dxan xten Dios neñ lastooreni, nani yu' xcäriejnreni. Reniguiire quis xhi gaureni. ⁴Te si'c sajc chanuutis guiniabnu lo Dios, guiluizanu xtidx Dios lo rebejn.

⁵Guiralii rebejnnga bidxagljazreni diidxga. Dxejcti gulereni Esteban, te niguii ni rililajzpac xtidx Dios, rbäjzza Sprit Dxan xten Dios neñ lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. ⁶Sas biädnä

rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni naareni yejc reniguiiga si'c te seen abiu'reni lo xtzuunreni.

⁷Birechduxh xtidx Dios. Xhidajl beñ Jerusalén huililajz xtidx Dios, nájza xhidajl bixhojz.

Gunaazreni Esteban sanärenini lo rebixhojz nani rnibee

⁸Gucnäduxh Dios Esteban, bejnii redzunro, remilagwr nez lo rebejn. ⁹Dxejc reben guidoo ni laa Libertados gusloj cadilnäj Esteban. Lojreni nadxaag beñ Cirene, nájza beñ Alejandría, nájza gaii beñ Cilicia, nájza sgaii bejn ni siääd reguedx Asia. ¹⁰Reniguiire di niajcdi nuzejcreni diidx lo Esteban, sa'csi nasinduxhni, luxh cayacnäj Sprit Dxan xten Diosni. ¹¹Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés nájza Dios.

¹²Scree gujc bache'chreni rebejn nájza rebejn ni ruluii leii nájza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. ¹³Dxejcti biädnäreni reniguii nani baquilreni te guniireni didx-xhii. Räjpreni reniguiire:

—Entis rniyaj Esteban leii xten toMoisés nájza guidodxanre. ¹⁴Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

¹⁵Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

Diidx ni basule' Esteban lo rebixhojz

7 Dxejcti räjpreni beñ bixhojz nani rnibee lo Esteban:

—¿La gulii si'c guniilu, ä?

²Räjpreni Esteban lojreni:

—Colgucuadajg rextidä, guebju dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz nen guedx Harán. ³Räjp Dios loj toAbram: “Birii lajdxtu, basa'n guiraa resa'lu. Huij cadrotis guluää lojlu” ⁴—räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtdni, biädnä Dios toAbram nez ree, cadro rbääznu naj. ⁵Di Dios nuzalajz nicla tla' yuj cadro suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.” ⁷Räjp Dios: “Narä sunä castiigw rebejn ni gusacsíreni che najceni mos. Narä cuää rexagdoolu ro'c, te ree guzuxhijbreni loä nen guejdxre”, si'c räjp Dios ⁸—räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacoob. Sigajcza bennäj Jacoob guitzubitio'p rexi'nni nani najc rexpengoldoo xpen Israel.

⁹Räjp Esteban:

—Guitzubiteb rexi'n Jacoob guyu' te yälru dxojn lo bejtzreni José. Dxejc bato'reni José lo te bejn Egipto. Dxejc Dios goptzu'tz José. ¹⁰Che gudejd José trabajwduxh, gucnäj Diosni. Badeed Dios yälnasinduxh lojni. Bejn Dios bichaglajz rei Faraón José. Badeed rei Faraón gujcn gubernadoor xten Egipto. Gunibeeza José guira'ti xhixten reiiga.

¹¹Räjpza Esteban:

—Che bidzujn dxej gujc te gubijn, guiraa nen reguedx Egipto näjza guiraa nen reguedx Canaán, trabajwduxh cadejd guiraa rebejn. Xhet guyu'di xhi najw retoxtdgoldoonu. ¹²Che biejn diajg xtdadgoldoonu Jacoob yu' xhi gaureni nen reguejdx xten Egipto, ro'c baxhalni rexi'nni, bica'reni xhi gaureni te huält. ¹³Che huijreni stehuält, dxejc bazäbdiidx José lojreni laani najc bejtzreni. Biembeza Faraón resa' José. ¹⁴Dxejcti baxhal José diidx jiäd xtdni Jacoob, näjza guiraa resa'ni, cuääzreni Egipto. Najc rebejnga si'cti gayonbitzubigaii bejn. ¹⁵Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtza retoxtdgoldoonu. ¹⁶Dxejcti huiinäreni rextzujtreni loj Siquem te biga'tzsacreni nen baa nani gusii toxtadgolnu Abram lo rexi'n Hamor nen guedx Siquem.

¹⁷Räjp Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu nen guedx Egipto. ¹⁸Dxejcti guyu' te xreii Egipto ni di gan guiraa redzunsac nani bejn toxtadgoldoonu José. ¹⁹Reiiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee reiiga basälreni guiraa rebaz niguii te di laareni, te guetreni. ²⁰Nen redxega, gojl Moisés. Che gujc Moisés báz, te báz daani, saru rujn lojni, huinälaiz Diosni. Gułaani chon bäii rolizni. ²¹Dxejc huisälrenini, te guzobj xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nni. ²²Bisieed Moisés guiraa ni najn rebejn Egipto. Gunisa'cni diidx, bensa'cni dzuun.

²³Räjp Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni. ²⁴Dxejc bahuiini casacsí te bejn Egipto te bejn sa'ni. Sas bagu'tni bejn

Egipto. ²⁵ Bejn Moisés xhigab pet sachee resa'ni cayacnäj Diosni te guslaani rexpejn̄ni. Luxh di resa'ni niacbee si'c. ²⁶ Che bara yääl, bahuii Moisés cadilnäj sa'reni tiop xpen̄ Israel. Räj̄p Moisés lojreni: “Colcuedxi, Dad. Lagajc sa'tu cadilnäjtu. ¿Xhicient rdijltu?” si'c gunii Moisés, te na'cru tilnäj sa'reni. ²⁷ Dxejcti nani cayunniälajzga, balanaani Moisés, räj̄pni loj Moisés: “¿Chu baniidx yäl̄rnibee lojlu te jiädnibeelu nuure?” ²⁸ ¿La rlaizlu ju'tlu narä si'c bagu'tlu ben̄ Egipto naii?” —räj̄pni—. ²⁹ Che biejn diajg Moisés rediidxga, baxun̄ni, huijni zijt. Huiläzsjicni guedx Madián. Ro'c bachnaani, guyu' tiop xingaanni.

³⁰ Räj̄pza Esteban:

—Che gudejd tiuu ijz, bidzuj̄n te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl nen̄ te yaguejch. Nen̄ bajlga baluiloj angl xten Dios lo Moisés. ³¹ Bidxeloduxh Moisés che bahuiini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räj̄pni lo Moisés: ³² “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacob.” Dxejcti gucsez Moisés sa'csi bidxebduxhni, diruni nuhuisa'c yajgga. ³³ Dxejcti räj̄p Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree. ³⁴ Abahuiä xho cagusacsí reben̄ Egipto rexpenä. Abiejn diagä xho roonreni. Naj abiälä te guslaá rexpenä. Gudaa naj, suxhalälu chäälü Egipto.”

³⁵ Räj̄p Esteban:

—Dios badeed yäl̄rnibee lo Moisés nani baze' rextadgoldoonu che räj̄preni: “¿Chu baniidx yäl̄rnibee lojlu te jiädnibeelu nuure?” Baxhal̄ Dios Moisés te guinibeeni xpejn̄ Dios, gucnäjza Dios Moisés baslääni rexpejn̄ni nen̄ nacióñ Egipto si'c gunii angl xten Dios che baluilojni lo Moisés nen̄ yaguejchga. ³⁶ Gulää

Moisés rebejn̄ga. Ganiddoo bejn Moisés redzunro, yäl̄rdxeloj nen̄ nacióñ Egipto näjza ro' nisdoo ni laa nido xniaa. Tiuu ijz cuansaj rextadgoldoonu nen̄ yubijdzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che räj̄pni loj rexpejn̄ Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” ³⁸ Lagajc Moisés guyunäj rebejn̄ nen̄ yubidzro. Xangl Dios guninäj Moisés nen̄ dajn xten Sinaí. Dxejcti badeed Moisés rediidx ni gunibee Dios lo rextadgoldoonu. Laareni basa'nreni diidxga loonu.

³⁹ Räj̄p Esteban:

—Niluxh di rextadgoldoonu nusoob rextidx Moisés. Di rlaizreni guinibee Moisésreni. Canaduxhlajzreni nacióñ Egipto. ⁴⁰ Che säa Moisés dajn Sinaí, räj̄preni loj Aarón bejtz Moisés: “Benchee banäj̄b gac xtiooznu, te nidreni loonu, te chanajlnuren̄i. Chu gan con Moisésre ni baluii nezyuj che gulääni nuure guejdx reEgipto.” ⁴¹ Sas bencheereni te banäj̄b ni najc si'c te gonbäz. Dxejcti bagu'treni guidxaa te badeedreni rejnga lo banäj̄b te bazuxhijbreni lojni. Bibalazduxhreni sa'csi abencheereni banäj̄bga. ⁴² Dxejcti gubicaj Dios loj rexpejn̄ Israel sa'csi bejnreni si'c. Basaan Dios goj̄preni gubijdx, näjza bäi, näjza rebal xhaguibaa. Guj̄cni si'cni caj lo guijt̄z ni bejn reniguii nani bacuaa rextidx Dios. Räj̄p Dios:

La'tu ben̄ Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniidxtu xtiejnreni, ä?

⁴³ Xho gacni si'c, räj̄p Dios.

Cuansanäjtu te yu' najcw guij̄d cadro chu te banäj̄b.

Nenga guyu' banäj̄b ni laa Moloc, nani najtu najc xtiostu.

Gojnzatu balbäze' xten xtiostu ni laa Remfán.

Redios ni bencheetistu reni'c gojntu.

Ni'cni sibää' la'tu ree guxhalä la'tu stelaad guedx Babilonia.

⁴⁴ Guniiru Esteban, räjpni lojreni:

—Neñ reyubijdz gojp retoxtadgoldoonu te yu' najcwni guijd. Gujčni xquidooreni. Ro'c guninäjreni Dios. Benchee retoxtadgoldoonu yu' najcw guijdga si'cni gunibee Dios che baluiini lo Moisés xhoni gacni. ⁴⁵ Che gujt Moisés, Josué gunibee lacuaa toMoisés, huináni retoxtadgoldoonu nación Canaán. Batzujlreni yuro ni najcw guijd te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhijbreni lo Dios neñ yuguijd ni najc xquidooreni che gojlli xtiemp reii David. ⁴⁶ Huinäälajz Dios David. Räjp David lo Dios: “Rläzä gunä te guidoo par guejblu, Dios xten nuure, rexpejn Israel.” ⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸ Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Räjp Dios:

⁴⁹ Si'c najc te yagxhilsa'c cadre rnibee reii, si'c najc xhaguibaa cadre rbeä.

Si'c te bancw cadre rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadre gusilazä, räjp Dios.

⁵⁰ ¿La et naädi benchee guiraa nani ruhuiitu?, räjp Dios.

⁵¹ Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuum Sprit Dxan xten Dios, dizani cuääz neñ lastootu. Si'c bejn retoxtadgoldootu, si'cza rujntu. ⁵² Basacsí retoxtadgoldootu guiralii reniguii nani gunii xtidx Dios. Nicla

tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinä-tuni lo guxhtis te gunibeetu gujtni. ⁵³ La'tu biannäjtu leii nani gunii reangl xten Dios loj Moisés, luxh la'tu ditu nu-cuadiajg rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban. ⁵⁵ Rbäjz Sprit Dxan xten Dios neñ lastoo Esteban, ni'cni bahuitzu'tzni xhaguibaa, ro'c bahuini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjp Esteban lojreni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxunreni bixa'treni yejc Esteban. ⁵⁸ Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejčni, guläyalreni xhajibreni; te niguii ni laa Saulo biannäj xhajibreni. ⁵⁹ Lañ ni cagucuaareni guij yejčni, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti białb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquijlurenii.

Gulujxsi guniini si'c, gujtni.

Saulo basacsí rexpejn Jesucrist

8 Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa

reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhrenei sa'csi riareni gujt Esteban. ³ Biäädza Saulo, guixeguixee basacsíni rebejn nani huililajz xtidx Dios. Biu'ni rolizrenei, gunaazni reniguii näjza regunaa te basäunireni nen latzguuib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejnğa laa Felipe. Sini nez te guedx Samaria. Ro'c basule'ni xtidx Dios. Räjzni:

—Jesús najc Crist nani cabäjztu jääd.

⁶ Ro'c bachagsa' rebejn bacuadijgrenei rextidx Felipe, bahuiizareni redzunro, remilagwr nani bejn Felipe. ⁷ Gaii bejn yu' bendxab nen lastooreni. Che gunibee Felipe guirii rebendxab lastoo rebejnğa, guredxa' rebendxabğa, dxejcti biriireni nen lastoo rebejnğa. Yu'za xhidajl bejn nani digacdiru guiniib, yu'za reni rajc ni'reni, naareni. Con xcälrnibee Jesucrist basiajc Felipe guiraa rebejnğa. ⁸ Sa'csi gujc si'c, bibalazduxh guiraa rebejn nen guejdxğa.

⁹ Guyu' te niguii ni laa Simón nen guejdxğa. Biseedni bejnni xhidajl redzuun yälbidxaa, basgueeni rebenguejdxğa. Bidxeloduxh rebenguejdx lojni. Räjzni lo rebejn rutru chu stee bejn ni najc maazru benro lojni. ¹⁰ Luxh guiraa rebejn, rebiuux, rebengool, rebenrajp, rebenproob bacuadijgrenei xtidx bidxaaga, räjprenei:

—Laani rajpni yälrnibee xten Dios.

¹¹ Xchero basgueeni rebejn, bidxelojrenei rextzunyälbidxaani. Guiraa rebejn huililajz xtiidxni. ¹² Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebenguejdxğa huililajz rediidx nani gunii Felipe. Dxejcti biro-

nisrenei, niguii näjza gunaa. ¹³ Nägajcza Simón huililajz rediidxğa dxejc gurob-niszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

¹⁴ Che biejn diajg reapost ni yu' guedx Jerusalén huililajz rebejn Samaria xtidx Dios, baxhalrenei Pedr näjza Juan ro'c. ¹⁵ Che bidzujn guiro'preni guejdxğa, gunabrenei lo Dios xcuent rebejn ni huililajzğa te gudeed Dios Sprit Dxan xtenni lojrenei, ¹⁶ sa'csi gajd Sprit Dxan xten Dios jäädläjz nen lastooreni. Che huililajzrenei, guobnistrereini te gucbee rebejn chuni'c najc rexpejn Jesucrist. ¹⁷ Dxejc batzuub Pedr näjza Juan naareni yejc tejga renani ahuililajz xtidx Dios, dxejc badeed Dios Sprit Dxan xtenni biädläjzni nen lastooreni.

¹⁸ Che bahuii Simón biädläjz Sprit Dxan xten Dios lastoo rebejn ni batzuub reapost naani yejcreni, rlajz Simón nudeedni meel loj reapost, ¹⁹ räjzni lojrenei:

—Colguniidx yälrnibee löä te si'cza gudzubä naä yejc rebejn, te jiu' Sprit Dxan xten Dios nen lastooreni.

²⁰ Dxejcti räjpedr lojni:

—;Sunitloj xmeellu con luj! Xho gunlu xhigab siilu Sprit Dxan xten Dios nani rudedxlia' Dios. ²¹ Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl nen lastoolu. ²² Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäjł lajz Dios xtojllu ni bejnlu nen lastoolu. ²³ Naj narä nanä ruguilazduxhlu, luxh runduxhlu xhigabguijdx.

²⁴ Dxejcti räjpedr Simón lo guiro'preni:

—Colnab loj Dios xcuentä te na'c sacä si'cni caniitu.

²⁵ Che gulujxti bijrenei diidx xcuent ni bahuilojrenei bejn Jesucrist, che gu-

lujx basule'reni xtidx Jesucrist loj reben Samaria, gubisacreni Jerusalén.

**Felipe näjza te dade' ni
siääd nación Etiopía**

²⁶ Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyulga rdejd lo reyubijdz.

²⁷ Sä'ti Felipe. Che bidzujñni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajñni Dios. ²⁸ Siädbisacni lajdxni. Sobga'ni neñ te gare't saruduxh, cayolni xtidx Isafas, nani bacuaa xtidx Dios agujc xchero. ²⁹ Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isafas. Dxejcti räjp Felipe lojni:

—¿La racheelu ni caj lo guijtzt nani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni neñ gare'tga.

³² Cadro cayol dade'ga neñ guijtzt ni caj xtidx Dios rnii scree:

Di xiil cuedxa' che rinä bejnñi cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujn yäl_guxhtisni xhet lali-idi bejnreni.

Xhet si'cti nunyäj_l gunreni.

¿Xho guiniinu yu' xpejnñi?

Ni abagu'trenini. Diruni guibajñ lo guedxliuj.

³⁴ Dxejcti gunabdiidx beñ Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni la-gajc laani o la ruzä'tni ste'ca bejn, ä?

³⁵ Gusloj basule' Felipe rediidx nani abıl dade'ga. Dxejcti basule'ni rediidx xcuent Jesucrist. ³⁶ La_l ni sääreni lo nezyuj, bidzujñreni te lajt cadro yu' nis. Dxejcti räjp dade'ga lo Felipe:

—¡Bahuii, ree yu' nis! ¿Xhi rudxojn tiobnisä?

³⁷ Dxejcti räjp Felipe lojni:

—Palga rililajzlu xtidx Dios neñ las-toolu, sajcti tiobnislu.

Dxejcti räjp dade'ga lo Felipe:

—Rililazä Jesús najc Crist Xi'n Dios.

³⁸ Dxejcti gunibee dade'ga gusudxi gare't, sas biäjcti guiro'preni, biu'reni neñ nis, ro'c batiobnis Felipe dade'ga. ³⁹ Che biriireni neñ nis, huinä Sprit Dxan xten Dios Felipe ste'ca lajt. Dxejcti diru dade'ga nuhuii lo Felipe. Sä'ti dade'ga lajdxni, cabalazduxhni. ⁴⁰ Dxejcti chela gucbee Felipe abidzujñni guedx Azoto. Baluiizani xtidx Dios neñ guiraa reguejdx che bidzujñlini guedx Cesarea.

Huililajz Saulo rextidx Jesucrist

(Hch. 22:6-16; 26:12-18)

9 La_ltis cagusacsí Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee, ² gun-abni gac te guijtzt chanäni lo reguidoo neñ guedx Damasco te palga guidxälñi reni najc xpejn Jesucrist neñ reguidooga, niguii sigac gunaa, guliibnireni, jääd-nänireni guedx Jerusalén te jäüreni. ³ La_l sasajni lo nezyuj, asiäddzungajxhni guedx Damasco, basaniya' te bal xh-aguibaa, basanijni guideb gabi cadro siädsaj Saulo. ⁴ Dxejcti białjñni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpena?

⁵ Räjþ Saulo lojni:

—¿Chuluj Dad?

Räjþni lo Saulo:

—Narä nacä Jesucrist, nani cagusacsí-
duxhlu. Niluxh lagajc luj cadejdlu tra-
bajw si'c rajc te gon ni rucuaní' yejc
caru'ch.

⁶ Bidxebduxh Saulo, racsejsni räjþni:

—Dad, ¿xhini'c rlanjzlu gunä?

Dxejc räjþ Jesús loj Saulo:

—Huistie, biu' guedx Damasco. Ro'c
suluii te niguii xhini'c gunlu.

⁷ Rebejn ni siädnä Saulo sugadxireni,
bidxebbreni sa'csi biejn diajgreni te xse'
bejn, luxh rut lojdi bahuiireni. ⁸ Che
huistie Saulo lo yuj, baxhalni lojni,
niluxh di lojni jien. Dxejc gunaazreni
naani, sanärenini guedx Damasco. ⁹ Ro'c
guyu'ni chon dxej, natiä'p balojni, dini
niä', dizani niajw.

¹⁰ Guedx Damasco rbäjz te xpejn Jesu-
crist ni laa Ananías. Baluiloj Jesucrist loj
Ananías lo te bacal, räjþ Jesucrist lojni:

—Ananías.

Dxejc räjþ Ananías lojni:

—Anaree Dad.

¹¹ Räjþ Jesucrist lojni:

—Huistie te chäálu lo nezyuj ni laa
Ladbee cad rbäjz Judas. Ro'c guiniab-
diidxlu con te niguii ni laa Saulo, bejn
Tarso. Cabejdx, canabni loä naj. ¹² Lo
bacal abahuiini siäd te niguii ni laa
Ananías te gutzuubni naani yejcní te fi-
ni stehuält.

¹³ Dxejcti räjþ Ananías lojni:

—Dad, abiejn diagä xho basacsí nigu-
iiga rexpejnlu nen guedx Jerusalén.
¹⁴ Luxh rebixhojz ni rnibee abadeed gui-
jtz lojni te guiniaazni ree guiraa re-
bejn nani rbedx-rniab lojlu, chanänireni
jiäureni.

¹⁵ Dxejcti räjþ Jesucrist lojni:

—Huij, narä aguleäni te gunni xtzunä.
Suluini xtidxä loj rebenzijt nani digac

xpejn Israel, näjza loj reni rnibee rena-
cion, näjza loj rexpejn Israel. ¹⁶ Narä su-
luiä lo Saulo trabajwduxh ni tedni te
jiädnajni narä.

¹⁷ Dxejcti säa Ananías, bidzujþni ro
yu' cadro rbázlaa Saulo. Batzuubni naani
yejc Saulo. Dxejcti räjþ Ananías loj
Saulo:

—Betzá Saulo, Jesucrist ni rnibee,
nani baluiloj lojlu lo nezyuj cheni
siädldu, lagajc laani baxhalni narä te fi-
ilu stehuält, te jiädläjzza Sprit Dxañ xten
Dios nen lastoolu.

¹⁸ Lagajc dxejc bitejb si'c xmelbäjł yec
baloj Saulo, biacgajc balojni, bahuisa'cni
stehuält. Dxejc huistieni, gurobnisga-
jcní. ¹⁹ Dxejc gudajwni, guc nadaanni
stehuält. Xchej guyunäj Saulo rexpejn
Jesucrist nen guedx Damasco.

Gusloj basule' Saulo xtidx

Dios nen guedx Damasco

²⁰ Dxejcti gusloj basule' Saulo xtidx
Dios nen reguidoo xten rexpejn Israel,
räjþni:

—Jesucrist najc Xi'n Dios nani gujc
Niguii.

²¹ Che biejn diajgreni xtiidxni, bidx-
eløjreni, räjþ lo sa'reni:

—¿La xhet laadi niguiire ni rusäu
rexpejn Jesucrist nen latzguiib guedx
Jerusalén, ä? Lagajcza dee bidzujþ ree te
guliibni rexpejn Jesucrist te chanänireni
guedx Jerusalén lo rebixhojz.

²² Dxejcti gusutzu'tz Saulo guniini
xtidx Dios. Basacajþni rexpejn Israel
nani rbäjz Damasco sa'csi basule'pacni
Jesús najc Crist nani rnibee.

Baxun Saulo guedx Damasco

²³ Che gudejd xhidajł dxej, bachagsa'
rexpejn Israel te nugu'treni Saulo. ²⁴ Dx-
ejcti gucbee Saulo xhi xhigab bejnreni.
Dxej, yääl cabäjzreni Saulo ro' guiraa
renezyuj ni rdzujþ guejdxga te ju'trenini.
²⁵ Dxejcti che gojł te yääl basäl rex-

pejn Jesucrist Saulo nen te dximro, basiajtreni dxijmga nez ro' te padeer ni dejd gabi guejdxga. Basiajtrenini nez dejt padeerga, te si'c baxunni guejdxga.

Bidzujn Saulo guedx Jerusalén

²⁶ Che bidzujn Saulo guedx Jerusalén, rlažni nuchaagni loj reni rililajz xtidx Jesucrist, niluxh guiraareni bidxebrenini sa'csi direni gan ahuililajzni xtidx Dios. ²⁷ Dxejcti huinā Bernabéni lo reapost, bijni diidx xcuent Saulo. Rājp Bernabé lojreni:

—Baluloj Jesucrist lo Saulo loj nezyuj. Gunināj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnāj Saulo rexpejn Israel nani rnii didx griegw. Laareni rdxecheduxhrenei, rlažrenei nugu'treni Saulo sa'csi direni nichaglažz xtidx Jesucrist. ³⁰ Che gucbee rexpejn Jesucrist si'c, huinārenei Saulo guedx Cesarea, ro'c gulāārenei Saulo, baxhalrenini guedx Tarso.

³¹ Dxejc guredxi lažz guiraa renani huililajz xtidx Dios nen reguedx Judea, nen reguedx Galilee, nāžza nen reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnāžza Sprit Dxaan xten Diosreni.

Biaje Eneas

³² Che gusloj sahuii Pedr guiraa renani huililajz xtidx Dios, huihuižani rexpejn Jesucrist nani yu' guedx Lida. ³³ Ro'c bidxālmi te niguii ni laa Eneas. Agujc xhujn ižz naga' niguiiga cayacxhuuni. Abixu'n tiejxhni, digacdiru guiliini.

³⁴ Dxejcti rājp Pedr lo Eneas:

—Eneas, cagusiajz Jesucrist guejblu. Huistie, gulās xta'lu.

Lagajc dxejc biajčni, huistietini.

³⁵ Guiraa rebejn ni rbāžz guedx Lida, nāžza rebeni ni rbāžz guedx Sarón, bahuiireni abiajz niguii ni cayacxhuu. Dxejc xhidajlrureni nen reguejdxga huililajz xtidx Dios.

Gubañsac Dorcas

³⁶ Nen guedx Jope yu' te gunaa ni laa Tabita; miizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. ³⁷ Gucxhuu gunaaga, dxejc gujtni. Che gulujc bahuajz rebejn togoolga, huitixhrenei nen te yu' ni najc jiaa yejc sa'ni. ³⁸ Sa'csi gajxh guedx Jope tre' guedx Lida, luxh biejn diajz rexpejn Jesucrist ro'c yu' Pedr, baxhalreni tiop dade' saxii Pedr. Rājp redade'ga loj Pedr:

—Bejn huen salu chonnu Jope nanajga.

³⁹ Dxejc sanāgajz Pedr redade'ga. Che bidzujnrenei, huinārenei Pedr nen yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajpni. ⁴⁰ Dxejcti gunibee Pedr birii guirareni nen yu'. Dxejc bazuxhibni, guredxgunabni loj Dios. Dxejc gubiréni bahuiini loj togoolga, rājpni:

—Tabita, huistie.

Dxejcti baxhal gunaaga balojni; che bahuini loj Pedr, gurejni. ⁴¹ Dxejc gunaaz Pedr naani, basuliinini, dxejcti gurejdx Pedr regunabiuud nāžza sgaii reni najc rexpejn Jesucrist. Baluiini gunaaga lojreni te bahuilojreni agubañsacni. ⁴² Gucbegajz reben guedx Jope xhini'c gujc, dxejcti xhidajl rebejnaga huililajz xtidx Jesucrist. ⁴³ Xchejza guyu' Pedr ro'c, gulāžzni

rolijz dade' ni laa Simón, nani ruscoodz guijd.

Pedr con Cornel

10 Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijz, dini gac beṅ Israel. ²Bensacduxh najc Cornel, nájza guiraa resa'ni, sacruduxh rusoobreni xtidx Dios. Rudeedni gojn lo rebeṅ proob xten Israel. Guixe-guixee rbejdx, rniabni lo Dios. ³Te dxej, si'cti rchachon gudxej, si'c lo bacal bahuuini loj xangl Dios, rájpnj loj Cornel:

—¿Conlu Cornel?

⁴Che bahuu Cornel xangl Dios, bidxeljbnj, bidxelojnj, rájpnj lojnj:

—¿Xhini'c, Dad?

Dxejcti rájpnj angl xten Dios lojnj:

—Che rniilu lo Dios, riejn diajg Dios xtiidxlu, che rudeedlu meel lo rebeṅ proob, ruhuii Dios ni rujnlu, ni'cni rnalajz Dios luj. ⁵Naj baxhal tiop niguii cháä guedx Jope te chaxiireni Simón Pedr. ⁶Rbájznj rolizj te dade' ni laa Simón nani ruscoodz guijd. Rolizj Simón sojb gajxh ro' nisdoo. Simón Pedr gusule' xhini'c nanab gunlu.

⁷Che sii angl xten Dios, gule Cornel tiop mos xtenni nájza te xsoldaadni nani sanälajz Dios. ⁸Dxejcnj bij Cornel diidx lojreni xcuent ni gusajcni, dxejcnj baxhalni redade'ga guedx Jope.

⁹Che bara yääl, sääreni lo nezyuj. Asiäddzungajxhrene guedx Jope, pet si'cti läidxejni. Lagajc orga huä'p Pedr yecyu' te guininájni Guejb Dios. ¹⁰Calanduxh Pedr, rlanjni gauni. Laṅ ni cayujnreni xhi gauhuejcnj, gusloj canixcalni. ¹¹Bahuuini bixal xhaguibaa, bahuuizani biäjtnj te bariadro nani naliib guidap xi'ni. Siädjätchäini gajxh nez loj Pedr. ¹²Neṅ bariaadga yu' guiraa reman ni yu' lo guedxliuj nani rsianáj guidap ni'ni, nájza

renani rxeeb si'c bäl, nájza renani rutajtnj.

¹³Gunii Dios lo Pedr, rájpnj lojnj:

—Pedr, huisu te ju'tlu man gaulu.

¹⁴Dxejcnj rájpnj Pedr lojnj:

—Na'c Dad. Nunc gauä sa' remandxudxga, abia'a dina gauä reman nani rni xleilu najc mandxuudx.

¹⁵Gunisac Dios loj Pedr, rájpnj:

—Na'cru guiniilu nacdXuudx reman nani abasia.

¹⁶Che gujcnj chon huält gujcnj si'c, huä'psac bariaadga xhaguibaa. ¹⁷Laṅ ni cayujn Pedr xhigab xhichani'c säloj nani bahuuini, bidzujn reniguii ni baxhal Cornel ro' yu'ga, sa'csi agunabdiidxreni caro rbájznj Simón nani ruscoodz guijd.

¹⁸Che bidzujnreni rolä'ga canabdiidxreni la ro'c rbájznj te dade' ni laa Simón Pedr. ¹⁹Laṅ ni cayujn Pedr xhigab xcuent ni bahuuini, gunii Sprit Dxan xten Dios lojnj, rájpnj:

—Bahuuini, chon dade' caguillu. ²⁰Biäjtnj yejcnj yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

²¹Dxejcti biäjtnj Pedr jiaaga, bidzujnni cadro suga' redade'ga, rájpnj lojreni:

—Narä nacä ni caguillu. ¿Xhi siäädtnj?

²²Rájpnj reniguiiga lo Pedr:

—Cornel, nani rnibee te gayuu soldaad, te bensa'c, te bejn ni rajn Dios, te bejn ni sanälajz rexpejn Israel, laani baxhal nuure lojlu, sa'csi rájpnj angl xten Dios lojnj, jiopxiinu luj te jiejn diajgnj xtiidxlu.

²³Dxejcti gurejdx Pedr rebejnnga, biu'reni neṅ yu'. Ro'c bia'nreni te guxhijcnj. Che bara yääl, Pedr nájza sgaii beṅ Jope ni najc xpejn Jesucrist, sanä redade' ni baxhal Cornel.

²⁴Che bara yääl, bidzujnreni guedx Cesarea. Abatojpnj Cornel resa'ni nájza rexamigwni rolizjcnj. Cabájznjreni guidzujn Pedr. ²⁵Che bidzujn Pedr ro yu', huichagloj Cornelni, bazuxhijbnj

lo Pedr. ²⁶Dxejc gunaaz Pedr naani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷Cayuiireni diidx, biu'reni neñ yu'. Che biu'ni bahuii Pedr nadxagsa' rebejn neñ yu'. ²⁸Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj beñzajt nani digac xpejn Israel, digacdiza jiu'ni rolizreni. Niluxh agunii Dios loä lo te bacal, te gacbeä digacdiru jiuä releiire. Abaluu Dios narä sajc guchagsa'ä chutis bejn. ²⁹Ni'cni, che gurejdxtu narä biälgacä. Naj rniabdidxä, çxhicutent gurejdxtu narä?

³⁰Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladnol ni rdimbicha'. ³¹Najni loä: “Cornel, che rbedx-miablü lo Dios, riejn diajg Dios xti-idxlu, che rudeedlu meel lo reben proob, racbee Dios, di lajzni jial luj. ³²Ni'cni naj baxhal tiop dade' chää guedx Jope te chaxiireni Simón Pedr nani rbäzlaa rolizj Simón ni ruscoodz guijd. Rolizjni sojb gajxh ro' nisdoo. Che guidzujni, laani gusule'ni xtidx Dios lojtu.” ³³Dxejc baxhalä chu biädxilu. Xquixtiostelu biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolizj Cornel

³⁴Dxejcti räjp Pedr lojreni:

—Naj gucbeliä tebloj rinälajz Dios guiraa bejn; rebenzajt sigajc rexpejn Israel. ³⁵Niluxh rinälajz Dios chutis ben guedxliuj nani ruzuxhijb lojni, nani rusoob rextiidxni, nani laaca nabajñ. ³⁶Badeed Dios xtiidxni loj rexpejn Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rñibee guideb guedxliuj. ³⁷Che gulujx baluii Juan ni rutiob-

nis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea. ³⁸Nancheetu xho badeed Dios yälñibee loj Jesucrist, ben Nazare't. Badeedza Dios Sprit Dxan xtenni te cuääzni neñ lastooni. Nancheetu xho bejn redzunro, remilagwr, basiajnci rebejn nani caguteed bendxab trabajwduxh. Redzunroga bejn sa'csi bennä Diosni dzuun. ³⁹Bahuiloonu guiraa redzuun ni bejn Jesucrist neñ reguedx Israel näjza guedx Jerusalén. Bacuaa rexpejn Israel Jesucrist lo cruzj, ro'c gujtni. ⁴⁰Dxejcti che biojn dxej, guläs Dios Jesucrist lo rebengut, gubansacni, badeed Dios yälñibee lojni te gujc biädluiloj Jesucrist loonu. ⁴¹Di Jesucrist nululoj loj chutis bejn. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule Dios. Bidaunänuni, bidunnänuni che gubansacni lo rebengut. ⁴²Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajñ näjza xte rebengut. ⁴³Galooli bacuaa renani gunii xtidx Dios lo guijtj, räjpreni: “Guiraa rebejn ni chalilajz xtidx Jesucrist sudzucaj Dios xtojreni.”

Biädlajz Sprit Dxan xten Dios neñ lastoo rebenzajt

⁴⁴Lal ni canii Pedr rediidxga, biädlajz Sprit Dxan xten Dios neñ lastoo renani huililajz xtiidxni. ⁴⁵Bidxelox guiraa rexpejn Israel nani huinä Pedr sa'csi biädlajz Sprit Dxan xten Dios neñ lastoo renani najc beñzajt. ⁴⁶Gucbeereni biu' Sprit Dxan xten Dios lastoo rebenzajt sa'csi bejn Sprit Dxan guniireni stee didxsaj nani gajdreni guisieed, calä'pzareni xpala'n Dios. ⁴⁷Dxejcti räjp Pedr lo rexamiigwni:

—Chu laa ni gudxojn yälrobnis lo re-bejnre, ni sigajc biädläjz Sprit Dxi xten Dios nen lastoonu, abiädläjzni nen lastoo rebejnre.

⁴⁸Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choñ dxej.

Basule' Pedr xho biädlajz Sprit Dxi xten Dios lastoo rebenzajt lo rexpejn Jesucrist nen guedx Jerusalén

11 Reapost, näjza renani huililajz xtidx Jesucrist nen reguedx Judea, biejn diajgreni huililajz rebenzajt ni digac xpejn Israel xtidx Dios. ²Che bidzujñ Pedr guedx Jerusalén, rexpejn Israel nani rlanj chu guiraa rexpejn Jesucrist bee si'cni bejn toAbram, gudilñajreni Pedr. ³Räjpreni lo Pedr:

—¿Xhicuent biu'lu rolijz benzajt nani xhet yu'di bee si'c nuure? ¿Xhicuent gu-daunäjläreni, ä?

⁴Dxejcti basule' Pedr diidx xho gujc huijni loj rebenzajt:

⁵—Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäini nez loä. ⁶Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz nen dajn, renani rxeeb si'c bäl, näjza renani rutajt. ⁷Dxejcti biejn diagä naj Dios loä: “Pedr, huisu. Bagu't man gaulu.” ⁸Dxejcti räpä: “Digacdin Dad. Nicla tej gadna gauä te man nani rnii leii xtenlu najc mandxuudx.” ⁹Dxejc gunisac Dios loä: “Na'cru guiniilu nacdxuudx recos nani abasia Dios.” ¹⁰Che gujc choñ huält gunii Dios si'c, huä'psac bariaadga xhaguibaa. ¹¹Lagajc orga bidzujñ choñ dade' ro yu' cadro yu'ä. Guedx Cesarea biriiireni, biädxiiireni narä. ¹²Dxejc gunii Sprit Dxi xten Dios loä: “Huinä reniguiire. Na'c gun tiop lajzlu.” Dxejcti

huinää xho'p ben Jope, dade' nani rililajz xtidx Jesucrist. Che bidzunn guedx Cesarea, biu'nu rolijz Cornel. ¹³Basule' Cornel diidx loonu xho baluiloj te angl xten Dios lojni lagajc rolijzni. Räjp angl xten Dios lojni: “Baxhal tiop dade' chää guedx Jope te chaxiiireni Simón ni rniireni Pedr. ¹⁴Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” ¹⁵Che gusloj cagusule'ä xtidx Dios lojreni, biu' Sprit Dxi xten Dios nen lastooreni si'c biu'ni lastoonu galooli. ¹⁶Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxi xten Dios te cuääzni nen lastootu.”

¹⁷Dxejc räjpza Pedr:

—Palga badeed Dios Sprit Dxi xtenni lojreni si'c baniidxni Sprit Dxi xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxi xtenlu lojreni.”

¹⁸Che biejn diajg reben Jerusalén rediidxga, biäuu ro'reni, dirureni ni-diñäj Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechläjzreni te guibannäjreni Dios par tejpas.

Rexpejn Jesucrist ni yu' guedx Antioquía

¹⁹Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel. ²⁰Lojreni nadxaag gaii ben Chipre, näjza gaii ben Cirene. Redee bidzujñ guedx Antioquía. Ro'c gusloj caniiireni lo benzajt nani rnii didx griegw. Basule'reni lo rebenzajtga guiraa xcuent Jesucrist. ²¹Gucnäjd Diosreni caniiireni xtiidxni. Xhidajl rebe-

ĵnga huililajz xtidx Jesucrist, basoobreni xtiidxni.

²²Che biejn diajg rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía. ²³Che bidzujn Bernabé guedx Antioquía, bibalazduxhni che bahuiini xho cayunnāj Dios rebejnĝa. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴Beŝa'c najc Bernabé. Rililazduxhni xtidx Jesucrist. Racnājduxh Sprit Dxan xten Diosni. Xhidajl rebejn huililajz xtidx Jesucrist guejdxĝa.

²⁵Che birii Bernabé guejdxĝa, huijni guedx Tarso satiilni Saulo. ²⁶Che bidxalni Saulo, huinānini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid benguejdxĝa gulālaj "Cristianos" renani rililajz xtidx Jesucrist.

²⁷Neñ redxejĝa birii gaii dade' nani nrii xtidx Dios. Guedx Jerusalén biriiireni, bidzujnreni guedx Antioquía. ²⁸Huisulii te dade'ga ni laa Agabo. Gucnāj Sprit Dxan xten Diosni te guniini siāād te gubijn guideb guedxliuj. Luxh gujc gubijngā neñ rejiz ni gunibee reii Claudio ni sajcrū. ²⁹Dxejcti rexpejn Jesucrist ni rbājz guedx Antioquía bejn xhigab cade tejreni gudeed meel chāā lo rexpejn Jesucrist ni rbājz neñ reguedx Judea. ³⁰Batojpreni meel, baxhalrenini lo rebengool ni rnibee rexpejn Jesucrist ro'c. Saulo nājza Bernabé huinā meelĝa che huijreni Judea.

Gujt Jacob, biāu Pedr neñ latzguiib

12 Neñ redxejĝa, trabajwduxh bateed reii Herodes gaii rexpejn Jesucrist. ²Gunibeeni gujt Jacob betz Juan, biru' guejnni. ³Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajcreni Pedr. Dee gujc neñ redxe lanij che rajwreni yāttxtil ni di saguij. ⁴Che gu-

naazreni Pedr, biāuni neñ latzguiib. Gunibee Herodes biāād tajp cuāa soldaad cuanājreni ro' latzguiib. Tapĝaj soldaad cuanāj ro' latzguiibĝa cade xho'p or. Bejn Herodes xhigab cuāāni Pedr te guetni nez loj rexpejn Israel che ted lanij. ⁵Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulāā Dios Pedr neñ latzguiib

⁶Bidzujnti dxe bispr dxej ni rlajz Herodes nibāā Pedr nez loj rexpejn Israel. Yāālgā nagayejs Pedr galāii tiop soldaad. Caden naliib guiro'p naa Pedr. Stiop soldaad canāj ro' latzguiib. ⁷Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnini te gubajjni. Rājpnī lo Pedr:

—Basquejngā, huistie.

Dxejcti bixec recaden, bitejbreni naa Pedr. ⁸Rājpnī xangl Dios lo Pedr:

—Gojt xhajblu, balāj xcura'chlu.

Si'c bejn Pedr, dxejc rājpnī xangl Dios lo Pedr:

—Gojt xhablajzlu, gudanajl narā —rājpnī.

⁹Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnīni xhigab pet canixcalni. ¹⁰Gudejdreni nez loj te soldaad, gudedgajcreni nezloj steeni, dxejc bidzujnreni ro' puertguiib xten latzguiib nani caĝ lo nezyuj ni rdejĝ galāii guejdxĝa. Xtebca bixal puertroĝa, biriireni gusajreni tebnezyuj. Dxejcti te squiini gunitloj xangl Dios. Xtebtis Pedr sasaj lo nezyuj. ¹¹Dxejc si'cni gubajpnī Pedr, bejnīni xhigab:

—Naj sii nanā baxhal Dios te xanglni bašlaa narā ladznaa Herodes te digacdi gun rexpejn Israel nani rlajzreni gunnājreni narā.

¹²Che gucbee Pedr xhi gusajcni, huijni rolizj Marii, xnan Juan ni rni-

ireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. ¹³ Cagusejz Pedr rolä', dxejc gubig te dxa'p ni laa Rode, bacuadiajgni ro lä'. ¹⁴ Che biembée Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni nen yu', räjpni lojreni:

—Pedr suga' ro lä'.

¹⁵ Dxejcti räjpreni lo Rode:

—Yeyclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. ¹⁷ Dxejcti bazäab Pedr naani te na'cru jiejyreni. Dxejc bij Pedr diidx xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr nen latzguiib. ¹⁹ Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jiajl lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajcro lo guiraa rexmos Herodes. Guninäj Blasto Herodes xcuentreni te na'cru guidxechnäj Herodes rebejnğa. ²¹ Basoobtini te dxej te guininäjniren. Dxejga gojt

Herodes xhajn reiini, gurejni lo xyacxhil reiini. Dxejcti gusloj caniini didxsa'c loj rebejnğa. ²² Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³ Lagajc dxejc biääd te angl xten Dios, bejnii gusloj cayacxhuu Herodes, gudajw rebisiujg Herodes, gujtni sa'csi basaanni gunii rebejn najcni te dios, sa'csi dini niliä'p xpala'n Dios.

²⁴ Xhidajl bejn biejn diajgni xtidx Dios, huililajzreni xtidx Dios.

²⁵ Che guluix badeed Bernabé näjza Saulo meel ni batojp reben Antioquia lo rebengool, biriireni guedx Jerusalén. Sanäreni Juan ni rniireni Marcw lo guedx Antioquia.

Gule Sprit Dxan xten Dios

Bernabé näjza Saulo

13 Lo rexpejn Jesucrist ni rdxaag sa' guedx Antioquia guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, bejn Cirene; näj Manaén ni gulanäj reii Herodes gujcn si'c bejtzni; näjza Saulo. ² Bidzujn te dxej cagucua'nreni laj ni cabedx-canabreni lo Dios, dxejc räjp Sprit Dxan xten Dios lojreni:

—Colcue Bernabé näjza Saulo te gunreni dzuun ni rlazä gunreni.

³ Che guluix bacua'nreni, che guluixza guredx-gunabreni lo Dios, batzubenreni naarenen yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

Guiro'preni baluii xtidx

Dios lo reben Chipre

⁴ Baxhal Sprit Dxan xten Dios Saulo näjza Bernabé guedx Seleucia. Ro'c biu'reni nen barcw, sääreni nez yuj ni tre'

galäii nisdoo, ni laa Chipre. ⁵ Che bidzujnreni Chipre, biu'reni guedx Salamina. Ro'c basule'reni xtidx Dios nen guiraa rexquidoo rexpejn Israel. Näj Marcw gucnäjreni. ⁶ Che cuansajreni guideb yuj Chipre, bidzujnreni guedx Pafos. Ro'c bidxaagreni te niguii ni laa Barjesús. Najni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. ⁷ Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rla-jzni jiejn diajgni xtidx Dios. ⁸ Dxejcti Barjesús, ni laaza Elimas, bidxagdijlñi guiro'preni sa'csi di rla-jzni chalilajz Sergio Paulo xtidx Dios. ⁹ Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

¹⁰ —Rusgueduxhlu rebejn, najclu beñlatsiaj, benguidxduxhlu, najclu xi'n Satanás, bendxab ni rnibee. Rdxehnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist? ¹¹ Naj siääd xcastiigw Dios yejclu. Xhidajl dxej sicäjy lojlu, xhetliidi fiilu —räjp Pabl.

Gujcsi räjpni si'c, bicäigajc lojni. Dxejctiru cuansajni caguuilni chu guini-aaz naani guluiini canejz chääni. ¹² Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcärluluii Dios.

Bidzujn Pabl näjza Bernabé guedx Antioquía xten distrit Pisidia

¹³ Che baluux Pabl näjza resa'ni xtzunreni guedx Pafos, biu'reni nen barcw, gudejdreni lo nisdoo, sääreni guedx Perge nen estad Panfilia. Che bidzujnreni guejdxga, gubisac Juan, ni rni-ireni Marcw, Jerusalén. ¹⁴ Dxejcti birinäj Pabl resa'ni guedx Perge, sääreni

guedx Antioquía nen distrit Pisidia. Dxejcti te dxe sabd, dxej ni rusilajz rexpejn Israel, biu'reni nen xquidoo rexpejn Israel, ro'c gurejreni. ¹⁵ Che gulujx bil te dade' reguijtz xten Dios ni laa leii näjza reprofet, baxhañ reguxhtis xten guidoo chu huigajnreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejnre, colguiniini.

¹⁶ Dxejcti huisulii Pabl, guläsni naani bejnnei seen lo rebejn te cuadiajgreni xtidxni. Räjp Pabl lojreni:

—Colcuadiajg, la'tu rexpejn Israel, guiraatu ni rajñ Dios. ¹⁷ Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjduxh Diosreni bejnnei remilagwr, te guläänireni guedx Egipto. ¹⁸ Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni. ¹⁹ Guyu' gajtz nación guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. ²⁰ Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. ²¹ Dxejcti gunab rexpejn Israel te rei lo Dios te guinibee reiiga lojreni. Badeedi Dios Saúl xi'n Cis, sa' toBenjamín. Gunibeeni tiuu ijz. ²² Che badzucaj Dios Saúl, badeedni gunibee toreii David. Räjp Dios: “Agucbeä David xi'n Isaí rujn tejsi xhigab con narä. Susoobni xtidxä sujnni guiralii ni rla-zä gac.”

²³ Räjpza Pabl:

—Galooli bia'n diidx lo rexagdoor David guxhañ Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnnga, rudzucajni xtojlnu, ruslaani nuure lo dojl. ²⁴ Che gusloj cagulijdx Juan rebejn, baluiini nanabpac gusiechajz rexpejn Is-

rael, tiobnisreni te jia xtojłreni. ²⁵ Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhał Dios. Colhuid, detzä siääd tej ni sacduxhru loä; nicla gac surloä te cuää xcura'chni.”

²⁶ Räjpa Pabl:

—Rniä lojtu sa'ä, rexagdo toAbram, näjza lo chutis ni rajn Dios, loonu baxhał Dios xtiidxni ni rusule' xho rudzucaj Jesucrist xtojłnu, xho ruslaani nuunu lo dojl. ²⁷ Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga. ²⁸ Balijdxreni Pila't ju'tni Jesucrist, luxh xhet bejdini te guetni. ²⁹ Che bagujc guiraa ni caj lo guijtz xcuent Jesucrist, gulätreni Jesucrist lo crujz, bacua'tzrenini neñ baa cuä' te guilaj. ³⁰ Dxejcti guläs Dios Jesucrist lo rebengut. ³¹ Balti huält baluiloj Jesucrist lo rexamigwni nani biädnałni nez rexyuj Galilee, renani biädnałzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

³² Naj siopnānu xtidx Diosre lojtu te guibalajztu. Agujc xchero bia'n Dios diidxre con retoxtagoldoonu. ³³ Guläs Dios Jesucrist te huile' diidxga par nure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxer guleälu te guinibeelu.”

³⁴ Räjpa Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.” ³⁵ Ni'cni

bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.” ³⁶ Che gulujc gunibee toDavid lo retoxtagoldoonu, si'cni badeed Dios gunni, dxejc gujtni. Biga'tznājni retoxtagoldooni. Niluxh guyujdx tiejxh toDavid. ³⁷ Niluxh guläs Dios Jesucrist lo rebengut, ni'c di tiejxhni niujdx. ³⁸ Ni'cni colyacbee, la'tu resa'ä, Jesucriste, bejn ni caniä xcuentni, laani rudzucajni rextojłnu. ³⁹ Chutis ni rililajz xtidx Jesucrist ruslaa Jesucristni loj guiraa rextojłni nani digacdi guibicaj mascä rusoobni guiralii ni caj lo leii xten toMoisés. ⁴⁰ Colsusin te na'c sajctu recos ni caj lo guijtz ni bacuaa te niguii nani bacuaa xtidx Dios:

⁴¹ Colhuilaa, la'tu ni ruxhiznāj xtidxä colguidxeloj,

colnitloj, sa'csi naj ni nabajntu sunä te dzunro,

te milagwr nez lojtu, niluxh dipac lajztu chalii,

mascä jiääd chu gusule'pacni lojtu.

⁴² Gulujxti xtidx Pabl, biunejz rebejn. Che birināj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre loonu.

⁴³ Che care'ch rebejnnga, xhidajl rexpejn Israel, näjza xhidajl rebenzajt nani rusoob xtidx Dios si'c rujn rexpejn Israel, birinajłreni Pabl näjza Bernabé. Dxejc balijdxreni rebejn ni siädnałreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojłti stee sabd, dxej ni rusilajz rexpejn Israel, xhidalduxh rebenguejdx bire' te gucuadijgreni guinii Pabl xtidx Dios. ⁴⁵ Che bahuui rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdił rexpejn Israel Pabl. Che rniini te diidx, laareni rniireni “didxxhiini”. Caniyajzreni Pabl näjza Bernabé, caguereni lojreni. ⁴⁶ Luxh di Pabl niclaza Bern-

abé nidxejb. Gusutijptisreni, räjpreni lo rebejn:

—Nungäjł ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibannäjtu Dios par tejpas. Ni'c sibiré loonu, te guiniinu xtidx Dios lo rebenzajt ni digac xpejn Israel. ⁴⁷ Sa'csi si'c agunibee Xtiosnu. Scree caj xtidx Dios lo guijt:

Suxhalātu te guluiilu rextidä lo rebenzajt ni digac xpejn Israel, te chalilajz rebejnğa xtidä, te laareni lo xtojlreni, cadrotis yu'reni lo guedxliuj, räjpp Dios.

⁴⁸ Che biejn diajg rebenzajt rediidxre, bibalazduxhrene, gulä'preni xpala'n xtidx Dios. Renani gule Dios galooli huililajz xtidx Dios. Xhidajł najcreni. ⁴⁹ Bire'ch xtidx Dios guideb nez reguejdxga. ⁵⁰ Dxejc rexpejn Israel balijdx regunaa ni sajcru, näjza reniguii ni sajcru nen guedx Antioquía, te bidxechnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquía. ⁵¹ Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sätireni guedx Iconio. ⁵² Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxan xten Dios lastooreni.

Guyu' Pabl näj Bernabé guedx Iconio

14 Che bidzujn Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzajt. Xhidajł rebejnğa huililajz xtidx Dios. ² Niluxh sgaii rexpejn Israel nani di chalilajz xtidx Jesucrist balijdx rebenzajt te bidxechnäjreni rebejn nani huililajz xtidx Jesucrist. ³ Ni'cni bia'n Pabl näjza Bernabé lo guejdxga balti dxej. Gusutzu'tz

guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejn cayacnäj Diosreni. ⁴ Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl näjza Bernabé, ⁵ dxejc sgala' guejdxga bacua diajg xtidx rexpejn Israel. Dxejc bire' te cuaa rexpejn Israel, näjza benzajt, näjza reguxhtis, rłajzreni nidxadijłreni reapost, rłajzarenı nucaareni guij yejc Pabl näjza Bernabé. ⁶ Dxejc gucbeereni xhi rłajzreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Lистра, guedx Derbe, näjza reguejdx ni re' nejzga. ⁷ Che bidzujnreni ro'c, cadrotis huijreni basule'reni xtidx Dios.

⁸ Guedx Lистра guyu' te niguii ni digacdi sa, che gojllini racxhuu ni'ni. ⁹ Cagucua diajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzani sajc gusi-ajc Diosni. ¹⁰ Dxejcti dip gunii Pabl lojni, räjpnı:

—ıHuisulii!

Dxejcti huisuyälni, gusajni. ¹¹ Che bahuii rexpejn Licaonia xhi bejn Pabl, lagajc xtiidxreni guniireni, räjpreni lo sa'reni:

—ıRedios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³ Dxejcti te bixhojz xten xquidoo Júpiter cua' tiop gon najł guii guejnreni. Biädnäni regonga ro' xquidoo Júpiter ni suga' ro' guejdxga. Rebejn näjza bixhojz rłajzreni nugu'treni regon te ganreni Bernabé näjza Pabl si'c räjpnı rextiosreni. ¹⁴ Che biejn diajg reapost xhi cayajc, batiäjsreni tla' xhajbreni si'c te seen direni guichagłajz xhi cayujn rebejnğa. Ruxunreni bidzujnreni lo rebejn, räjpreni lo rebejn:

¹⁵—Colcuadiajg xtiidxnu. ¿Xhicuent cayujn guebntu recosre? Ni lagajc sabejntu najcnu, lagajc ben guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa nájza guedxliuj, nájza nisdoo, nájza guiralii ni yu' lojreni, nenreni, ¹⁶ Galoo basaan Diosga gun reben guedxliuj si'ctis ni raljzreni. ¹⁷ Huen najc Dios, ruedeedni nisguuj, ruedeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl diidx guniireni te cháii bejnreni gaan guredx rebejn, sa'csi raljzpac rebejn nugu'treni regon.

¹⁹ Dxejcti bidzujn gaii xpejn Israel siäädreni guedx Antioquía nájza guedx Iconio. Baquiilreni reben Listra te gucuaareni guij yejc Pabl. Bacuaareni guij yejc Pabl, gudobxhaxharenini gulääreni ro' guejdxga, sa'csi naareni agujtni. ²⁰ Dxejc laj ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujnreni guejdxga, basule'reni rextidx Dios lo rebejnnga. Xhidajlreni huililajz xtidx Dios. Dxejc gubi'reni, biu'reni guedx Listra, nájza guedx Iconio, nájza guedx Antioquía. ²² Balijdxreni rebejn nani huililajz xtidx Dios, gucnäjreni rebejnnga te batiplajz rebejnnga, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, laj ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl nájza Bernabé distrit Pisidia, bidzujnreni estad Panfilia. ²⁵ Basule'reni xtidx Dios lo reben Perge, dxejcti biriireni ro'c sääreni guedx Atalia. ²⁶ Che bidzujnreni guejdxga, biu'reni nen barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhałreni Pabl nájza Bernabé chasule'reni xtidx Dios nen guiraa reguejdx. Naj abaluux Pabl nájza Bernabé dzuunga. ²⁷ Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnnga guira'ti ni bennäj Dios laareni, nájza xho badeed Dios huililajz rebenzajt nani digac rexpen Israel. ²⁸ Xchej biannäjreni rexpejn Jesucrist ro'c.

Bidxagsa'zarenin nen guedx Jerusalén

15 Nen redxejga bidzujn gaii dade' ni siääd nez Judea, caguluiireni rexpejn Jesucrist, räjpreni lojreni:

—Palga ditu gusäl bee si'c gunibee to-Moisés, di Dios guslaatu lo xtojltu.

² Che biejn diajg Pabl nájza Bernabé rediidxga, bidxagdijlreni redade'ga. Dxejc gule rexpejn Jesucrist Pabl nájza Bernabé nájza sgaii rexpejn Jesucrist cháäreni guedx Jerusalén te guininäjreni reapost nájza rebengool te guidon xho gac xcuent beega.

³ Huisunejz rexpejn Jesucrist ni najc ben Antioquía Pabl nájza rebejn ni sanäjreni, sääreni guedx Jerusalén. Gudejdreni reguedx Fenicia, nájza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzajt xtidx Dios. Bibalazduxh rexpejn Jesucrist che biejn diajgreni rediidxga.

⁴Che bidzujñreni guedx Jerusalén, huichagloj rexpejn Jesucristeni. Dxejcti bij Pabl nájza Bernabé diidx lo reapost, lo rebengool nani rnibee rexpejn Jesucrist, nájza lo rexpejn Jesucrist, guiraa redzunro nani cayunnáj Diosreni. ⁵Dxejcti huisulii gatii refarisee ni ahuililajz xtidx Dios, rájpreni lojreni:

—Che chalilajz rebenzajt xtidx Dios, nanab chureni bee, nanabza gusoobreni leii xten toMoisés.

⁶Dxejcti bachagsa' reapost nájza rebengool nani rnibee rexpejn Jesucrist, te don xho gunreni. ⁷Huisulii Pedr, rájpnini lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzajt, te chalilajzreni xtidx Dios. ⁸Luxh Dios, nani numbechee lastoo guiralii bejn, badeed seen huililajzpac rebenzajt xtiidxni. Badeed Dios Sprit Dxan xtenni lojreni si'c te seen te gacbee bejn najcreni xpejn. Sigac baniidxni Sprit Dxan xtenni loonu galoo, si'cza badeedni lo rebenzajt. ⁹Sigajc rinälajz Dios nuunu, sigajc rinälajzni rebenzajt. Che huililajz rebenzajt xtiidxni, basia Dios lastooreni. ¹⁰Naj xhicient rusieedu Dios, ä? Di nijajc di nisanáj re-toxtadnu releiiga, digac diza chosanájnu releiiga naj. Xhicient rlanjtu chasanáj rebenzajt releiiga? ¹¹Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzajt lo dojl che rililajzreni xtidx Jesucrist —rájpedr.

¹²Che gulujx gunii Pedr, dxitis gurej rebejn, bacuadijgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzajt.

¹³Che gulujx gunii guiro'preni, xhet guniidi rebejn. Jacoobtis rájpedr lojreni:

—Sa'ä, colcuadijg xtidxä. ¹⁴Agunii Simón ni rniireni Pedr lojtu xho ganid-

doo baxhal Dios laani lo rebenzajt te gurejdx Dios rexpejn ni nadxaag lo rebenzajt. ¹⁵Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che rájpnini:

¹⁶Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajntoDavid.

Si'c gunä,

¹⁷te jiädgajñ rebejn narä te gacä Xtiosreni,

nájza guiraa rebenzajt nani najc rexpenä jiädgajñ narä,

¹⁸si'c rájpedr Dios nani galooli baluuloj guiraa redzuunre.

¹⁹Dxejcti rájpedr Jacoob lojreni:

—Dee najc xhigab ni runä. Na'cru gusieednu rebenzajt ni cagusiechajzreni, renani salilajz xtidx Dios. ²⁰Gucuaanu te guijtz, jie'tznu lo rebenzajt: Na'c gaureni xhi cos ni basuj bejn loj rebanajb, sa'csi dinu chalilajz xcuent rebanajb. Na'cza guesnäjreni bejn ni di gac chäälni, na'cza gaureni bäl nani gurerejn, na'cza gaureni rejn. ²¹Dee gucuaanu te di guche'chreni xpejn Israel sa'csi neñ guiraa reguejdx galooli yu' rexpejn Israel nani rol leii xten toMoisés gasob sabd —rájpedr Jacoob.

²²Che biejn diajg reapost nájza rebengool nani rnibee, nájza guiraa rexpejn Jesucrist xtidx Jacoob, bichagljazreni xtiidxni. Dxejcti gulereni tiop sa'reni chanä Pabl nájza Bernabé guedx Antioquía. Gulereni Judas ni rniireni Barsabás nájza Silas. Guiro'preni najc bejn ni sajcru loj rexpejn Jesucrist. ²³Dxejcti bejnreni guijtz huinäreni. Bacuaareni rediidxre:

“Nuure reapost, nájza rebengool ni rnibee, nájza rexpejn xquidoo Jesucrist ruxhalnu xtixtios lojtu, resa'nu nani rbäjz guedx Antioquía nájza estad Siria nájza estad Cilicia. ²⁴Rucuaanu guijtzre sa'csi biejn diaagnu birii gatii

resa'nu ree biädsieedreni la'tu con xti-idxreni, cayu'tu yärsia' sa'csi najreni lojtu nanab chutu bee si'c gunibee to-Moisés, guibajnzatu si'c rniï leii xten to-Moisés. Xhet nuudinu gunibeenu jiadni-ireni si'c. ²⁵ Ni'cni biennu xhigab guxhaľnu lojtu tiop dade' ni gulenu loj resa'nu te chanäreni Bernabé nájza Pabl, nani sanälaaznu. ²⁶ Agajc balti huält rla-jzreni nugu'treni Bernabé nájza Pabl, luxh direni guidxeyb gusule'reni xtidx Jesucrist. ²⁷ Naj ruxhaľnu Judas nájza Silas lojtu. Laareni susule'za guiraa redi-idxre lojtu. ²⁸ Tejsi najc xhigabnu con Sprit Dxaan xten Dios. Di rlaaznu gutaal-runu leii ni chasanájtu. Releitis nani nanab rusoobnu rucuaanu lojtu. ²⁹ Na'c gautu xhicos ni basuj bejn lo rebanájb, sa'csi dirunu chalilaaz xcuent rebanájb. Na'cru gautu rejn, na'cza gautu bääľ nani gurerejn, na'cza guesnájtu nani digac chääľtu. Palga gusoobtu recosre, laaca cayujntu. Sacru guibajntu. Sujiannájtu Dios.”

³⁰ Dxejcti basadiidx rexpejn Jesucrist Judas nájza Silas huinäreni Pabl nájza Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijtzga lojreni. ³¹ Che biejn diajg rexpenzit Jesucrist diidx ni caj lo guijtzga, bibal-azduxhrene sa'csi gulecdxi diidxga lastooreni. ³² Dxejcti basule' Judas nájza Silas xtidx Dios lojreni, sa'csi rudeed Dios xtiidxni loj guiro'preni. Xhidajl di-idx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. ³³ Ro'c bia'nreni xchej, dxejcru cuájb rexpejn Jesucrist gubi'reni te gudeedreni xtixtios loj reni baxhaľreni.

³⁴ Dxejc Silas bejn xhigab jia'nni ro'c. ³⁵ Luxh Pabl nájza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

Huihuisac Pabl rexpejn Jesucrist nen guiraa reguejdx

³⁶ Che gudejd xhidajl dxej, rájp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlaiz chanäreni Juan ni laa Marcw. ³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisianáj Pabl nájza Bernabé. ³⁹ Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni nen barcw, sääreni Chipre ni re' galäii nisdoo. ⁴⁰ Dxejcti Pabl gule Silas te sanänini. Badeed rexpejn Jesucrist xtixtios lojreni, rájpreni gacnáj Diosreni. ⁴¹ Laľ ni sasajreni gudejdreni guiraa reguedx Siria nájza guiraa reguedx Cilicia, ro'c gucnäjreni guiraa rexpejn Jesucrist, basule'rureni xtidx Jesucrist lojreni.

Huinä Timoteu Pabl náj Silas

16 Bidzunsac Pabl nájza Silas reguedx Derbe nájza Listra. Ro'c bidxaagreni te xpen Jesucrist ni laa Timoteu. Xnanni najc ben Israel ni huililajz xtidx Jesucrist. Xtadni najc ben griegw. ² Didxsa'ctis rniï rexpen Jesucrist ni yu' Listra nájza Iconio xcuent Timoteu. ³ Rlaiz Pabl chanäni Timoteu. Dxejcti basäl Pabl bee Timoteu te gujcnï si'c xpen Israel, te xhet naadi rexpejn Israel, sa'csi guiraareni nanchee xtad Timoteu najc ben griegw. ⁴ Che bidzujnreni cade tej reguejdx, basule'reni xtidx reapost nájza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaareni lo guijtz. ⁵ Bazutijp xtidx Dios lastoo renani huililajz xtidx Jesucrist. Guixe-guixee

xhidajlru bejn huililajz xtidx Dios xcuent Jesucrist.

Lo te bacal gunii te niguii lo Pabl

⁶Che gudejdreni distrit Frigia, näjza estad Galacia, di Sprit Dxan xten Dios nusaan nusule'reni xtidx Jesucrist nen reguedx Asia. ⁷Bidzujntireni gajxh estad Misia. Dxejc rlanjreni nijreni estad Bitinia, niluxh di Sprit Dxan xten Dios nusaan nijreni ro'c. ⁸Ni'c gudejdtireni stelaad estad Misia, bidzujnreni guedx Troas. ⁹Te yääl si'c lo te bacal bahuii Pabl suga' te bejn Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlru nuunu.

¹⁰Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxha| nuure te guluiini xtiidxni lo reben Macedonia. Narä, Lucas, ni cagucuaä rediidxre, gusanää Pabl näjza Silas.

Che guyu' Pabl con Silas guedx Filipos

¹¹Biu'tinu nen barcw ro' guedx Troas. Bidzunnu Samotracia, te yuj ni re' nen nisdoo. Che bara yääl bidzunnu guedx Neápolis. Ro'c biriinu nen barcw, ¹²bionnu guedx Filipos, guejdx nani sajrcu lo estad Macedonia. Guedx romanni. Ro'c bia'nnu tiop chon dxej. ¹³Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jääd rexpejn Israel te guinäjreni Dios. Ro'c gurejnu, guniinu lo renane' nani bire' ro'c. ¹⁴Lojreni nadxaag te nane' ni laa Lidia, te benzijt ni digac xpejn Israel. Guedx Tiatira siäädni. Ruto'ni ladmu-raad ni sacduxh. Rajn gunaaga Dios si'c rajn rexpejn Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni. ¹⁵Birob-

nisni, näjza guiraa reni rbäjz rolizjni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolizjni.

¹⁶Te dxej cheni sionnu cadro rminäj bejn Dios, bidxaagnu te dxa'p nani yu' te bendxab nen lastooni. Rajp rexpaxhuaanni melduxh sa'csi rusule' dxa'pga recos ni gajd gac. ¹⁷Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

¹⁸Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' nen lastoo dxape'ga:

—Xcuent xcälrnibee Jesucrist rmiä lojlu: “Birii nen lastoo dxape'ga.”

Lagajc dxejc birii bendxab nen lastoo dxape'ga.

¹⁹Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhaxhreni guiro'preni nez roguii cadro suga' reguxhtis. ²⁰Che bidzunäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni biey lo guejdxre. ²¹Caguluiireni garenca leii nani digacdi gusoobnu sa'csi najcnu bejn roman.

²²Dxejcti bidxechnäj rebejn Pabl näjza Silas. Gunibee rejuejz gulääreni xhajb Pabl, näjza xhajb Silas, te batiäjlni baar guideb tiejxh guiro'preni. ²³Che gulujx gudinduxhreni Pabl näjza Silas, biäuren nen latzguiib. Dxejcti räjp reguxhtis lo reguixhajc:

—Colgapdzu'tzreni, di gusaantu guiriireni.

²⁴ Basäl guixhajgreni neņ latzguiib. Guyu' ni'reni neņ te baräjd ni sojb gueed te di guxunreni.

²⁵ Garolyääl guninäy Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neņ latzguiib cayolreni. ²⁶ Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷ Che gubajņ guixhajg ni canäj latzguiib, bahuini naxhal latzguiib, gulääni spaad xtenni, te rlanjni nugu'tni lagajc laani, sa'csi naani abadxun reni niäu neņ latzguiib. ²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹ Dxejc gunibee guixhajg biääd te bajl te biu'ni neņ latzguiib. Racsejsni biäädni bazuxhijbni nez loj Pabl näjza nez loj Silas. ³⁰ Dxejcti gulää guixhajgreni neņ latzguiib. Gunabdiidxni räjpni lojreni:

—iColguinii, dade! ¿Xhini'c nanab gunä te guslaa Dios narä lo dojl?

³¹ Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolijzni. ³³ Lagajc dxejc, garol yääl, huinä guixhajgreni gudiibni dejtreni cadro batiuug baarreni. Dxejcti batiobnisreni guixhajg näjza guiraa reni yu' rolijzni. ³⁴ Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis guslaātu. Naj colchäj, gacnäy Dios la'tu, saru chäātu.

³⁷ Niluxh räjp Pabl loj reguixhajg:

—Nuure najczanu beņ roman. Batiäjłreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäuren i nuure neņ latzguiib. Leii xten roman di gusaan gac rebeņ roman si'c. Luxh naj rlanjreni guslaaren i nuure xhiga'tz. iDinu guirri si'c! Lagajc laareni sujiaädslääreni nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni beņ roman najc Pabl näjza Silas.

³⁹ Dxejcti biääd reguxhtis, gulääreni Pabl näjza Silas, gunabreni jiajllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neņ latzguiib, huijreni rolijz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

Cadxecheduxh guiraa rebeņ Tesalónica

17 Che gudejdreni reguedx Anffipolis, näjza guedx Apolonia, bidzujreni guedx Tesalónica cadro yu' te xquidoo rexpejn Israel. ² Ro'c basule' Pabl xtidx Dios si'c ni rujnpacni. Chon sabd, dxej ni rusilajz rexpejn Israel, basule'ni xtidx Dios lojreni. ³ Basule' Pabl xtidx Dios ni caj lo guijtzi ni bacuaa reniguii ni gunii xtidx Dios galooli. Caj lo guijtzi: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beņ griegw nani rajņ Dios näjza xhidajł reguna griegw ni sajcru huililajz xtiidxni. ⁵ Luxh yu' rexpejn

Israel ni di chalilajz, ni bidxechlajz. Batie'reni gatii benpjoj, benlatsiaj, bejnreni bieje nez galäi. Biu'reni rolizj Jasón caguiilreni Pabl näjza Silas te cuääreni guiro'preni nez lo rebejn. ⁶ Niluxh che direni nidxäl Pabl näjza Silas, alga Jasón gulääreni näjza gatii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujnreni laadxnu, ⁷ luxh badeed Jasón rolizjni jia'nreni. Direni gusoob leii xten César, najreni yu' stee reii ni laa Jesús.

⁸ Che biejn diajg reguxhtis näjza rebejn diidxre, guyu'reni yärsia'. ⁹ Cua' reguxhtis meel lo Jasón näjza lo rexamigwni. Räjp reguxhtis sudedsacreni meelga che jii Pabl näjza Silas, jiunejzreni lo guejdxga. Dxejcti baslaareni Jasón näjza rexamigwni.

Che guyu' Pabl con Silas guedx Berea

¹⁰ Che biu' guxhijn, baxhalgajc rexejn Jesucrist Pabl näjza Silas ste guejdx ni laa Berea. Che bidzujnreni guejdxga, biugajczeni xquidoo rexepejn Israel. ¹¹ Hueenru najc reben Berea loj reben Tesalónica, sa'csi rbaali lajzreni bacuadijgzeni xtidx Pabl ni guniini xcuent Jesucrist. Guixe-guixee bilreni guijtz cadro caj xtidx Dios te gucbeereni la guli rextidx Pabl. ¹² Xhidajl rexepejn Israel näjza xhidajl ben griegw ni sajru, gunaa sigajc niguii, huililajz xtidx Dios. ¹³ Che gucbee rexepejn Israel ni rbäjz guedx Tesalónica caguliii Pabl xtidx Dios guedx Berea, biäädreni guedx Berea. Che bidzujnreni lo guejdxga bejnreni bieje ro'c. ¹⁴ Dxejcti baxhal rexepejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea. ¹⁵ Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas näjza Timoteu jädgajczeni lo-

jni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ Laļ ni guläjz Pabl guedx Atenas, guyuduxhni yärsia' sa'csi bahuiini rajn guiraa rebejn rebanäjb nani runchee lagajc bejn. ¹⁷ Ni'c nen xquidooreni gudildiidx Pabl rexepejn Israel näjza rebenzijt ni rajn Dios si'c rajn rexepejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biäd gatii bejn lojni. Yu' reni roļduxh guijtz ni bacuaa epicúreos, yu'za renani roļduxh guijtz ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zarenä räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgzeni bazä't Pabl “Jesús” näjza “Resurreccion”, ni säloj yälgubansac lo rebengut. ¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiilu, ²⁰ sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

²¹ Reben Atenas näjza rebenzijt ni yu' ro'c ruteedreni redxej miiireni didxcoob lo sa'reni, o rucuaadijgzeni didxcoob. Ni'cpac rchagljazreni.

²² Galäi Areópago huisulii Pabl, räjpni lojreni:

—Colcuadijg guejbtu, ben Atenas. Abahuiä xho randuxhtu xhidajl banäjb.

²³ Che siädsää lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Räjp Pabl:

—Diosre benchee guedxliuj nájza guiralii ni yu' lo guedxliuj, sa'csi rñibeeni xhaguibaa nájza guedxliuj. Di Diosre cuääz lo piään niclaza nen reguidoo ni runchee bejn. ²⁵Diza Diosre guiquiin chu gacnäjni sa'csi lagajc Diosre rudeed yälñabajñ, yälñadaan, nájza guiralii nani rquiin reben guedxliuj.

²⁶Räjp Pabl:

—Guiralii reben guedxliuj najc rexag-doo tejsi gunaa nájza tejsi niguii. Desde galooli gunibee Diosga bal ijz chu renacion, nájza cati gunibee renacionga. ²⁷Benchee Dios guiraa reben guedxliuj te quuilreni Dios te chalilajzreni xtiidxni. Luxh suga' Dios gajxh cadetejnu, ²⁸sa'csi Dios rujn nabajñnu lo guedxliuj, runidxni rsiaanu lo guedxliuj, runiidxzani rdajlru xcälñabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” ²⁹Ni'cni, sa'csi najcnu xi'n Dios, di nungäjñ jiennu xhigab najc Dios si'c rebanäjb ni nachee pla't, o guij, o yajg si'ttis ni runchee bejn rexpanäjbtu. ³⁰Nen redxey ni di bejn niembee Dios, diza Dios niujn castiigwreni. Niluxh najc gunibee Dios gusiechlahz guiraa rebejn, ³¹sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bensa'c. Rñilii Jesucrist rediidx ni najc guliitis. Guläs Dios Jesucrist, baspansacnini lo rebengut, te gacheenu rajp Jesucrist yälñibee lo guiraa recos.

³²Che biejn diajg rebejnnga gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiajgrunu xcuent ni rusule'lu.

³³Dxejcti birii Pabl lojreni. ³⁴Yu'za reni huinajñni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópagó; nájza te

nane' ni laa Dámaris. Guyu'za sgaii bejn ni huililajz.

Guyu' Pabl guedx Corinto

18 Biriiti Pabl guedx Atenas, huijni guedx Corinto. ²Ro'c bidxaagni te dade' ni najc beñ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejn Israel guedx Roma. Birinäj Aquila Priscila chäälni. Biriireni Italia, biädäreni guedx Corinto. Bihuii Pablreni, ³sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. ⁴Gasob sabd, dxej ni rusilajz rexpejn Israel, basule' Pabl xtidx Dios nen xquidoo rexpejn Israel. Rlajzni chalilajz rexpejn Israel nájza beñ griegw ni digac xpejn Israel diidx ni rñini xcuent Jesucrist.

⁵Dxejcti birii Silas nájza Timoteu Macedonia. Che bidzujñreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhañ Dios.

⁶Dxejc bidxechnäj rexpejn Israelni, guniyajzaren i xtiidxni. Dxejcti gubijb Pabl xhajbni si'c te seen diruni jiuureni, caguro'nnireni. Räjpzani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räjpn i.

⁷Dxejcti biriini lojreni, huijni roliz Justo, te bejn ni rajñ Dios si'c rajñ rexpejn Israelni. Rolizni sojb cuä' xquidoo rexpejn Israel. ⁸Crisp, ni rñibee xquidoo Israel, huililajz xtidx Jesucrist. Huililajzja guiraa reni rbäjz rolizni. Xhidajlza beñ Corinto huililajz xtidx Jesucrist, dxejcti birobnisreni. ⁹Gojl te yääl gunii Dios lo te bacal, räjpni lo Pabl:

—Na'c guidxejblu. Guniitis, na'c gusäulu ro'lu, ¹⁰sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹Ni'c bia'n Pabl ro'c tebizgarol. Baluini xtidx Dios lojreni.

¹²Che gujc Galñon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galñon. ¹³Räjpreni lo Galñon:

—Niguiire caguluii rebejn ganreni Dios garenca mood, xhet si'cti ni caj lo xleiinu —räjpreni.

¹⁴Agojl ninii Pabl, che räjp Galñon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xti-idxtu. ¹⁵Per la'tu cadxe'chtu xcuent di-idix, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu cołchahuii xho guntu yälguxhtis —räjp Galñon.

¹⁶Gunibee Galñon barilaagw resol-daad rexpejn Israel. ¹⁷Dxejc gunaaz re-Griegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galñon. Niluxh nicla niu Galñonreni.

Choñ huält huihuii Pabl rexpejn Jesucrist

¹⁸Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadro bahuaj Pabl yejcní si'c te seen yu' xhi di-idix bia'nni con Dios. ¹⁹Che bidzujñreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidix con rexpejn Israel. ²⁰Dxejcti che gunabreni jia'n Pabl

ro'c xchej, naaddini jia'nni. ²¹Badeedni xtixtios, räjpni lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jiälä.

Biusacni neñ barcw, biriini guedx Éfeso. ²²Che bidzujñni guedx Cesarea, biriini neñ barcw, huijni guedx Jerusalén. Che bidzujñni, guniini xchan lo reapost näjza lo rexpejn Jesucrist. Dxejc huijni guedx Antioquia xten Siria. ²³Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

Baluii Apolos xtidx Dios neñ guedx Éfeso

²⁴Neñ redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc misa'cni, nanduxhzani xtidx Dios. ²⁵Nanduxhni xtidx Dios xcuent Jesucrist. Laaca basule'ni xtidx Dios, guideb xcälñabajñni rinälajzni Dios. Niluxh xcuent Jesucrist najntisni yälrobnis xten Juan. ²⁶Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila näjza Aquila xtiidxni, huinärenini roli-jzreni. Ro'c basule'rureni xtidx Dios nani gajdñi gan. ²⁷Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn Jesucrist guijtze lo rexpejn Jesucrist ni yu' neñ reguejdxga te gacnäjreni Apolos. Gucnäduxh Apolos rebejn nani badeed Dios huililajz xtidx Dios neñ reguejdxga, ²⁸sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidix lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhał Dios.”

Guyu' Pabl guedx Éfeso

19 La₁ ni guyu' Apolos guedx Corinto, huij Pabl xhidajl reguejdx nen región Asia, dxejcti bidzujñni guedx Éfeso cadre bidxaagni gaii bejn nani huililajz xtidx Dios. ²Gunabdiidx Pabl lojreni:

—Che huililajztu xtidx Dios, ¿la biäd-lajz Sprit Dxi xten Dios nen lastootu, ä?

Räjpreni lojni:

—Nicla gajd diajgnu jiejn la yu' te Sprit Dxi xten Dios.

³Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

⁴Dxejcti räjp Pabl lojreni:

—Guliica bastiobnis Juan che basiejch lajz rebejn xtojreni. Räjpza Juan lo rebejn: “Colchalilajz xtidx bejn ni siäd detzä.” Bejn ni basät'ni najc Jesucrist —räjp Pabl.

⁵Che biejn diajgreni rextidx Pabl birobnisreni te gacbee rebejn najczeni xpejn Jesucrist. ⁶Che batzuub Pabl naani yejzeni, biu' Sprit Dxi xten Dios nen lastooreni. Dxejc gusloj caniiireni garen-garen didxsaj. Guslojza caniiireni diidx ni badeed Dios lojreni. ⁷Si'c tzu-bitio'p dade' gusajc si'c.

⁸Si'c chon bäii, guixe-guixee gunii Pabl rextidx Dios, basule'ni xcuent xcäl'rnibee Dios loj rebejn nen xquidoo rexpejn Israel. Dini nidxebj guniini loj rebejn.

⁹Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejñni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰Tiop ijj bejn Pabl

si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. ¹¹Gucnäj Dios Pabl bejn xhidajl dzunro, remilagwr. ¹²Ni'cni biäd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh ricgajc rebejn ni racxhuuga, rigajcza rebendxab lastoo renani yu' bendxab.

¹³Dxejcti guyu' gaii bejn Israel nani entis rcansaj, direni cuäz tejsi guejdx. Najczeni bejn ni rbää bendxab lastoo rebejn. Bejn redee xhigabcoob, naareni cuääreni bendxab xcuent laj Jesucrist, ni'cni räjpreni lo renani yu' bendxab nen lastooni:

—Xcuent xcäl'rnibee Jesucrist nani ru-luii Pabl rnibeenu guiriilu nen lastoo bejnga —räjpreni.

¹⁴Guyu' gajdz xi'n Esceva, te bejn Israel, nani sajcu lo rebixhojz. Rujn redee dzuun rbääreni rebendxab nen lastoo rebejn. ¹⁵Che gunii rexi'n Esceva loj bendxabga si'c, räjp bendxab ni yu' nen lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶Dxejcti bixa't niguii nani yu' bendxab nen lastooni yejc rexi'n Esceva, gudinduxhniireni, basäl'ta'nireni, batiäjsni xhajbreni. Dxejcti baxunreni biriireni nen yu'ga, bidxäl'guijdxzaren biräsa' xhajbreni. ¹⁷Dxejcti guiraa reben Éfeso, rexpejn Israel sigajc bejn griegw, gucbee xho bennäj bendxab reniguiiga. Bidxebduxh rebejnga, luxh huä'p xpala'n Jesucrist.

¹⁸Xhidalduxh reni huililajz xtidx Dios biäd lo rexpejn Jesucrist. Cacäjpreni guiraa recos xhet laadi nani rujnreni. ¹⁹Xhidajl reni najc bidxaa biäd'nä reguijtz cadre caj yäl'najn xten rebidxaa. Dxejcti base'czeni reguijtzga nez loj guiraa rebejn. Bejnreni cuent lacti meel saj reguijtzga. Sajczeni tiubitzuu mil

melpla't. ²⁰Xhidalduxh rebejn huililajz xtidx Dios. Batijp Dios lastoo rexepejn. Gulä'p guiraareni xpala'n Dios.

²¹Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²²Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxehduxh reben Éfeso

²³Neñ redxejga, guyuduxh rebejn yärsia' sa'csi baluui Pabl xtidx Dios. Direni nichagljaz care'ch xtidx Dios. ²⁴Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhrenei gaan meel ro'c. ²⁵Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu. ²⁶Abahuiitu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni. ²⁷Ni'c ries nitloj xtzuumnu palga diru bejn sii ni'ch ni riencheenu. Luxh rieszza diru bejn jäädgajñ Diana neñ xquidoro Diana. Naj reben Asia, näjza guiraa reben guedxliuj randuxh Diana, banäjb ni sajru, niluxh palga diru rebejn gan Diana, pet sinitlojni —räjpni.

²⁸Che biejn diajg replateer xtiidxni, bidxe'chduxhrenei, guredxa'reni räjpreni:

—Sacduxh Diana xtios reben Éfeso.

²⁹Guideb guejdx guyu' biejy. Dxejcti ruxunreni bidxagsa'reni lo yuj cadro rajc rexjuntreni. Gunaazreni Gayo näjza Aristarco, beñ Macedonia ni ri-

najl Pabl. ³⁰Rlajz Pabl niu'ni cadro bidxagsa' rebejn, niluxh di rexepejn Jesucrist nusaanni. ³¹Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäälu cadro nadxagsa' rebejnğa —räjpreni.

³²Lo rebejn ni re'ga, yu' reni rbedxa'tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. ³³Dxejcti gulää rexepejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexepejn Israel loj guiraa rebejn, te di guidxe'chrenei lo rexepejn Israel. ³⁴Niluxh che gucbee rebejn najc Alejandro ben Israel, tiop or guredxaduxhrenei, räjpreni:

—Sacduxh Diana xtios reben Éfeso.

³⁵Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu ben Éfeso, caguidxäjñ te ben guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj.

³⁶Sa'csi rediidxre najc gullii, nungäjñ cuedxitu, na'c guntu recos guijdxre.

³⁷¿Xhicuent gunaaztu reniguii ni siädnätu ree? Direni gac gubaan ni rbajn recos guidoo, dizarenii niniyaj xtiosnu. ³⁸Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. ³⁹Niluxh palga yu' xhi stee, nanab gac te junt xte rebenguejdx si'c ni caj lo xleiiinu. ⁴⁰Ries jii xquejnu lo gubier, naareni bidojpnu te guidxagdiñnu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹Che gunii secretaar si'c, bire'ch rebejn, biunejzreni ro'c.

Huihuisac Pabl rexpejn Jesucrist ni yu' Macedonia näjza Grecia

20 Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni tixtios lojreni. Sä'tini nez reguedx Macedonia. ²Guiraa reguejdxga cadro gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. ³Che bidzujjni Grecia, bia'nni ro'c choñ bäii. Dxejcti niu' Pabl neñ barcw te ni-jni reguejdx Siria. Niluxh che biejn di-ajgni cabäz-xhiga'tz rexpejn Israelni te guiniaazreneni, gunaazni nezyuj, gubi'ni nez Macedonia. ⁴Huinäni Sópater, xi'n Pírios, te beñ guedx Berea; näj Aristarco näjza Secondo, beñ guedx Tesalónica; näj Gayo, beñ guedx Derbe; näj Timoteu; näj Tíquico näjza Trófimo, beñ Asia. ⁵Guiraa redee gunijd loonu, huiläjzreni nuure guedx Troas. ⁶Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzunnu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. ⁸Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacañ bi'nga, gudiejsni, bitejbni lo yuj desde yu' ni riojn pis. Che huiläsreneni, agu-

jtni. ¹⁰Dxejcti biäjt Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubansacni. Baspajn Diosni.

¹¹Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. ¹²Xhetliidiru rajcdi bi'nga nani gubansac, nani guläs Pabl. Bibalazduxhreni, huisa'nreneni rolizjni.

Biu'nu neñ barcw, bionnu guedx Mileto

¹³Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jini guejdxga, ro'cli jiu'ni neñ barcw. ¹⁴Che bidxaag Pabl nuunu guedx Asón, biu'ni neñ barcw, sonnu lo nisdoo te bidzunnu guedx Mitilene. ¹⁵Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl, bidzunnu guedx Mileto. ¹⁶Di rlanj Pabl jiu'nu guedx Éfeso, diza rlanjni chunu Asia xchej, sa'csi riojb lajzni guidzunnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

¹⁷Che guyu'nu guedx Mileto, baxhañ Pabl diidx lo rexpejn Jesucrist ni yu' guedx Éfeso, gurejdxni reni rnibee. ¹⁸Che bidzujnreni lo guejdxga, räjp Pabl lojreni:

—Lagajc la'tu najntu xho nabanä nez lojtu, dxejli ni bidzunä, nabannää Dios. ¹⁹La'tu najntu xho runä xtuun Jesucrist guixe-guixee, guideb xcälnapä.

Dina niliäp ä xpala'nä. Najntu xho ronä che di bejn chalilajz xtidx Jesucrist. Che rlanj rexepejn Israel nugu't narä, gudedä trabajwduhx. ²⁰La'tu najntu xho baluiä lojtu guirali rextidx Dios ni najc huen par la'tu. Che nadxagsa'tu baluiä xtidx Dios lojtu, näjza roljz cade tejtü huiluiä xtidx Dios lojtu. ²¹Basule'ä xtidx Dios lo rexepejn Israel näjza lo rebenzjyt ni di gac xpejn Israel. Röpä lojreni nanab gusiechljazreni, gusa'nreni xtojlrēni, nanab chalilajzreni xtidx Jesucrist te gudzucaj Dios xtojlrēni. ²²Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³Niluxh nanä cade tej reguejdx cadro rdedä rni Sprit Dxan xten Dios loä sidedä trabajwduhx, siäüä nen latzguiib guedx Jerusalén. ²⁴Niluxh dina guidxebä, dizana chanälazduhxä xcälñabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlrēni palga chalilajzreni xtidx Dios xcuent Jesucrist —räjp Pabl.

²⁵Räjpzani:

—Naj agucebä dirutu fisac loä, la'tu nani basule'ä xcälñibee Dios lojtu. ²⁶Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlrēni. ²⁷Xhetliidi biäädxdidi loj rextidx Dios ni basule'ä lojtu. Dina nucua'tzä nicla tej xtidxni xcuent xho rlanj Dios guibanu. ²⁸Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe'xtiejn Jesucrist lo crujz te gac gudzucaj Dios xtojlrēni. ²⁹Anancheä che rutdiru narä, siääd bejn nani rlanj chalilajz jztu ste'ca diidx, na'c chalilajztu niclaza jiuu rebejnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't

rexiil. ³⁰Su'za lagajc sa'tu ni guinii didx-xhii lojtu te gunreni gusaan rexepejn Jesucrist xtidx Dios, te chanajlreni redee ni rusguee. ³¹Colhuii te di gusgueereni la'tu. Di jiäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

³²Räjpza Pabl:

—Asia'are, rusa'nätu ladzñaä Dios, gacnäj Dios la'tu. Sutijp xtidx Dios las-tootu, te xca'tu guiraa ni bia'ni diidx guiniidx Dios lojtu, näjza loj guiraa ni abejn Dios bensa'c, nani najc xpejñni. ³³Dina niniabä meel, niclaza xhabä che baluiä xtidx Jesucrist lojtu. ³⁴Anajntu lagajc narä benä dzuun con naä te bio' xhi gudaunää reexamigwä. ³⁵Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjpn.

³⁶Che gulujx gunii Pabl rediidxga, bazuxhibnäjni rebejnga, guredxgunabni lo Dios. ³⁷Dxejcti ronduxh guiraareni gudäazreni guejn Pabl, bachagro'renini. ³⁸Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

Huij Pabl guedx Jerusalén

21 Che basa'tinu rexepejn Jesucrist ro'c, biu'nu nen barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunnu lo xyuj Rodas ni tre'za lo nisdoo. Ro'c biriinu sionnu nen barcw nez guedx Pátara. ²Che bidzunnu ro' guejdxga, bidxälnu te barcw ni sää nez reguedx Fenicia. Dxejc biu'nu nen barcwga te chonnu ro'c. ³Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunnu guedx Tiro cadro gule'creni cargw ni nuu barcwga. ⁴Ro'c bidxälnu rexepejn Jesucrist. Biannänurenini gajdz dxej. Baluii

Sprit Dxan xten Diosreni te guniireni lo Pabl, räjpreni:

—Na'c chäälü guedx Jerusalén.

⁵Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhijbnu te guredx-gunabnu lo Dios.

⁶Che abazadiidxnu sa'nu, nuure biu'nu neñ barcw, biädla laareni gubisacreni rolizreni.

⁷Biriitinu guedx Tiro. Che bidzunu ro' guedx Tolemaida, gulujx xpiajnu biäjtnu neñ barcw. Dxejc biohuiinu rexepejn Jesucrist ni yu' guejdxga, bianänureni tejtis yääl. ⁸Che bara yääl, biriinu guejdxga, sonnu guedx Cesarea. Che bidzunu guejdxga, bionnu roliz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexepejn Jesucrist nani xhet rajpdi guedx Jerusalén. Rolizni huijia'nnu. ⁹Yu' tajp xindxapxteb Felipe. Dios badeed diidx guiniireni lo bejn. ¹⁰Xhidajl dxej guläjznu roliz Felipe. Lañ ni dxunnu ro'c, bidzujñ te niguii ni laa Agabo, biriini nez Judea. Ruzanij Dios xcäriejnñi te guiniini xtidx Dios.

¹¹Che bidzujñni loonu, cua' Agabo xsindoor Pabl, baliibni lagajc reni'ni näjza renaani, najni loonu:

—Anaj Sprit Dxan xten Dios: “Scree suliib rexepejn Israel ni yu' guedx Jerusalén niguii ni najc xtenni sindoorre te gutedrenini ladznaa rebenzajt.”

¹²Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guedx Jerusalén. ¹³Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä neñ latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

¹⁴Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rlaiztis Dios.

¹⁵Che gudejd redxejga, bilucheenu rexhixtennu, biriinu guejdxga, sontinu guedx Jerusalén. ¹⁶Gaii rexepejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, beñ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizni, ro'c gulääznu.

Huihui Pabl Jacoob

¹⁷Che bidzunu guedx Jerusalén, bibalazduxh rexepejn Jesucrist sa'csi siopnu ro'c. ¹⁸Che bara yääl huinänu Pabl lo Jacoob näjza lo renani rnibee guidoo xten rexepejn Jesucrist. ¹⁹Dxejc gudääz Pablreni, bijni diidx xcuent tebgaj redzuun nani badeed Dios bejnñi che gyunäjni rebenzajt nani di gac xpejn Israel, te biejn diajgreni xtidx Dios. ²⁰Che biejn diajgreni xtidx Pabl, gulä'preni xpala'n Dios, räjpzaren lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés. ²¹Abiejn diaj rebejñre xcuentlu. Abiejn diajgreni garenca ruluiilu guiraa rexepejn Israel nani rbäjz neñ reguejdx xten rebenzajt, rulijdxlureni na'c gusal'reni bee rexi'nreni, na'cza chazanäjñureni rexcostumbrnu. ²²¿Xhini'c jiennu? Siejn diajgreni abidzujñlu ree, dxejc suchagsa'reni te jiädreni lojlu. ²³Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. ²⁴Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn

diajgreni xcuentlu. Te gacbeereni laaca rusooblu xleii toMoisés. ²⁵ Biädla rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjt nani di gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni neñ xquidoo rexpejn Israel te huiye'tzreni lo bixhojz neñ guidoo xhi dxej jiädna tejgareni te man te ju't re-bixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuui rexpejn Israel ni siädä Asia lo Pabl neñ guidoroga. Gunaazreni Pabl, dxejcti gusloj cayujnreni bieje, ²⁸ guredxa'reni räjpreni:

—¡Coltaa xpejn Israel! ¡Coltaa te gacnäjt nuure! ¡Bahuilaare! Niguiire najc nani rniyaj rexpejn Israel cadrotis ri-jni. Rulijdxni bejn te di chazanäjrureni xleii toMoisés, riye'tzni lo bejn xhet sajcdi xquidoronure. Colhuilaa xho siäd-näni ree beñ griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahui-ireni sanä Pabl Trófiomos lo nezyuj. Trófiomos najc te benzijt ni siädä guedx Éfeso. Naj cayujnreni xhigab laa niguiiga ni siädna Pabl neñ xquidoro rexpejn Israel.

³⁰ Guideb guejdxga guyu' yärsia', bire' benguihxuj, bixa'treni yejc Pabl, gunaazrenini, gudobxhaxhrene Pabl, gulä-gajcrenini neñ guidoroga. Biägajc re-puertro xten guidoro. ³¹ Lañ ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³² Guredxgajc comandant resoldaad näjza gaii capitán, ruxunreni bidzujnreni

cadro tre' rebejn. Che bahuui rebejn lo comandant näjza resoldaad, guläjz caguijnreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo rebeñ xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant ni-ujn gan niacbeeni xhicuent cayajc bieje sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni. ³⁵ Che bidzunnäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlanjreni nugu'treni Pabl.

³⁶ Siädnañl guiraa rebejn Pabl, rbedxa'reni:

—Colgugu'tni.

³⁷ Che agojl jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An niilu xtidxsaä! ³⁸ An dilu gac niguii ni siädä nación Egipto, nani gudilnäj gubier, nani huinä lo reyubijdz tajp mil niguii nani rugu't bejn.

³⁹ Dxejc räjp Pabl lojni:

—Narä nacä te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰ Dxejc cuäjb comandant guiniä Pabl lo rebejn. Lal ni suga'ni lo scaleer basääd Pabl naani lo rebejn te guedxireni. Che aguredxi rebejn, gusloj Pabl canii lojreni didxsaj hebreo, räjpni:

22 —Guejbtu bengool, guejbtu resa'ä, näjza la'tu dade'. Gucuaadijgtu rextidxä —räjpni.

²Che biejn diajgreni caniini didx hebreo, dxidujru guzuj rebejn. Räjþ Pabl lojreni:

³—Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc releii xten rextotadgoldoonu. Guideb xtipä basobä ni gunibee Dios. Gucä si'cpac ni najctu naj. ⁴Dxejcti bidxechduxhä loj renani huililajz xtidx Jesucrist, bagu'täzareni. Balibä xhidajl bejn, niguii näjza gunaa, con cadenguiib. Basäuäreni neñ latzguiib. ⁵Bixhojz ni sajcro näjza guiraa rebengool ni sajcro neñ xquidootu, sajç guinii xhini'c benä. Laareni baniidxreni guijt loä. Ni'c huinää lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jädnääreni guedx Jerusalén te jiaüreni neñ latzguiib, te gusacsäreni rebejnğa.

Gunii Pabl xho huililajzni xtidx Jesucrist

(Hch. 9:1-19; 26:12-18)

⁶Räjþzani:

—Dxejç hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga. ⁷Biabrloä lo yuj, dxejç biejn diagä te se' ni canii loä, najni: “Saulo, Saulo, çxhicuent rusacsflu narä näjza rexpenä?” najni. ⁸Dxejcti räpä lojni: “ÇChuluj, Dad?” Najni loä: “Narä nacä Jesucrist ni siääd Nasare't, nani cagusacsíduxhlu.” ⁹Rebejn ni sanää bahuiloj bajlga, bidxebreni, niluxh di diajgreni niejn xse' nani gunii loä. ¹⁰Räpä lojni: “Dad, çxhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.” ¹¹Bastujxh bajlga loä, diru loä niñ, ni'cni gunaaz resa'ä naä, sontinu guedx Damasco.

¹²Räjþ Pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexpejn Israel rnií nadalajz lo dade'ga. Biääd Ananías loä. ¹³Cuä'ä guzujni najni loä: “ÇSaulo, betzä, bahuisac!” Lagajc dxejç biajc loä, bahuiä lojni. ¹⁴Naj Ananías loä: “Xtios rextotadgoldoonu agulelu. Gule Dios luj te jiejn diajglu rediidx ni rlajzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. ¹⁵Loj guiraa bejn susule'lu guiraa ni bahuiilu näjza nani biejn diajglu. ¹⁶ÇXhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluini xtidx Dios lo rebenzijt

¹⁷Che gubi'ä guedx Jerusalén, biu'ä neñ guidoro xten rexpejn Israel te guredx-gunabä lo Dios. Lañ ni cabedxcanabä lo Dios, astoo gunixcalä, ¹⁸dxejç bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.” ¹⁹Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neñ latzguiib. ²⁰Che bacuaareni guij yejç Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban lañ ni bacuaareni guij.” ²¹Dxejcti naj Jesucrist loä: “Huij. Suxhañ luj zitduxh. Chäälü lo guiraa rebenzijt ni di gac xpejn Israel.”

Bia'n Pabl neñ rolijzro xten resoldaad

²²Bacuadiajg guiraa rebejn lañ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäjñ guibajnrni.

²³Sanuutis cabedxa'reni. Gulääreni xcamangwreni, cacuaazareni yuyol

jiaa. ²⁴Dxejcti gunibee comandant lo resoldaad, räjpni:

—Colchanä Pabl nen yuro xtenu. Ro'c colquiin Pabl te guiniini didxgulii, te gacbeenu xhicuent rbedxaduxh rebejn lojni.

²⁵Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beñ roman che gajdtu gacbee xhi dojl bejnmi, ä? Et si'cti caj lo xleilu.

²⁶Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjludade're, sa'csi najcni beñ roman.

²⁷Biädguxun comandant lo Pabl, räjpni:

—¿La gulii najclu beñ roman, ä?

Räjp Pabl lojni:

—Guliini.

²⁸Dxejcti räjp comandant:

—Narä badedä xhiroob meel te nacä beñ roman.

Dxejcti räjp Pabl lojni:

—Narä che gołali nacä beñ roman.

²⁹Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beñ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

³⁰Che bara yääl, rrajz comandant gacbeeni xhicuent rrajz rexpejn Israel ju't Pabl. Ni'c gunibeeni jääd rebixhojz ni sajcru näjza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

23 Rdxelodzu'tz Pabl lo rebejn ni tre' ro'c lał ni räjpni lojreni:

—Narä gusule'ä tiop diidx lo guebttu, beñ Israel, sa'ä. Guideb ni nabanä ruzobä

xtidx Dios. Di lastoä guidxejb nez lo Dios —räjp Pabl.

²Che biejn diajg Ananías, bixhojz ni sajcru, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rmi leiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

⁴Reni suga' cuä' Pabl räjp lo Pabl:

—¿La dilu gacbee laa bixhojz ni sajcru xten Dios? Na'c guiniyajluni.

⁵Dxejcti räjp Pabl lojreni:

—Rexamigwä, dina niacbeä caniä lo bixhojz ni sajcru, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guiitz ni bacuaa reni gunii xtidx Dios.

⁶Gucbee Pabl tiop cuaa najc reni tre' ro'c. Yu' reni najc beñ saducee, yu'za reni najc beñ farisee. Dxejc guredxa' Pabl räjpni lojreni:

—Sa'ä, narä nacä te beñ farisee, xi'nza te beñ farisee narä. Rililazä sibansac bejn lo rebengut, ni'c cabe'creni xquejā ree.

⁷Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee.

⁸Di lajz resaducee chali sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. ⁹Guyu' te bieiro. Dxejcti huisulii gaii farisee nani najn leii, gusloj caniduxhrene, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tilnäjnju, dxejc sidxechnäj Diosnu.

¹⁰Che gusloj cabedxaduxhrene lo sa'reni, bidxejb comandant, andi ju'treni Pabl, caxha'treni yejcni. Dxejcti gunibeeni biäjt resoldaad cadro suga'

Pabl. Guideb xtijpreni gulääreni Pabl galäii rebejnğa huinäsacrenini neḡ yuro xtenreni.

¹¹ Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

¹³ Si'cti tiuu niguii bia'n diidxga.

¹⁴ Bidzujnreni lo rebixhojz näjza reben-gool, räjpreni lojreni:

—Abia'nnu diidx, xhet guidaudinu, xhetza guidaudinu palga dinu guigutx-gaa Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhaḡ diidx lo comandant te guixee jiädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che jiädnä comandant Pabl ree, nuure sugu'tnuni lo nezyuj che gajdni guidzujn ree —räjp reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoladaad. Che bidzujjni, biu'ni räjpni lo Pabl rediidx ni biejn diajgni. ¹⁷ Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpni lo comandant:

—Pabl, nani niäu neḡ yuro xten resoladaad, gunab loä jiädnälää bi'nre lo guejblu te guiniini te diidx lo guejblu —räjpni.

¹⁹ Dxejc gunaaz comandant naa bi'nre, huinäniini te laad cadre rut jiejni diajgni xtiidxreni, dxejc räjpni lojni:

—¿Xhini'c rlanjzlu guiniilu loä?

²⁰ Dxejc bazejcnii diidx, räjpni loj comandant:

—Abia'n te cuaa xpejn Israel diidx siniabreni lo guejblu jiädnä guejblu Pabl ro jusgaad guixee. Sujnsireni si'c ni rlanj jiejnru diajgreni diidx xcuent Pabl. ²¹ Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjztsireni guxhaḡ guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sii bi'nga rolizjni, räpxgaani lojni:

—Rut lojdipac gäblu guiniilu diidxre loä.

Huij Pabl lo Pels ni najc gubernador

²³ Dxejcti gurejdx comandant tiop capitán, räjpni lojreni:

—Colgutojtp tiop gayuu soldaad, chää guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcagaa guxhijn guiriireni ree. ²⁴ Colquuil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

²⁵ Dxejcti bejn comandant te guijtz chanäreni lo gubernador.

²⁶ Loj guijtzga nii scree: “Gubernador Pels, nani sacduxh. Narä, Claudio Lisias, ruxhaḡä tixtios lo guejblu. ²⁷ Rediidxre rucuaá lo guejblu. Gunaaz rexpejn Israel niguiire, luxh paru dina nidzunga'cä con resoladaad, nugu'treni. Che gucebeä najcni beḡ roman, guläänuni ro'c. ²⁸ Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. ²⁹ Dxejc gucebeä requej ni rbe'creni najc ganax xcuent leii xtenreni, niluxh xhet bejndini te

nungäjł guetni, niclazä nanab jiauni nen latzguiib. ³⁰Che baxhalreni diidx loä cabäzxiha'tz rexpejn Israelni te ju'treni dade're, baxhalga'cäni lo guebłu. Agunibeäza jiadle'c rexpejn Israelre xquejreni lo guebłu. Ni'tcis miä lo guebłu", si'c caj lo guijtz ni bejn comandant.

³¹Che biu' guxhijn, huixii resoldaad Pabl sanärenini guedx Antipatris si'cni gunibee comandant gunreni. ³²Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³Che bidzujn redee Cesarea, badeedreni xquijtz comandant lo gubernadoo, huiinäzarenini Pabl lojni te biembeenini. ³⁴Che gulujx bilni guijtzga, gunabdiidxni lo Pabl:

—¿Caro siäädłu?

Che gucbeeni siääd Pabl Cilicia, ³⁵räjpni lo Pabl:

—Guidzujnsi rexpejn Israel ni cadx-echnäj luj, sucuadiaggacä xtiidxlu —räjp gubernadoo.

Gunibeeni ga'p resoldaadni nen yuro xten Herodes.

Gunii Pabl xtiidxni lo Pels

24 Gudejdti gaii dxej, dxejc bidzujn Ananias, bixhojz ni sajcru, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoo. ²Che biädnäreni Pabl, gusloj Tértulo cabe'c xquej Pabl lo gubernadoo. Räjpni lo gubernadoo:

—Xquixtioste guebłu dxiduxh nabannu. Cayacnäduxh guebłu laadxnu con redzunsacduxh ni cayujn guebłu. ³Xquixtiosduxh guebłu, gubernadoo Pels, xcuent guiraa redzunsac ni rujn guebłu guira nejz. ⁴Luxh na'cru gusieednu guebłu, gucuadiaglaa guebłu tiop diidx. ⁵Agucbeenu xho najc niguiire. Benguidxduxhni. Cadrotis rijni rujnii bieje lo rexpejn Israel. Laani nibee te cuaa ni laa nasaren, nalajznu

rebejn nani rililajz xtidx Jesucrist ni biääd guedx Nasare't. ⁶Rlajzlini nuxhinni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. ⁷Niluxh bidzujn comandant Lusias näjza resoldaad. Diptis badzucajreni niguiiga ladznanu. ⁸Laani gunibeeni lo guebłu jiaäd reni rbe'c xquejni. Naj lagajc guebłu sajc guiniabdiidx lojni te gacbee guebłu guli guiraa requej nani rbe'cnu xcuentni —räjp Tértulo.

⁹Dxejcti guiraa rexpejn Israel ni suga' ro'c räjp guliica xtidx Tértulo. ¹⁰Dxejcti bejn gubernadoo seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guebłu, sa'csi anana agujc xchero lacti huen rujn guebłu yälguxhtis nación Israelre —räjp Pabl—. ¹¹Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. ¹²Nicla tej dina nichagdilä bejn nen guidoro. Nicla tej dina niunä bieje nen reguidobäz, nicla ro nezyuj. ¹³Agule'creni quej xtenä lo guebłu, niluxh nicla tej redzuunga dina niunä. Di gacdi guluipacreni lo guebłu guli najc xtiidxreni. ¹⁴Rniliäpac lo guebłu: Ranä Xtios retoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. ¹⁵Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujn te dxej che guibansac rebengut, rebenguidx sigajc rebensa'c. ¹⁶Ni'cni racbeä laaca nabanä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajdi guiliäs dixhii xcuentä.

¹⁷Räjp Pabl:

—Agujc xchej yu'a zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios. ¹⁸Ni'c sanää guidoro. Ro'c bidxäjl rexpejn Israel ni siääd Asia narä. Agucnayaä si'c ni rnibee xleiinu. Xhet benxhidajldi suganää, xhetza bieydi cayunä. ¹⁹¿Con rebejnğa naj? Te cue'creni quej lo guejblu palga yu' xhini'c rdxechnäjreni narä. ²⁰O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. ²¹Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

²²Che biejn diajg Pels xtidx Pabl näjza sa'csi najne'ni xcuent diidx nani baluui Jesucrist, basoobni stee dxej guidxagsac sa'reni räjpni lojreni:

—Che jiaädli comandant Lisias dxej gunä yälguxhtis —räjp Pels.

²³Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rla-jztisni gunni. Na'cza gudxojnni jiaäd rexamigwni te fiireni lojni.

²⁴Che gudejd balti dxej, gubi' Pels, biädnäni chäälmi Drusila. Drusila najc ben Israel. Dxej gurejdx Pels Pabl te gusule'ru Pabl xtidx Jesucrist. ²⁵Gunii Pabl xho nanab guibansa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujn dxej gac Dios juejz loj guiraa rebejn te fiini xhi bejnreni. Racsesli Pels tant bidxejbni biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

²⁶Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. ²⁷Si'c gudejd tiop

ijz. Dxej birii Pels gubernadoor. Dxejcti biu' Porcio Festo, gujcn gubernadorcoob. Niluxh Pels rlaiz chanälajz rexpejn Israelni, ni'c basa'nni niäusijc Pabl.

Gunii Pabl xtiidxni lo Festo

25 Che biu' Festo gujcn gubernadorcoob xten reguejdxga, bia'nni guedx Cesarea choj dxej. Dxej biriini ro'c sääni guedx Jerusalén. ²Che bidzujni guedjdxga, rebixhojz nani rnibee näjza reniguii ni sajru lo rexpejn Israel biääd lo Festo. Gusloj cabe'creni xquej Pabl lojni. Gunabduxhrene lo Festo ³sa'csi rlaizreni gunni te huen laareni, guinibeeni jiaädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezyuj.

⁴Dxejcti räjp Festo lojreni:

—Suniau Pabl guedx Cesarea. Di gaclaa guibi'ä guedx Cesarea. ⁵Suchää reniguii ni sajru lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnni —räjpni.

⁶Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni. ⁷Che bidzujn Pabl lojni, biääd rexpejn Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸Dxejcti räjp Pabl lojreni:

—Nicla tej latsiaj dina niunä, dina niunä latsiaj loj lei xtennu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹Dxejcti Festo, sa'csi rlaizni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

¹⁰Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäjł cue'creni xquejä lo guejblu, xhet guedx Jerusalendi. Ananchee guejblu xhet latsiajdi benä lo rexpejn Israel.¹¹ Palga nacä te benguijdx, o palga yu' xhi latsiaj benä te nungäjł guetä, xho dina xcäbä guetä. Palga xhet latsiajdi benä nani canii rexpejn Israel benä, dx-ejc rutliidi sajc gutede narä ladznaareni. Suchale'creni xquejä lo César nani najc reii xten reben roman —räjp Pabl.

¹²Che guninäj Festo reguxhtis xten xquidoro rexpejn Israel, räjpni lo Pabl:
—Luj gunablu chäälü loj reii César.
Mbjaj. Sijlu lo reii César —räjp Festo.

Huixiireni Pabl huinärenini lo reii Agripa

¹³Che gudejd balti dxej, bidzujn reii Agripa näjza chäälmi Berenice guedx Cesarea. Biädhuiireni gubernadoor Festo.
¹⁴Che guyu'reni ro'c xchej, bij Festo didix lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels.¹⁵ Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni.
¹⁶Räpä lojreni: “Di leii xten nación roman gusaan guet te bejn palga di bejn jäädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.”¹⁷ Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä.¹⁸ Benä xhigab pet yu' xhi cosro bejn. Luxh che gusloj cabe'creni xquejni, gucbegacä xhet latsiarodi bejn Pabl.¹⁹ Alga cadiłnäjrenini xcuent xleiireni, xcostumbrreni. Guniizarenini xcuent te niguii ni laa Jesucrist. Agujtni, niluxh canii Pabl gubansacni lo re-

bengut.²⁰ Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni.²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jääusijcni lal ni gac guxhaläni lo César —räjp Festo.

²²Dxejcti räjp Agripa lo Festo:
—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:
—Guxicee gucuadiajglu xtiidxni —räjpni.

²³Che bara yääl, biääd Agripa näjza Berenice, luxh sucheduxhrene. Näjza recapitán ni sajcro näjza rebejn ni sajcro lo guejdxga biu'reni nen yuro xten Festo. Dxejc gunibee Festo biääd Pabl.²⁴ Dxejcti räjp Festo lo guiraa reni re' nen yuro:

—Reii Agripa näjza guiraa rebejn ni tre' ree, colcuadiajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhrene guetni.²⁵ Niluxh narä rchaloä xhet bejndini te nungäjł guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni.²⁶ Naj dina ganä xhini'c gucuaä lo guijtzt te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtzt ni chää lo César.²⁷ Narä runä xhigab di nungäjł guxhalä niguiire ni niäu latzguuib lo César palga di gacdi gusule'ä xhi quej xcuentni cabe'c rexpejn Israel loä.

Gunii Pabl rextiidxni lo reii Agripa

26 Dxejcti räjp Agripa lo Pabl:

—Gunilaa xtiidxlu loonu.
Dxejcti guläs Pabl naani, gusloj cagusule'ni diidx lojreni. Räjpni:

2—Reii Agripa, rbalazduxhä sa'csi saĵ gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. 3 Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdx-agdijl sa'reni. Ni'c rniabduxhä na'c jieed guejblu gucuadiaglaa guejblu guiraa rextidä.

4 Räjpa Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. 5 Galooliza numbeereni narä, malaii guicäjpreni gucä te farisee nani bazobduxhru xleiinu si'cni rililajznu. 6 Naj suga'a ree, rlajzreni jäüä sa'csi rililazä diidx nani bia'n Dios con retoxtad-goldoonu. 7 Guitzubitiop cuaa rexpejn Israel huililajz siliäs Dios guiraa rebengut te guibansacreni. Ni'cni bazuxhibreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebengut te guibansacreni, ni'cni rlajzreni gusaüreni narä. 8 Palga abejn Dios xhigab guiliäsni guiraa rebengut te guibansacreni, xhicuent di lajztu chalii xtidx Dios?

9 Räjpa Pabl:

—Narä benäza xhigab galoo nanabpac guidxe'chä loj rexpejn Jesucrist ni siääd Nazare't, ni'c batedäreni trabajwduxh basäuäreni nen latzguiib. 10 Guiraa recosre benäza guedx Jerusalén. Baniidx rebixhojz ni rnibee guijtz loä te basäuä rexpejn Jesucrist nen latzguiib. Che biäurenin nen latzguiib, narä gule'cä xquejreni te gujtreni. 11 Balti huält basacsiduxhäreni lagajc nen reguidobäz te niniyajreni Jesucrist. Luxh basacsiduxhäreni, hua'a guideb nez reguedxz-ijt te ro'c huisacsä rexpejn Jesucrist.

(Hch. 9:1-19; 22:6-16)

12 Räjpa Pabl:

—Ni'c sa'a nez guedx Damasco, ca'a guijtz ni baniidx rebixhojz ni rnibee. 13 Rniliä lo guejblu, reii, si'cti läidxej, bahuiä te bajl ni siääd xhaguibaali. Rsanijruni loj gubijdx. Basanijni guideb gabi cadro suga'a näjza reni sanäa. 14 Che biabrloonu lo yuj, biejn diagä xse' te ni canii loä con didx hebreo: “Saulo, Saulo, xhicuent rusacsflu narä näjza rexpenä? Che rusacsflu narä, lagajc luj rdejdlu trabajw, si'c te gon ni rucuanii' yejc garu'ch.” 15 Dxejcti räpä loj: “Chu luj Dad?” Dxejc najni loä: “Narä nacä Jesucrist nani cagusacsfluxhlu. 16 Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu. 17 Naj suxhalälu loj rexpejn Israel näjza lo rebenzijt nani di gac xpejn Israel. Che gusacs rexpejn Israel näjza rebenzijt luj, sacnäduxhälu, te di ju'treni luj. 18 Gacnäa lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirurenin gusoob xtidx Benxgab ni rnibee rebenxgab, sa'csi susoobreni xtidx Dios. Che chalilajzreni rextidxä, sudzucaj Dios xtojlni. Dxejcti suchaag Diosreni loj renani anajc benñaya sa'csi basoobreni xtidx Dios, huililajzreni xtidxä.”

19 Räjpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. 20 Gunixgää xtiidxnin lo reben Damasco. Räpä lojreni: “Colgusiech-lajz, colgusoob xtidx Dios. Coluyjn dzunsa'c te gacbee rebejn abasiech-lajz, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel. 21 Sa'csi benä si'c, gunaa rexpejn Israel narä nen guidoro, rlajzreni nugu'treni narä. 22 Naj racnäj Dios narä, naj sanuutis cagusule'ä redi-

idxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijtz nani bacuaa to Moisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. ²³ Najreni sidejd Crist trabajwduxh, sugu'trenini. Niluxh sa'csi ganiddoo laani guibañsacni lo rebengut, ganiddooza laani suluiini loj rexpejn Israel näjza loj guiraa rebenzijt guliipac xtidx Dios, sibansac bejn lo rebengut, si'c ni guniini galooli.

Di Agripa nililajz xtidx Jesucrist

²⁴ La₁ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtz ni'c cayajc yejclu.

²⁵ Dxejcti räjp Pabl lojni:

—Rniliä lo guebllu dad gubernador Festo, xhet rajcdi yecä. Ganax didxlii cania. ²⁶ Ree suga' reii Agripa. Laani nancheeni guiraa rediidxre, ni'c guyasi cania rediidxre lojni, dizana guidxebä sa'csi anajnni guli guiraa ni gujc, sa'csi xhet xhiga'tzdi gujcreni. ²⁷ Guebllu reii Agripa, ¿la rililajz guebllu xtidx reniguii nani bacuaa xtidx Dios, ä? Nancheä rililajz guebllu diidxga —räjp Pabl.

²⁸ Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹ Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guebllu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni.

³¹ Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jäüni.

³² Dxejcti räjp Agripa lo Festo:

—Paru dini niniab chääni lo César, sajc nuslaanuni.

Birii Pabl säa nez guedx Roma

27 Basoobtireni dxej ni niu'nu nen barcw te chonnu Italia. Dxej bateedreni Pabl näjza sgaii bejn nani niäuzo lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ² Näjza te dade' ni laa Aristarco guzaj, siäädni guedx Tesalónica xten Macedonia. Biu'nu nen barcw ro' guedx Cesarea. Barcwa siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwni ni yu' guejdxga te bahuiireni Pabl, badeedreni xhi rquiinni. ⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäjgwnu, te guxiiru rda' bej loonu. ⁵ Che sonnu nen barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia. ⁶ Ro'c bidxäjł capitán xten resoldaad stee barcw ni siääd guedx Alejandría. Agojl chää barcwa Italia. Bateedtini guiraanu lo barcwa. ⁷ Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu nen barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos Puertos cadro guxii säab bej. Gajxh ro'c tre' guedx Lasea. ⁹ Agujc balti dxej cayaclaanu, luxh agudejzda dxej ni rucua'n rexpejn Israel, guxii riäädx chaa ijz. Rebäire di bejn chää nen barcw sa'csi yuduxh riesgw lo nisdoo, ni'c balijdx Pabl rebejn, ¹⁰ räjpni lojreni:

—Rexamigwä, runxgää bis guejbtu, palga chonnu neñ barcw chanuunu xne-jznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpmi.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw.

¹² Luxh sa'csi lajtga dini gajc huen tedreni rebäii nałduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. ¹⁴ Niluxh di niacclaa gusloj te nisguipeduxh birii nez redajn xten Creta. ¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rłajzni. ¹⁶ Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan guläsreni canuu neñ barcw. ¹⁷ Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibiłni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rłajzni. ¹⁸ Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. ¹⁹ Ni riojn dxej, lagajc laareni basälreni lo nisdoo guiraa xtrast barcw. ²⁰ Che agujc balti dxej niäu lo gubijdx, diza rebale' nien xhaguibaa sa'csi lałtis cayajb nisguipeduxhga, bi-ennu xhigab guiraanu sejtnu. ²¹ Xchero rut rłajzdi gau. Dxej gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajw-duxhre. ²² Niluxh colcuedcxi lastootu. Niclatej bejn ni siääd lo barcw di guet. Barcwitis sinitloj. ²³ Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'a, ²⁴ najni loä: “Na'c guidxejblu Pabl. Nanabpac chäálu lo reii César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä. ²⁵ Ni'cni canä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadro chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujñ barcw gajxh lo yuj, ²⁸ ni'c bastejbreni te guiib lo duu xhajñ nisdoo, te barexhreni ro'c, dx-ejc gucbeereni najc nisdoo jiät si'cti galb-itzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jiät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rłajzreni malai jianijga lo guedxliuj. ³⁰ Dxejcti gulät remos canuu lo nisdoo cayujnsireni si'cni chastejbreni stee guench guiib lo nisdoo, niluxh rłajzreni guxunreni guidon la sajc guidzujñreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcälñabajntu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³ Che gusloj cayani, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. ³⁴Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

³⁵Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. ³⁶Dxejc bibaa-lajzreni, näjza laareni gusloj cayajwreni. ³⁷Nuunu najcnu tiop gayuu gayonbitzibixho'p bejn ni yu' nen barcwga. ³⁸Che agujc gudajwreni, basälreni triuu lo nisdoo te bicharu barcw.

³⁹Che bianisac, direni niembee yujga, niluxh bahuiireni cadro rdzujn te gueubaz ro' nisdoo cadro yu' xhiroob yujxh ro' nisdoo. Rlajzreni nusiureni barcw ro'c. ⁴⁰Dxejcti baslaareni guidap guench guuib ni naaz barcw, bia'nreni guideb caden nen nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo. ⁴¹Sas biu'reni te lajt cadro rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejt barcw sa'csi sanuutis caguijn nisdoo detz barcw. ⁴²Dxejcti rlajz resoldaad nugu't repres te di guixoobreni lo nis guxuren. ⁴³Niluxh di rlajz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. ⁴⁴Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

Bidzujn Pabl lo yuj ni laa Malta ni re' lo nisdoo

28 Che bidzujnmu lo yuj ni tre' lo nisdoo, biembeenu yujga najc ni laa Malta. ²Gucnäj rebejn ro'c nu-

ure, gule'creni guiboo bahuiireni nuure sa'csi cayacnalduhx, cayajbza nisguj. ³Ca' Pabl te däaz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni naa Pabl. ⁴Che bahuii reben Malta li najl bäl nialajzga cayauya' naa Pabl, gusloj cayajbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojlni, sejtmi naj.

⁵Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶Dxejc reben ro'c cabäz fiireni la sisiägüj naa Pabl o laa sejtmi. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolizjni chon dxej. Huenduxh gujc dade'ga, baniidxni guiraa ni biquiinnu. ⁸Naga' xtd Publio cayacxhuuni, yu'ni xliaa, cayajczani yobrejn. Huihuii Pabl. Guredx-gunab Pabl lo Dios, dxejc batzuub Pabl naani yejcn, basiacgajcnini. ⁹Che gucbee rebenguejdxga abasiajcn bejn racxhuuga, bidzunäjreni bejn racxhuu lo Pabl, basiajc Pabl guiraareni. ¹⁰Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu nen barcw.

Bidzujn Pabl guedx Roma

¹¹Agujc chon bäii yu'nu ro'c che biu'nu nen te barcw ni siäd Alejandria. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹²Biriinu Malta sonnu nen barcw nez guedx Siracusa. Ro'c bia'nnu chon dxej. ¹³Dxejcti biusacnu nen barcw, sonnu lo nisdoo cheni bidzunlinu guejdx ni laa Regio.

Che bara yääl, gubi' te bej birii lad sur. Biusacnu nen̄ barcw. Bara yääl bidzunu guedx Puteoli. ¹⁴Ro'c bidxaagnu gaii xpejn̄ Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵Che gucbee rexpejn̄ Jesucrist ni yu' guedx Roma siopsaanu nez Roma, biää-dreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. ¹⁶Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

Baluii Pabl xtidx Dios lo reben̄ Roma

¹⁷Che gudejd chon̄ dxej, gurejdx Pabl reni rnibee lo rexpejn̄ Israel. Che bidxaag sa'reni cadre yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejn̄ Israel, dizana nibälazä xleii toMoisés. Niluxh basäureni narä nen̄ latzguiib guedx Jerusalén, dxejcti bateedreni narä ladznaa reroman. ¹⁸Che biejn diajgreni xtidxä, rlanj reguxhtis roman nuslaa narä sa'csi xhet benädi te nugu'treni narä. ¹⁹Niluxh naaddi rexpejn̄ Israel guslaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexpejn̄ Israel cue'cä. ²⁰Ni'cni guredxä la'tu te fiä lojtu, te guininaä la'tu, sa'csi rililazä lagajc si'c rililajz xpejn̄ Israel sibansac rebengut, ni'c nalibä cadenre.

²¹Dxejcti räjpreni lojni:

—Nicla tej guiijt gajd reguxhtis xten reguedx Judea guxhāl loonu xcuentlu, gajdza rexpejn̄ni ni bidzujn̄ ree jiädsan̄ diidx xhet laadi bejnlu. ²²Rlanjnu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidx-coob xten Jesucrist —räjpreni.

²³Guletireni te dxej guidxagsa'reni. Che bidzujn̄ dxejga, bidxagsa' xhidalduxh bejn̄ nen̄ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben̄ Israel jiäd. ²⁴Yu'reni huililajz xtidx Pabl, yu'za reni di nililajz xtiidxni. ²⁵Sa'csi di niacijdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxan xten Dios rediidxre guniini, räjpni lo rextadgoldoonu:

²⁶Huij, gunii lo rebejn̄re, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷Agucnajd lastoo rebejn̄re sa'csi di rlanjreni chalilajzreni xtidxä.

Direni cuadiajg xtidxä sa'csi di rlanjreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl̄ te gudzucaj Dios xtojln̄reni.

²⁸Räjp Pabl lojreni:

—Colgacbee. Najli sisiule' xtidx Dios lo reben̄zijt ni di gac xpejn̄ Israel te gusiejch lajzreni, te gudzucaj Dios xtojln̄reni. Rniliäpac lojtu, sililajzreni rextidx Dios.

²⁹Che gulujx gunii Pabl rediidxga lojreni, ensilaareni gusloj cadxagdijl sa'reni laļ ni sääreni.

³⁰Tiop ijz guläjz Pabl guejdxga nen̄ yu' ni cualaani. Biuni guiralii rebejn̄ ni biäd rolizni. ³¹Lo guiraa rebejn̄ga basule'ni xho rnibee Dios lojreni. Bijzani diidx xcuent redzuun nani bejn̄ Jesu-

cris. Di lastooni nidxejb, rutza badxo-
jndi guniini.

Guijtz Nani Bacuaa Pabl Lo Reben Roman

Rucuaa Pabl lo reben guidoo nen guedx Roma

1 Narä, Pabl, nacä te xmos Jesucrist, laani gule narä te gusule'ä xtidx Dios loj rebejn.

²Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiijtz xten reprof'e'tga. ³Rediidx ni rusule'ä najc xcuent Jesucrist, Xi'n Dios, ni najc xagdoo toreei David xcuent tiejxhni. ⁴Xcuent Xsprit Dxaan Dad Jesucrist, najcni Xi'npac Dios. Badeed Dios yälrnibee lojni, ni'cni gubansacni lo reben gut. ⁵Laani gucnäjni narä, guleni narä te gusule'ä xtiidxni te guzobdiajgtu, te chalilajz rebejn ni rej guideb guedxliuj xtiidxni. ⁶Luxh nadxaagtu loj rebejn ni guleni te chalilajzreni xtiidxni.

⁷Ruxhalä guiijtzre lojtu ni yu' guedx Roma, guiraatu ni sanälajz Dios ni bibeetu gactu bendxan. Gacnäj Dios ni najc Xtdanu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj ruuj bejn diidx xcuent xcälrlililajztu. ⁹Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist. ¹⁰Sanuutis canabä lojni, top sajc jiadhuiä lojtu si'cni rlazä gunä agujc xchejli. ¹¹Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. ¹²Nalajznu, te gustioobnu lajz sa'nu xcälrlililajz xtidx Dios xten sa'nu.

¹³Rebetzä rlazä gacbeetu balti huält benä xhigab jiadhuiä lojtu, luxh gajd

gacdi jialä. Rlazä jiadhuiä lojtu te chalilajz xhidajlru bejn xtidx Dios sigajcni salilajzreni guiralajt cadro hua'a loj rebejn ni di gac xpen Israel. ¹⁴Nungäjlpac gusule'ä xtidx Dios loj rebejn nani rnii garen-garen didxsaj, sigajc loj reben griegw, loj renani nayääl, sigajc loj reben najn. ¹⁵Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcälrnibee xtidx Dios

¹⁶Sa'csi dina guituiä xcuent xtidx Dios, sa'csi najcni yälrnibee xten Dios te guslaani lo dojl chutis bejn nani rlaz chalilajz xtiidxni, ganidtoo reni najc rexpejn Israel, dxejcti näjza rebejn ni di gac xpen Israel. ¹⁷Sa'csi xtidx Dios rusule' xho nanab chalilajz te bejn te gacni te bensa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te bejn xtidx Dios, najcni te benaya nez lo Dios, nabannäjni Dios xcuent xcälrlililajzni."

Rextojl bejn

¹⁸Xcälrdxe'ch Dios nani yu' xhaguibaa siajbni yejc rebejn nani gun dojl, nani rlaz gun cosguijdx, nani di gusaan guisieed sabejnreni didxgulii. ¹⁹Sa'csi anancheereni nani sajc gan bejn xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰Cheni birixtiejli guedxliuj, recos nani di gacdi fii bejn xcuent Dios, si'c xcälrnibeeni ni najc par tejpas, si'c xtujxh xtenni, huenliisi ruzenreni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlaz Dios gunreni. ²¹Ni'cni, mase biembeereni Dios, direni niliäp xpala'nni te ganreni Gueb Dios, dizarenen nudeed xquixtios lojni. Alga guyalajz gujcreni, bicäy xcäriejnreni, naarenen huen najc

gunreni si'ctis ni jiajb yejreni, si'cni rsia' lajzreni neñ lastooreni. ²² Caniireni nanduxhreni, per direni gan, nayäälreni. ²³ Gulälazreni xcälr dimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te nigui ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.

²⁴ Ni'cni gulälaz Diosreni, basaanni gunreni si'ctis ni rlaizreni. Bejnreni dojl con resa'reni. ²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbzareni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnä j nigui, lagajc sagu-naareni resnäjreni. ²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijreni latsiaj ni rujnreni.

²⁸ Luxh sa'csi di rlaizreni jiureni Dios, basaanti Dios suyu' cosguijdx tis xcäriejnreni, te chanutisreni lo xcällatsiajreni, rujnreni recos ni xhet laadi. ²⁹ Guidxareni dojl, näjza cosguijdx, näj yälruuilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusguereeni sa'reni, rdxechnäjreni sa'reni, rniizareni didxxhii. ³⁰ Rniyaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacoob rbäxtiejreni, gualajzreni lo xczajzreni, ³¹ nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäj] gacni, dizareni gulasajz sa'reni. ³² Luxh mase agucbeereni gun Dios yälguxhtis lojreni, najnzareni nungäj] guetpac renani

rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

Dios rujn yälguxhtis con didxguliipac

2 Ni'cni, ¿canejz chäätu, la'tu benguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga. ² Nancheenu sujn Dios yälguxhtissa'c loj renani rujn sa' dojlga. ³ Ben guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yälguxhtis lojlu xcuent xtojllu, ä? ⁴ O ¿la rbälazlu ni rujn Dios, najcni huenduxh, lacti guroob najc xcälrulasajzni, rapduxhzani pasens? ¿La dilu gan dee najc ni gacnäjl gu siechlaizlu te guibicajlu lo dojl, ä? ⁵ Luxh sa'csi nadduxhlu, di lastoolu guigoodz te gusiechlaizlu, cagutajllu yälguxhtis ni gaclu che guidzuj dxej ni gun Dios yälguxhtis loj reben guedxliuj, ⁶ siguijx Dios loj tejgatu xcuent dzuun nani bejn tejgatu. ⁷ Loj rebejn nani rlaiztisreni guiba'nsa'c, ni gusoob xtiidxni, sudeed Dios yäl nabaj par tejpas sa'csi gudiilreni xhaniduj näjza go'preni xpala'nreni loj Dios, rlaizreni guibajzreni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoooreni reyällatsiaj, redidxguijdx. ⁹ Guiraa reben guedxliuj ni rujn dojl sidejd trabajwduxh näjza sac-huin lastooreni; ganid rexpē Israel, dxejcti näjza reben griegw. ¹⁰ Loj guiraa rebejn nani rujn cos-hueen, sudeed Dios xhaniduj, näjza bala'n, näjza yälrbecdx lastooreni, ganid rexpē Israel, dxejcti näjza reben griegw.

¹¹ Sa'csi tebloj najc guiraasi rebejn nez loj Dios. ¹² Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälguxhtisreni xcuent xtojlrēni. ¹³ Xhet ganaxdi renani rucua diajgtis xleii Moisés najc bennaya nez loj Dios; rebejn ni rusoobpac rexleii toMoisés, reni'c najc bennaya loj Dios. ¹⁴ Yu' xhidal bejn ni di gumbee xleii toMoisés, dizareni gac rexpen Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. ¹⁵ Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. ¹⁶ Guiraa recosre saj che guidzujn dxej ni gun Dios yälguxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpen Israel näj xleii toMoisés

¹⁷ Luj ni laalu xpen Israel, ni rniilu sanäpaclu xleii toMoisés, rmiduxhlu najclu xpen Dios, ¹⁸ rniilu nancheezalu xhini'c rlanj Dios gunlu, anajnzalu xhini'c najc hueenru sa'csi bisiedsa'c paclu leii. ¹⁹ Rchalolu saj caguluilu nezyusa'c lo rebejn nani najc si'c loti'äp, saj guzanijlu xcäriejn reni nacäy xcäriejnreni. ²⁰ Rchalolu najclu mastr lo renani nayääl, najczalu mastr lo rebiuux, sa'csi nansa'clu leii, luxh lojni caj guiraa yäl'najn näjza guiraa didxguliipac. ²¹ Ni'cni rniä lojlu, luj ni caguseed xtee bejn, xhicient dilu guseed lagajc luj? Luj ni rusule'lu diidx na'c cuan bejn, xhicient rbajnlu? ²² Luj nani rniilu na'c guesnäjni te ni di gac chääl'ni, zla resnäjl nani di gac chäällu, ä? Rdx'e'chlu xcuent rebanäjb, xhicient rbääl'lu xhicos nen xquidoo rebanäjb, ä? ²³ Luj rlanjzlu chä'p xpala'nlu sa'csi

najnlu leii, zla rusanxtujylo Dios sa'csi dilu gusoob xtidx leiiga, ä? ²⁴ Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

²⁵ Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. ²⁶ Ni'cni palga te bejn ni di chu beega, luxh rusoobni guiraliipac xtidx leiiga, zla di gacdi guchaagni cuent najcni si'c te nani yu' beega, ä? ²⁷ Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. ²⁸ Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. ²⁹ Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'n'ni, xhet bejndi.

3 zXhini'c sacnä j te bejn najcni te rexpen Israel, ä? O zxhi saj chuni beega? ² jEmpac sacduxhni! Ganidtoo, sa'csi loj rexpen Israel badeed Dios xtiidxni. ³ Mase yu' renani di nililajz didxga, zla ni'cni xhet sajcdi diidx ni bia'n Dios loj rexpejn'ni, ä? ⁴ jXho gacni si'c! Diostis najc guliipac, guirali bejn rusguee. Scree caj lo xtidx Dios:

Lagajc xtiidxlu sului laaca rujnlu, te che gaclu yälguxhtis, nicla tej xtojllu di guidxäjl.

⁵ Palga xcällatsiajnu ruluuru najc Dios huenduxh, xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, zla rujnni latsiaj loonu, ä? (Caniä si'c te ben guedxliuj naj.) ⁶ jXho gacni si'c! Paru najcni si'c,

¿xho mood gun Dios yälguxhtis loj rebejn guedxliuj?

⁷Paru redidx-xhii ni rniä riliä'pru xpala'n Dios näjza xtidxliini, ¿xhicient gunni yälguxhtis narä si'c te beñdojl?

⁸Yu'za bejn ni canii didx-xhii, najreni cayäjpnu lo rebejn: "Colyejn cosguijdx te guiluilojni recoshuen." Per rebejn ni canii si'c sidzujñ dxej gacreni yälguxhtis.

Guiraanu najcnu beñdojl

⁹¿Dxejca'? ¿La najcnu beñhuenduxhru lojreni, ä? Dini gac; tebloj abile'cnu yälquij xten rexpən Israel con rebejn ni di gac xpen Israel, sa'csi guiraareni yu'reni lo dojl. ¹⁰Si'cni caj lo guijtz:

Ruti te beñsa'c, nicla tejni.

¹¹Ruti te bejn ni racbee, ruti chu tej nani rguuil Dios.

¹²Guiragajcreni abirii lo xnejz Dios, teblojsi xhet sajcdireni.

Ruti chu tej ni rujñ cossa'c, nicla tejni.

¹³Ro'reni rii ganax didxguijdx, najcni si'c te baa ni naxal, rusgueerani con lujdxreni, didxlatiaj rii ro'reni najcni si'c benen ni yu' ro' te bälñialajz.

¹⁴Ro'reni entis cage, entis canii didxrdxe'ch lo sa'reni.

¹⁵Ni'reni ruxunli saxhe' xtiejn sa'reni.

¹⁶Cadrotis rijreni rujñreni latsiaj, rutedreni sa'reni trabajw.

¹⁷Direni gumbee nezyuj ni ruscuecdxilajz.

¹⁸Niclaza guidxelojreni Dios.

¹⁹Racbeenu najc rediidx nani caj lo xleii Dios par rebejn ni rnibee leii lojreni, te jääu ro' guiralii rebejn, te guiraa rebejn guedxliuj gacbeerani yu' xtojñreni nez loj Dios. ²⁰Sa'csi mase gusoob bejn guira'ti diidx ni caj lo leii, di leiiga gudzucaj xtojñ bejnğa, sa'csi leiiga najc nani guluii dojl ni yu' nen lastooni.

Ruslaa Dios lo dojl xcuent yälirililajz xtiidxni

²¹Naj ruluii Dios stee mood guibicaj xtojñnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. ²²Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. ²³Sa'csi guiralii rebejn guedxliuj abanijt lo Dios, direni guiga' guidzujñreni lo xnezyuj Dios. ²⁴Niluxh balaslajz Dios nuunu, banidxxlia'ni loonu yälñabannaya nez loj Dios sa'csi Jesucristis gudijx yälguxhtis xten dojl che baxhe'ni xtiejñni lo cruzj te badzucajni xtojñnu. ²⁵Baxhal Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextojñ chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujñ yälguxhtis rextojñreni, ²⁶sa'csi acanajn Dios guc gunni yälguxhtis redojlğa, te si'c guiluini xcälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

²⁷Ni'cni ¿con yälñaro? ¿Con yälbindaan? ¿Xhet sajcdini! ¿Xhi leii rudzucaj xtojñnu? ¿La leii najc ni rnii jiennu dzunsa'c, ä? ¿Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. ²⁸Dxej sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujñni redzunsa'c ni caj lo leii.

²⁹¿La najc Dios Xtiooztis rexpən Israel, ä? ¿La dini gac näjza Dios xten rebejn ni di gac xpen Israel? ¿Xho dini gac! Najcni Dios xten guirop cuaa bejn. ³⁰Ruti chu stee Dios, tejtis Dios yu'.

Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzarenen xtiidxni. ³¹ ¿La rudzucanjnu leii sa'csi rililajznu, ä? Ajndi. ¡Xho gacni si'c! Alga basoobnu xtidx leiiga che huililajznu xtidx Jesucrist.

Xcälrlilajz toAbram

4 ¿Xhini'c sajc guiniinu xcuent toxtadgoldoonu, Abram? ² Paru niajc toAbram bennaya nez loj Dios por redzuun ni bejnini, pet sajc guibalazduxhni, per xhet nez lojdi Dios. ³ ¿Xhini'c caj lo xtidx Dios? Caj rediidxre:

Huililajz toAbram xtidx Dios, ni'c bachaag Dios cuent najcni te bennaya nez lojni.

⁴ Meel nani rca' te bejn ni rujn te dzuun, meelga najc ni riäjl xca'ni, xhet rcaxlia'dinini. ⁵ Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te bennaya nez loj Dios, sa'csi huililajzni xtiidxni. ⁶ Sigajcza naj toDavid, chicbaa bejn nani ruchaag Dios cuent najcni te bennaya luxh di niqiiin niujnini redzuun ni caj lo leii. Räjpni:

⁷ Chicbaa renani abaslaa Dios lo xtojlni,

renani abiäuu loj xtojlni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: "ToAbram gujc te bennaya nez loj Dios sa'csi huililajzni xtidx Dios." ¹⁰ Guc bidxaag cuent najcni te bennaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹ Dxejcti guyu'ni bee si'c te seen xten yalnaya sa'csi huililajzni xtidx Dios che gajdlini chu bee te gacni xtdad guiraa renani rililajz laj

ni xhet beedi yu'reni, te näjza laareni guidxaag cuent najceni bennaya nez loj Dios, ¹² te gaczani xtdad guiraa renani yu' bee ni huililajzta xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yälrlilajz

¹³ Bia'n Dios diidx loj toAbram näjza loj rexagdooni, xca'ni guedxliujre si'c yalnasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te bennaya nez loj Dios sa'csi huililajzni xtidx Dios. ¹⁴ Sa'csi paru renani rusoob xtidx leiiga najc nani xca' yalnasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram. ¹⁵ Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yalnasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtdad guiraanu nani chalilajz xtidx Dios. ¹⁷ Si'cza caj lo xtidx Dios, caj rediidxre: "Abenä gaclu xtdad xhidäl renación." Si'c bia'n Dios diidx loj toAbram, Gueb Dios nani gudeed yalnabajn loj rebengut, nani rnii xcuent recos nani gajd gac acanuu ala najcni.

¹⁸ Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcnii xtdad xhidajl nación, te gusojb xtidx Dios ni guniini che räjpni: "Scree gac xhidajl rexagdoonu." ¹⁹ Di toAbram nuniijt xcälrlilajzni, mase ayu'ni tegayuu ijz, najnini anajcni bengool, luxh sigajcza Sara abengool diru xi'nreni chu. ²⁰ Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni

xquixtios lojni. ²¹ Anajnni rajp Dios yälrnibee te gunni guirali nani bia'n didix gunni. ²² Ni'c bachaag Dios cuent najcni te bennaya nez lojni sa'csi huililajzni xtidx Dios.

²³ Xhet xtebtisdi xcuent toAbram cuaj rediidxre: "Bidxaag cuent najcni te bennaya nez loj Dios sa'csi huililajzni xtidx Dios", ²⁴ näjza xcuentnu cuajni, sa'csi che chalilaaznu xtiidx nani baspañsac Xtrad Jesucrist loj rebengut, sidxaag cuent najcnu bennaya nez loj Dios. ²⁵ Bacuaareni Jesucrist lo crujz te gudijxni rextojlunu nez loj Dios, luxh gubansacni lo rebengut, te gac gacnu bennaya nez loj Dios.

Xhi rsiajc bejn che najcreni bennaya nez loj Dios

5 Ni'cni che rililajznu xtidx Dios rudzucaj Jesucrist xtojlnu rajcnu bennaya nez loj Dios, ni'cni ruscuedxini lajznu. ² Sa'csi gujt Jesucrist, sa'csi gubansacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yälñabajn, su'pacnu lo xcälrdimbicha' Dios. ³ Luxh xhet ni'ctis, sajca guibalaaznu che tednu trabajw, sa'csi najnnu trabajwga sujn jia'pnu pasens. ⁴ Luxh che rajpnu pasens rajcnu te benguyajlru; che anajczanu benguyajl, rililazsa'crunu. ⁵ Luxh yälirililazsa'cnu dini gusanxtujy, sa'csi yälñanälajz ni rajp Dios ruchaj lastoonu sa'csi nen lastoonu rbäjz Xsprit Dhan xten Dios ni baniidxni loonu.

⁶ Lał ni xhetliidi sajcdi jiennu lagajc xcuentnu te guibicaj xtojlnu, che basa' dxej biääd Jesucrist te gujtni lo crujz xcuent rebendojl. ⁷ Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxäjl te bejn ni xcäjb guet lacuaa te bensa'c. ⁸ Luxh Dios baluiloj xcälrinälajzni xcuent nuurnu sa'csi lał ni yugajcnu

lo dojl, gujt Jesucrist lo crujz xcuentnu. ⁹ Aticaxh naj ni najcnu bennaya nez loj Dios sa'csi baxhe'ni xtiejnni te gubicaj xtojlnu, naj sidedcaj gacnu xcälguxhtis Dios. ¹⁰ Palga lał ni rdxe'chnu lo Dios, basiäjlni lajzni xcuentnu sa'csi gujt Xi'nni lo crujz, naj ni abiäjł lajzni, suslaani nuure lo dojl sa'csi gubansac Xi'nni loj rebengut. ¹¹ Luxh xhet ni'ctis, sibalaznajnu Dios xcuent Dad Jesucrist, sa'csi xcuentni ara'pnu yälrbexdi lajzni nez loj Dios.

Adán con Dad Jesucrist

¹² Ni'cni, xcuent tejtis niguii bitu' dojl lo guedxliuj, luxh xcuent dojl biäädza yälgujt, gudejdti yälgujt loj guiraa rebejn, sa'csi guiraa rebejn bejnreni dojl. ¹³ Cheni gajd xleii toMoisés chu lo guedxliujre, alabejn rebejn dojl, per di najcdi nucuaquijni rebejn sa'csi xheti leii. ¹⁴ Luxh empac gujt rebejn nen redxej ni gubajn toAdán hasta redxej ni gubajn toMoisés, mase direni niujn lagajc dojl nani bejn toAdán; luxh ruluiloj yu' chu stee bejn nungäjł jiääd.

¹⁵ Luxh nani runidx-xlia' Dios dini gac si'c najc xtojł toAdán. Dini gac si'c sa'csi palga xcuent dojl ni bejn toAdán, gujt xhidalduxh bejn, cuantimaaz naj sunidx-xlia' Dios yälñabajn par tejpas loonu por xcälru-lasajz Dios, nägajc por xcälru-lasajz Dad nani laa Jesucrist. ¹⁶ Luxh nani runidx-xlia' Dios loonu dini gac si'c yälrunijt ni biääd loonu xcuent dojl ni bejn toAdán; sa'csi xcuent tejtis dojlga biääd yälguhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo crujz, ni'c gujc sa'csi yuduxhrej dojl, te xcuent ni bejn Jesucrist sajca gac bejn bennaya nez loj Dios. ¹⁷ Palga xcuent dojl ni bejn tejsi bejnga gunibee yälgujt lo guiraa bejn, cuantimaaz lo yälñabajn par tejpas sinibee guiraa reni rca' xcälru-lasajz Je-

sucrist näjza renani rcaxlia' lojni yälrac-naya nez loj Dios.

¹⁸Ni'cni sigajc ni biääd yälguxhtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc bennaya nez loj Dios, cua'reni yäl-nabajn par tejpas. ¹⁹Nalajznu sigajc ni banijt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajcbennaya nez loj Dios xcuent tej niguii ni basoob xtiidx Dios. ²⁰Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcäl'rulaslazduxh Dios, ²¹te sigajc ni gunibee dojl guyu' yälgujt, sigajcza guinibeeru xcäl'rulaslazj Dios te jia'cnu bennaya nez loj Dios, te xca'nu yäl'nabajn par tejpas xcuent Xi'nni, Dad Jesucrist.

Agujtnu lo dojl per nabannäjnu Jesucrist

6 ¿Xhini'c guiniinu, naj? ¿La sajcbguidxunrunu lo dojl te tioobru xcäl'rulaslazj Dios, ä? ²¿Gurniälojtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajnrunu lo dojl? ³¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? ⁴Sa'csi che gurobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcäl'rnibee Dios, sigajcza näj nuurnu sajcbguidxunnu lo te yäl'nabancoob.

⁵Sa'csi palga gujcnu tejsi con laani lo xcäl'gujtni che birobnisnu, sigajcza sajcnu tejsi con laani lo yäl'nabansac lo rebengut. ⁶Ni'cni xcärienbiejwnu cuaj lo cruz con laani, te badzucajni rextojlnu, te di gacdiru guinibee dojl loonu. ⁷Sa'csi nani agujt, di gacdiru guinibee dojl lojni. ⁸Palga nuurnu agujtnu con

Jesucrist, rililaaznu sibansaczanu con laani. ⁹Sa'csi nadonpacnu gubansac Jesucrist loj rebengut, ni'c diruni guet, diru yälgujt ga'p yäl'rnibee lojni. ¹⁰Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubansacni, nabajnni nez loj Dios. ¹¹Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannäjtu Jesucrist.

¹²Ni'cni na'c gusaantu guinibee dojl tiejxhtu te guntu si'ctis ni rlaiz tiejxhtu. ¹³Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, näjza colgudeed guideb lagaa tiejxhtu te guntu recoshueen si'c ni rlaiz Dios guntu. ¹⁴Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl'rulaslazj Dios.

La'tu najc si'c remos

¹⁵¿Xho gacni naj? ¿La sajcbjienrunu dojl naj ni dirunu chu lo leii sa'csi yu'nu lo xcäl'rulaslazj Dios, ä? ¿Xho gacni si'c! ¹⁶La'tu nansa'ctu palga yu'tu si'c te mos loj te lam te gusobdiajgtu xtiidxni, najcpectu xmos bejn nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu bennaya nez loj Dios. ¹⁷Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. ¹⁸Luxh agułaatu lo dojl, biädjiajctu xmos Dios lo dzunsa'c. ¹⁹Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu coljejnru dzunsa'c, te si'c

sidadjrlu dzunsa'c ni guntu sa'csi najctu bejnaya nez loj Dios.

²⁰ Sa'csi che gujctu xmos dojl, di rextidx Dios guinibee la'tu. ²¹ Najä, ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujn loj yälgujttis. ²² Per naj, sa'csi agulaatu lo dojl, abiu'tu najctu xmos Dios, sajntu sajctu bejnaya nez loj Dios, luxh xnezyuj recoscoobre rdzujn lo yäl nabannäj Dios par tejpas. ²³ Xcälrajx xten dojl najc yälgujt, per nani runid-xlia' Dios najc xcäl nabannäj Dios par tejpas xcuent ni bejn Jesucrist xtadnu.

Yälruui ni rudeed yälguçnaa

7 Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre? ² Najcni si'c te gunaa nani bachnaa te niguii. Nanabpac cuäznäjni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. ³ Ni'cni, la| ni nabajn chääl gunaaga, palga cuäznäj gunaaga ste'ca niguii, cayujnni dojl sirilajni gunaguijdx. Palga agujt chääl gunaaga, agulaani lo leiiga, sajc guçnaani stee niguii, xhet dojlđi cayujnni, dizani guirilaj gunaguijdx.

⁴ Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruz, te naj sajc jiu'tu lo ste'ca bejn, loj lagajc Jesucrist nani gubansac loj rebengut te sajc jiennu redzunsa'c ni rlanj Dios jiennu. ⁵ Sa'csi la| ni gubajnnu lo yäl nabanbiejwga, lagajc rediidx nani mii leiiga di gacdi gun bejn, lagajc recosga rlanj gun tiejxhnu, luxh si'c sozaatisnu lo xnezyuj yälgujt. ⁶ Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpriitcoob ni yu' nen lastoonu yu'nu lo Dios, xhet con

xcärienbiejwdi ni gojpnu che nanab gusoobpacnu leii.

Redojl nani yu' tiexhä

⁷ ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn palga dina niolä lo leii rediidxre: "Na'c chuguij lajzlu rehxixten bejn." ⁸ Ni'cni lagajc didx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leii, xhetiza dojl, agujtni. ⁹ Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. ¹⁰ Luxh baxha| Dios leiiga loonu te jiuäni, te xca'ä yäl nabajn, luxh alga bazenni benä dojl, banitä nez loj Dios, gutäti dxejc. ¹¹ Con leiiga, basguee dojl narä, bejnni narä si'c te bengut nez loj Dios.

¹² Ni'cni, leii najc dxan, najza rediidx ni caj lo leiiga najc dxan; hueen najcni, didxgulii najcni. ¹³ ¿Dxejca'? ¿La nani najc te coshueen huinä narä lo yälgujt, ä? ¿Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te ben guedxliujre, nacä xmospac dojl. ¹⁵ Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. ¹⁶ Naj palga narä runä latsiaj nani dipacna rlazä gunä, lagajcza ni'c ru-luii hueenca najc leii. ¹⁷ Naj, diruni gac narä ni cayujn latsiaj, sa'csi yu' dojl nen lastoä, ni'c ni cayujn runä latsiaj. ¹⁸ Sa'csi narä nanä nen lastoä, nalajznu lo tiexhä, xhetliidi cossa'cđi yu'; sa'csi rlazä gunä cossa'c, per dina gacđipä te gunäpac recossa'cga. ¹⁹ Sa'csi dina gunä redzunsa'c

nani rlazä gunä, alga latsiaj nani diru rlazä gunä, ni'c runä. ²⁰Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

²¹Ni'cni narä, nani rlazä gunä redzunsac, rdxälä leiire: yu'pa dojl tiexhä. ²²Sa'csi nen lastoä, rlazäpac gusobä diidx xten xleii Dios. ²³Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, ruteedzani narä ladznaa xleii dojl nani yu' guideb lagaa tiexhä.

²⁴¡Proobza narä! ¿Chuni'c guslaa tiexhä ni nungäj! guet xcuent dojl? ²⁵¡Xquixtios loj Dios sa'csi Dad Jesucrist sajc guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl, chuni lo xleii dojl.

Yäl nabajñ ni najc xcuent Sprit Dxan xten Dios

8 Ni'cni naj rut rajcdi rbe'c xcälquij renani ahuililajz xtidx Jesucrist, renani diru jiu gunreni latsiaj ni rlazj gun tiejxhreni, alga riurureni rujnreni ni rnibee Sprit Dxan xten Dios ni rbäjz nen lastooreni. ²Sa'csi leii xten Sprit Dxan xten Dios ni rudeed yäl nabajñ xcuent Jesucrist, abaslaani narä lo yäl rnibee xten xleii dojl näjza yälgujt. ³Sa'csi nani di niajcdi niujn leibiejw, sa'csi dini niajc nadip lo rebenguedxliuj te gacreni ben naya nez loj Dios, ni'c bejn Dios che baxhalni Xi'nni Jesucrist, si'c te ben guedxliujre xcuent dojl, te bejnni yäl guxhtis lo dojl ni rnibee tiejxh bejn. ⁴Te si'c gac xcäl guxhtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' nen lastoonu.

⁵Sa'csi renani rusoobtis nani rlazj gun tiejxhreni, rujntisreni xhigab xcuent re-dojlga, luxh renani rusoob xtidx Sprit

Dxan xten Dios rujntisreni xhigab xcuent nani rlazj Dios gunreni. ⁶Sa'csi renani yu'tis yejcreni nani rlazj gun tiejxhreni, sejtreni, sinijtreni; luxh renani yu'tis yejcreni nani rni Sprit Dxan Dios, reni'c sibeedxi lajzreni, sica'reni yäl nabajñ lo Dios par tejpas. ⁷Te xcäriejn nani riutis ni rlazj gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. ⁸Renani nabajñtis te gunreni latsiaj ni rlazj gun tiejxhreni di Dios guibalaznäjreni.

⁹Luxh la'tu dirutu gun si'ctis ni rlazj gun tiejxhtu, ni'cni rujntu si'c ni rlazj Sprit Dxan xten Dios guntu, palga rbäjzni nen lastootu. Palga yu' chu tejtutu ni di Sprit Dxan cuääz nen lastooni, di ni'c gac xpejnñi. ¹⁰Palga rbäjz Jesucrist nen lastootu, agujt tiejxhtu xcuent dojl, xprittu nabajñ sa'csi anajctutu ben naya nez loj Dios. ¹¹Luxh palga nen lastootu rbäjz Sprit xten nani baspansac Jesucrist loj rebengut, lagajc nani baspansac Jesucrist lo rebengut suspansac tiejxhnu ni nabajñ lo guedxliujre xcuent Xpirtni nani yu' nen lastoonu.

¹²Ni'cni rebetzä, najcnu bejn ni cuaj di'n, xhet lojdi tiejxhnu te jiennu si'c ni rlazj gun tiejxhnu. ¹³Sa'csi palga cayujntu si'c ni rlazjtis gun tiejxhtu, sejt-pactu. Palga nabajñtu xcuent Sprit Dxan xten Dios ni rbäjz nen lastootu, sibälaztu latsiaj ni rlazj gun tiejxhtu, sibannäjtu Dios par tejpas.

¹⁴Sa'csi guiraa renani ruluii Sprit Dxan xten Dios guiraa reni'c najc rexi'n Dios. ¹⁵Naj ditu nica' te sprit xten te mos te chusactu lo yäl rdxejeb, alga cua'tu sprit xten ni najc si'c te bisiäjeb ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtaä." ¹⁶Sa'csi lagajc Sprit Dxan xten Dios ruluii loj xpirtnu, najc pacnu xi'n Dios. ¹⁷Luxh palga najcnu rexi'nni, sica'zanu yäl nasa'c lo Dios, tejsi yäl nasa'c con Dad Jesucrist, palga guliini tednu lagajc trabajw

ni gudejdni xcuent xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab re TRABAJW ni cadejdnu nen redxejre, digacdi gun tebloonureni con yälrDIMBICHA' nani churu guihuiinu. ¹⁹ Sa'csi guiraa recos nani benchee Dios lo guedxliujre, cabäjzreni, yuduxhrenei gaan fiireni dxej che guluiloj Dios chuni'c najc rexi'nni.

²⁰ Guiraa recos ni gulextiej Dios lo guedxliujre, xlia'si gujcreni, xhet sa'csi si'c rlanjdi recosga, per sa'csi si'c bejn Dios, ni cabäjtis ²¹ guslaapacni guiraa recos ni bencheeni lo guedxliujre lo xcälRNIBEE yälgujt, yälrnitloj, te dxej sajc jiu'ni lo yälrbedxi xten xcälrdimbicha' xten rexi'n Dios. ²² Guiraa recos ni gulextiej Dios lo guedxliujre entis roonreni, guira dxej rdejdreni trabajw, si'c rdej d te gunaa trabajw che rajl xi'nni. ²³ Luxh xhet nani tre'tis lo guedxliujdi, näjza nuunu ni yu' Sprit Dxan xten Dios nen lastoonu, roonzanu cabäaznu dxej cheni xca' Dios nuure si'c rexi'nni, cheni guscoobzani tiexhnu. ²⁴ Sa'csi xcälRILILAAZNU ni rbäaznu, ni'c bejn gulaanu luxh yälrBÄJZ ni guyasi rien, di ni'c gac yälrBÄJZ, sa'csi çchu laa ni cuääz xcuent te cos ni ala bahuiini? ²⁵ Palga cabäaznu xcuent te cos ni gajdnu guihuii, rbaali laaznu, rsidzu'tznu rbäjznu guihuiinu gacni.

²⁶ Sigajcza racnäj Sprit Dxan xten Dios nuure cadro xheti yälrutijp laaznu sa'csi nicla guidonnu xho mood riäjł guiniab bejn lo Dios. Luxh lagajc Sprit Dxan ni yu' lastoonu rniabni lo Dios xcuent nuure con yälrbedxnen nani nicla gajd bejn gäb con diidx xho najcni. ²⁷ Dios, nani rula'tz lastoonu, nanchee xhini'c rniab Sprit Dxan xtenni xcuent nuurnu, sa'csi rniabni si'cpac ni rlanj Dios guiniabnu xcuent rexejnpac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzuumni rsiajcrenini te gun Dios gac recosga par xcälNAsa'creni. ²⁹ Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. ³⁰ Renani guleni galooli, reni'c gurejdxni; renani gurejdxni, bejnzani najcreni bennaya nez loj Dios; renani bejnni najcreni bennaya nez loj Dios, gulä'pzani xpala'nreni.

³¹ çXhixhni'c guiniinu xcuent dee? Palga yu' Dios xlaadnu, çchuxh ni'c najc ni gun gaan loonu? ³² Dios nani di nudxojn Xi'nni, nani cuäj b cuaj Xi'nni lo cruzj te gujtni, te gudijxni xcuent xtojłnu, çxho dini guniidx loonu xcuent Xi'nni guira'ti nani rquiinnu, ä? ³³ çChuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rnii najcnu bennaya nez lojni. ³⁴ çChuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xladbee Dios cadro rnibeeni; laazani cabejdx canabni lo Dios xcuentnu. ³⁵ çChuni'c sajc gudzucaj nuurnu lo yälsanälajz xten Jesucrist: trabajw, o yälxliajs, o yälrusacsı, o yärliaan, o yälxhabääl, o yälr dxejb, o te spaad, ä? Nicla tejni. ³⁶ Si'c ni caj lo guijt z ni caj xtidx Dios:

Xcuentlu, sa'csi najcnu xpejłnu caye'tnu guixe-guixee.

Ruchaagreni cuent najcnu si'c xiil ni aguro' te ju't bejnni.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. ³⁸ Sa'csi anancheä nicla yälgujt, niclza yälNABAJN, nicla rexangl Dios, niclaza renani rnibee, nicla recos ni yu' naj, niclaza recos nani churu

gac, ni claza yäl milaagwr, ³⁹ ni claz jiaroduxh, ni claza jiä jtpac, ni claza xhitis cos ni guc-chee, ni claz tej redee di gacdi gudzucaj nuurnu lo xcälsanälajz Dios, yälsanälajz ni rajpza Dad, Jesucrist.

Dios agule reben Israel

9 Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxa xten Dios caguluii xcärienä laaca rniä; ² cayac-huinduxh lastoä, sanuutis yäl xliajsga. ³ Sa'csi narä rlazä malaii sajz lagajc narä nitlöä lo Dios te sajz gacnää resa'ä lo guedxliujre, rexpejn Israel. ⁴ Sa'csi laareni najc xagdoo toIsrael, luxh laareni nungäj l gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen guidoo. Sica'reni reyäl nasa'c xten Dios palga jiureni xtiidxn. ⁵ Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te bejn guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejnpac Israel. ⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: "Rexagdodoolu nani guigab najc reni gac xagdoo Isaac." ⁸ Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxn, reni'c najc xi'nni. ⁹ Sa'csi bia'n Dios didx loj toAbram: "Stebijz, lagajc bäiire guibisacä, te dxejc chu te xi'n Sara."

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtadgoolnu Isaac. ¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac

xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: "Xingangaloolu gac xmos xinhuinlu." ¹³ Si'cza caj lo guijt redixre: "Sanälazä Jacoob, niluxh bidxech-nää Esau."

¹⁴ ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! ¹⁵ Sa'csi räjp Dios loj toMoisés: "Sulaslazä chutis bejn nani rlazä gulaslazä, sacnää chutis bejn nani rlazä gacnää." ¹⁶ Ni'cni dini gac xcuent ni rlaz rebejn gac, dizani gac xcuent nani rujn rebejn. Rajctisni si'c rlaz Dios nani rulaslazaj bejn. ¹⁷ Ni'cni caj lo guijt xten Dios che gunii Dios xcuent Faraón: "Narä benä gujclu reii xten Egipto te gululoj xcälrnibeä, te guiliä'p bejn xpala'nä guideb guedxliujre." ¹⁸ Rulaslazajni rebejn nani rlazctisni, runnadipzani lastoo bejn nani rlazctisni.

¹⁹ Naj la'tu siniitu loä: "¿Xhicuent rucuaquijni bejn? ¿Chuni'c sajz sudzu'tz nez loj nani rlazjni gac, ä?" ²⁰ ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: "¿Xhicuent bejnlu narä scree?" ²¹ Gurniälojlu. Bejn nani runchee guejs, ¿la di gacdi gunni si'ctisni rlazjni con bajnga, ä? ¿La di gacdi guncheeni te guesa'c nägajcza te guesyuj ni xhet sirbdi con lagajc bajnga?

²² ¿Xhiru najc, palga Dios rlazjni gululojni xho rujnni yäl guxhtis, näjza rlazjni gululojni xcälrnibeeni, gopnäjni pasens renani nungäj l gac yäl guxhtis, te nitlojzareni, ä? ²³ Bejn ni si'c te gululojni lacti sajz xcälrdimbicha'ni loj renani galooli guleni chú lojni lo xcälrdimbicha'ni. ²⁴ Lagajc nuurnu najcnu reni aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu. ²⁵ Cajza lo guijt ni bacuaa Oseas:

Renani di gac xpenä, reni'c cuälää "xpenä".

Luxh nani dina ninälazä, sinälazäni.

²⁶ Dxejcti lagajc cadro räjpreni lojreni:

“Ditu gac rexpənä”,

lagajc ro'c säjpreni lojreni:

“La'tu najctu xi'n Dios ni nabajñ par tejpas.”

²⁷ Cajza lo guijtz ni bacuaa Isafas: “Mase najc xhidajl rexpən Israel si'c najc yujxh ni tre' ro' nisdoo, guxii gac reni laa lo dojl. ²⁸ Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojzba gunnini.” ²⁹ Gu-niiza Isafas, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoo reben tiemp,

niajcnu si'c gujc Sodoma näjza Gomorra, reguejdx ni gunitloj.

Xtidx Dios näj rexpən Israel

³⁰ ¿Xhini'c sajc guiniinu naj? Rebejn nani di gac xpen Israel, direni niguiil xho gacreni bennaya nez loj Dios, niluxh agujczeni bennaya nez loj Dios sa'csi huililajzreni xtidx Jesucrist. ³¹ Luxh rexpən Israel, mase sanuutisreni lo xleii Moisés ni ruluii xho gac bejn bennaya nez loj Dios, banijtreni, direni niujn gaan nusoobreni guideb leiiga. ³² ¿Xhicuent gujcn si'c? Sa'csi direni nililajz xtidx Dios, alga rlanjzreni guntisreni dzuun xten leii, naareni si'c gacreni bennaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist. ³³ Si'cza bacuaa Isafas, räjpni:

Aguleä te bejn lo guedx Siön ni gac si'c te guij cadro rtiäjñ ni' bejn,

te guij ni rusälta' bejn.

Chutis tej nani chalilajz xtiidxni, dini jianxtujy.

10 Rebetzä, rlazduxhä chalilajz rexpənä xtidx Dios. Rniabduxhä lo Dios te guslaanireni lo xtojñreni. ² Narä rniäpac nancheä ruzuxhijb rexpən Israel lo Dios, niluxh direni gumbesa'c xhini'c

rlajz Dios gunreni. ³ Sa'csi direni niacbee xcuent xho rajc te bejn te bennaya nez loj Dios, ni'c rlanjzreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni. ⁴ Abasoob Jesucrist xtidx Leii, ni'cni che chalilajz bejn xtidx Jesucrist, anajczeni bennaya nez loj Dios.

⁵ ToMoisés bacuaa rediidxre: “Chutis ni rlanjz gac bennaya nez loj Dios sa'csi rusoobni xtidx leii, nanab gubsobsa'cpacni diidxga guideb nabajñni lo guedxliujre.” ⁶ Xcälñayareni nez loj Dios sa'csi rililajzreni xtidx Jesucrist, rnii scree: “Na'c guiniitu nen lastootu, ¿chuni'c chä'p xhaguibaa?” nalajznu, te jiädñasacni Jesucrist loj guedxliuj.

⁷ Na'cza gäbni: “¿Chuni'c jäjt gabijl?” (nalajznu te chaxiini Jesucrist loj rebengut). ⁸ ¿Xhini'c rniini naj? Rniini: “Diidxga suga' gajxh ro'tu, nen lastootu.” Nalajznu, diidx xcuent yärlililaaz nani cagusule'nu lojtu. ⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspansac Dios Jesucrist loj rebengut, suslaani la'tu lo dojl. ¹⁰ Sa'csi con lastooni rililajz biniet xtiidxni, ni'c rajcni bennaya nez loj Dios; luxh che räjzpa biniet con ro'ni, Jesucrist rnibee loonu, ruslaa Diosni lo dojl.

¹¹ Sa'csi rnii xtidx Dios scree: “Chutis ni rililajz xtidx Dad Jesucrist, dini jianxtujy.” ¹² Sa'csi guiraa rebejn najc tebloj nez lojni, rexpən Israel sigajc rebenz-ij, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. ¹³ Lo xtidx Dios caj rediidxre: “Chutis ni rbedx-rniab lo Dad, siliaani lo xtojñni palga rililajzni xtidx Dios.” ¹⁴ ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä?

¹⁵Luxh ¿xhoza gusule'reni diidxga palga rut guxhaldireni? Si'cni caj lo guiitz: “Chipza saru najc ni' renani riädna diidx xcuent cossa'c, yälrbecdx lajz rebejn.”

¹⁶Xhet guiraadireni rusoob xtiidxni, sa'csi guniiza toIsaías: “Dad, ¿chuni'c chalilajz xtiidxnu?” ¹⁷Rililajz bejn xtidx Dios che rucua diajgrendi diidxga; rucua diajzarení che yu' chu rusule' xtidx Jesucrist.

¹⁸Naj arniä: Gajdpac diajgrendi jiejn xtiidxni, o ¿la babiejn diajgrendi, ä? Pues abiejn diajgrendi, sa'csi lo xtidx Dios caj scree:

Abire'ch xse'reni guideb guedxliuj,
abidzujnza rextiidxrendi lo guiraa regue-
jdx ni tre' lo guedxliujre.

¹⁹Rniäza: Dipac rexpen Israel niacbee, o ¿la gucbeereni, ä? Galooli gunii to-Moisés rediidxre:

Sunä gudxojntu xcuent rebejn ni di gac te guejdx,
con te guejdx nani di gacbee suche'chä la'tu.

²⁰Diza toIsaías nidxejb guniini rediidxre:

Renani di niguiil narä, bidxäjl narä,
baluiloäza loj renani di niniabdiidx narä.

²¹Guniiza toIsaías xcuent rexpen Israel: Desde galooli, dxej-yääl basgaä naä lo rebejnga te niurení xtidxä, luxh najcreni bejn ni di gusoob diidx, rutzu'reni didxnaj.

Rexpen Israel nani guäaa lo dojl

11 Arniä: ¿La agulälaz Dios rexpen Israel, ä? ¿Xho gacni si'c! Ni la-gajc narä nacä te xpen Israel, te xag-doo toAbram, nadxagä lo resa' toBen-jamín. ²Di Dios nibälaz rexpejn, xpen Israel nani guleni galooli che gajdli guir-ixtiej guedxliuj. O ¿la dilu gacbee xhi caj lo xtidx Dios cadro rnii xcuent Elías, xho gunabduxh Elías didxnaj lo Dios xcuent rexpen Israel, ä? Räjpní scree: ³“Dad, abagu'treni guiraa reniguii nani

gunii xtiidxlu, abatzujlreni rexquidoolu, xtebtis narä bia'nä, luxh naj rlanjreni ju'treni narä.” ⁴Luxh, ¿xhini'c räjp Dios lojni? Räjpní: “Abaluçheä gajdz mił bejn nani gajd guzuxhijb nez loj Baal.” ⁵Si'cza naj, abia'n te chinae' rexpen Israel nani agule Dios xcuent xcälruulasajzni. ⁶Dxej-ej palga ruslaani nuure lo dojl xcuent xcälruulasajzni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcälruulasajz Dios gac yälruulasajz.

⁷¿Dxejca? Di rexpen Israel nidxäl nani caguuilreni, luxh rebejn nani agule Dios, ni'c bidxälni, luxh ste cuaareni, aguyalajzreni. ⁸Gujcni si'c caj lo xtidx Dios:

Bascäy Dios xcäriejnreni, näjza balojni di jien,

lo dxe najli di diajgrendi jiejn.

⁹Guniiza toDavid, scree caj lo xtidx Dios:

Sugun xmex lanijreni jiajbreni,

te gac guiga'reni,

sugacni si'c guij ni rulani' bejn, te gacreni yälguxhtis.

¹⁰Suguscäy Dios balojreni te na'c fisa'creni,

suje't dejtreni, sutedreni trabajwduxh par tejpas.

Yälrusläa lo dojl xten bejn ni di gac xpen Israel

¹¹Naj rniabdidxä: ¿La biajb rexpen Israel te gunijtreni par tejpas, ä? ¿Xho gacni si'c! Sa'csi biajb rexpejn Israel, ni'cni gojl biäd yälrusläa lo dojl lo bejn ni di gac xpen Israel, te si'c guisiäblajz lajz rexpen Israel laareni lo dojl. ¹²Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijt xten rexpen Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

¹³Naj caniä lojtu ni najc bejn ni di gac xpejn Israel. Gule Dios narä

te gusule'ä xtiidxni lojtu, ni'cni caläpä xpala'n xtzunä, ¹⁴te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. ¹⁵Palga gulecdxireni lajz reben guedxliuj con Dios sa'csi gulälaz reppen Israel xtidx Jesucrist, aticaxh che chalilajz reppen Israel rextidx Jesucrist, sibansac renani najc si'c bengut. ¹⁶Palga tla' cojb najc hueen, guideb cojba najc hueen. Sigajcza najc te yajg; palga xlobaani najc hueen, guidebni najc hueen.

¹⁷Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquidreni naa ste'ca yajg te guibajzni con xtiejn yajg oliibga. ¹⁸Ni'cni, na'c gactu guyalajz lo renaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni runiidx yäl'nabajn lojtu.

¹⁹Dxejc colguinii: "Batiuugreni naapac yajgre, te gujc biguidä cuä' yajgga." ²⁰Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu guyalajz, colguidxejb, ²¹sa'csi palga di Dios nutedbia renaa yajgga, diza Dios gutedbia la'tu. ²²Bahuii j lacti hueen najc Dios! Luxh lacti niälajzjzani; con renani banijt najcni niälajz, luxh lacti rulaslajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios. ²³Luxh sigajcza reni bidin, palga di chanuu cuälazreni xtiidxni sajce suquidsac Diosreni lo yajgga. ²⁴Luxh la'tu najctu benzij, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni readuxh oliib lojni, mase xhet si'cti najc olibguijxhga, jaticaxh reppen Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac reppen Israel lo dojl

²⁵Rebetzä, rlazä gacbeetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios. ²⁶Dxejcti siliaapac guiraa reppen Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre: Nani ruslaa sajce ben guedx Siön, luxh sudzucajni xtoj l renani najc xagdooto Jacob.

²⁷Dee najc diidx ni bia'nä con laareni, che gudzucä xtojreni.

²⁸Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. ²⁹Sa'csi rut rajc di rudzucaj nicla yäl'nasa'c ni rudeed Dios, niclaza yäl'rbejdx xten Dios. ³⁰La'tu galoo ditu nusoob xtidx Dios. Naj rulaslajz Dios la'tu sa'csi gulälaz reppen Israel xtiidxni. ³¹Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslajzjzani la'tu. ³²Dios basaan bialj guiraanu lo dojl, te si'c sajce gulaslajz Dios guiraanu.

³³j Lacti guroob najc yäl'nasa'c xten xcäl'najn, xcäl'racbee xten Dios! Nicla tej bejn guedxliuj di gacbee guiraa rex-cäl'guxhtisni, rudliidiza najc rexnezyujni. ³⁴Si'c caj lo guijt: "¿Chuni'c gucbee xcäriejn Dios? ¿Chuni'cza abaluiini? Rutliidi. ³⁵O ¿chuni'c badedxgaa te xhi cos lojni, te quixsacni lojni, ä? Rutliidi." ³⁶Sa'csi loj Dios siäd guira'ti, luxh laani bencheeni guira'ti par laga-jcza laani. Suguiliä'pnu xpala'nni par tejpas. Sugacni si'c.

Yäl'nabajn rliä'p xpala'n Dios

12 Ni'cni rulidxä la'tu rebetzä, sa'csi rulaslajz Dios nuure, colgudeed

xcäl̄nabajntu lo Dios te gac guibansa'ctu si'cni rlanj Dios. Dee najc yäl̄rajnpac Dios si'c ni nungäj̄l gantu Dios. ²Na'c rujntu lagajc xhigab ni rujn reben̄ guedxliuj, col̄guscoob rexhigabtu te guidxaapac xmoodtu te si'c guluii Dios xhini'c rlanj guntu, nalajznu xhini'c najc hueen, xhini'c rdxagljaz Dios, xhini'cza najc laapac.

³Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Col̄yejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. ⁴Sa'csi sigajc najc tiejxnu, yu' xhidäl̄ la'ni, luxh tejgareni rujn xtzuun-xtzuunreni, ⁵sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

⁶Luxh sa'csi tejganu rajpnu garen-garen dzuun xcuent yäl̄rulaslajz ni baniidx Dios loonu, sujiennu rextzuunnu screeza: nani rajc rnii xtidx Jesucrist, suguiniinini, si'c ni najc xcäl̄rililajzni; ⁷nani rajc racnäy sa'ni, sugacnäyjni; nani rajc ruluii xtidx Dios, suguluiini; ⁸nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguiniibeeni con yäl̄nadolajz; nani rajc rulaslajz resa'ni, sugulaslajzni con yäl̄rbalajz.

Xho nanab guibanu lo xnezyuj Dios

⁹Col̄chanälajzpac resa'tu, na'c gunsitu si'cni rinälajztureni. Col̄cuälaz redzunguijdx, col̄yejntis redzuns'a'c. ¹⁰Col̄chanälajz resa'tu si'c rinälajz bejn̄ rebejtzni. Col̄guiliä'p xpala'nreni.

¹¹Col̄yejn dzuns'a'c, na'c cuedxitu. Col̄yejn xtzuun Jesucrist con guideb xti-jptu, guideb xcäriejntu.

¹²Col̄guibalajz sa'csi ahuililajztu xtiidxni. Col̄cuedxi lajztu che tedtu tra-

bajw. Col̄cuedx-col̄nabtis lo Dios guideb nabajntu.

¹³Col̄gacnäy rebejn̄ nani rililajz xtidx Dios; sacru col̄nii loj ni riädhuiitu.

¹⁴Col̄guinii didxsa'c xcuent renani rusacsä la'tu, na'c gudzubdureni.

¹⁵Col̄guibalaznäy renani rbalajz, col̄y-onnäy renani roon.

¹⁶Col̄yejn tejtis xhigab con resa'tu, na'c gactu guyalajz, col̄guchaag loj reben̄ nadolajz. Na'c guchalotu najctu bejn̄anduxh.

¹⁷Na'c gudzu'tu dzunguijdx loj renani rujn dzunguijdx lojtu. Col̄yejn recossa'c nez loj guirasi bejn̄. ¹⁸Cadrotis sajcn̄i, dxitis col̄guibannäy guiraa rebejn̄. ¹⁹Rebetzä, na'c guntu xhigab lagajc la'tu gudeedtu xten renani rujn dojl̄ lojtu, sa'csi lagajc Dios gun yäl̄guxhtis lojreni, ni'cni caj lo xquijtzni scree: "Narä gunä yäl̄guxhtis, narä quixä lojreni si'c naj Dad, Dios." ²⁰Näjza: "Palga calaan nani rdxe'ch lojtu, col̄gudeed xhi gauni, palga cayojlni, col̄gudeedza xhi yäni, te si'c jianxtuijni." ²¹Na'c gusaantu gun redzunguijdx gaan lojtu, col̄yejn gaan lo dzunguijdx con recossa'c ni rujntu.

13 Guiraatu nanab jiuu xtidx renani rnibee lojtu. Sa'csi xheti te yäl̄rnibee nani di Dios nudeed, luxh guiraa reyäl̄rnibee ni yu' lo guedxliujre, lagajc Dios gule'creni. ²Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl̄, sujn Dios yäl̄guxhtis lojreni. ³Renani rnibee di guchejb renani riu xtiidxreni, ruchejbreni renani najc bejn̄ guijdx ni di jiu xtiidxreni. Palga di rlanjztu guidxejbtu reguxhtis, bejntis dzuns'a'c, dx-ejcti guiliä'preni xpala'ntu sa'csi rujntu dzuns'a'c. ⁴Reguxhtis rujnreni lojtu xtzuun Dios te guibansa'ctu. Palga guntu dzunguijdx, col̄guidxejb, xhet xlia'di ca'ni spaad, sa'csi najczeni nani rujn xtzuun Dios te gunreni yäl̄guxhtis, te

quixpac renani rujn dojl. ⁵Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejsa'c, te xcäriennaya. ⁶Ni'cni colquix lojreni nani riäjl xca'reni sa'csi renani rnibee najc xmos Dios, luxh ni'cpac najc xtzuunreni.

⁷Colgudeed lo guiraa bejn nani riäjl xca'reni. Colquix loj renani nazääbtu; colquix impuest loj ni riäjl xca'ni; colchanälajz renani riäjl chanälajztu; colguiliäp xpala'n renani riäjl chäp xpala'reni. ⁸Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisinni, bejnga abasoob xleii Dios. ⁹Sa'csi lo xleii Dios caj scree: "Na'c guesnäjl bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu." Luxh palga yu' xhi stee leii rsa'ni con leii ni rnii: "Chanälajzlu resa'lu si'c sanälajzlu lagajc luj." ¹⁰Nani rajp yälsanälajz, dini gun latsiaj lo resa'ni. Ni'cni yälsanälajz rusoob releii ni caj lo xtidx Dios.

¹¹Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacad sa'csi abidzungajxhru dxej che laanu nen dojl lo dxej che huililajznu. ¹²Aguxhinduxh, asiädgajxh bianij. Ni'cni cuääz jiennu redzuun guijdx ni rajc lo xcäjy, te jientisnu redzunsac ni rajc rdxee, lo bianij. ¹³Guibansa'cnu si'c riäjl guibajn rebejn rdxee, na'c guibanu lo yälrä', niclaza lo yälbiejy, na'c guidiesnäjnu bejn ni di gac chäälnu, na'c ga'pnu rebis, na'c guidx-agdilnu resa'nu, na'c chuguij lajznu xhixten resa'nu. ¹⁴Ni'cni colca' xcälrnibee Jesucrist te na'c guntu redojl ni rrajz gun tiejxhtu.

Na'c guiniyajtu rebejztu

14 Colnii didxdoo lo rebejn nani di gumbesa'c xtidx Dios, na'c tilnäjtureni. ²Sa'csi yu' reni rililajz nani sajc gaureni guira'ti xhi cos, niluxh nani gajd

sutijp lo yälrililajz, ganaxtis berduur rajwni. ³Nani rajw guira'ti, na'c guidxech-näjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnga. ⁴¿Chuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutijp lastooni.

⁵Tej bejn naa sajru tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, teja bejn sugunpac lagajc xhigabni. ⁶Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷Sa'csi nicla tejnu dinu guibajn xcuentcanu, nicla tejzanu dinu guet xcuentcanu. ⁸Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, laltis najcnu rexpenn Dad, Jesucrist. ⁹Ni'cni gujt Jesucrist, ni'cni gubansaczani, te sajc gacni Dad xten rebengut, näjza Dad xten rebejn nani nabajn.

¹⁰Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu.

¹¹Sa'csi scree caj lo xtidx Dios: Si'ctis ni nabanä, rniliäpac lojtu, räjp Dad Dios, guiraa reben guedxliuj suzuxhijbreni loä,

luxh guiragajc ro'reni sicäjp narä nacä Dad Dios.

¹²Ni'cni guiraanu, tejganu sudeednu cuent loj Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen jiennu xhigab nen lastoonu xhetli-idi jiennu ni gun jiajb resa'nu lo dojl.
¹⁴ Narä nanä, racbeäpac guira'ti najc hueen. Jesucrist Xtadnu baluui narä si'c. Luxh palga yu' chu tej ni rchalo dini gac hueen, par laatisni dini gac hueen.
¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni.
¹⁶ Ni'cni na'c gusaanlu guiniyajreni nani najc te cos hueen par luj.
¹⁷ Sa'csi xcälribee Dios dini gac xcuent yälrajw, niclaza xcuent yälrä'; xcälribee Dios najc xcuent te yäl-abannya nez loj Dios, näjza yälrbedxilajz con yälrbalajz xcuent Sprit Dxaan xten Dios.
¹⁸ Sa'csi nani rujn si'c lo xtzuum Jesucrist, bejnga rchaglajz Dios, luxh reben guedxliuj rniiza didxsa'c xcuent sa' bejnga.

¹⁹ Ni'cni chanuutis guidiilnu recos nani rujn chu yälrbedxilajz, näjza nani rujn racnäjnu resa'nu te tioobruren loj xnezyuj Dios.
²⁰ Na'c guntu nit xtzuum Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu nen dojl, ni'c najc xhet laadi.
²¹ Hueen najc na'c gautu bääl, na'cza yätu bin, na'cza guntu jiajb sa'lu nen dojl.
²² Nani rililajz, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni.
²³ Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yälrlililajz, sa'csi xhitis ni di gac xcuent yälrlililajz, lagajc ni'c najc dojl.

Huinälajz sa'lu

15 Nuurnu ni agusutijpnu lo yälrlililajz nanab gacnäjnu

resa'nu nani gajd chalilazsa'c. Di gacdi guibañisnu xcuentcanu.
² Tejganu nanab chonälaznu resa'nu lo xcäl'nabansa'cni te gacnäjnu chalilajzruren.
³ Sa'csi nicla Jesucrist dini nibajn xcuentcani, luxh si'cni caj loj xtidx Dios: "Redidxyaj ni guiniyajreni lojlu biajbreni yecä."
⁴ Guiraa rediidx ni cuaj lo guijtz galooli, cuajreni te guluiireni nuurnu te ga'pnu yälsutijp näjza yälrustioblajz te gacza guibääznu lo xtidx Dios.
⁵ Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu.
⁶ Te dxejcti tejtis gac xse'tu guiliä'ptu xpala'n Dios, Xtad Jesucrist.

Gusule' xtidx Dios loj rebenzajt

⁷ Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios.
⁸ Sa'csi narä rniä lojtu, biääd Jesucrist te gujcn si'c te mos loj rexpen Israel te baluini xcuent didxgulii xten Dios te gusojb rediidx nani bia'n Dios loj retoxtadgoldoonu,
⁹ näjza par rebenzajt, te guiliä'preni xpala'n Dios sa'csi baluilojni xcäl'rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzajt, soläza dij lojlu.

¹⁰ Dxejcti stee lajt rniini:

La'tu benzajt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzajt, colguiliä'p xpala'n Dad,

suguliä'pza guiralii rebejn xpala'nni.

¹² Stee huält guniiza Isaías scree:

Siricaj te xagdoo tolsaí,

näjza te ni chäs te guinibeeni loj rebenzajt,

laani cabäjz rebenzajt.

¹³ Naj rniabä lo Dios ni rudeed yälrbälajz, te laani gacnäj guibalajz, te

cuecdxilajztu, sa'csi salilajztu, te tioobru yälräbälajz ni rajptu sa'csi Sprit Dhan xten Dios yu' neñ lastootu, luxh laani rajpni yälrnibee.

¹⁴Luxh xcuent la'tu rebetzä, anancheä nabansa'ctu nasinduxhtu, arajcza ruli-jdxtu sa'tu, ¹⁵luxh loj guijtzre bacuaä gaii didxnaj xcuent tiop-choñ cos, te gusnaä lajztu. Runä si'c xcuent yälrulaslajz ni baniidx Dios loä ¹⁶te gacä xpeñ Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujreni bennaya sa'csi rbäjz Sprit Dhan neñ lastooreni.

¹⁷Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. ¹⁸Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni, ¹⁹con yälmilaagwr xten redzunro, resenro, ni gujc con xcälrnibee Sprit Dhan xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. ²⁰Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbée Jesucrist, te na'c gunä dzuun cadro gusloj cayujn ste'ca bejn dzuun. ²¹Te gacni si'cni caj lo guijtz:

Renani rutliidi bij diidx xcuentni, suhuiipacreni lojni,

luxh renani gajdpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

²²Ni'cni balti huält badxojn Dios narä jiädhuiä lojtu. ²³Luxh naj sa'csi abaluxä xtzunä guideb nezree, näjza sa'csi agujc balti ijj rlazduxhä jiädhuiä lojtu, ²⁴naj che cha'a España siädhuiä-pac lojtu. Che tedä, jiädhuiäpac contu

te ganid guibalaznää la'tu, dxejecti gacnäjtü narä te cha'a España. ²⁵Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. ²⁶Sa'csi rebejn Macedonia näjza reben Acaya rlanjpacreni guxhalreni te coobr loj rebenproob ni yu' lo reni huililajz xtidx Dios neñ guedx Jerusalén. ²⁷Bejnreni xhigab hueen gunreni si'c, luxh guli'careni, sa'csi yu' xhi nazäabreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. ²⁸Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'a España. ²⁹Luxh ananä che jiälä lojtu, li guidxa lastoä xcäl'nasa'c xtidx Jesucrist guidzunä lojtu.

³⁰Rebetzä, rniabduxhä lojtu xcuent xtidx Dad Jesucrist näjza xcuent xcälrinälajz Sprit Dhan xten Dios, colguidxagsa'tu, te colgacnäj colcuedx-guiniabtu lo Dios xcuentä. ³¹Colnab lo Dios te guslaani narä loj reben Judea nani di gusoob xtiidxni te saru gun rebendxan ni yu' Jerusalén te xca'reni ni chanää lojreni. ³²Te cabaa lazä guidzunä lojtu, sa'csi rlanjpac Dios jiälä lojtu, te lajni yu'ä lojtu siälyuä, susilazäza con la'tu. ³³Dios ni rbecdxilajz bejn gacnäj guiraatu. Sugacni si'c.

Ruxhalni xtixtios lojreni

16 Colgacnäj bisiajnnu Febe. Nane're bejn dzunduxh neñ guidoo ni tre' Cencrea. ²Colca'ni xcuent Dad, Jesucrist, si'cni riäjł gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduxhni xhidal rebejn, nägajcza narä gucnäjni.

³Ruxhalä xtixtios lo Priscila näjza lo Aquila, ni racnäj narä lo xtzuum Jesucrist. ⁴Laareni nicäjpreni niejtreni xcuentä, ni'c rudedä xquixtios lojreni,

luxh xhet narätis, näjza guiraa rebejn ni yu' lo rexquidoo rebenzajt. ⁵Ruxhalä xtixtios loj resa'ä ni rdxagsa'reni roliz Priscila näjza Aquila. Ruxhalä xtixtios loj Epeneto, ni sanälazduxhä, ni gujc benganid ni huililajz xtidx Jesucrist nen guedx Acaya. ⁶Ruxhalä xtixtios lo Marii nani benduxh dzuun lojtu. ⁷Ruxhalä xtixtios loj reben ladxä ni laa Andrónico näjza Junias; laareni guyunäj närä nen latzguib, najcreni benro loj reapost. Ganid laareni huililajz xtidx Jesucrist, dxejcti huililazä.

⁸Ruxhalä xtixtios loj Amplias, ni sanälazä xcuent Jesucrist. ⁹Ruxhalä xtixtios loj Urbano, ni runnäj nuurnu xtzuum Jesucrist. Ruxhaläza xtixtios loj Estaquis, ni sanälazä. ¹⁰Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' roliz Aristóbulo. ¹¹Ruxhaläza xtixtios lo Herodiön ben ladxä, näjza loj resa' Narciso nani ahuililajz xtidx Jesucrist. ¹²Ruxhaläza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. ¹³Ruxhaläza xtixtios lo Rufo nani agule Dios, näjza lo xnanni, sa'csi gujcnä si'c xnanäza. ¹⁴Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵Ruxhaläza xtixtios loj Filólogo, näjza lo Julia, näjza lo Nereo con bisajnni, näjza lo Olimpas näjza guiraa rexpen Dios nani yunäjreni ro'c.

¹⁶Colye'tz xchan loj resa'tu. Guiraa rexquidoo Jesucrist ruxhalä xtixtios lojtu.

¹⁷Rebetzä, rniabduxhä lojtu ga'ptu cuidaad xcuent renani rujn bieje te guilia' sa' bejn, nani rlanj guntu guiraloj nani najc garenca loj yälruuii ni bisieedu, colguibicaj lojreni, ¹⁸sa'csi sa'

rebejnğa direni gun xtzuum Jesucrist. Laareni rlanjtisreni gunreni si'c rlanj tiejxhreni; rniireni didxdoo, diidx ni rgudxguel diajg bejn te rusgueereni lastoo rebejn nani di susin. ¹⁹Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasinduxh xcuent recoshueen, luxh si'c báz xhet ganditu xcuent recosgujdx. ²⁰Luxh Dios nani ruscuedxilajz bejn siojb guta'cwni bendxab xhan ni'tu. Gacnäj Dad Jesucrist la'tu.

²¹Timoteu nani racnäj narä lo dzuun, ruxhalä xtixtios lojtu. Lucio, Jasón, näjza Sosípater, ben ladxä, ruxhaläza xtixtios lojtu.

²²Najrä Tercio, ni cagucuaä guijtze xcuent Pabl, ruxhaläza xtixtios lojtu xcuent Jesucrist.

²³Ruxhaläza Gayo xtixtios lojtu. Rbääznu rolizni, luxh rudeedzani rolizni guidxagsa' reben guidoo. Ruxhaläza Erasto, ni najc tesoreer xten guejdxre, xtixtios lojtu, sigajcza bejznu ni laa Cuarto.

²⁴Gacnäj Dad Jesucrist la'tu. Sugacni si'c.

Rediidx lult xten Pabl

²⁵Colguiliä'p xpala'n nani saje gusudzu'tz la'tu loj xtiidxni nani basule'ä, näjza loj xtidx Jesucrist xcuent rehxigab ni naga'tz galooli, ²⁶naj abaluiloj rediidxga lojtu; näjza xcuent ni bacuaa reprofet' galooli; si'c najc diidx ni bia'n Gueb Dios ni nabajn par tejpas loj rexpejnni, agusule'ni loj guiraa reben guedxliuj, te gusoobreni diidx sa'csi rililajzreni xtiidxni, ²⁷colguiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Guijtz Ganid Ni Bacuaa Pabl Lo Guidoo Xten Guedx Corinto

Bacuaa Pabl te guijtz lo guidoo xten guedx Corinto

1 Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijszre lojtu ²ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. ³Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴Rudedätis xquixtios lo Dios xcuentu, xcuent yälruulasajz xten Dios ni cua'tu xcuent Jesucrist, ⁵te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶sigajcza con xcäl'nabansa'ctu baluiitu huililajz-pactu xtidx Dios xcuent Crist. ⁷Ni'cni xhetliidi cayäädxditu loj redzunsa'c ni runiidx Dios, la_l ni ganduxh yu'tu cabäjztu guibisac Jesucrist lo guedxliuj. ⁸Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹Rusoob-pac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäjtni.

Rlia' sa'reni neñ guidoo

¹⁰Rulidxä la'tu, rebetzä, xcuent Xtdad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi

xcäriejn. ¹¹Sa'csi agucbeä xcuenttu, betzä ni huililajz xtidx Dios. Tej resa' Cloé biädsa'n diidx loä xcuenttu, yu' yälrdijl lojtu. ¹²Rlazä guiniä scree lojtu sa'csi yu'reni rni: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zareni rni: "Narä nacä xpejn Crist." ¹³¿La rujntu xhigab nala' sa' Crist, ä? ¿La cuaj Pabl lo crujs xcuent xtojltu, ä? o ¿La gurobnistu con laj Pabl, ä? ¹⁴Rudedä xquixtios lo Dios dina nutiobnisä nicla tejtü, xtebtis Crispo näjza Gayo, ¹⁵te rut naadi con laä batiobnisäreni. ¹⁶Abanaj lazä batiobnisä resa' Estéfanas. Di lazä guinaj la yu' chu stee bationnisä. ¹⁷Di Crist nuxha_l narä te gutiobnisä. Baxha_lni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo crujs.

Crist najc xcäl'milaagwr näjza xcäl'najn Dios

¹⁸Rediidx ni rniinu xcuent Jesucrist xcuent xho gujtni lo crujs te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcäl'milaagwr Dios. ¹⁹Scree caj loj rexquijtz Dios:

Narä sutzulä yäl'nasin xten rebennajn, sudzucaäza xcäl'nadxällajz, xhigab rebejn ni nadxällazduxh.

²⁰¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl'nasin xten guedxliuj si'c nayällajz nez loj Dios, ä? ²¹Ni'cni loj xcäl'nasin Dios, di rebejn guedxliuj niembee Dios con xcäl'nasin guedxliujre, ni'c bichagljaz Dios con yäl'rusule' diidx ni rniireni nayällajz,

con ni'c baslaani lo dojl rebejn ni huililajz xtiidxni xcuent Crist.

²²Rexpejn Israel rlanjpacreni fiireni remilaagwr; rebejn griegw rguuil yalnanduxh. ²³Niluxh nuurnu rusule'nu didix xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzajt xhet sajcdi rediidxre. ²⁴Niluxh loj rebejn ni gule Dios chalilajz rediidxre, rexpejn Israel sigajc loj rebenzajt, rediidxre najczani yalmilaagwr najczani yalnasin xten Dios. ²⁵Sa'csi xcäl-nayääl xten Dios si'c rchalo rebejn ni'c najc nasinduxhru loj xcäl-nasin xten reben guedxliuj; luxh xcäl-rniaj xten Dios sacduxhruni loj guiraa xcäl-nadaan reben guedxliuj. ²⁶Colhuui la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben nasin loj reben guedxliuj, guxiiza rajptu yäl-rnibee, guxiizatu najctu bejn ni agojl guiga'tu bensa'c. ²⁷Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. ²⁸Agule Dios rebejn ni di guiga' benro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹Te nicla tej bejn digacdi guiliä'p lagajc xpala'nmi nez loj Dios. ³⁰Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yalnasin xten Dios, te guibansa'cnu nez loj Dios, te gacnaya lastoonu, näjza te quiixni rextojlnu. ³¹Si'c bejn Dios te soob xtiidxni cadro caj scree:

Ni rlanj guinii didxro, suguiliä'pni xpala'n dzuun ni bejn Jesucrist.

Rediidx xcuent Crist ni cuaj lo cruzj

2 Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist. ²Cheni

guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruzj. ³Bidzunä lojtu guideb rdxagä, guideb racditä sa'csi cadxebduxhä. ⁴Cheni basule'ä diidx lojtu, dina niniä didxro xten yalnasin xten guedxliuj, alga guniä xtiidx yalnasin xten Sprit Dxan xten Dios näjza xcäl-rnibee Dios, ⁵te di gac xcäl-rililajztu xcuent yalnasin xten guedxliujre, te gac xcäl-rililajztu xcuent yäl-rnibee xten Dios.

Rumbee bejn Dios xcuent ni ruluu Sprit Dxan xten Dios

⁶Rniizanu lo sa'nu ni aguyajl lo xtidx Dios rediidx xten yalnasin xten Dios, per te yalnasin ni di gac xcäl-nasindi guedxliuj, niclaza xten reni rnibee lo guedxliujre, sa'csi sidzujn dxej sinitlojreni. ⁷Niluxh che rniinu yalnasin xten Dios, rniinu diidx ni rut racbextebdi, xcuent xho gac guidzunnu cadro yu' Dios xhaguibaa. Cheni gajdli gac guedxliuj, rapcheeni yalnasin xhiga'tz xtenni. Baluiinini loonu te guibannäänuni lo xcäl-rdimbicha' xtenni. ⁸Nicla tej reni rnibee lo guedxliujre gajd gacbee recosre niluxh paru niacbeerenini, direni nucuaa lo cruzj Dad Jesucrist nani rajp xcäl-rdimbichaduxh. ⁹Najcni si'cni caj lo rextidx Dios cadro rnii: Recos ni gajdpac baloj bejn fii, nani gajdpacza diajg bejn jiejn; nani gajdpacza jitu' lo xhigab bejn, guiraa recosga abaluchee Dios par rebejn ni chanälajzni.

¹⁰Niluxh abaluu Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios racbesa'c guiraa rexhigab, näjza recos xhiga'tz xten Dios.

¹¹Loj reben guedxliuj ¿chuni'c racbee rexhigab ni rujn bejn? Lagajc sprit xten bejn ni yu' nenni racbee xhi xhigab cayu-

jnni. Sigajcza rut racbeedi rexhigab xten Dios; Sprit Dxantis xten Dios racbeeni. ¹²Luxh nuurnu dinu nica' yäl'najn xten guedxliuj, alga cua'nu Sprit Dxan ni siääd lo Dios te gacbeenu rexhicos ni abasalajz Dios loonu. ¹³Nuurnu rniizanu xcuent recosga, xhet diidxdä ni ruluii xcäl'najn guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn ni rbäjz Sprit Dxan xten Dios nen lastooreni.

¹⁴Niluxh reni di chalilajz xtidx Dios, direni gacbee rexhigab xten Sprit Dxan xten Dios, sa'csi laareni xhigabyäältis rchaloreni xcäl'nasin Dios. Di gacdiza gabeereni rexhigabga, sa'csi Sprit Dxan xten Diostis rajc ruluii lo bejn rexhigab xtenni. ¹⁵Rebejn ni ahuuililajz xtidx Dios, rula'tzreni guira'ti ni ruluii Sprit Dxan xten Dios lojreni. Luxh rebejn ni ahuuililajz rutliidi rula'tzdireni. ¹⁶Sa'csi scree caj lo xtidx Dios: "¿Chuni'c agucbee xho najc xhigab xten Dios te gac guluuini Gueb Dios, ä?" Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racbeenu rextiidxni.

Reni rujn dzuun lo Dios

3 Rebetzä, di niajcdi niniä redidxna-gajn lojtu si'c ni rniä loj rebejn ni rajp yäl'nasin xten Sprit Dxan xten Dios, basule'ä ganaxtis didx guyasi lojtu, sa'csi najctu bejn guedxliuj o bi-uxbäz ni guxii racbeeni xcuent Crist. ²Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³sa'csi nabañsijctu si'c nabajn reben guedxliuj lältis runembiidtu, rdexchlajztu lo sa'tu, ¿la ditu gacbee nacsijctu si'c bejn guedxliuj, ä? ¿La lältis nabajntu si'c nabajn reben guedxliuj ni di gumbee xtidx Dios, ä?

⁴Sa'csi cheni rniä tejni: "Narä nacä te xpejn Pabl", dxejcti steeni rniä: "Narä nacä te xpejn Apolos", ¿la xhet cayujnditu sigajctis ni rujn rebejn guedxliuj, ä?

⁵¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runidx Dios jiennu. ⁶Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷Ni'cni nicla ni rusulexгаа diidx, niclaza nani racnä j racbeeru bejn rediidxga xhet sajcdireni; Diostis sajc nani rusanij xcäriejn rebejn. ⁸Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejganu dzuun nani riennu. ⁹Nuurnu najcnu si'c remos ni runnä j Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios. ¹⁰Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcnä. Niluxh tejsa ni chanuu gun dzuun lojga, suga'pni cuidaad xho guiliäsni padeerga. ¹¹Sa'csi di gacdi gusu-jreni garenca cimient loj nani najcxгаа, ni najc Jesucrist. ¹²Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, ¹³sidzujn dxej sien xho najc dzuun ni bejn tejsa bejn. Sa'csi siääd fis guiboo ni guluuloj dzuunga, sa'csi lagajc guibooga guluuloj dzuunga, xho najcni. ¹⁴Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejn ga ni riäj j xca'ni sa'csi bejn ni yusa'c. ¹⁵Niluxh palga chec ni bejn ni yejc cimientga xhet xca' dini, xcäl'nabajntisni di nit, luxh xtzuunni sejc.

¹⁶¿La ditu gan la'tu najctu xquidoo Dios, luxh nen lastootu rbäjz Sprit Dxan

xten Dios, ä? ¹⁷Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸Nicla tejtu na'c gusgueetu lagajc la'tu. Palga yu' chu rujn xhigab nanduxhni xcuent yäl'nasiñ xten guedxliujre, nanabpac gacni si'c te bejn ni xhet najdi te xca'ni yäl'nasiñ xten Dios te gullipac gacni te bennajn, te ben nasin. ¹⁹Sa'csi yäl'nasiñ xten guedxliuj xhet sajcdi nez loj Dios. Xo rexquijtz Dios caj scree: "Dios rujn rga' reni rajp yäl'nasiñ xten guedxliuj lagajc xcuent xcälrus-gueereni ni rujn lagajc xcäl'nadxällajzreni." ²⁰Ste'ca lajt caj scree: "Nanchee Dios xho najc xhigab ni rujn rebejn ni rajp xcäl'nasiñ guedxliujre, luxh xhetliidi sajcdi nez loj Dios." ²¹Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexhicos najc xtengatu, ²²palga najcni Pabl, o Apolos, o Pedr, o guedxliuj, o yäl'nabajn, o yäl'gujt, o recos ni yu' naj, o recos ni churu gac, guiraareni najc xtentu. ²³La'tu najctu xten Crist, luxh Crist najc Xi'n Dios.

Xtzuun reapost

4 Ni'cni la'tu nanab fiitu loonu si'c rexmos Dad Jesucrist ni rajp rexhigabxhigatz xten Dios te gusule'nureni lojtu. ²Mbaj pues, te bejn ni cahuii te dzuun nanab gusoobreni diidx, gunreni te dzunsa'c. ³Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴Entis rbedxi xcärienä, per xhet xcuent ni'cdi sajcdi guiniä xheti xtolä, Dad Jesucrist najc nani rula'tz narä, rhuilojni xho nacä. ⁵Ni'cni la'tu na'c gucuaquijtu bejn che gajd guidzujñ dxej; colcuäjz jiääd Jesucrist dxej laani sibääni lo bianij guiralii ni naga'tz lo nacäy, luxh suluilozani xhi xhigab yu' nen lastoo tejga re-

bejn, dxej lo tejganu sudeed Dios ni nungäjñ xca'nu.

⁶Rebetzä, xcäl'nasa'ctu caniä redidixre lojtu. Caniä xcuent Apolos näjza narä, si'c te yäl'ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejt lo resat'u, lañ ni cabälaztu steeni. ⁷Sa'csi çchuni'c rniij najclu bensa'cru lo ste'ca bejn?, o çxhini'c rajplu ni di Dios nuniidx lojlu? Luxh palga cuaxlia'luni, çxhicuent lagajc luj rliä'plu xpala'ntu, lascanu rut baniidxdilojlu recos ni rajplu?

⁸Rujntu xhigab rajptu xhidajl cos, naatu najctu ricwduxh, rchalotu najctu reii, dirutu guiquiin nuurnu. Malaii gullij najcpactu reii te näjzanu guinibenäjnu la'tu. ⁹Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangl Dios najcnu si'c reben ni rd-edlojtis bejn lojreni. ¹⁰Nuurnu najcnu bennayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu najc bendanduxh. Rliä'p rebejn xpala'ntu, ni'c rbälazreni nuurnu. ¹¹Cadeednu trabajwduxh naj, rliä'annu, riojlnu, xho rniäy xhajbnu, rdiñäj rebejn nuurnu, luxh xheti rolijznu. ¹²Rdxaagnu riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsí rebejn nuurnu, ri-entisnu huant. ¹³Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴Dina gucuaä rediidixre te gusanxtuiyätu. Rucuaä rediidixre te gulidxätu si'c rexi'nä ni sanälazä. ¹⁵Palga ga'ptu tzuu miñ bejn ni guluiitu rediidx xten Crist, ruti stee xtadtu; narä gucä xtadtu,

ganid narä basule'ä rextidx Dios lojtu. ¹⁶Ni'cni rulidxä la'tu, colyejn si'cni ruhuiitu runä.

¹⁷Ni'cni baxhalä Timoteu lojtu, najni si'c xi'nä ni sanälazä, ni rusooob dididx xcuent Crist. Laani susnajni lajztu xho mood nabanä lo yäl'nabajn xten Jesucrist, sigajcni ruluiä neñ reguidoo guiraasi lajt. ¹⁸Yu'tu ni acayajc guyalajz, naatu pet dina guibisacä lojtu. ¹⁹Cabäzä jiädhuiätu, palga si'c rrajz Dios, dxejc sacbeä chuni'c najc rebejn ni cayajc guyalajz, fiä xhipacni rujnreni, xhet xti-dixtisreni gacbeä. ²⁰Sa'csi xcäl'rnibee Dios xhet ganaxtis xcuent diidx najcni, näjza dzuun ni rujnreni ruluiloj xcäl'rnibee Sprit Dxan xten Dios ni rajpreni. ²¹¿Xho rrajzzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunä yäl'rinälajz näjza yäl'nadolajz te gulidxätu, ä?

Xho nanab gunnäjtu te bejn ni rujn falt lo sa'ni

5 Agucbeä yu' tejtu ni ahuililajz xtidx Dios, cua'ni si'c chääl'ni te gunaa ni gujc chääl xtadni. Dee najc te doļduxh nani nicla reni di chalilajz xtidx Dios direni gun. ²Luxh la'tu gujcty guyalajz lacuaa niac-huin lastootu; te bejn nani bejn doļlga, riäjł nibäätuni nez lojtu. ³Mase ruti narä ro'c, lastoä suganäj la'tu. Alabenä xhigab xhini'c jienäjnu bejnğa ni bejn doļduxhğa, sigajc ni ninä paru suga'ä ro'c. ⁴Con laj Dad Jesucrist, che abidxagsa'tu, luxh alastoä suganäj la'tu, con xcäl'rnibee Dad Jesucrist, ⁵abenä xhigab guteednu bejnğa ladznaa beñdxab te ted tiejxhni trabajw, niluxh sprit xtenni laani neñ dxej ni jiädsac Dad Jesucrist lo guedxliujre.

⁶Di guchaag guiliä'ptu xpala'ntu xcuent dzuun ni rujntu. ¿La ditu gan te doļl najc si'c tudxe'n cojb ni ruslaj, rusaguijni cojb cadro ru'chni, ä? ⁷Colgudzucaj cobyujxhğa, te guibajntu

te yäl'nabannayacoob si'c te cobyä, sa'ni racchee yätxtiil ni xheti levaduur yejcnı par lanij xten pascw. Arajptu yäl'nabannaya sa'csi agujt Jesucrist sigajc gujt te xile' lo lanij pascw te badzucajni rextojłnu. ⁸Si'c nanab jiennu lanij xten pascw con yätxtiil ni xheti levaduur yejcnı, nalajznu con yäl'guliipac neñ lastoonu, xhet yätxtiildi ni yu' cobyujxhğa yejcnı, nalajznu na'c gunlu latsiaj.

⁹Lo stee guijt abacuaä lojtu, na'c guchaagtu reben ni runnäj cosguijdx bejn ni di gac chäälreni. ¹⁰Niluxh xhet caniädi xcuent reben guedxliuj ni rujn cosguijdx con bejn ni di gac chäälreni, niclaza xcuentdi rebejn ni rchaglaztej meel, niclaza rebejn ni najc gubaan, niclaza rebejn ni riu rebanäjł. Paru si'c gacni, nanab jiunejztu guedxliujre. ¹¹Niluxh narä bacuaä guijtza lojtu te na'c guchagsa'tu te bejn nani rnii ahuililajzni xtidx Dios, luxh rujnrni cosguijdx con bejn ni di gac chääl'ni, o rchaglaztejni meel, o riuni rebanäjł, o rniyaj sa'ni, o rsiojzni, o rusgueeni bejn te rca'ni xhi xtenni. Rniäza lojtu, nicla gaunäjtu sa' bejnğa. ¹²⁻¹³Sa'csi narä di gacdi gunä yäl'guxhtis loj rebejn ni gajd chalilajz xtidx Dios. Gunti Dios yäl'guxhtis lojreni. La'tu nungäjł guntu yäl'guxhtis loj rebejn ni ahuililajz xtidx Dios. Ni'cni colgudzucaj beñdoļlğa lojtu.

Na'c chäätu loj rebeñdoļl te gunreni yäl'guxhtis lojtu

6 Palga tejtu ni ahuililajz xtidx Dios rrajz cue'c xquej stee sa'tu, ¿xhicuent chale'ctu xquejni loj rebeñdoļl te gunreni yäl'guxhtis lojtu? ¿Xhicuent ditu guiniab yäl'guxhtis loj rebejn ni ahuililajz xtidx Dios, ä? ²¿La ditu gan, rebejn ni ahuililajz xtidx Dios sujn yäl'guxhtis lo reben guedxliuj, ä? Palga la'tu sujntu yäl'guxhtis lo reben guedxliuj, ¿la di gacdi guntu yäl'guxhtis lo sa'tu lo re-

cosbáz lacuaa cháätu loj rebendoj̄l te gunreni xcälguxhtisreni lojtu, ä? ³¿La ditu gan sienzanu yälguxhtis lo rexangl Dios, ä? ¡Aticaxh jiennu yälguxhtis loj recos baze' xten sa'nu lo yälñabajnre! ⁴Palga la'tu cadilñaj sa'tu xcuent recos xten guedxliujre, ¿xho mood cháälu loj rebendoj̄l ni rut najcdi loj xquidootu, te naareni lojtu xhini'c guntu, ä? ⁵Rniä rediidxga lojtu te guitujytu. ¿La ruti nicla tej bennasin loj guiraatu ni sajc gun yälguxhtis lo resa'tu, ä? ⁶¿Xhicuent rile'c te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

⁷Mbaj naj, guliipacni alabanijt̄tu sa'csi yu' yälrdilñaj sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu. ⁸Per dee, alga lagajc la'tu runnijt̄tu loj lagajc resa'tu, luxh rca'tu xhixten lagajc resa'tu.

⁹O ¿la ditu gan reben dojl dipacreni jiu' lo xcälñibee Dios, ä? Na'c gusaantu gusgueereni la'tu; nicla te resa' dee di jiu' lo xcälñibee Dios: guiraa reni richagtoo regunaa; guiraa reni rajñ rebanäjb; reni resnäj bejn ni di gac cháälñi; reniguii ni rungunaa; reni najc birääx; ¹⁰reni najc gubaa; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälñibee Dios. ¹¹Yu'zatu ni gujc si'c galoo, niluxh naj abasia Dios lastootu, naj anajctu bennaya nez loj Dios sa'csi abiälñajz Dios xtojltu xcuent Jesucrist, najza xcuent Sprit Dxi xteni. La'tu anajctu rexpejni.

Tiejxhnu najc xquidoo Dios

¹²Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. ¹³Guliini najc yälrajw par xque'ni, luxh xque'ni najc par yälrajw, niluxh sidzujñ dxej sunit-

loj Dios guiro'preni. Per tiejxhnu di gac par jiennu cosguijdx con bejn ni di gac cháälñu. Tiejxhnu najc par Dios, luxh Dios najcza par tiejxhnu. ¹⁴Luxh naj lagajc Dios guläs Dad Jesucrist lo rebengut, siliäsazani nuurnu con xcälñibeduxhni.

¹⁵¿La ditu gan tejgatu najc si'c te la' tiejxh Crist sa'csi ahuililajztu rextidixni, ä? Palga tiejxhnu najc xten Crist, ¿la sajc gudeednuni loj te gunadxab, ä? ¡Gurniälöjlu jiennu si'c! ¹⁶¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: “Guiro'preni sajc si'c tejtis bejn.” ¹⁷Niluxh nani rudeed lastooni lo Dios anajczani tejtis con laani sa'csi rbäjz Sprit Dxi xten Dios nen lastooni.

¹⁸Colguibicaj lo dojl ni rujn bejn con nani di gac cháälñi. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac cháälñi najc dojl lagajc nen tiejxhni. ¹⁹O ¿la ditu gacbee tiejxhtu najc xquidoo Sprit Dxi ni abaniidix Dios te cuääzni nen lastoonu, ä? Ni'cni di gacdi guinibeetu lagajc la'tu. ²⁰Agudijx Jesucrist xtojlnu con xtejnñi lo crujz, ni'cni nanab jiennu dzunsa'c nani guiliä'p xpala'n Dios con tiejxhnu najza Xpirtnu.

Yälrulijdx xcuent yälñuchñaa

7 Naj gudzu'ä diidix lojtu xcuent ni gunabdiidixtu cheni bacuaatu guijtz loä. Guliini hueen najcni na'c guchñaa te niguii. ²Niluxh sa'csi yu' xhidajl reni richunäj chutis gunaa, suga'p tejga reniguii cháälñicni; sigajcza suga'p tejga regunaa cháälñicni. ³Nanab niguii guchaagni cháälñi che rlazj cháälñi, sigajcza gunaa nanab guchaagni cháälñi che ni si'c rlazj cháälñi. ⁴Di gunaa guinibee lagajc tiejxhni, sa'csi cháälñi rñibee tiejxhni. Sigajcza di niguii guinibee lagajc tiejxhni, sa'csi cháälñi rñibee tiejxhni.

⁵Na'c gusuni' tejt_u lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil bendxabtu chunäjtu ste'ca bejn.

⁶Rniä rediidxre lojtu te ni rlanj guchnaa sajc guchnaani, niluxh dina guiniä lojtu, nanabpac guchnaatu.

⁷Narä rlazä maläii sajc gac guiraa bejn si'c ni nacä. Dios abadeed loj teja bejn xho mood guibajnni. Yu'reni sajc guibajn tej mood, yuzareni sajc guibajn garena mood.

⁸Loj reben xteb näjza loj regunabi-uud rniä, hueen najc na'c guchnaareni, gacreni si'c narä. ⁹Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlanjzreni guchaagreni te niguii o te gunaa.

¹⁰Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." ¹¹Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

¹²Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäznäjni niguiiga, na'c guro'n niguiigani. ¹³Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjzni cuäznäjni gunaaga, na'c guro'n gunaaga chäälni. ¹⁴Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yäl'ruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yäl'ruchnaaga nez loj Dios. Palga dini

gac si'c, di Dios gunle' rexi'nreni, per naj abenle' Dios rexi'nreni. ¹⁵Palga chäälni te gunaa o chäälni te niguii ni di chalilajz xtidx Dios luxh rlanjzni guilia' sa'ni con chäälni ni ahuuilajz xtidx Dios, sujiizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuecdxi lajznu. ¹⁶Sa'csi xho najnlu, gunaa, la suslaa Dios chäällu lo dojl xcuentlu, ä? O xho najnlu, niguii, la suslaa Dios chäällu lo dojl xcuentlu, ä?

¹⁷Si'ctis ni baniidx Jesucrist lo tejanu, si'ctis ni gule Dios tejanu, si'c suguibajnnu. Si'cza rulidxä gunrenini nen guiraa reguidoo. ¹⁸Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. ¹⁹Xhet najcdi la yu'ni bee o xhet beedi yu'ni. Tejtis ni nanab gunni, gu-soobni rediidx ni gunibee Dios. ²⁰Tejgani jia'n si'cni najcni cheni gurejdx Diosni. ²¹Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi. ²²Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³Guzii Cristtu con xtejjni, ni'c na'c gusaantu guinibee bejn la'tu te gac guntu xtzun Dios. ²⁴Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

²⁵Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. ²⁶Runä xhigab

hueen najc palga di reniguii guchnaa sa'csi siääd yäl'naganduxh lo guedxliujre. ²⁷ ¿La alabachnaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. ²⁸ Palga guchnaalu, xhet dojl'di rujnlu. Palga guchnaa te dxa'p, dizani gun dojl. Niluxh reni ruchnaa sidejdreni trabajw lo yäl'nabajnre. Ni'cni rniä na'c guchnaatu sa'csi di rlazä tedtu trabajw.

²⁹ Rebetzä, rlazä guiniä lojtu redidixre: Guxiiru dxej guibajnnu lo guedxliujre, ni'cni reni abachnaa na'c gunreni xhigab xtentis yäl'ruchnaa, te gac gunreni xtzuun Dios. ³⁰ Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³² Narä rlazä na'c chutu yärsia'. Rebejn ni gajd guchnaa, riureni rextzuun Dios, näjza xho guspaareni lajz Dios. ³³ Renani abachnaa riureni recos guedxliujre te guspaani lajz chäälni, ³⁴ tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälni.

³⁵ Rniä rediidixre par xcäl'nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

³⁶ Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajc gudeednini guchnaani. ³⁷ Palga steeni dini gun xhigab si'c nanab gunni, sajc gunni si'ctis ni rlanjzi palga abejnpacni xhigab

neñ lastooni di xindxa'pni guchnaa, hueenza najc si'c. ³⁸ Ni'cni nani rudeed xinda'pni guchnaa, hueen rujnni, sigajcza nani dini gudeed xindxa'pni guchnaa, laacaza rujnni.

³⁹ Te gunaa ni abachnaa, rajpni por guibannäjni chäälni guideb nabajn chäälni. Palga guet chäälni, jianxtebni stehuält, dxejc sajc guchnaani chutis niguii ni rlanjzi, palga najcni tej ni ahuililajz xtidx Dios. ⁴⁰ Narä rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxan xten Dios narä.

Yäl'rajw ni ruzujreni lo rebanäjb

8 Rniä lojtu xcuent reyäl'rajw ni ruzujreni lo rebanäjb. Guliini guiraanu rajpnu yäl'najn xcuent recosga. Niluxh yäl'najn rujn rajc bejn gualajz. Luxh yäl'rinälajz sa'ni, ni'c rujn racnäjnu resa'nu. ² Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. ³ Palga yu' chu sanälajz Dios, Dios anumbee bejnga.

⁴ Ni'cni, xcuent reyäl'rajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc "dios" xhaguibaa o loj guedxliuj, luxh yu'za xhidajl "dios" näjza xhidajl lam ni rniibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajnnu. Rajpnu tejtis Dad ni rniibee loonu, ni'c najc Jesucrist. Xcuent xcäl'rniibeeni guc-chee guiraa recos loj guedxliuj, luxh nuurnu nabajnnu xcuent Jesucrist.

⁷ Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajpneni rebanäjb, luxh rajwzareni reyäl'rajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhizä

xcäriejnreni. ⁸Xhet xcuent xhi rdaudinu sajc guibansa'crunu lo xnejz Dios. Xhet najcdi palga guidaunu o palga dinu guidaun. ⁹Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. ¹⁰Palga te bejn ni gajd chalilazsa'c xtidx Dios fiini caya-jwlu reyälrajw ni guzuj lo rebanäjb, luxh luj najclu te bennajn, sa'csi dee gajd gacbesa'c rextidx Dios, ðla di lajzni gac nadip te näjza laani chatajwni yälrajw ni guzuj lo rebanäjb? ¹¹Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijnni, luxh najcni bejtzlu sa'csi näjza par laani gujt Dad Jesucrist lo crujz. ¹²Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. ¹³Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

Xhi sajc gun te apost

9 ðLa dina gacä te bejn ni rut lojdi yu'ä? ðLa xhet apostdi narä? Ni abahuiä lo Dad Jesucrist, abasule'ä rextidxn lojtu, ni'c huililajztu xtiidxn. La'tu najctu xtzunä ni runä lo Dios. ²Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

³Diidx ni rniä scree loj reni di chalilajz nacä apost najc scree: ⁴ðLa di riäjl xca'ä guiraa ni runiidxtu gauä näjza ni runiidxtu yä'ä? ⁵ðLa digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr? ⁶O ðla xtebtis Bernabé näjza narä di gacdi cuääz jiennu dzuun te guidaunu laj rusule'nu xtidx Dios? ⁷ðChuni'c rajc soldaad luxh lagajc laani siini xhi gauni? O ðchuni'c rusuj yaguub luxh dini gau ninejxh ni rcaj lojga, ä? O ðchuni'c rajp

gaii dxib, luxh dini yä le'ch ni rudeedreni, ä? ⁸Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcuent recosre. ⁹Loj reguijtz xten xleii toMoisés caj rediidxre: "Na'c gusällu guijxh ro'gon che cayo'tni yejc triuu." ðLa guniitis Dios rediidxre sa'csi riuni regon, ä? ¹⁰ðDini gac! Xcäl'nasa'cni guniini rediidxga, sa'csi bejn ni rujn dzuun lo niaa näjza nani rusia triuu riäjl gunlojni xca'ni te yäl'nasa'c ni rajc lo xniaani. ¹¹La'tu najctu si'c te yuj cadro gule'cnu binij sa'csi basule'nu rextidx Dios lojtu, ðla rujntu xhigab dzunro najc gacnäjtu nuurnu tudxene', ä? ¹²Palga racnäjtu ste'ca bejn ni ruluuutu, nungäjlrugacnäjtu nuurnu.

Niluxh gajdnu guinii si'c lojtu sa'csi di rlaizdinu guidxoönnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. ¹³La'tu najntu reni rujn dzuun nen guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga. ¹⁴Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxn. ¹⁵Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

¹⁶Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxn. ¹⁸ðXhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxn te guniidx rebejn xhi

guniidxreni xcuent xtzunä, mase si'c riäjł gunreni.

¹⁹Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajł bejn xtidx Dios.

²⁰Cheni yu'ä loj rexepejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajł loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo lei-iga. ²¹Stee lajt cadro rlazä gunä gaan reni di guibajł lo xleii toMoisés, runä si'c rujnzarenı, mase empac nabanä lo xleii Dios sa'csi rusobä diidxnı basa'n Crist. ²²Cheni yu'ä loj reni guxii rililajz xtidx Dios, racäza si'c ni najczeni te gunä gaan chalilazsa'czeni. Narä runä sigajc rujnreni, te si'c gunä gaan chalilajz xhidajłreni xtidx Dios. ²³Runä guira'ti xcuent xtidx Dios ni rusłaa bejn lo dojl, te xca'zanu, narä näjza rebejn ni ahuililajz xtidxä, yäl'nabajł par tejpas.

²⁴Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. ²⁵Guiraa reni rrajz guxun rapdareni tiejxhreni te ga'p tiejxhreni yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. ²⁶Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäätisni lo bej. ²⁷Niluxh narä runä rajc tiexhä si'c xmosä te na'c gunni si'ctis ni rrajzni, te gunni nani rrajz Dios te di cheni abasule'ä xtidx Dios loj xhidajł bejn, gusanxtujy tiexhä narä.

Yäl'rulijdx lo xcuent rebanäjł

10 Rebetzä, di rlazä jiällajztu ni gusajc rextotadgoldoonu. Gusajreni xpalaa te za gudejdzarenı galäii nisdoo ni laa Nisdo Xniaa.

²Gudejdreni xpalaa te za näjza gudejdreni galäii nisdoo; ni'c najc si'c te yäl'robnis sa'csi sanajłreni toMoisés.

³Sigajcza guiraareni gudajw tejtis yäl'rajw ni baxhal Dios xhaguibaali.

⁴Guiraazarenı gu' nis ni badeed Dios, Dios bejn birii nisga cuä' te guilaj. Luxh Xprit Crist gusanäjreni cadrotis säärenı nez lo reyubidzroga. Luxh con xcäl'rnibeeni birii nis loj guilajga, Crist najc si'c guilaj ni huinärenı. ⁵Dios bidxechnäj xhidajłreni, ni'c xhidajłreni gujt nez lo reyubidzga.

⁶Guiraa rediidxga najc te yäl'rulijdx loonu, te na'c guichagłajznu jiennu lagajc redojl ni bejn rextotadgoldoonu.

⁷Na'cza gantı rebanäjł si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisurenı te gusloj caguijtreni."

⁸Na'c chunäjnu stee bejn di gac chäältı si'c bejnreni, ni'cni gujt gal'bichon milreni tejtis dxej. ⁹Na'cza guche'chnu Dios con rextojłnu si'c bejn balti rebejnğa, ni'cni gujtreni sa'csi gudauya' bäl'reni. ¹⁰Na'cza chamojmtı xcuent ni rujn Dios si'c ni bejn rebejnğa xcuent ni bejn Dios, ni'cni baxhal Dios angl xten yäl'gujt bagu't xhidajłreni.

¹¹Guiraa redee gusajc rextotadgoldoonu te rulijdxni nuurnu, cuajzarenı lo guijtz te guluii rediidxga nuurnu xho riäjł jiennu, nuurnu ni nabajłnu nenı redxej naj. ¹²Ni'cni chutis ni rujn xhigab nabansa'cni nez loj Dios, sudzu'tzni te di jiabsacni. ¹³Xheti te trabajw ni cadejdtı nani gajd ted chutis bejn. Niluxh di Dios cuälaztu, dini gusaan tedrutı dzunduxh nani digacdi guntu huant, suniidx Dios yäl'nadip yäl'nadaan lojtu te che tedtu trabajw sidxältı xho guibicajtu lo dzunduxhga, te gutiplajztu.

¹⁴Ni'cni rniä lojtu, rebetzä nani sanälazä, colbicaj lo yäl'rajw xten rebanäjł. ¹⁵Rniä lojtu si'c lo te bejn

nasin, te bennajn: colgulatzsa'c rextidxä don la laaca najcreni. ¹⁶Che rdaunu xchej xten Dad Jesucrist najcni te seen nabannäanu Jesucrist. Che rdunnu nen co'p, maalajznu gudijx Dad Jesucrist xtejnni xcuent xtojlnu lo crujz. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo crujz xcuentnu. ¹⁷Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸¡Bahuii xho rujn rexpejn Israel! Rajwreni xpääl reguidxaa ni rila'creni lo Dios lo dxan nen guidoo, ni'c najcreni tejsi con guiraa rebejn nani rujn sigajc rujnreni. ¹⁹¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn lo banäjb, ä? O ¿la yu' xhi sajc banäjbga, ä? ²⁰Xhet sajcdireni. Narä caniä lojtu dee: Recos nani rbe'c rebenzajt lo rebanäjb, lo rebenđxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo rebenđxab, te di chachunäjzatu rebenđxab. ²¹Sa'csi digacdi yätu co'p ni rusnaj laaznu ni bejn Dad Jesucrist lo crujz nägajcza co'p nani rudeedreni lo rebenđxab. Digacdiza guidaunu xchej xten Dad Jesucrist nägajcza xchej ni rudeedreni lo rebenđxab. ²²O ¿la rlaiznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

Colyejn guira'ti te chä'p xpala'n Dios

²³Guliicani, sajc jiennu xhitis ni rlaiznu jiennu, niluxh xhet guira'ti ni rlaiznu jiennu najc hueen par nuurnu. Guira'ti najc laaca, niluxh yu' reni di gacnäy gustioobnu lo xcälirililajz Dios. ²⁴Na'c guntu xhigab quiiltistu lagajc xcäl'nasa'ctu; maazru hueen quiilzatu xcäl'nasa'c xpsinü. ²⁵Coltajw xhitis bääl ni rdo' lo guii, na'c guiniabdiidxtu caro siäädni te di gacnaj xcäriejntu. ²⁶Lo xtidx Dios caj rediidxre: "Sa'csi guideb

guedxliuj näjza guiraa ni tre' lo guedxliuj najc xten Dios."

²⁷Palga jäädgajñ te bejn ni di chalilajz xtidx Dios luj jäädtaunäjlni luxh acuäjblu chäälü, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu. ²⁸Palga yu' chu naa lojlu: "Dee najc bääl ni bile'cnu lo rebanäjb", na'c gauluni, didi gunni gunijt dade'ga ni gunii si'c lojlu te di gacnaj xcäriejn chutis. ²⁹Dina guiniä xcäriejnlu, didi gunnajni xcäriejn stee dade'ga; mbaj naj, ¿xhicuent riäjñ gula'tzreni narä sa'csi rajc runä guira'ti porsi racnaj xcäriejn ste'ca bejn, ä? ³⁰Palga rudedä xquixtios lo Dios nani runiidx xhi rauä, ¿xhicuent rniyajreni narä ni rauä, luxh abadedä xquixtios lo Dios? ³¹Ni'cni palga gautu, o palga yätu o xhitis ni rujntu, colyuuj guira'ti te chä'p xpala'n Dios. ³²Na'c guche'chtu nicla rexpejn Israel niclaza rebenzajt, niclaza rexpejn xquidoo Dios. ³³Sigajcza runä narä, runä guira'ti ni rusjaa laiz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

11 Colyejn si'cni runä narä, sigajcza narä runä si'cni rujn Jesucrist.

Xho riäjñ gun regunaa nen xquidoo Dios

²Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu rusooobtu rediidx sigajcni baluiäreni lojtu. ³Narä rlazä gabeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. ⁴Chutis te niguii ni yu' xhumbreel yejcnii lañni cabedx-canabni lo Dios o lañni caguluiini xtidx Dios, laani rusanxtujyni yejcnii. ⁵Palga yu' te gunaa ni dini gusäu xpäiini yejcnii che cabedx-canabni loj Dios o che caniiini xtidx Dios, rusanxtujyni

yejcní sa'csi najcni sigajc najc te gunaa ni abigaj yejcní. ⁶Palga di te gunaa gusäu xpäiini yejcní suguigaj yejcní. Palga najcni te xtujy guigaj yejcní, sugusäuni xpäiini yejcní. ⁷Di guchaag gusäu te niguii yejcní sa'csi najcneni si'c xtuxh Dios, näjza xcälrdimbicha' Dios. Niluxh regunaa najc si'c xcälrdimbicha' niguii. ⁸Sa'csi di niguii nixixtiej cuä' gunaa; gunaa najc ni birixtiej cuä' niguii. ⁹Xhetza xcuent gunaadi guc-chee niguii; gunaa najc ni guc-chee xcuent niguii. ¹⁰Ni'cni nanab jäü yejc gunaa nen guidoo si'c te seen lo rexangl Dios yu' chu rnibeereni. ¹¹Niluxh nez lo Dios nicla niguii niclaza gunaa digacdi guiban xtebreni. ¹²Sigajc galoo birixtiej gunaa cuä' niguii, sigajcza naj gunaa najc nani ruu bäz; luxh Diostis najc nani runchee guira'ti rebejn.

¹³Colyejn lagajc xhigabtu naj, çla laaca najcni cuedx-guiniab te gunaa lo Dios laç ni xhet niäudi yejcní, ä? ¹⁴Loj reben guedxliuj guiraa reniguii rgaj yejcní, sa'csi najcni te xtujy guigaduxh xquidxejcní. ¹⁵Niluxh regunaa hueen najc rga' xquidxejcní te rusäuni yejcní. ¹⁶Palga yu' chu tiläidix xcuent rediidix nani cania lojtu, nanab gacbeeni si'ctis riennu, si'ctisza rujnreni nen guiraa rexquidoo Dios.

Xho ruxhijreni xchej Dad Jesucrist

¹⁷Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu nen xquidoo Dios, lacuaa laaca cuetu, xhet laadi rujntu. ¹⁸Rnixgää dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre. ¹⁹Pet naatu nanab guntu si'c te gacbeetu churení'c sanälajzpac Dios, churení'c sajcrú lo xtuun Dios. ²⁰Ni'cni che rdxagsa'tu, dini gac te cuetu lo xmex xchej Dad Jesucrist, ²¹sa'csi che agule'cneni xchej lo mex, tejga bejn rlaiz xcaxgaa xhi gauni, dxejc yu' reni agudxadoo xque'reni, agusojjzarení, laçni yu'

stee cuaa bejn calaan, gajdreni gau. ²²çXho mood? çLa xheti rolizjtu cadro gac gautu, yätu, ä? O çla rbälazlu xquidoo Dios, ni'c rusanxtujyлу rebejn ni xhet räjpdi, ä? çXhini'c guiniä lojtu naj? çLa naatu guiliä'pä xpala'ntu xcuent nani rujntu, ä? çGurniälojtu guiliä'pä xpala'ntu!

Xchej Dad Jesucrist

(Mt. 26:26-29;

Mr. 14:22-25; Lc. 22:14-20)

²³Baluiloj Dad Jesucrist loä lagajc nani baluia lojtu xcuent xho bejnni guxhijñ che gudaunäjni rexpejnñi te xchej xten pascw, guxhijñ ni gudo'ni. Cua'ni yätxtiil, ²⁴dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” ²⁵Si'cza bennäjni co'p che gulujx gudajwreni, räjpni lojreni: “Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.” ²⁶Che gautu yätxtiilga, che yätu nen co'pğa, ruluilosactu xhi bejn Jesucrist che gudijxni xcuent rextojñnu lo crujz; si'cza colyujñ dxejli ni guibisacni lo guedxliujre.

Xho riäjł gac xchej Dad Jesucrist

²⁷Ni'cni rniä lojtu, chutis tejtu ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujñni dojl, najcni si'cni lagajc laani bagu't Jesucrist, baxhe'zani xtiejnñi. ²⁸Niluxh sugula'tz tejgatu lagajc lastooni don la yu' xhi dojl bejnñi, dxejcti sajç gauni yätxtiil, yäni co'p xten xchej Dad Jesucrist, sa'csi abaxhobdojlñi. ²⁹Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujñni jiajb xcälñaj

Dios yejcní. ³⁰Ni'cni lacti resa'tu racx-huu, xhet nadaanreni, luxh yu'zarení agujt. ³¹Ni'cni nanab fiinu xho najcnu, guiniabnu lo Dios gudzucajni rextojnu te didi tednu trabajw. ³²Niluxh che rdejdnuní te na'c tednu trabajwduxh si'c ted reben guedxliuj che gacreni yálguxhtis xten Dios.

³³Ni'cni rniä lojtu, rebetzä, che guire'tu te gautu xchej, colcuájz resa'tu. ³⁴Palga yu' chu tejtú ni calaan, sugauni lagajc rolizjni, te di gun Dios yálguxhtis lojtu. Guiraa rexhistee cos, che jiälä ro'c fiä don xho gacsa'cni.

Dzuun ni rudeed Sprit Dxan xten Dios lo tejga ni rililajz

12 Rebetzä, rlazä gacheetu xcuent dzuun ni rudeed Sprit Dxan xten Dios lo tejganu.

²La'tu najntu che gajdtu chalilajz xtidx Dios, rajntu chutis banäjb ni di gachee, ni naatis bejn gantú. ³Ni'cni rlazä gacheetu naj, nicla tejtú ni yu' Xsprit Dxan Dios nen lastooni sajc guinii: “Xhet sajcdi Jesucrist.” Luxh rut rajcdi mii: “Jesucrist najc Daddid baxhuaannu”, palga di Xprit Dxan Dios cuääz nen lastooni.

⁴Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga nen lastoo guiragajcnu. ⁵Yu'za balti cuaa dzuun nani riennu, niluxh tejsi najc Xtaddid baxhuaannu. ⁶Yu' xhidajl mood rajc dzuun, niluxh tejsi Dios rujn dzuunga lastoo guiralií bejn. ⁷Tejga bejn ruluiloj garen-garen xtzuum Sprit Dxan xten Dios, niluxh guira'ti redzuunga najc te gacnäjreni guiraanu. ⁸Lo tej bejn rudeed Sprit Dxan yálnasiñ, lo steeni rudeed lagajc Sprit Dxanga yálnajn. ⁹Lagajcza Sprit Dxanga rudeedzani yárlililajzro lo tejni, dxejc lo steeni rudeedza lagajc Sprit Dxanga yálmibee te rusiajcní yálracxhuu. ¹⁰Loj stee bejn rudeedzani

yálmibee te gunni milaagwr, loj stee bejn rudeedni yálríembee te sajc guinixgaani xcuent recos ni churu gac; lo steeni rudeedni yálnasiñ te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yálracbee te rajc rniini loonu xhini'c gunii bejn ni rnií garen-garen redidxsaj. ¹¹Niluxh tejsi najc Sprit nani rujn guiraa redzuunre, racnäjni rujn tejganu xtzuumni si'ctis ni rlanjni.

Guiraanu najcnu te la' tejsi tiejxh

¹²Sigajc ni najc tiejxhnu tejsi, mase yu' xhidajl la' xtenni, tejgareni te la' tejsi tiejxh, sigajcza najc rebejn nani huililajz xtidx Jesucrist. ¹³Guiraanu, mase najcnu rexpejn Israel o ben griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädläjz nen lastoonu.

¹⁴Sa'csi tiejxhnu dini gac tejsi la', najcni balti la'. ¹⁵Paru naa ni'nu: “Sa'csi dina gacä te naa, ni'cni dina gacä te la' tiejxhre.” ¿Xhixh porsí ni'c dini gac tla' tiejxhga, ä? ;Gurniälöjlu! ¹⁶Palga diajgnu naa: “Dina gacä te baloj, ni'cni dina gacä te la' tiejxhre.” ¿Xhixh porsí ni'c dini gac tla' tiejxhga, ä? ;Gurniälöjlu! ¹⁷Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni? ¹⁸Mbaj naj, ni'c basoob Dios guiraa rela' te guc-chee tiejxhnu si'ctis ni rlanjni gacni. ¹⁹Paru niajc guidebni si'c tejtis la'ni, ¿xho niajcpacni te tiejxhni dx-ejc? ²⁰Niluxh naj ensilaani yu' xhidajl la' te najcni tejsi tiejxhni.

²¹Te balojnu di gac gäbni lo naanu: “Dina guiquinálu”, niclaza bitiyuejcní di gac gäbni lo ni'ni: “Dina guiquinálu.” ²²Chucala lapacreni rquiinru nani ruzen lascanu xhet sajcdireni. ²³Luxh retla'ga nani rchalonu guxii sajcreni, reni'c

maazru sajc. Luxh reni rtuinäänu, niguii sigajc gunaa, reni'c riapdarunu. ²⁴ Biätla sgaii la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajc. ²⁵ Bejn ni si'c te di chu yälrdijl lo retla' tiejxhnu, te guiraa retla'ga gacnä j sa'reni. ²⁶ Ni'cni che et laadi yu' te la' tiejxhnu guidebni ru' et laadi. Sigajca che guiliä'pnu xpala'n te la' tiejxhnu, guideb tiejxhnu rbalajc.

²⁷ Ni'cni guiraanu najcnu si'c tiejxh Jesucrist. Tejganu najc te la' tiejxhni. ²⁸ Luxh abadeed Dios yälrnibee lo tejganu lo xquidoo ni te gunnu xtzuum-xtzuunni. Ganidtoo guleni reapost; ni rojnga, guleni rebejn ni rnii xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajc bejracxhuu, reni racnä j, reni rnii garen-garen redidxsaj. ²⁹ Et guiraadi rexpejn Jesucrist najc apost. Et guiraadizareni rnii reni xtidx Dios. Et guiraadireni rajc ruseed. Et guiraadizareni rajc rujn remilagwr. ³⁰ Et guiraadireni rajc rusiajc rebejracxhuu. Etza guiraadireni rajc rnii garen-garen didxsaj, et guiraadireni rajc rnii xhi sälo j redidxsajga. ³¹ Nanab guideb lastootu rlanjtu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru lo j guiraareni.

Yälsanälajc

13 Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yälnasin xten guedxliujre, palga rapä yälrlilazduxh te gac gäp lo redajnre, "colguibicaj", luxh rbicajreni, niluxh xhet sanälazädi rebejn, rut nacädi. ³ Palga gudedä guiraa rexhixtenä nani rapä te gau rebejn ni

xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴ Rebejn ni rajp yälsanälajc cabä jzreni, najczareni bejnsa'c, direni säblajc xhi xten sa'reni, direni guschä'p lagajc xpala'nreni, direni gac guyalajc. ⁵ Direni gun recos ni di gucaag, dini quuil xcälmasa'ctisni, dini guidxe'ch, dini jiu redojl ni rujn bejn lojni. ⁶ Nani rajp yälsanälajc dini guibalajc che rujn stee bejn dojl, alga rbaa lajzni che laaca rujn bejn. ⁷ Nani rajp yälsanälajc rujn huant xhitis cos, rililajzni hueen xcuent xhitis cos, sanuutis cabä jzni, rajc rdejndi xhitis trabajw.

⁸ Yälsanälajc dipacni nitlo j. ¿La rnii reni xtidx Dios xcuent recos ni churu gac, ä? Sidzujn dxej sibä jz rediidxga. ¿La rajc rnii bejn garen-garen redidxsaj, ä? Sidzujn dxej siacdx redidxsajga. ¿La yu' yälrajn? Sidzujn dxej sinitlo j-pacni. ⁹ Sa'csi naj guxilii racbeenu, guxilii xtidx Dios xcuent recos ni churu gac rajc rmiinu, ¹⁰ niluxh che jiädsac Jesucrist ni rajp guiralii yälrajn, sinitlo j xcälmandxucnu.

¹¹ Che gucä biuux, guniä si'c biuux, benäza xhigab si'c biuux, niluxh che bidzunä lo yälbengol, gunitlo j rexhigab biuux ni benä galoo. ¹² Sa'csi naj rhuiinu si'c lo j te guihuajn ni nacä j, luxh che guibanäänu Dios xhaguibaa, suhuisa'cnu si'cni ruhuii bejn che suga'ni lo j sa'ni cahuinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure. ¹³ Niluxh naj ria'n yälrlilajc näjza yälrbäzljajc, näjza yälsanälajc. Lo guidxon redee, sajrcru yälrlinälajc.

Renani rnii rediidx

14 Ganidoo colquuil yälrlinälajc, colnabza lo Dios te guniidxruni xhi stee dzuun, niluxh colyejnru te xca'tu yälrnibesac te gusule'tu xtidx

Dios. ²Che rni te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniini cosro, cosxhiga'tz nani ruluii Sprit Dxa xten Dios guiniini. ³Niluxh bejn ni rusule' xtidx Dios, rustioobni xcälirililajz bejn ni rulijdxni, ruspaani lajz nani rac-huin lajzni. ⁴Che rni te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustiobruni lastoo guiraa rebenguidoo.

⁵Narä rlazä maläii rajc rni guiraatu garen-garen diidx, niluxh hueenru gac gusule'tu xtidx Dios. Maazru saj nani rajc rusule' xtidx Dios loj nani rni garenca diidx palga di gacdi gusule'ni lo rebejn xhini'c caniini. ⁶Mbay naj betzä, che jialä lojtu, palga guiniä garenca diidx lojtu, çxhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl'najn, o xcuent te xtidx Dios, o xcuent te yäl'ruluii.

⁷Ni ruhuiinu xho najcza reinstrument ni roj bejn si'c te bizej, o te harp; palga di bejn golsa'creni, çxho jienu gacbeenu xhi dij cayol'reni, ä? ⁸Sigajcza lo guerr, palga direni goj cornet dipac, çxho gacbeereni agojl chatijl'reni, ä? ⁹Sigajcza la'tu, palga ditu guinisa'c didxsaj nani racbee bejn, çxho gunreni gacbeereni xhini'c caniilu, ä? Xlia'si guiniilu, lo bejtis sää xtiidxlu. ¹⁰Yu' xhidalduxh didxsaj lo guedxliuj, luxh xheti tejni nani xheti xnejzni. ¹¹Niluxh palga dina gacbeä didxsaj ni rniireni loä, nacä si'c te benzijjt loj nani canii loä, sigajcza saj nani caninäj narä. ¹²Ni'cni la'tu ni rlazztu xca'tu yäl'rnibee xten Sprit Dxa te guntu xhi redzuun, col'guejs, col'nab lojni xhidajl dzuun te gacnäjtutioobru xcälirililajz rexpen guidoo.

¹³Ni'cni palga yu' te bejn ni rni garenca didxsaj, suguiniabni loj Dios yäl'rnibee te gac gusule'ni diidx ni rni-

ini lo rebejn. ¹⁴Palga cuedx-guiniabä lo Dios con te didxsaj ni dina gacbeä, lastoätis ni caläp xpala'n Dios, niluxh xcärienä xhet cayacbeedini. ¹⁵çXho ricajni dxejc? Siniab xspritä näjza xcärienä lo Dios; sol' xspritä näjza xcärienä dij. ¹⁶Palga dini gac si'c, xsprittislu caläp xpala'n Dios con ste'ca didxsaj, niluxh bejn nani cacuadiajg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu. ¹⁷Hueencaza calä'plu xpala'n Dios, per stee bejnga dini tioob loj yäl'irililajz. ¹⁸Rudedä xquixtios lo Dios maazru rajc rniä garen-garen diidx loj guiragajctu. ¹⁹Niluxh nen guidoo maazru rlazä guiniä con xcärienä gaitis diidx nani gacbeetu, nani guluii la'tu, loj tzuu mił diidx nani guiniä con xspritä ni ditu gacbee.

²⁰Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool. ²¹Scree caj lo xleii toMoisés: "Mase guiniä lo rebejn con garenca diidx näjza xtidx benzijjt, nicla si'c direni gacuadiajg xtidxä", naj Dad baxhuaannu. ²²Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yäl'rusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³Palga re'tu nen guidoo dxejcti caniitu garen-garen diidx ni rut racbeedi, dxejc guidzujj tej ni di gan xtidx Dios, siniini guiraatu rajc yejctu. ²⁴Palga re'tu nen guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniitu, sacbeeni yu' xtojłni, ²⁵sienloj rexhigab xhiga'tz ni yu' nen lastooni, dxejcti siabrojni suzuxhijbni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu nen guidoo suxca' tejpgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajca te ni gusule' xhi säloj diidxga. Colyejn guiraa ni rujntu te tioob xcälirililajz renani ahuililajz xtidx Dios. ²⁷ Palga yu' renani rni con garenca diidx, suguini tjo'p-chon bejn, niluxh tebgajreni, dxejcti sugusule' steeni xhi säloj ni rni tejpgareni. ²⁸ Palga rut rajcdi gusule' rediidxga, na'c guiniireni con garenca diidx nen guidoo, suguinixtebreni lo Dios. ²⁹ Si'cza renani rusule' diidx ni rudeed Dios lojreni, suguini tjo'p-chon bejn, niluxh tebgajreni, te cuadiajg stiop xchonreni donnu la laaca caniireni. ³⁰ Palga gululoj Dios te cos loj te bejn ni sobga' cacuadiajg, sucuedxisijcni, dxejcru suguiniini. ³¹ Sa'csi guiraatu sajc gusule'tu tebgajtu didx ni baniidx Dios lojtu te gac guisieedu, te tioob lastoo guiraatu lo yälirililajz. ³² Rudeed Sprit Dxan xten Dios yälrajn loj reni rusule' diidx ni rudeed Dios lojreni te acanajreni che riäj l guiniireni o che riäj l cuedxireni, ³³ sa'csi Dios najc te Dios ni rujn guira'ti xnez-xnejzni, dini gun biey, niluxh rbecdxini lastoo bejn nen guiraa reguidoo xten rebejn ni ahuililajzpac xtiidxni. ³⁴ Sucuedxi regunaa nen reguidoo, sa'csi di gacdi gusule' te gunaa xtidx Dios. Nanab gunreni si'c caj lo lei gunreni, gucuadajgreni xtidx Dios ni rusule' renigui lojreni. ³⁵ Palga rla-jzreni gacbeerureni, suguiniabdiidxreni loj chääl ni che guibi'reni rolizjreni, sa'csi sianxtujy gunaaga palga guiniini nen guidoo.

³⁶ Colgacbee et la'ditu guläxtiejditu rextidx Dios, luxh etza xtebtis lojtu biädni. ³⁷ Palga yu' tejpgu ni rchalo rajc rniini diidx ni rudeed Dios lojni, o palga rchaloni abadeed Xprit Dxan

xten Dios te dzunro lojni, sugacbeepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni. ³⁸ Palga yu' chu tejpgu ni di chalilajz rapä xcälrnibee Jesucrist, rutza jiudi xtiidxni.

³⁹ Ni'cni, rebetzä, colyejnru te gusule'tu diidx ni rniidx Dios lojtu, na'c gudxojpgu renani rniiza garenca didxsaj. ⁴⁰ Luxh guira'ti nani rujntu, colyensa'cni, xnez-xnejzni.

Gubansac Jesucrist lo rebengut

15 Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, ² näjza colgusnaj lajztu diidx xcuent ni badzucaj Dios xtojpgtu che huililajztu, palga sanuu sutijptu lojni, te di xlia'si huililajztu diidxga.

³ Lojtu ganiddoo basule'ä rediidx ni sajcru ni bisiedä, basule'ä xho gujt Jesucrist lo crujz, bixe' xtejpgni te badzucajni rextojl nu, sigajc ni caj lo xtidx Dios gac. ⁴ Basule'äza xho biga'tzni, dxejc ni rion dxej guläs Diosni, gubansacni si'cni caj lo xtidx Dios gacni. ⁵ Cheni gubansacni, baluilojni lo Pedr, dxejctiru loj guitzubito'p rexpejpgpacni, ⁶ dxejcti baluilojni lo gabixh gaii gayuu bejn ni tre' tejsi lajt. Xhidajlreni nabansajc, niluxh yu'za reni agujt. ⁷ Dxejcti baluilojni lo Jacob, dxejctiru loj guiraa reapost.

⁸ Dxejcti lultpac baluilojzani loä, luxh alagudejd ruluilojni lo rexpejpgni dxejc. ⁹ Narä guxiiru sacä loj guiraa reapost, niclaza nungäj l cuälajreni narä apost sa'csi basacsä rexpejpg xquidoo Dios. ¹⁰ Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcälrulaslajz Dios cayacnä j narä. ¹¹ ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibansac rebengut

¹² Mbaj naj, palga nuurnu cagusule'nu diidx xcuent ni gubansac Crist loj rebengut, ¿xhicient yu'tu ni rni, xheti yälransac loj rebengut? ¹³ Palga xheti yälransac lo rebengut, dxejc nicla Crist di nibansac lo rebengut. ¹⁴ Luxh palga di Crist nibansac loj rebengut, ¡xlia'si najc diidx nani basule'nu! ¡Xlia'siza najc xcälirililajztu! ¹⁵ Luxh et ni'ctis. Abiga'nu sa'csi rusgueenu rniinu baspansac Dios Jesucrist loj rebengut, luxh dini nus-pansacni loj rebengut, palga guliini di bejn guibansac loj rebengut. ¹⁶ Niluxh palga di rebengut chäs, niclaza Crist di nibansa'c lo rebengut. ¹⁷ Luxh palga di Jesucrist nibansac loj rebengut, xhet sajcdi xcälirililajztu, sanuutistu loj xtojltu. ¹⁸ Sigajcza agunijt rebengut nani huililajz xtidx Jesucrist. ¹⁹ Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäj! jiaduxhtej guiraa reni ruhui loonu.

²⁰ ¡Per dini gac si'c! Guliipacni gubansac Jesucrist loj rebengut. Laani gac ganiddoo loj guiraa rebengut ni gubansac, luxh laani dini niejt par tejpas. ²¹ Sigajcni biääd yälgujt loonu xcuent tejtis niguii, sigajcza biääd yälransac lo rebengut loonu xcuent tejtis niguii. ²² Sigajc xcuent te niguii ni laa Adán biääd yälgujt, sigajcza xcuent Jesucrist biääd yälransac loj rebengut. ²³ Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejn ni che jiädsacni lo guedxliujre, guiraareni suspansacni. ²⁴ Che agujc ni'c, dxejcti siääd dxe lult che gudedsacni yälrnibee lo Dios Xtradni, che abadzujlni guiraa reyälrnibee, guiraa reyälguxhtis, guiraa reyälmilagwr. ²⁵ Nungäjlpac guinibee Jesucrist cheni gunli Dios gaan loj guiraa reni rdxe'ch lojni, quixhnereni

detz ni'ni. ²⁶ Lult ni rdxe'ch lojni ni gunitlojni najc yälgujt. ²⁷ Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸ Che acanibee Jesucrist guiraali recos, dxejcti sudeedni guideb yälrnibee loj Xtradni Dios, te xtebtis Dios guinibee guira'tipac.

²⁹ Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicient rutiobnisreni la'tu xcuent rebengut?

³⁰ ¿Xhicientza rdxunnu lo casionduhx guira'ti or? ³¹ Rniliäpac lojtu, rebetzä, caläpä xpala'ntu xcuent Jesucrist Xtradnu ni cayun xtzuunni lojtu. Ni'cni guniä lojtu, guira dxej rguuilreni narä te ju'treni narä. ³² Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijtz: “Do'o guidau, do'o guidun, sa'csi guixee empac sejtnu.”

³³ Na'c gusaantu gusgueereni la'tu, palga sachaaglu lo benguijdx näjza luj sajclu benguijdx. ³⁴ Basanij xcäriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujytu ni'c rniä diidxre lojtu.

Xho guibansac rebengut

³⁵ Naj yu' reni rniabdiidx: “¿Xho rbansac bejn loj rebengut? ¿Xhoza gac tiejxhrenei?” ³⁶ ¡Chip nayäällu! Che rbe'clu te binij, di gäj! guiliejn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gäj!ga si'cni r!ajzlu gacni, alga rbe'clu xhob o triuu o ste'ca binij, ³⁸ niluxh Dios rujn rliejn ni, rustioobni gäj!ga, lo tejga gäj! rudeedni xpala'jni o tiejxhni, si'ctis ni r!ajzni. ³⁹ Xhet guiraadi retiejxhrenei najc

tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjł. ⁴⁰Sigajcza yu' tiejxh rebajł xhaguibaa, tiejxh rexten guedxliujre. Niluxh yälrdimbicha' xten rebajł xhaguibaa najc tej, dx-
ejc yälrdimbicha' guedxliuj najc ste'ca. ⁴¹Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. ⁴²Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajni par tejpas. ⁴³Che rga'tzni, rujn bejn xhigab xhetru gacnäjdı tiejxhga, niluxh che guibansacni, lacti sacru, lacti sajc tiejxhga. Che rga'tzni, xhetru sajcdı gunni, luxh che guibansacni, anadipduxhni. ⁴⁴Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääđ lo guedxliuj, yu'za te tiejxhni ni siääđ xhaguibaa.

⁴⁵Si'cza caj lo xtıdx Dios: "Nigui galooga ni laa Adán, bejn Dios gujcnı te bejn nabajñ." Niluxh Adán ni biääđ lult, Jesucrist najc Sprıt ni runiidx yälñabancoob loonu. ⁴⁶Ganıđ najc yälñabajñ xten guedxliujre, dxejctıru yu' te yälñabancoob xhaguibaalı. ⁴⁷Sigajcza niguii galooga najc bejn guedxliujre, niluxh ni rojp niguii ni biääđ najc bejn xhaguibaalı. ⁴⁸Benchee Dios Adán con yuj, najcni bejn guedxliuj. Xhaguibaalı biääđ Jesucrist, najcni bejn xhaguibaa. ⁴⁹Sigajcni najcnu si'c bejn guedxliujre, sigajcza sajcnu sigajc najc bejn ni yu' xhaguibaa.

⁵⁰Naj guiniä rediidxre lojtu betzä, di gac ted tiejxhnu ni najc bääł näjza rejñ xhaguibaa cadro yu' Dios. Tiejxnure nani sinıtloj di gacdıza xca'ni stee tiejxh ni najc par tejpas. ⁵¹Colhıui! Rlazäza gacheetu te didx-xhiga'tz; xhet guiraadinu guet, niluxh sıdxaa guiraa retiejxhnu ⁵²tera't bälzule', si'c cheni

rdınya' guzii, che jıel lult trompe't, dx-
ejc sibansac rebengut, säjsrenı guideb tiejxhcoobrenı ni najc par tejpas. Luxh näjza tiejxhnu sıdxaa. ⁵³Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtnı, niluxh tiejxhnu ni najc xten xhaguibaa di gacdı guetni, najcni par tejpas. ⁵⁴Niluxh che tiejxhnu ni najc xten guedxliuj abıdxaa te ga'pnu tiejxhnu ni najc xten xhaguibaa, näjza che tiejxhnu ni sajç guet abıdxaa te ga'pnu tiejxhnu ni di gacdı guet, ni najc par tejpas, dxejc sısıojb xtıdx Dios ni caj scree: "Yälgujt agunitloj sa'csi bejn Jesucrist gaan lojni. ⁵⁵Yälgujt, çxho gac gunlu gaan naj, ä? Yälgujt, çCon xcälñayanlu naj, ä?" ⁵⁶Xcälñayan xten yälgujt najc dojl. Xcälñıbee dojl najc leii. ⁵⁷Niluxh rdeednu xquixtıos lo Dios, nani runiidx te yälñıbee loonu te jıennu gaan lo yälgujt xcuent Dad Jesucrist.

⁵⁸Ni'cni rebetzä ni sanälazduxhä, colchanuıtis, colsudzu'tz lo xtıdx Dios, na'c guıdxajgtu guntu xtzuunni, sa'csi anancheetu xhet xlıa'dı najc dzuun ni runiidx Dios riennu.

Meel ni guire' par rexpejn Dios

16 Xcuent meel nani guire' par rebejtnu, colıejnnı sigajcni räpä gun reben rexquıdoo Galacıa. ²Casob dumingw, nalajznu ganıđ dxej xmaan, tejpgatu colıuää te meel yejç nani rujntu gaan nen te xmaan, colıcucheeni, te na'c gutıe'tu meel che jıälä. ³Te che guıdzunä, guxhalä meelga, näjza tiopchon guıjtz chanä chıtis bejn ni cıetu chasa'nnı guedx Jerusalén. ⁴Palga laaca cha'aza, sajçza chänärenı narä.

Xhıgab ni bejn Pabl chääni bıaj

⁵Guıdzunä lojtu che agudedä reguedx Macedonia, sa'csi sıdedä nejzga galoo ni jıälä ro'c. ⁶Dxejctı pet sıannää la'tu,

pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a. ⁷ Sa'csi di rlazä jädhuiätu te ladejtzi, rlazä jiannää la'tu xchejpac, palga gusaan Dad Jesucrist gunä si'c. ⁸ Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxaan xten Dios. ⁹ Sa'csi ro'c yu' xhidajl bejn nani rlazz guisheed xtidx Dios, niluxh ro'c yu'za xhidajl reni rdxe'ch loä.

¹⁰ Palga guidzujn Timoteu lojtu, saru colhuiini, te na'c chuni yärsia' laḷ ni yunäjni la'tu, sa'csi cayujni xtzuum Dios sigajc runä narä. ¹¹ Na'c gusaantu chu tej ni cuälazni, colcuedxii lajzni, dxejc colgusunejzni, te jädhuiini narä ree, sa'csi ree cabääznu laani con rebejznu.

¹² Niluxh xcuent bejznu Apolos, räpäza lojni niäädpacni lojtu con rebejznu, niluxh di rlazpacni niäädni naj. Per siäädcani dxejtis ni gac jädädni.

Rextixtios lult ni ruxhalni

¹³ Colsusin, colsudzu'tz lo yälirilajz xten Dios, colyejn dzuun si'c niguii, colyajc beñdaan. ¹⁴ Xhitis ni rujntu colyejnii con yälrinälajz.

¹⁵ La'tu rebetzä, anajntu xcuent rex-famil Estéfanos, nani ganid huililajz

xtidx Dios nez reguedx Acaya, najntu xho racnäduxhrenei rebejznu nani huililajz xtidx Dios ro'c. Naj rniabduxhä lojtu, ¹⁶ colgusoob xtidx rebejnğa, näjza xtidx guiraa rebejn ni racnäj rexpejn Dios, ni rujnza xtzuum Dios. ¹⁷ Rbalazä bidzujn Estéfanos, näjza Fortunato, näjza Acaico, sa'csi laareni bejnrenei par narä nani di niäjcdi niujntu sa'csi rutitu. ¹⁸ Gulecdxireni lazä näjza lajztu, ni'cni, coljiu sa' rebejnğa!

¹⁹ Rebejn xquidoo Dios nez reguedx Asia ruxhal xtxitios lojtu. Aquila näjza chäälni Priscila näjza rebejn ni re'rolijzrenei ruxhalzareni xtxitios lojtu. ²⁰ Guiraa rebejznu ruxhal xtxitios lojtu. Colguinii tejgatu lo sa'tu: "Xchan, gacnäj Dios la'tu."

²¹ Narä Pabl, ruxhalä xtxitios lojtu, la-gajc narä benä relettre.

²² Palga yu' chu tejtu ni di chanälajz Dad Jesucrist, sunitlojni. Dad Jesucrist, guda!

²³ Gacnäj xcälruulasajz Jesucrist guiraatu. ²⁴ Yälrinälajz ni rapä xcuent Jesucrist suchunäjni la'tu. Sugacni si'c.

Stee Guijtz Ni Bacuaa Pabl Lo Guidoo Xten Guedx Corinto

Ni rojp guijtz ni bacuaa Pabl lo guidoo xten guedx Corinto

1 Narä Pabl nacä apost xten Jesu-
crist sa'csi si'c rlaiz Dios te gusule'ä
xtiidxni. Narä näjza Timoteu, ni najc
bejtznu lo xtidx Dios, rucuaanu gui-
jtzre lojtu rexpejn xquidoo Dios ni yu'
guedx Corinto, näjza loj guiraa rexpejn
Dios ni rbäjz nez guiraa reguedx Acaya.
²Rniabnu lo Dios ni najc Xtdadnu näjza
lo Dad Jesucrist, gacnäjreni la'tu, gus-
cuedcxireni lajztu.

Trabajw ni gudejd Pabl

³Guiliä'pnu xpala'n Dios Xtdad Jesu-
crist, nani rulaslajz nuurnu, nani rus-
toolajz nuunu. ⁴Che rdejdnu trabajw,
rbedcxini laaznu te rajcza rbedcxinu
lajz renani cadejd trabajw con lagajc
yälrbecdxilajz ni baniidx Dios loonu.
⁵Sigajc ni rdedduxhnu trabajwduxh ni
gudejd Jesucrist sa'csi rusule'nu xtiidxni,
sigajcza rbedcxiduxh Jesucrist laaznu.
⁶Palga rdeednu trabajw, najcni te gus-
tolajz la'tu, te laatu lo dojl. Palga rus-
cuedcxni Dios lajznu, si'c rujnni te cuedx-
ilajznu te guntu huant che tedtu la-
gajc trabajw ni cadejdzanu. ⁷Rinudzu'tz
yälrunloj ni rajpnu xcuent la'tu, sa'csi
nadonnu palga rdejdtu lagajc trabajw ni
cadejdnun, suscuedcxni Dios lajznu sigajcni
ruscuedcxini laaznu.

⁸Rebetzä, rlazä gacbeepactu lacti
trabajwduxh bideednu nez reguedx
Asia, tudxe'nsi dinu nien huant,
sa'csi gudedcaj trabajwga, acasislinu.
Trabawduxhtejni, benä xhigab sujnni
gaan, sugu'tni nuurnu. ⁹Gulicanu,
alabiennu xhigab sejtpacnu. Niluxh dee
gusajcnu te bisieednu na'c chaliilajznu
lagajc nuurnu, alga chaliilajznu Dios

nani ruspansac rebengut. ¹⁰Sa'csi
Dios baslaa nuure lo yälgujtgä, luxh
sinuutis guslaani nuurnu lo yälgujt.
Salilazduxhnu Diosre suslaaruni
nuurnu, ¹¹sa'csi cayacnäjtu nuurnu,
cabedx-canabtu lo Dios xcuentnu.
Dxejcti palga xhidajl bejn cabedx-canab
lo Dios xcuentnu, xhidajlzareni sudeed
xquixtios lo Dios xcuentnu xcuent
xcälruulaslajz Dios ni baniidxni loonu.

Xhicuent di Pabl nij guedx Corinto

¹²Dee najc nani ruspaä laaznu: rbedxi
xcäriejnnu, ni'c ruluui loonu laaca naba-
jnnu, con yälradolajz riennu si'cni
rnibee Dios; xhet sa'csi rajpnu xcäl-
najz reben guedxliujdi, alga sa'csi rac-
näj Dios nuure. Si'cpac nabajnnu lo
guedxliujre, luxh maazru che yu'nu lo-
jtu. ¹³Cacuaanu lojtu rediidx ni sajc
gojtu, ni sajc gacbeetu, luxh cabäzä
sacbesa'ctu guiragajc rediidx ni gucuaä,
¹⁴lagajc si'cni agucbeetu mase gaii xti-
idxnu, cabäzä guibaa lajznu xcuent nu-
urnu, sigajcni guibaa lajznu xcuent la'tu
nen dxej ni jääd Dad Jesucrist.

¹⁵Ni'cni ganiddoo benä xhigab niäd-
huiä la'tu te nibalajznu tio'p huält.
¹⁶Nalajznu, benä xhigab nidedä ro'c che
sa'a reguedx Macedonia, dxejcti stehuält
cheni guibi'ä Macedonia, niädhuisacä
la'tu ro'c te niacnäjtu narä te nia'a Judea.
¹⁷¿Xhaa dina niunsa'cä xhigab che benä
xhigabre? ¿La rchalotu runä xhigabä
si'c te bejn guedxliuj nani runtiop la-
jzni, nani tejsi diidx rniini "sia'ä" näga-
jczä "dina cha'a", ä? ¹⁸Dios guluii lojtu
guliica rniä lojtu, dinu guinii tejsi diidx
"sia'ä" nägajc "dina cha'a". ¹⁹Xi'n Dios,
Jesucrist nani bisule'nu lojtu narä näjza
Silvan, näjza Timoteu dini guntio'p la-
jzni, dini guinii tejsi diidx "sunäni" näj
"dina gunäni", niluxh laani guiraa xti-
idxni najc "sunäpacni". ²⁰Si'cza guiraa
rediidx ni bia'n Dios loonu xcuent Jesu-
crist najcreni "sunäpacni"; näjza xcuent

laani najcreni “sugacni si'c” par nuurnu, te chäp xpala'n Dios xcuent nuurnu. ²¹Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni. ²²Abacuaazani xseenni loonu, ni'cni baniidxni Sprit Dxan xtenni te cuääzni neñ lastoonu.

²³Rbedxä loj Dios gacbeeni xhi yu' lastoä, guliipacni te diruna gotalä xcäl-najtu, ni'c dina niälsacä guedx Corinto. ²⁴Di rlanjnu guinibeenu xho chalilajtu, alga rlanjnu gacnäanutu lo dzuun te guibaa lajztu; guliipac agusudzu'tztu lo xcälirililajztu.

2 Niluxh lagajc xcuent xcäl'nasa'cä benä xhigab dina jiädhuisacä la'tu che cayac-huin lazä. ²Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni. ³Ni'cni lagajc xcuent ni'c bacuaä lojtu, te che jiälä lojtu, di re-bejn gunhuin lazä nani riäjil guspaa lazä. Luxh nancheä palga narä guibaa lazä, nägajc la'tu sibaa lajztu. ⁴Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yäl'sanalazduxh ni sanälazä la'tu.

Yäl'rusiäjil lajz ni yu' par nani bejn falt

⁵Palga yu' chu tej ni cayujn cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh. ⁶Alabasacsiduxh xhidajl bejn dade'ga, na'cru gusacsítuni naj. ⁷Naj col'siäjil lajztu xcuent xtojlni, col'cuedcxi lajzni didi gac-huinuxhetej lajzni. ⁸Ni'cni rni-abä lojtu, col'chanälajz bejnre si'c ni huinälajztuni galoo. ⁹Bacuaaxgaäza lojtu te gacbeä laa susoobtu xtidxä. ¹⁰Naj renani jiäjil lajztu xtojlni, näj narä siäjil lazäni. Sigajcza narä, nani basiäjil lazä, palga yu' xhi basiäjil lazä, benäni xcuent xcäl'nasa'ctu, nez loj Jesucrist, ¹¹te di

gun beñdxab gaan nuure, sa'csi anajnnu xho najc latsiaj ni rujn beñdxab.

Guyu' Pabl yärsia' che bidzujnni guedx Troas

¹²Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxoindi narä, ¹³niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

Jesucrist rujn riennu gaan

¹⁴Xquixtios lo Dios nani con Jesucrist racnäy nuurnu te dipacnu gunijt, empac rujntisnu gaan, luxh con nuurnu guiraa nejz ruluulojoi xhi saru najc gum-beepac bejn xtidx Dios. ¹⁵Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xti-idxni. ¹⁶Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yäl'nabancuob. ¿Chu laa ni racbee sa' recosga? ¹⁷Sa'csi dinu gac si'c najc xhidajl bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl'racnäy Jesucrist nez loj Dios ni cahuii xhini'c riennu.

Diidx nacoob ni basa'n Dios loonu

3 Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rniij najcreni beñsa'c. ¿La rlanjzatu guiluuiu lojtu sa' guijtzga, o guiniabnu guntu sa' guijtzga xca'nu, ä? ²La'tu najc si'c xquijtznu ni rniij xho najcnu. Lastoopacnu acujtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu.

³Huenliisi rluiløj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxi xten Dios ni nabajñ bacuaa rextidx Diosga, bacuaanireni lastootu.

⁴Nadoncheenu redee, ni'cni xcuent Crist dinu guidxejb nez loj Dios. ⁵Di gacdi jieñ xtebnu xhitis dzuun ni riennu, riennuni sa'csi laa Dios ni racnäj nuurnu. ⁶Laani runiidx yälñadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleiini biädñ dojl, dxejc gujtnu. Niluxh didxcoobga ni rusule'nu biädñ Sprit Dxi xten Diosni, luxh runiidxni yälñabacooob loonu. ⁷Leii baluui yu' xtojñ bejñ, riäjñ guetreni. Xhidajñ seen guyu' che bacuaa Dios rediidxga lo guij. Luxh di nijcdi nuhii rexepejñ Israel loj Moisés, bidxejbreni sa'csi rdimbicha' lojni, luxh sanuu cayuui yälrdimbicha'ga. ⁸Palga si'c gujc che biädñ lei, aticaxh naj su'ru xcälrdimbicha' xleii Sprit Dxi xten Dios, ni najc redidxcoob nani abasule'nu. ⁹Palga xleii toMoisés ni baluiloj yälgujñ xcuent dojl biädñ yälrdimbicha', aticaxh naj yu' xcälrdimbicha' xtidxcoob Dios ni rudzucaj dojl. ¹⁰Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. ¹¹Palga yälrdimbicha' nani biuui bianisesduxhni tera't, stee yälrdimbicha're ni najc par tejpas sidimbichasesduxhni.

¹²Luxh ni'c runiidx yälrbecdxij lajznu, dipacnu guidxejb che rusule'nu xtidxcoob Dios. ¹³Dinu gac si'c toMoisés, ni basäu tla' lajd lojni te di fii rexepejñ Israel cayuui yälrdimbicha' ni guyu' lojni. ¹⁴Niluxh bicäjy xcäriejnreni; lo dxej najli che riel xleii toMoisés, najcni si'cni yu' xhi lajd rusäuu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. ¹⁵Lo

dxe najli che rojreni xleii toMoisés, najcni si'cni ruscäjy te lajd xcäriejnreni. ¹⁶Lo xtidx Dios rñii scree: "Niluxh che gusiechlajz te bejñ, gudzurëni nez loj Dad, sibicaj lajdga", nalajznu sacbeeni xtidx Dios. ¹⁷Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. ¹⁸Niluxh nuure dinu gäsäu lajd lojnu, didi guscäjyñi xcäriejnnu. Nuure najcnu si'c te guihuaajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujñ Sprit Dxi xtenni.

4 Ni'cni sa'csi agule Dios nuure te gusule'nu xtiidxni, sa'csi balaslajzani nuure, dipacnu jäxhan. ²Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rñiinuni si'cpacni najcni, te si'c ruhuii guiraa bejñ rsiaapacnu lo xnezyuj Dios. ³Niluxh palga yu' chu dipac gacbee rextidx Dios nani rusule'nu, najctisreni rebejñ nani ala canitloj par tejpas, ⁴sa'csi abascäjy beñdxab ni rñibee guedxliujre xcäriejnreni, si'cni rujñni lo rebejñ nani di chalilajz xtidx Jesucrist, te na'c fiireni xcälrdimbicha' xtidx Dios ni rñii xcuent xhanij xten Jesucrist, ni najc xtujxh Dios. ⁵Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. ⁶Che benchee Dios guedxliuj, guniini: "Lo xcäjy suguirii te bajl ni gusanij." Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

Xho guibañnu con yälirilajz

⁷Nuurnu najcnu si'c te guesyuj, xhet sajedinu, niluxh guidxanu te yälñasacduxh, ni najc xtidx Dios xcuent Jesucrist, te guiluloj xcälñasa'c xten xcälñibee

Dios lacuaa xhisi te yäl'nadipbáz xtenu. ⁸Rdeednu trabajw guira nejz, niluxh dinu gunijt yälrunloj. Mase di jien xho jiennu, dinu chu yärsia'. ⁹Rusacsíreni nuure, niluxh di Dios cuälaznu, rguijnreni nuure, dizareni ju't nuure. ¹⁰Cadrotis rionnu rusacsíreni nuure si'c basacsíreni Jesucrist, te si'c neñ tiejxhnu guluilozjani yäl'nabansac loj rebengut xten Jesucrist. ¹¹Cadrotis rionnu rlažreni ju'treni nuure sa'csi rusule'nu xtidx Jesucrist te si'c za neñ tiejxhnu guluilozjani xcäl'nabajn Jesucrist loj reben guedxliujre. ¹²Ni'cni rujn yäl'gujt dzuun loonu, per yäl'nabajn cayujn dzuun lojtu.

¹³Sa'csi rajpnu lagajc xsprit xten yäl'rilihajzga, sigajc ni caj lo xtidx Dios: "Huililazä ni'cni basule'ä diidx." Sigajc za nuure, huililaznu xtidx Dios, ni'cni rusule'nuni. ¹⁴Sa'csi nadonnu lagajc nani baspansac Jesucrist loj rebengut, lagajc za laani gun guibansacnu con Jesucrist te gunni sunäjnu la'tu nez lojni. ¹⁵Rsiajcnu guiraa ni rsiajcnu te xcuentisi la'tu gudeedru bejn xquixtios lo Dios, te guiliä'pruzareni xpala'nni xcuent yäl'rulaslajz ni sanuutis care'ch lo xhidajl bejn.

¹⁶Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. ¹⁷Retrabajw ni cadeednu lo yäl'nabajnre rdedgajczeni, niluxh rujnreni ga'pnu te yäl'rdimbichaduxh ni gajdnu guidon, ni najc par tejpas. ¹⁸Dinu fiitis renani ružen lo guedxliujre sa'csi sinitlej reni'c, alga cayenloonu renani di guzen, sa'csi renani di guzen najczeni par tejpas.

5 Aracbeenu tiejxhnu najc si'c te yu' xten xaimnu lo guedxliujre, sidzujn dxej sinitlejoni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ²Guliicani, lałni dxunnu neñ tiejxhre, rbedxnennu rdeednu trabajw, ni'cni rlažznu maläi agojl guidxaa tiejxh guedxliujre te xca'nu te tiexhcoob ni

siääd xhaguibaa. ³Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. ⁴Lałni dxunnu neñ tiejxhre rbedxnennu, rdeednu trabajw, sa'csi di rlaaznu suxhabääl xaimnu, rlažznu gacwnu tiexhcoobnu, te tiejxhre nani cayejt, sidebnäjni tiexhcoob ni siääd xhaguibaa. ⁵Nani benchee nuure parpac dee najc Dios, lagajc nani runiidx Sprit Dxan xtenu loonu si'c te seen sujnpacnini.

⁶Ni'cni dinu guidxeeb, sa'csi nadonnu lałni nabajnnu lo guedxliujre, di gacdi guibajnnu xhaguibaa loj Dadga. ⁷Sa'csi nabajnnu xcuent nani rilihajznu, xhet xcuentdi nani rajc rhuiinu. ⁸Ni'cni rniä nabajnnu dinu guidxeeb, rchaloonu hueenru guisa'nnu tiejxhnu lo guedxliujnure, te choläznäanu Jesucrist xhaguibaa. ⁹Ni'cni tejtis najc xhigabnu, palga lo guedxliujre o xhaguibaa, rlažztisnu jienu renani gun guibaa lažzni. ¹⁰Sa'csi guiraanu riäjł suunu nez loj yagxhiil cadre gun Jesucrist yäl'guxhtis, te tejganu guica'nu xcuent nani bienu lo guedxliuj, palga dzunsa'cni, o palga dzunguijdxni.

Diidx xcuent yäl'rbedxni lažzni

¹¹Luxh sa'csi rdexjenu (nalajznu ru-cuadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabajnnu; maläi näjza lo xcäriejntu gululoj xho nabajnnu. ¹²Dinu guiliä'p lagajc xpala'nnu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchaglažztis ruhuui xho rien bejn, direni gacbee xhi yu' neñ lastooreni. ¹³Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnu par la'tu. ¹⁴Sa'csi sanälazduxh Jesucrist nuure, ni'c rusoohtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez

loj Dios. ¹⁵Luxh Jesucrist gujt xcuent guiraa rebejn, te renani rililajz xtiidxni, na'cru guibajjnreni xcuenttis laareni, alga guibajjnpacreni xcuenttis Jesucrist nani gujt, nani gubansac xcuent laareni. ¹⁶Ni'cni nuure dinu fii lo bejn si'cni najczeni lo guedxliujre. Galoo biembeenu Jesucrist si'cni gujcn che gubajjni lo guedxliuj, niluxh naj et si'cti riembee-nuni. ¹⁷Ni'cni chutis bejn, palga rililajzni xtidx Jesucrist, sujnnini te bencoob, diruni guichagljajz gunruni nani rajc lo guedxliuj, alga guichagljajzni gunni xtzun Dios.

¹⁸Guiraa dee siääd lo Dios, nani basiäjł lajzni xcuent Jesucrist, dxejcti baniidxni loonu rediidx xcuent xcälrusiäjł lajzni te gusule'nu rediidxga, ¹⁹nalajznu, nanab gusule'nu diidxre: Dios guyunäj Jesucrist, cagusiäjłlajzni con reben guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxej gule Dios nuure te gusule'nu rediidxpacre lo rebejn. ²⁰Ni'cni si'o'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios. ²¹Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te bejdojl che gule'cni guiraa rextojł guedxliuj yejc Jesucrist che cuajni lo crujz. Si'c gujcn te sajc ga'pnu xcäl'naya, xcäl'nasa'c Dios xcuent Jesucrist.

6 Ni'cni rniabnu lojtu, jia'cnu tejsi lo xtzun Dios, na'c cuälaztu xcäl'racnäjä Dios; palga guntu si'c, xlia'si cua'tuni. ²Sa'csi loj xtidx Dios caj scree: Dxej nani riäjł gunäni, bacuadiagä xtiidxtu, dxej che gubicaj xtojłtu gucnää la'tu. jColjiejn! Naj najc te tiempsa'c, coljiejnza, naj najc dxej ni guibicaj xtojłtu.

³Na'c jiennu nicla tej ni gun guidxe'ch lajz bejn, didi guiniireni xhet laadi najc xcäl'rusule'nu. ⁴Niluxh lo guira'ti dzuun ni riennu, gululojnu lo rebejn najcnu xmos Dios; gacnu nadolajz; jiennu huant che rusacsireni nuure; che rdejdnu trabajw; che di jien xho jiennu; ⁵che rguinjreni nuure; che rusäureni nuure nen latzguiib; che rdejdnu lo bieiduxh; che rdajł xtzuumnu; che re'ch bacal yäl; che rucua'nnu; ⁶gululojza najcnu xmos Dios xcuent xcäl'nabansa'cnu lo Dios; najza xcäl'nansa'c xtidx Diosnu; najza yälrajc nadolajz; sa'csi laaca riennu lo sa'nu; najza sa'csi rbäjz Sprit Dxan xten Dios nen lastoonu; najza xcuent yäl'rinälajzpac bejn; ⁷najza xcuent didxguliipac; najza lo xcäl'rnibeduxh Dios; ca'zanu si'c te madxed xcäl'naya Dios, ca'nuni guropnaanu, ladbee, najza ladbäjägw. ⁸Rululojzanu najcnu xmos Dios palga chäp xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu benrusguee, mase najcnu bejn ni rni didxlii. ⁹Palga rut rlajzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguinjreni nuure, niluxh dinu guet; ¹⁰najcnu si'c bejn ni yu' xliajs, niluxh rbalaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

¹¹Lojtu, ben Corinto, aguniliinu lojtu guiragajc rediidx ni yu' nen lastoonu. ¹²Xhetliidi diidxdi bacua'tznu lojtu, niluxh pet cacuatx lajztu diidx ni nanab guiniitu loonu. ¹³Naj narä rulidxä la'tu si'c rulidx te Dad rexi'nni: jColguinii loonu rediidx ni yu' nen lastootu!

Najcnu si'c xquidoo Dios ni nabajn

¹⁴Na'c guchaagtu lo rebejn nani di chalilajz xtidx Dios, sa'csi di gacdi gun-

teblojtu dzuun sa'csi tejni rlaiz gun dzunsa'c, steeni rlaiz gunni dzunguijdx, ¿xho gac sanäj bajl xcäy, ä? ¹⁵O ¿xho gac sanäj Jesucrist beñdxab ni laa Satanás, ä? O ¿xho gac sanäj te bejn nani rililajz xtidx Dios te bejn ni di chalilajz xtidx Dios, ä? ¹⁶¿Xhixh tebloj najc xquidoo Dios con rebanäjb, ä? Ni nuunu najcno xquidoo Dios ni nabajn, lagajc si'cni gunii Dios galoo:

Cuázä neñ lastooreni, sisiaääzareni.

Narä sacä Xtiosreni, laareni sajcreni rexpensä.

¹⁷Ni'cni colrii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c fałtu recosdxuudx.

¹⁸Dxejc la'tu sajctu rexinganä, rexindxa'pä,

luxh narä gacä xtadtu,

si'c naj Gueb Dios ni rajp guiralii yälrnibee.

7 Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnno, lastoonu näjza tiejxhnu, do'o cuäcaj guiraa rexhigabguijdx, guiraa re-dojl, te gac sanu lo rexnezyudxan Dios con xcälrdxejb Dios.

Xho basiejch lajz reben Corinto

²Colchanälajz nuunu neñ lastootu! Xhet latsiajdi biennu lojtu. Rut baxhiñdinu. Rutza basguedinu. ³Dina guiniä rediidxre te cue'cä xquejtu; ni aguniä lojtu galooli, la'tu yu'tu neñ lastoonu palga tejsi guetnu, o palga tejsi guibajrunu.

⁴La'tu nadip lazä, rmiduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

⁵Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcuent yälrdijl ni guyu' guideb gabinu, xcuentza yälrdxejb ni guyu' lastoonu. ⁶Niluxh Dios ni racnäjb rebejn ni rac-huin lajzreni, gucnäj nuure, sa'csi che bidzujñ Tito guredxi lastoä.

⁷Luxh xhet sa'csi bidzujntis Tito, näjza

sa'csi gulecdxitu lastoo Tito, näjza sa'csi biädñäni diidx xho yu'tu, xho rlaiztu fitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

⁸Acananä guc-huin lajztu che biłtu guiłtz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guiłtzga guc-huin lajztu, xhet xchejdi guc-huin lajztu. ⁹Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlaiz Dios, te di yu' xhi gunijttu xcuent nuunu. ¹⁰Sa'csi yälrac-huin ni ruxhal Dios loonu rujñ rusiejch lajznu, te ruslaa Dios nuurnu lo dojl ni'cni rbaalazä che bejn ni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujñni nitloj bejn tejpas. ¹¹La'tu bejntu huant xliajs ni baxhal Dios si'cni rchaglajz Dios gac. Naj colhuii gan! ¡Lacti xhi cossa'c bejn ni par la'tu! Bejn ni bahuisa'cpactu xhini'c gujc, te gac gusulegajctu xcuentni; dx-ejc bejn ni bidxe'chtu, näjza bejn ni bidxejbtu, ni'cni basaantu dojlga, dxejcti bejn ni rlaizpactu nuhuiitu loä, bejnzani guyu'tu yärsia' xcuentä, bejnzani rlaiztu guntu yälguixhtis bejn nani bejn dojlga. Guiraa redee baluiloj et la'ditu bejn dojl.

¹²Ni'cni, che bacuaä guiłtzga, dina nu-cuaäni loj bejn ni bejn dojlga, niluxh bacuaä guiłtzga lojtu te guiluiloj xcälrsia'tu ni rajptu xcuent narä nez loj Dios. ¹³Ni'cni aguredxi xcäriejnno.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xpriitni xcuent guiraatu.

¹⁴Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxguli, sigajcza najc guiraa redidxsa'c xcuenttu ni guniä loj Tito, guliipacni.

¹⁵Ni'cni maazru sanälajzni la'tu, che rñaj

lajzni xho basoobtu diidx, xho bejntu cua'tuni che bidzujñnu, racejslitu cadxejbtu. ¹⁶ Naj rbaalazä sa'csi loj guira'ti la'tu nadip laza.

Saru rudeedreni meel

8 Naj bejtznu, rlanjnu guiniinu lojtu xho badeed Dios xcäl'rulaslajzni lo reben Macedonia ni huililajz xtidx Dios. ² Mase gudedduxhreni trabajw, bibalajzreni, mase xhetliidi gojpreni, badeedreni meel si'c te ben ni rajp. ³ Narä caniliä lojtu, badeedreni xmeelreni si'cni gojpreni, luxh badeedrueni loj ni naa bejn sajc gudeedreni. ⁴ Gunabduxhazreni loonu guisaannu gudeedreni xmeelreni te gacnäjreni rexpenn Dios. ⁵ Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac. ⁶ Sa'csi batie' rexpenn Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl'najn; rchaglajzpacktu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

⁸ Dina guiniä lojtu colyujnpacni; narä rlazätis gacbeetu xho rbaalajz reni rudeed meel te guluiloj don la gulii sanälajzpaczatu rexpejn Dios. ⁹ Sa'csi la'tu anumbecheetu rulaslajz Dad Jesucrist, te mase najcni ri'cw, rajpni guiraa xhixten Dios, xcuentu gujcn si'c te bejn ni xhet rajpdi, te xcuentni ga'ptu guiraa rehxixten Dios xhaguibaa.

¹⁰ Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rlanjzpacktu guntuni. ¹¹ Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. ¹² Sa'csi

palga rlanjzduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. ¹³ Dina guiniä gudeedtejtü te tedtu trabajw te gapduxh stee bejn, alga te gacteblojstistu. ¹⁴ Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajc sunidxzareni te gusalojreni nani cayäädxtu te si'c gacni tebloj. ¹⁵ Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojy yäl'nasa'c, xhet biäädxdü."

Tito näjza rexcomanieerni

¹⁶ Xquixtios lo Dios nani rudeed lo Tito lagajc yärsia' ni rapä narä par la'tu. ¹⁷ Sa'csi cuäjbn gunni nani gunabä lojni gunni. Luxh sa'csi rlanzduxhpacni gunni xtzuum Dios, naj lagajc laani bejnii xhigab jäädhuini lojtu te luux dzuunre.

¹⁸ Caguxhalnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. ¹⁹ Ni'ctis aguleza reben guidooni te chunäjni narä te gacnäjni narä lo xtzuum Dios nani cayennu te guiliä'pni xpala'n Gueb Dad Jesucrist, te guluilojza lacti rlanjzpacni jiennu xtzuumni. ²⁰ Ni'cni rlazä jiapdaduxhnu te di chu tej ni guiniyaj nuure xcuent melrore ni chosa'nnu lo rexpejn Dios. ²¹ Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

²² Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlanjzpacni gunsa'cni xhidajl dzuun, luxh naj rlanjzruni gunsa'cni redzuunga sa'csi nadip lajzni la'tu. ²³ Palga yu' chu guiniabdiidx xcuent Tito, colyejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najc jreni xquixhajg reguidoo, rliä'pzarenii xpala'n Jesucrist. ²⁴ Ni'c na'c guidxe-

jbtu che yu'tu lo rebejn reguidoo gu-luiipactu loj rebejnga xho sanälajztu, näjza redzuun ni rujntu ni'c rniinu ganax didxsa'c xcuenttu.

Meel par rebejtzu

9 Ni'cni dina gucuaäru lojtu xcuent dzuunre, nalajznu, yälracnä j rex-pejn Dios, ²sa'csi anancheä rlaizpactu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel. ³Ni'cni abaxhalä rebejtzu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunixgää lojtu. ⁴Didi che jäädnä reben Macedonia jiophuiinu la'tu, xhet rajpditu, dx-ecj jianxtuyä narä, näjza la'tu. ⁵Ni'cni benä xhigab, nanabpac jäädxgaa rebejtzu, jädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlaizpactu gudeedtuni, xhet sa'csi rniinu riäjlpac gudeedtuni.

⁶Rniliä lojtu, nani guxii rbe'c, guxiza yälNASA'c guiliäśni, niluxh nani rbe'c xhidajl binij, xhidajlza yälNASA'c guiliäśni. ⁷Tejgatu colhuii don lacti sajc gudeedni, dxejc si'c sugudeedni si'cti ni rlaizni, na'c gun tiopdi laizni, etza sa'csi riäjlpac gudeedni, sa'csi Dios sanälajz bejn ni rbaali laizni rudeedni meel lojni. ⁸Luxh Dios sajc guniidxru xcälracnäjni lojlu, te si'c guixe-guixee sajplu xhidajl guiraloj rexhixtenlu, te ga'plu xhitis ni rquiinlu loj guira'ti xtzunsa'clu. ⁹Sa'csi lo xtidx Dios caj scree:

Abadeduxhni loj reben ni xhet rajpdi luxh

redzunsa'c ni rujnni, najcreni par tejpas.

¹⁰Dios nani rudeed binij ni rbe'c nani rujn dzuun loniaa, laani suniidxzani yäxtiil te guidaunu, lagajc Diosga suni-

idx, sutajlza binij cue'ctu, lagajc laani sustioobnini te gacduxh yälNASA'c xten xtzunsa'ctu. ¹¹Te si'c ga'ptu lacti yälNASA'c te gac gudeedzatu xhiroob. Luxh xcuent xtzuunnu, meel ni ruxhaltu loj rexpejn Dios sujn gudedduxhrene xquixtios lo Dios. ¹²Sa'csi che racnäju rebejtzu, dinu guideed ganaxtis ni rquiireni, rujnzanu rudeedrueni xquixtios lo Dios. ¹³Che racnäju sa'tu si'c, rululojtu lacti rusobtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäju, nalajznu xcuent meel ni badeedtu lojreni, näjza loj guiraareni. ¹⁴Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcälracnäjni lojtu. ¹⁵Xquixtiosi Dios sa'csi baniidxni yälNASA'cduxhtej loonu!

Yälrnibee ni rajp Pabl sa'csi najcni apost

10 Lagajc narä, Pabl, miabduxhä lojtu, con guiraa didxdoo, guiraa didxsa'c xten Crist, (narä ni nac benadolajz che biälä lojtu, niluxh che suga'a zijt lojtu, dxejc nacä bennialajz). ²Narä canabä lojtu, colguibansa'c te che jädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rni nabanä si'c te bēnguedxliuj. ³Guliicani najcnu bēnguedxliuj, niluxh dinu gucuanäj sa'nu guiib nani rca' ben guedxliuj che rcuaareni. ⁴Sa'csi reguiib ni rca'nu te guidilä'sa'nu direni gac sa' guiib ni rca' ben guedxliuj. Nuunu rucuaanu con xcälrnibee Dios te riennu gaan loj guiraa rexcälrnibee guedxliujre. ⁵Ni'cni cagutzujlnu guiraa rexhigabguijdxrene, näjza nani rchaloreni najc xhigabro nani rlaizrene guiniyajrene yälrumbee Dios, luxh caca'nu guiralii rexhigabnu cagutednureni ladznaa Jesucrist te gusoobnu rextidx Jesucrist. ⁶Cabääztisnu te gunnu yälguxhtis loj chutis bejn ni dini gu-

soob xtidx Dios, che abasoob guiragajctu xtidx Dios.

⁷La'tu cahuiitu redzuun ni rien. Palga yu' chu tejtü ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajznu xtidx Jesucrist, sigajcza nuure ahuililajznanuni. ⁸Sa'csi mase guiliä'pärü xpala'nä xcuent yälrnibee ni rapä, ni baniidx Dios te gustiobä xcälirilajztu, et te guxhiñädi la'tu, nicla si'c dina guituiä. ⁹Dina rlazä guchalotu rlazä guchebä la'tu con rexquitzä. ¹⁰Sa'csi miiireni: "Lo rexquijztni caj didxnagajn, didxnialajz, niluxh che suga'ni laapacni, xheti xcälsjudz'utzni, luxh xho rniaj diidx ni miiini." ¹¹Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

¹²Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. ¹³Nuure dinu gunnarotej lagajc nuurnu, niluxh riennu si'cni nungäjil jiennu, xcuent yälrnibee ni baniidx Dios loonu te jiennu dzuun cadro yu'litu. ¹⁴Ni'cni dinu nidedcaj xcälrnibeenu che bio'pnu lojtu, sa'csi baniidx Dios yälrnibee loonu ganiddoo nuunu gusule'nu xtidx Jesucrist lojtu. ¹⁵Dinu niennaro lagajc nuurnu xcuent xtzuum ste'ca bejn, ascanu lagajc nuunu biennuni. Cabääznu tioobru xcälirilajztu, te gac jienrunu dzuun lojtu, si'ctis gal jiennuni. ¹⁶Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

¹⁷Sa'csi nani rrajz gacnaro, suguiliä'pni xpala'n Dad Jesucrist. ¹⁸Sa'csi et nani rliä'p lagajc xpala'ndini ni ria'n hueen nez loj Dios, niluxh

bejn ni rliä'p Jesucrist xpala'nni, ni'cni rbalaznäj Dios.

Pabl näjza rebejn ni rniisi najcreni apost

11 Maläii chanunäsijctu narä la' ni guiniä gaii didxnayäle', niluxh asanunäjtu narä. ²Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladzñaä Jesucrist te xca'ni la'tu. Rlazä gactu bejnaya chäätu lojni, si'c te dxa'p che ruchñaani te bi'n, rut bahualdini. ³Niluxh rdxebä didi gusguee bendxab la'tu si'c ni basguee bäl Eva con xcäl'nadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu. ⁴Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. ⁵Narä runä xhigab dina gacä bejn ni guxiiru sajc loj guiraa reapost.

⁶Mase di gacdi guinisa'cä, xhet yäl-najndiza cayädxä; niluxh ni'c huenliisi rluiløj guiraa rediidx ni abaluiä lojtu, guiraa redzuun ni abenä ro'c.

⁷O ¿la benä te dojl guyu'ä lojtu si'c te bejn nadolajz, te gactu bejnroru, sa'csi xhetliidi cua'ädi xcuent ni basule'ä xtidx Dios lojtu? ⁸Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. ⁹Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuumtu. Sa'csi che biääd rebejznu ni siääd Macedonia, baniidxreni guiraa ni biquinä. Loj guiraa redee dina nutalä xtzuumtu, luxh si'c sinuu gunä. ¹⁰Guideb didxlii xten Jesucrist ni yu' nen lastoä, rniliä rut sajedi gudzucay xcuent xho yuä lojtu, ni'cni care'ch didxroga lo guiraa reguedx Acaya. ¹¹¿Xhicuent rniä si'c? ¿Laa sa'csi

dina chanälazä la'tu, ä? ;Xho gacni si'c!
;Dios anajn lacti sanälazä la'tu! ¹² Niluxh
nani rungacä, lagajc ni'c sinuu gunä,
te gudxonä renani rlajz gacnaro, renani
rlajz naa rebejn najcreni si'cpac najcnu,
niluxh direni gac. ¹³ Direni gac apost,
laareni rusgueereni, rujnsireni si'c ni na-
jcreni apost xten Jesucrist, luxh rut na-
jcdireni. ¹⁴ Luxh xho dini gac si'c, ni
lagajc bendxab ni laa Satanäs ruluiloj
si'c te xangl Dios ni rdimbicha' te rus-
gueeni bejn. ¹⁵ Ni'cni na'c guidxelojtu
palga näjza rexmos bendxab riääd, rujn-
sireni si'c bejn ni rujn dzunsa'c, niluxh
sinitlojreni par tejpas xcuent ni rujnreni.

Rdejd Pabl trabajw sa'csi najcni te apost

¹⁶ Rnisacä lojtu, na'c guntu xhigab
yecä cayajc, niluxh palga si'c rujntu
xhigab, colgusaanza guiniä si'c te ni rajc
yejcnj te guniäza didxro lagajc xcuentä.
¹⁷ Diidx ni rniä dina guiniäni xcuent
xcälrnibee Dios, alga rniäni si'c te ni rajc
yejcnj, lala redidxro ni rniä xcuent la-
gajc narä. ¹⁸ Sa'csi lacti bejn yu' ni rni
didxro xcuent redzuun ni rujnreni lo
guedxliujre, sigajcza siniä didxro xcuent
lagajc narä. ¹⁹ Ni la'tu, sa'csi nasindux-
htu, sanunäjtu rebejn ni rajc yejcreni.
²⁰ La'tu sanunäjtu chutis ni rnibee lo-
jtu si'c te lam, o rusguee la'tu te rba-
jnreni xhi xtentu, o rujnni runxlia'tu
xtzuunni o rliä'preni lagajc xpala'reni, o
rga'preni lojtu. ²¹ Mase rtuiyä guniäni,
dipac niajcdi niniä diidx lojtu te niacä
si'c najc rebejnga. Niluxh loj xhitis nani
runnaroreni, (canisicä si'c te bennayääl)
narä sajcru gunnaroä.

²² ¿La najcreni xpejn hebreos?
Sigajcza narä. ¿La najcreni xpejn
Israel? Sigajcza narä. ¿La najcreni xajg
toAbram? Sigajcza narä. ²³ ¿La najcreni
xmos Jesucrist? Narä nacäruni lojreni.
Naj miä si'c te bejn ni rajc yejcnj.
Abenäru dzuun lojreni, agudijnrreni

narä loj ni gudijnreni laareni,
abasäurureni narä nen latzguiib, nicla
gac guigab bal huält gudijnreni narä;
baltiza huält ameer nietä. ²⁴ Gaii huält
gudijn rexpejn Israel narä, tejsa huält
batiäjlreni duguijd detzä galbitzubigaa
huält. ²⁵ Chon huält bahuajcwreni
narä garo't; stee huält bacuaareni guij
yecä; chon huält biäaz barcw cadro
sa'ä loj nisdoo; teb dxej, teb yääl
guyu'ä lo nisdoo. ²⁶ Huaduxhä biaj,
lacti bixun riesgw xcuentä lo gueuu,
xcuent regubaan, xcuent rebenladxä,
xcuentza rebenzajt. Bixunza riesgw nen
reguedxro, näjza nez lo reyubijdz,
näjza lo nisdoo, näjza xcuent rebejn ni
rusguee, rniisireni najcreni bejtznu lo
xtidx Jesucrist. ²⁷ Abenduxhä dzuun,
agudedduxhä trabajw, balti yääl dina
niesä, balti huält gulanä, biolä, balti
huält xheti xhi niauä; agudedäza
yälnduxh; guyu' huält xhetiza xhabä.

²⁸ Luxh xhet loj redeetis rdedä tra-
bajw; guixe-guixee di lastoä cuexi
xcuent yärsia' ni ru'ä xcuent reben
guidoo ni huililajz xtidx Dios. ²⁹ Che
rdxajg tejtü, näjza narä rdxagä. Palga
tejtü riajb lo dojl, narä ruduxhä yärsia'
xcuentni. ³⁰ Palga nanab gunnaroä la-
gajc narä, sunäni xcuent rediidx nani ru-
luiloj xcälrdxagä. ³¹ Dios ni najc Xtad
Jesucrist, nani riäjl guiliäp xpala'nni
par tejpas, ananchee dina gusgueä la'tu.
³² Che guyu'ä guedx Damasco, guber-
nador nani guyu' ro'c, najcni xpejn rei
Aretas, gunibee gojp rexcuxhtisni gue-
jdxga te niniaazreni narä te nisäureni
narä nen latzguiib. ³³ Niluxh basiäjtreni
narä nen te dximro nez ro' te padeer
ni rdejd gabi guejdxga, te si'c gulaä
ladznaareni.

Dios baluiloj lo bacal

12 Mase riäjl guiniäni, xhet gunädi
gaan guiniä didxro lagajc
xcuentä ni'cni rlazä chanuu diidx,

guiniä xcuent rebacal näjza xcuent nani baluiloj Dios loä. ² Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax xspritni huij, Diostis najn. ³ Diostis najn la guideb tiejxhni, o ganax xpritni, niluxh nanä xho huij niguiiga, ⁴ guläs Diosni cadro yu'pac Dios, luxh ro'c biejn diajgni didx-higa'tz, didxroduxhtej, nani di gacdi guinii beñ guedxliuj. ⁵ Xcuent sa' niguiiga sajz guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni ruluiloj xcälrdxagä. ⁶ Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

⁷ Baluiloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguidx tiexhä, si'c te guejch huääz tiexhä, ni baxhal beñdxab xten Satanäs te gusacsini narä te di gacä te beñnaro. ⁸ Choñ huält agunabä lo Jesucrist xcuent ni'c, te guibicajni. ⁹ Niluxh laani najni loä: "Yälracnäj ni gunidxä salduxh luj, sa'csi ruzensa'cru xcälmlagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä. ¹⁰ Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yälñadip, yälñadaan loä.

Yu' Pabl yärsia' xcuent guidoo ni yu' Corinto

¹¹ Agucä si'c te beñnayääl, lagajc la'tu bejntu nacä si'c. La'tu riäj] niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajrcu mase rut nacädi. ¹² Redzuun ni benä la]

ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseem, näjza remilagwr. ¹³ ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtuuntu, nala-jznu dina niniabä niacnäjtu narä si'c gucnäj narä reguidoo ni yu' garenca lajt. ¿Colsiäj] lajztu narä dojlre!

¹⁴ Naj cayunä xhigab jiadhuiätu, naj gacni choñ huält siälä. Di quilä xhixtentu, alga lagajc la'tu rguilä. Di rlazä gotalä xtuuntu. Di riäj] cuchee rebuiux meel par xcuzajreni. Reguzajni ni riäj] cuchee meel par rexi'nreni. ¹⁵ Xhet najcni gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

¹⁶ Niluxh mase si'c najcni, di narä nutalä xtuuntu. Empac yu'reni canii basgueä la'tu sa'csi nadxällazä. ¹⁷ ¿Xhixh naatu cua'ä xhi xtentu sa'csi baxhalä rebajtzu lojtu, ä? ¹⁸ Che baxhalä Tito, rapä lojni chanääni stee bejtzu te jiadhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ La]ni cayoltu guiraa rediidxre, cayujntu xhigab canabnu jiaj] lajztu, niluxh xhet si'cdini. Caniinu rediidxre nez loj Dios, caniizanu con xcälracnäj Jesucrist te si'c tiobrutu lo xtidx Dios, rebetzä nani rinälazä. ²⁰ Sa'csi rdxebä andi che jiadhuiätu fiä ditu gac si'cni rlazä gactu, dxejtiru la'tu suhuiizatu dizana gacä si'cni rlazä gacä. Rdxebä andi yu'tu ni cadijl, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutaj] diidx lo sa'ni; ni cayunnaro lagajc laani, ni cayujnza bieje. ²¹ Rdxebä andi che jiadhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiechljaztu xcuent xtojltu.

Yu'tu ni di guibannaya, resnäjtu bejn ni di gac chäältu, yu'za balti dojl rujntu.

Lult yälrujidx xten Pabl

13 Naj gac choñ huält siädhuiä la'tu. Guira'ti quej nanab cue'creni con xtidx tio'p o choñ bejn ni najnpac xhi dojl bejn tejpgani. ²Mase ruti narä ro'c, arnixgaä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jiälsacä, diruna gulaslazätu nicla tejtü, ³sa'csi rlanjtu fiipactu la guli runiidx Jesucrist yälrnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni neñ lastootu. ⁴Gulicani che cuajni lo crujz, gucni si'c te bejn nani casis, niluxh naj nabajjni sa'csi rapduxhni xcälrnibee Dios. Näjza nuure rsia'cnu si'c te bejn nani casisnäj laani niluxh nabannäjnu laani xcuent xcälrnibee Dios ni baniidxza Dios xcuenttu.

⁵Colninäj lastootu lagajc la'tu, colhuii la guliipac ahuililajztu xtidx Dios; colhuisa'c xho najc lastootu. ¿La ditu gacbee rbäjz Jesucrist neñ lastootu, ä? Palga rutini, rusqueetu lastootu,

ditu nililajztu xtidx Dios. ⁶Narä rlazä gacbeetu, dinu nusguee lastoonu, ahuililajzpacnu xtidx Dios. ⁷Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä. ⁸Sa'csi xhetliidi rajcdi riennu te nitloj didxguli, xcälrnibeenu najc te gusule'nu didxlii. ⁹Ni'cni rbaa lajznu che casisnu, niluxh la'tu nadip, nadaantu; rbejdx-rmiabzanu lo Dios guiza' xcälrililajztu lo xtidx Dios. ¹⁰Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäjil tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹Ni'cni rbejtznu, colguibalajz, colhuii guisa' xcälrililajztu, colcuedcxi lajztu, colyennäj sa'tu tejsi xhigab, dxitis gubajñ. Dios xten yälrinälajz näjza yälrbecdxi lajz chunäj la'tu. ¹²Colnii: "Xchan" lo resa'tu. ¹³Guiraa rebejtznu nani ahuililajz ruxhal xtiixtios lojtu.

¹⁴Yälracnäj xten Dad Jesucrist, näjza yälrinälajz xten Dios, näjza yälracnäj xten Sprit Dxan chu neñ lastootu. Sugacni si'c.

Te Guijtz Lo Reben Gálatas

Pabl rucuaa guijtz loj reben guidoo nez región Galacia

1 Narä, Pabl, nacä apost xten Jesu-crist. Xhet rebejn di baxhal narä, xhetza bejn di gule narä. Lagajc Jesucrist näjza Xtadni Dios ni yu' xh-aguibaa, nani guläs Jesucrist loj re-bengut, laareni agulereni narä. ²Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galacia. ³Xca' guejbtu xcälracnäj Dios con xcälrbexilajz xten Dios xtadnu näjza xten Dad Jesucrist. ⁴Lagajc laani cuäjbn gujtni te guslaani nuure lo dojl xten guedxliuj gujdxre, si'cni gunibee Xtadnu, Gueb-Dios. ⁵Chä'p xpala'n Dios par tejpas. Sugacni si'c.

Xhetdi xhi stee didxcoob ni sajc guslaa nuure

⁶Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx. ⁷Xhetdi stee diidx ni sajc guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. ⁸Niluxh palga jääd chu jädluii lojtu ste'ca diidx ni ruslaa bejn lo dojl, niluxh di diidxga gac si'c najc diidx nani abaluiinu lojtu, bejn ga agubibdeni, chutis najcnu, mase naräni, mase te xangl Dios ni jääd xhaguibaali. ⁹Si'c ni guiniä lojtu, si'c rnisacä lojtu naj: Pal yu' chu jädluii lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluiinu lojtu, bejn ga agubibdeni.

¹⁰¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru

rlazä guspaä lajz bejn, digacdi gacä xmos Jesucrist.

Xtzun Pabl

¹¹Colyacbee sa'ä, diidx ni ruslaa bejn lo dojl nani abasule'ä lojtu di diidxga gac xhigab bejn guedxliuj. ¹²Xhet lojdi bejn guedxliujdi cua'äni, rutza baluiidini löä, niluxh lagajc Jesucrist baniidx xtiidxni löä.

¹³Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni. ¹⁴Loj reni ruseob xleii toMoisés narä cagusobäru xtiidxni, nanduxhäru loj guiraareni. Loj rebejn nani sadxagä ladxä, maazru sanälazä xcostumbr retox-tadgoldöä. ¹⁵Dios gule narä, guleni narä cheni nuuli xnanä narä, gurejdxni narä sa'csi sanälajzni narä. ¹⁶Dxejc bibalajz Dios baluilojni Xi'nni Jesucrist löä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujc si'c rut lojdi huiye'tzä. ¹⁷Niclaza nia'ä guedx Jerusalén loj reni ganid gujc apost löä. Alga hua'a nez reguedx Arabia, dxejcti gubisacä guedx Damasco.

¹⁸Che agudejd si'cti choj ijz, dxejcru hua'a guedx Jerusalén te biembeä Pedr, dxejc biannäni tzun-gubijdx. ¹⁹Niluxh dina nuhuiä loj chu stee apost ro'c. Lojtis Jacob, betzhuin Jesucrist bahuiä. ²⁰Rniliä nez lo Dios, dina guiniä didx-xhi, rediidx ni cacuaä najc guliipac.

²¹Dxejcti hua'a reguejdx xten Siria näjza Cilicia. ²²Resa'nu ni yu' nen xquidoo Crist guideb nez reguedx Judea, direni gumbee narä. ²³Riejntis diajgreni: "Bejn nani basacsíduxh nuure agujc xchej, abejnga caguluiini xcuent lagajc xcälirililajz nani galoo rlajzni nunitlojni." ²⁴Dxejc rliä'preni xpala'n Dios sa'csi huililazä xtiidxni.

Bidxaag Pabl loj reapost

2 Che agudejd tzudaj ijz, dxejcru hua'a guedx Jerusalén con Bernabé, nájza Tito huinānu. ² Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunāru dzuun. ³ Sanää Tito, te bejn griegw ni di gac xpejn Israel. Nicla lojni direni niāj b chuni bee si'c caj lo leii xten Moisés. ⁴ Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnno Dios. Rdxchreni sa'csi nuunu, rexpejn Jesucrist, dinu jienru si'c ni bejn retoxtdagdoonu. Laareni rlanjzreni guxhiidreni nurnu, rlanjzreni gusoobnu rextiidxreni. ⁵ Dipacnu nicāj b nucuadi-ajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

⁶ Niluxh reni sajc, nalajznu reni rnibee reben guidoo ro'c, xhet te didxcoobdi guniireni loä. (Luxh par narä xhet najcdi mase beñsajcreni, sa'csi Dios runtebloj guiraa bejn.) ⁷ Luxh bahuiireni abaniidx Dios xtidx Jesucrist loä, luxh rusule'äni loj rebenzajt te guibicaj xtojłreni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. ⁸ Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzajt nani di gac xpejn Israel.

⁹ Ni'cni Jacob, Pedr, nájza Juan nani najc beñroru nen guidoo xten Jesucrist, gucbeereni laa Dios ni cayacnāj narä. Dxejc baniidxreni naareni loä nāj lo Bernabé si'c te seen rbalajzreni, te chonnu guiro'pnu loj rebenzajt. Niluxh laareni chanuureni gusule'reni loj rexpen Israel. ¹⁰ Gunabtisreni loonu gac-

nājnu rebejn ni xhet rajpdi, luxh ni'cza rlazä gunä.

Pabl gudilnāj Pedr lo guedx Antioquía

¹¹ Che biääd Pedr lo guedx Antioquía, gudilnääni, sa'csi abejni dojl xhet laadi cayujni. ¹² Galoo gudaunājni rebenzajt, luxh che bidzujn gaii xpejn Israel ni baxhał Jacob, dxejcti gubicajni lo rebenzajt, diruni niaunājreni sa'csi bidxeljbní rexpejn Israel ni ru' bee ni bidzujn ro'c. ¹³ Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Nājli Bernabé bejn si'c. ¹⁴ Luxh che bahuiä direni gun si'cpacni najc xtidx Jesucrist, dxejc rapä loj Pedr nez loj guiraa reben guidoo: "Palga luj najclu te xpejn Israel, luxh nabajnlú si'c rebenzajt ni digac xpejn Israel, xhet si'cdi ni caj loj leii, ¿xhicuent rlanjzlu guinibeelu guibajñ rebenzajt si'c rexpejn Israel nani rusooob xleii toMoisés?"

Nungājł chalilajz rexpejn Israel, sigajc guiraa bejn, te guibicaj xtojłreni

¹⁵ Nuure najcnu rexpejn Israel cheni gojllinu; dinu gac bendojł si'c najc rebenzajt. ¹⁶ Anadonnu rut chu tejtí bejn sajc guibicaj xtojłni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojłnu sa'csi rililajznu, xhet sa'csi riennu si'cni caj loj leii. Di gacdi jia xtojł bejn xcuent yälrusooob xleii toMoisés.

¹⁷ Palga lał ni rlanjznu jia xtojłnu xcuent xcälřililajz xtidx Jesucrist, ruhuiinu cayenrunu dojl, la sajc guiniinu: Jesucrist rulúii rienrunu dojl, ¿ä? ¿Xho gacni si'c! ¹⁸ Palga rlazä gunsacä redzuun nani abarö'nä, lagajc narä rapä dojl nacä beñ dojl. ¹⁹ Niluxh xcuent leii, anacä si'c bengut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bengut

che gucbeä di gacdi gusobä guiraa ni caj lo leiiga. ²⁰Najcni si'cni gutnäá Crist lo cruju. Naj xhet narädi ni nabanä, laa Crist ni nabajñ neñ lastoä. Yälñabajñ ni nabanä naj lo guedxliujre nabanä sa'csi rililazä xtidx Xi'n Dios nani rinälajz narä luxh gujtni te gudijxni xtolä. ²¹Dina cuälazä xcälñulasajz Dios. Paru sajz gudzucaj leii xtojñ bejñ te gacreni ben-naya nez loj Dios, dxejc xlia'si gujt Jesucrist.

Yälñrililajz rusia dojl

3 ¿Chipsa nayäälto beñ Galacia! ¿Chu bascäyju te di cuadiajgtu xtidx Jesucrist? Ni nez lojpacku bisule'nu diidx xho cuaj Jesucrist lo cruju. ²Tejtis diidx rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu? ³Chipsa nayäälto. Acua'tu Sprit Dxan xten Dios dxejcti naj rlanjtu guntu ni riajbtis yejctu guntu. ⁴¿La xlia'si gudejdtu trabajw? Chugan la guli xlia'sini. ⁵Che runiidx Dios Sprit Dxan xteni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

⁶Huililajz toxtadgoldoonu Abram xtidx Dios, ni'cni cua' Diosni si'c te bejñ nani naya lastooni. ⁷Ni'cni colyacbee dee: renani rililajz xtiidx Dios najc xi'n toAbram. ⁸Galooli najn Dios xcuent yälñrililajz susia Dios lastoo rebenzajt, ni'c räjpni lo Abram: “Guirali reben guedxliuj sacle' xcuentlu.” Diidxre cuaj lo guijt ni gujc galooli, cadro caj xtidx Dios. ⁹Ni'cni reni rililajz naj agucnäj Diosreni sigajc gucnäjni toAbram nani huililajz.

¹⁰Guiraa reni rlanj guibajñreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.” ¹¹Niluxh huenliisi rieñ rut

nayadi nez loj Dios xcuent leii, sa'csi dee najc xtidx Dios: palga rililajz te bejñ xtidx Dios, najcni te bennaya nez lo Dios, nabannäjni Dios xcuent xcälñrililajzni. ¹²Leii dini naa chalilajz bejñ te xca'ni yälñabajñ. Scree caj lo leii: “Nani gunpac si'cni caj loj reguijtz xten leii, ni'c nanab guibajñ lojac leiiga.”

¹³Jesucrist badzucaj nuure loj yälñbibde xten leii. Laani gubibdeni xcuentnu sa'csi xtidx Dios naj: “Anabibde te bejñ ni najñ loj te yajg.” ¹⁴Scree gusajc Jesucrist te gusojb diidx ni räjp Dios loj toAbram, sacnäjni guiraa rebenzajt; näjza te guiraanu ni chalilajznu xtidx Jesucrist xca'nu Sprit Dxan xten Dios.

Leii näj diidx ni bia'n Dios loj toAbram

¹⁵Betzä, naj gusä'tä te diidx xcuent beñ guedxliuj. Cheni rujñ bejñ te guijt te jia'n diidx lo stee bejñ, mase bejntis najczeni, che abacuaani lajni lo guijtza, rut sajcdi gudzucaj guijtza. Rutza sajcdi gucuaaru diidx lojni che anajcni. ¹⁶Luxh anajnnu badeed Dios xtiidxni loj toAbram näjza loj xagdooni. Dini ninii “rexagdooni” si'c loj xhidajñreni, guniini lo tejtis xagdooni, luxh laani najc Jesucrist. ¹⁷Diidx ni rlazä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzuu ijz gudeedni leii lo Moisés te laani gudeednini loj rexpejñ Israel. Niluxh di leiiga nuchaa diidx ni bia'n Dios loj toAbram, lañtis sajcni. ¹⁸Paru naquuin leii te xca' bejñ erens, dxejc xhet erensdi cua' Abram lo Dios. Niluxh basa'n Dios erens lojac Abram sa'csi bia'nni diidx lojni galooli.

¹⁹¿Xhicuent badeed Dios leii loj Moisés? Badeed Dios leii sa'csi benduxh rexpejñ Israel dojl, te gacbeereni xho najc xtojñreni, lañ ni jääd nani najc xagdoon toAbram. Sa'csi bia'n Dios diidx con

laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjil diidx. ²⁰ Te ni rusiäjil diidx xhet par tejtis bejn di najcni, niluxh Dios tejtis najc.

Xcuent leii

²¹ ¿La garenca najc xleii Moisés lo diidx ni basa'n Dios loj toAbram, ä? ¡Xho gacni si'c! Paru nica'nu te leii ni rajc rudeed yäl**na**baj**n**, dxejc sii xcuent leiga nica' bejn yäl**na**bannaya. ²² Niluxh loj reguijtz xten Dios caj diidx ni rni: Guiraa bejn niäuu nen dojl, te reni chalilajz xtidx Dios si'c huililajz toAbram, reni'c xca' xcäl**ri**lilajz diidx xcuent Jesucrist si'cni bia'n Dios diidx loj toAbram.

²³ Che gajd xcäl**ri**lilajz xcuent Jesucrist jääd, dxejc basäuu leii nuure nen dojl, cabäjtisnu guiricaj xcäl**ri**lilajz xcuent xtidx Dios. ²⁴ Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojl**nu** con yäl**ri**lilajz xtiidxni. ²⁵ Niluxh naj sa'csi arajpnu yäl**ri**lilajz xcuent xtiidxni, dirunu guiquiin te mastr, nalajznu leii.

²⁶ Guiraatu najctu xi'n Dios xcuent yäl**ri**lilajz xtidx Jesucrist, ²⁷ sa'csi guiraatu ni gurobnistu loj xtidx Jesucrist, najctu rexpejn Jesucrist. ²⁸ Naj rutiru rexpejn Israel niclaza rebenz**ij**t, niclaza mos, niclaza bejn**t**is, niclaza niguii, niclaza gunaa, sa'csi guiraanu najcnu tebloj nez lo Jesucrist. ²⁹ Palga najcnu xpejn Jesucrist, dxejc guliipac najcnu xi'n toAbram, dxejc sica'nu yäl**na**sa'c ni abia'n diidx gudeed Dios loj Abram.

4 Mbaj naj. Nani xca' yäl**na**sa'c, che najcni biuux, najcni sigajc te mos, mase xtenni gac guiraa xhixten xtdadni. ² Yu' chu te bejn ruhuiini, yu'za chu rnibee xhixtenni cheni agurooblini, cheni guidzuj**n** dxej xca'ni ni gudeed xtdadni. ³ Sigajcza nuure che gucnu si'c

biuux guyu'nu gucnu mos loj releii, rnibeeni xhini'c digacdi jien**nu** lo guedxliuj. ⁴ Niluxh che bisa' dxej ni basoob Dios, baxha**l** Dios Xi'npacni. Xi'n te gunaa goj**l**ni, loj rexpejn Israelza biädj**ij**äl**ni**, basoobni leii xten toMoisés. ⁵ Si'c gujc te xcasacni reni rusoobpac leii, te xca'ni nuure gacnu si'c te xpsiä**ij**bni.

⁶ Luxh sa'csi anajctu xi'nni, ni'c baxha**l** Dios Sprit xten Xi'nni te cuääz**ni** nen lastoonu. Laani rniini lo Dios xcuentnu: “Guej**blu**, Xtad**nu**.” ⁷ Ni'c dirunu gac mos, sa'csi anajcnu xi'nni. Luxh palga najcnu xi'nni, suniid**x**za Dios yäl**na**sa'c loonu xcuent Dad Jesucrist.

Rulijdxni na'c gacsac bejn mos

⁸ Che gajd**tu** gumbee Dios najctu mos xten rebanä**jb** ni raj**ntu** si'c Dios luxh dipacreni gac Dios. ⁹ Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujct**u** mos xten rebanä**jb**. ¹⁰ Cayutistu redxej, rebä**ii**, retiemp, reijz. ¹¹ Naj rd**x**ebä andi xlia'si gudedä trabajw baluiä**tu**.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzungu**ij**dxdi bejntu loä che guyu'ä lojtu. ¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. ¹⁴ Dizatu nuze' niclaza nibälajz**tu** narä xcuent yäl**ra**cxhuu ni rajc tiexhä, alga si'c te xangl Dios, si'c lagajc Jesucrist cua'tu narä. ¹⁵ ¿Con yäl**ri**balajz xtent**u** ni gojptu dxejc? Niluxh rniä loj**tu**, paru niajc nibäätu baloj**tu**, nuniid**x**tuni loä dxejc, si'c niujntu. ¹⁶ Naj ¿la rd**x**e'chtu loä sa'csi caniä didxlii lojtu, ä?

¹⁷ Naj yu' gaii bejn nani rujnsi si'cni sanä**re**ni leii rujnsireni si'cni rinälajz**re**ni la'tu. Niluxh r**l**ajz**re**ni gudzucaj**re**ni la'tu te gusaant**u** xtid**xä**, te chanajltu la**re**ni, te jiutu xtiid**xre**ni. ¹⁸ Laaca chanälajz

bejn sa'ni, niluxh na'c gusgueeni, na'cza che suganáási la'tu chanälajztu narä. ¹⁹Rexi'nä, xcuent la'tu cadedä trabajw-duxh si'c te gunaa ni rajl xpäzni, luxh sinuu sidedä trabajw cheni arbäzjpacli Jesucrist neñ lastootu. ²⁰Maläii gac jiälä lojtu lagajc naj te gac guiniä xhi stee di-idx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar näj Sara

²¹Colguinii loä, la'tu ni rlaiz gun si'cni caj lo leii, çla ditu gacbee, la di diajgtu jiejn xhini'c caj lo leii, ä? ²²çColjiejn! Scree caj loj leii: guyu' tio'p xi'n toAbram. Tejní najc xi'n gunaa ni najc xmos Sara. Steeni najc xi'n chääl-pacni. ²³Niluxh xi'n xmosni gojl sa'csi la-gajc laani bejnni xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. ²⁴Diidx xcuent re-gunaare najc si'c diidx ni ruluii. Regu-naare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. ²⁵Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpeñ Israel con rexi'nreni, sanäreni leii. ²⁶Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. ²⁷Scree caj loj xtidx Dios:

Bibalajz, luj gunaa ni gajd xi'nlu chu, guredxa', bibalajz, luj ni gajdlu ted trabajw ni rdejd gunaa che rajl xi'nni. Sa'csi su'ru xi'n gunaa nani gulälajz chäälni quela xi'n gunaa ni gudies-näj chääl stee gunaaga. ²⁸Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. ²⁹Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlñi xi'n chäälpac Abram nani gojl xcuent di-

idx ni bia'n Dios loj Abram. Sigajcza na-jcni naj. ³⁰çXhi caj lo reguijtz? “Bari-laagw gunamos näj xi'nni, te di xca' xi'n gunamos yäl'nasa'c xtenlu si'c ni xca' xi'n gunaa nani najc chäälpaclu.” ³¹Naj nu-ure, betzä, dinu gac si'c xi'n gunamos te chunu lo leii. Nuurnu najcnu si'c xi'n gu-naa nani najc chäälpac toAbram.

Colguzutijp lajztu lo yälirilajz xtidx Dios

5 Colguzutijp lajztu lo xtidx Dios nani baniidx Jesucrist loonu sa'csi guli-pac gulää Jesucrist nuure ladznaa leii, badzucajni xtojlnu che huililajznu xti-idxni, ni'cni na'cru gusiejch lajztu te gac-sactu mos ladznaa leii.

²Narä Pabl rniä lojtu, palga la'tu chutu bee si'cni caj lo leii, dxejc xlia'si chalila-jztu xtidx Jesucrist. ³Rniäza stehuält, guiraa bejn nani rlaizpac chu bee, nanab gunni si'cpac ni caj lo leii. ⁴Palga rla-jztu guntu redzuun ni caj lo leii te guibi-caj xtojltu, dxejc agubicajtu lo Jesucrist, agubicajzatu lo xcälracnäj Dios. ⁵Niluxh nuure xcuentpac Sprit Dxañ xten Dios rililajznu gudijx Jesucrist xtojlnu lo crujz, cayenloonu jiädsacni te guniidxni yäl'bansa'c par tejpas loonu. ⁶Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajcdi najc chalilajz bejn xtidx Dios. Yälirilajzga rujn guibansa'cnu te chonälajznu resa'nu.

⁷La'tu laaca sasajtu. çChu badxojn gu-soobtu xtidxlii Dios? ⁸Xhet Diosdi ni guletu badxojnditu. ⁹Anajntu tudxe'nsi cobgulaj rusaguijni yätxtiil; si'c te cobgu-lajga najc te niguii ni caguluiiti xtidx leii. ¹⁰Rialilazä xtidx Dad Jesucrist, ni'c nadiplazä la'tu; ananä ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹Narä rebetzä, paru narä caguluiä chutu bee, si'c ruluii rexpeñ Israel, çxhi xcuent rusacsí rexpeñ Israel narä? Paru

si'c caguluiä, dirutu chalilajz gudijx Jesucrist xtojnu lo crujz. Luxh si'cpacza rlanjreni. ¹²Rebejn nani cagusgueetu caniireni chutu bee, ¡malaiiza gutiuugreni tejpas lagajc tiejxhreni!

¹³La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixgaa na'c xca'tistu rediidxga dxejcti guntu si'ctis ni rlanj tiejxhtu, si'ctis ni riabza yejcti. Colgacnäj sa'tu con yälrinälajz, tejni sigajc steeni. ¹⁴Sa'csi guiraa diidx ni caj lo leii con tejtis diidxre rsiojbn: "Chanälajztu sa'tu sigajc rinälajztu lagajc la'tu."

¹⁵Palga rdijltu, rauya'tu sa'tu, rajwtu sa'tu, ¡colnatiro! Andi lagajc la'tu gunijttu sa'tu.

Nani rchagljaz rebejn näj yäl nabajz ni rudeed xtidx Dios

¹⁶Rniä lojtu, colguibajz si'c ruluii xtidx Dios näjza Sprit Dxa xteni, te si'c na'c guibajntu si'ctis ni rlanj tiejxhtu, si'c ni najctis xhigabtu. ¹⁷Sa'csi ni najc xhigab xten bejn rdxe'ch loj xhigab Sprit Dxa xten Dios. Sigajcza xhigab xten Dios dini gac tebloj con xhigab xte bejn. Rudxojn tu loj sa'tu, ni'cni digacdi guntu dzuun ni rlanjztu guntu. ¹⁸Luxh palga cagulijdx Sprit Dxa la'tu, dxejc dirutu quiquiin guntu si'c ni caj lo leii.

¹⁹Guyasi jiembee bejn xhireni'c najc redzuun ni rujn rebejn nani di gumbée xtidx Dios. Dee najc redzuunga: yälrusguee chääl bejn, yälrusguee chääl sa'reni, yälrusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, ²⁰yälrajz rebanäjz, yälbidxaa ni rujn daan bejn, yälrdxechlajz loj sa'ni, yälrchagdijl sa'ni, yäl'nayedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzunguijdxre rujnreni: ²¹yälrdxe'ch lajz, yälrugut sa'ni, yälrsiojz, yälrauxha't, näjza guiraa dojl sa'

redee. Sigajc ni balidxä la'tu xhi dxejga rulidxä la'tu naj. Nani rujn sa' redoljre direni jiu' loj xcälrnibee Dios xhaguibaa.

²²Niluxh xtzuum Sprit Dxa xten Dios najc yälrinälajz sa'ni, yälrbalajz lastooni, yälrbedxi lajzni, yälrbecdxilajz sa'ni, yäl'najc bensa'c lo chutis bejn, yäl'nagodzljaz, yälrlililajz, ²³yäl'nadolajz, yälrnibee lastooni lo ni rlanj gun tiejxhni. Xheti te leii ni rudxojn gun bejn sa' redzuunre. ²⁴Niluxh renani ahuililajz xtidx Jesucrist, abatio'nreni guiraa redolguijdx ni rlanj gun tiejxhreni. ²⁵Palga rbäjz Sprit Dxa nen lastoonu, do'o guibajz si'c rnibee Sprit Dxa guibajntu.

²⁶Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

Colgacnäj sa'tu

6 Sa'ä, palga chu tejtu ni abiajb nen dojl, lagajc la'tu nani arabeetu xtidx Dios colgulijdx bejnga, colgacnäjni te guiriini nen dojl. Colni lojni nadolajz, nasinlajztu lagajc la'tu didi che guidon nägajcza la'tu jiajbtu nen dojl. ²Colhuii xhi rquini resa'tu, colgacnäjreni te si'c gusoobtu guiraa rediidx ni najc leii xten Jesucrist.

³Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. ⁴Tejgatu colcube xho najc xtzuumtu te fiitu la laaca najcni, dxejcti sajz guiliä'ptu lagajc xpala'ntu. Dxejc ditu quiquin chu stee bejn guiliä'p xpala'ntu. ⁵Sa'csi tejga bejn susule'ni didix lo Dios xhini'c bejnni.

⁶Nani casieed xtidx Dios nanab gacnäj bejn nani ruluiini, gudeedni tudxe'n xhixtenni loj nani ruluiini.

⁷Na'c gusgueelu lagajc luj. Dios digacdi guigueni, ni'c guira'ti dzuun ni rujn bejn lagajcza ni'c xca' bejn. ⁸Paru te bejn gun dzuun xcuenttis tiejxhni, dxejc che guidzujz dxej xca'ni yäl'nasa'c,

sinitloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yäl'nasa'c, sica'ni yäl'nabajn par tejpas. ⁹Ni'cni na'c guidxajgnu jiennu dzunsa'c te che guidzujn dxej ni xca'ni yäl'nasa'c, xca'zanu te yäl'nasa'cro. ¹⁰Ni'cni nanab lał ni sajcnı, gacnäjnu chutis bejn, ganidoo resa'nu ni ahuililajz.

Yäl'rulijdx näjza xtixtios

¹¹Colhuilaa lacti reletrduxh cacuaä lojtu con naápac. ¹²Guiraa reni rdxaglajz gun ni rlajztis tiejxhni, laa reni'c ni rlajz chutu bee, tedi tedreni trabajw xcuent ni cuaj Jesucrist lo cruju. ¹³Lagajc reni ru' bee direni gun si'cni caj lo leii, niluxh rlajzreni chutu bee te guibaa lajzreni sa'csi bejnreni gaan guyu' beega tiejxhtu. ¹⁴Luxh narä di-

lazä guibaa lo sa' recosga; rbaatis lazä sa'csi gujt Jesucrist, cuajni lo cruju, te gudijxni rextojlnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. ¹⁵Che ahuililajz te bejn xtidx Jesucrist, xhetru sajcdı chu bejn bee, xhetza sajcdı na'c chu bejn bee. Nani sajctis najc gacni si'c te bejcoob lo xtidx Jesucrist. ¹⁶Guiraa renani nabajn si'cni ruluii xtidx Jesucrist sibedxi lajzreni xcuent xcäl'rulaslajz Dios. Näjza rexpem Israel nani ahuililajz xtidx Jesucrist sibedxi lajzreni.

¹⁷Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸Rebetzä, gacnäj Dad Jesucrist guiragajctu con Sprit Dxaan xtenni. Sugacni si'c.

Te Guijtz Lo Reben Efesios

Bacuaa Pabl lo reben guidoo neņ guedx Éfeso

1 Narä, Pabl, nacä apost xten Jesucrist sa'csi si'c rlaĵz Dios. Cacuää guijtze loĵ rebeĵn nani huililajz xtiidxni, loĵ reni ruĵn si'cpac rniini neņ guedx Éfeso. ²Xca'tu yälracnäĵ, yälrbedxi laĵz xten Xtradn Dios, näĵza xten Dad Jesucrist.

Rusule' Pabl xtidx Jesucrist

³Rliä'pnu xpala'n Dios, Dad näĵ Xtrad Jesucrist. Dios racnäĵ nuure, xcuent Crist runiidxni guiraa reyälracnäĵ xca' lastoonu, astoo yu'lanu xhaguibaa. ⁴Laani gule nuure, che gajdli guirixtieĵ guedxliujre, te gacnu xpeĵnni, te guibanayanu nez loĵni con yälrinälajz. ⁵Sigajcza anungäjĵ xca'ni nuure te gacnu si'c xi'npacni sa'csi abiääd Jesucrist te guslaani nuure neņ doĵĵ, si'c ni gunibee Dios sa'csi balaslajzni nuure. ⁶Gucnäĵ Dios nuure te guiliä'pnu xpala'n Dios, sa'csi lagajc laani acua'ni nuure, abeĵnni nuure teĵsi con xi'nni ni sanälajzni. ⁷Laani baslaani nuure neņ doĵĵ xcuent xtieĵnni, laani badzucajni xtoĵĵnu xcuent xcälruslaslajzni ⁸nani banidxduxhni loonu. Guideb yäl-najĵ, guideb xcärieĵn ⁹basule'ni loonu xhigab xhiga'tzni xcuent redzuun ni rlaĵzni gunni, xhigabza ni beĵnni galooli. ¹⁰Luxh sidzujĵ dxeĵ sisioĵpac xhigab ni beĵn Dios. Che guidzujĵ dxeĵga sutoĵĵ Dios guiraaĵi, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹Arajpnu te xcäl'nasa'c Jesucrist, sa'csi galooli beĵn Dios xhigab guniidxni yäl'nasa'cga. Lagajc Dios benchee guira'ti ni yu', luxh ruĵnpacni nani abeĵnni xhigab najc laaca gunni ¹²te guiliä'p beĵn xpala'n xcälrnibeeni

xcuentnu, nani ganiddoo biolilaaznu xtidx Jesucrist. ¹³Näĵza la'tu, che bieĵn diaĵgtu redidx gulii, rediidx ni ruslaa beĵn lo doĵĵ, dxeĵc huililajztu xtidx Jesucrist, dxeĵc guĵczatu teĵsi con laani. Dxeĵc cua'tu Sprit Dxan xten Dios, ni'c najc si'c seen ahuililajztu, si'cni bia'n Dios diidx. ¹⁴Baniidx Dios Sprit Dxan xtenni te cuääzn neņ lastoonu, te ni'c najc seen xca'nu yäl'nasa'c nani guniidx Dios che abaluuxni xtzuumni, nalajznu guslaani guiraa rexpeĵnni te guiliä'preni xpala'nni lo xcälrnibeeni.

Rniab Pabl gudeed Dios yäl'najĵ loĵ renani ahuililajz

¹⁵Ni'cni näĵza narä, sa'csi abieĵn diaĵgä xho rililajztu xtidx Dad Jesucrist näĵza xho sanälajztu guiraa rexpeĵn Jesucrist, ¹⁶dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios. ¹⁷Rniabä lo Xtios Dad Jesucrist, xtradni ni rnibee xhaguibaa, guniidxni loĵtu te yäl'nanduxh, te yälru-luiloĵ recos xhiga'tz te gacbeduxhrutu xcuent Gueb Dios. ¹⁸Rniabäza lo Dios ĵianij xcärieĵntu te gacbeetu xhini'c najc speranza xten yälracreĵdxtu lo xtiidxni, te gacbeetu lacti saru, lacti saĵc yäl'nasa'c ni gudeed Dios lo Jesucrist näĵza loĵ rexpeĵnni, ¹⁹te gacbeezatu lacti gurobduxh najc yälrnibee nani rajpni nez loonu nani ahuililajz xtiidxni. Guiraa redee rului lacti nadip najc yälrnibee xten Dios. ²⁰Lagajc yälrnibeere beĵn dzuun par Jesucrist. Con yälrnibeere baspajĵ Dios Jesucrist lo rebengut, te gureĵni xladbee Dios cadre rnibeeni xhaguibaa. ²¹Maazru saĵcni lo chutis gubier, lo chutis yälrnibee, lo xhitis yäl'nadip, lo chutis ni rnibee; maazru saĵcni lo chutis nani abibee te guinibee, sigajc naj, sigajc neņ redxeĵ ni churu ĵiääd. ²²Niluxh badeed Dios guira'tini ladznaa Jesucrist, laazani beĵn bibee Jesucrist gunibeeni lo guiraa xhixten xquidooni. ²³Reben

guidoore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooni.

Ruslaa Dios nurnu sa'csi rinälajzni nurnu

2 Laani baniidxni yäl nabajñ lojtu che najctu si'c bengut nez loj Dios sa'csi rujntu dojl. ²Galoo gubajntu lo dojl, entis lo xnez guedxliujre guzajtu, bitutu xtidx bendxab nani rnibee guedxliujre. Sprit xtenni rujn dzuun nen lastoo rexi'nni nani di gucuadiajg xtidx Dios. ³Luxh galoo, naj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäjñ guidxe'ch Dios loonu, sigajc bidxe'chni loj guiraa reben guedxliuj. ⁴Niluxh balaslajz Dios nuure. Con xcäl sanälazduxhni huinälajzni nuure. ⁵Mase anajcnu bengut lo dojl, laani baniidxni yäl nabajñ loonu. Rajpnu yäl nabajñre con Jesucrist. Sa'csi balaslajzni nuure baslaani nuure nen dojl. ⁶Bas pansacni nuure con Jesucrist; sigajcza bejn ni cuenäjnu Jesucrist xhaguibaa, ⁷te nen redxer ni churu jääd, guluilojni lacti sajcxäl nasa'c xten yäl rulaslajzni, ni'c sanälajzni nuure, najcni huenduxh loonu por Jesucrist. ⁸Sa'csi rulaslajz Dios nuure, ni'c baslaani nuure nen dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. ⁹Xhet xcuent xhi dzunsa'cdi ni biennu, te di chu tejtu gac nayedx-lajzdi. ¹⁰Dios najc ni benchee nuure. Sigajcza con Jesucrist bejn ni gacnu bejn ni rujn dzunsa'c nani galooli agunibee Dios jienpacnu.

Yälrbedxilajz ni rajpnu por Jesucrist

¹¹Ni'c colsnaj lajztu xho gujctu galoo. Ditu niajc rexpejn Israel. Rniireni la'tu

'benzajt' sa'csi ditu chu bee si'c ru' rexpejn Israel. Sa'csi lagajc con naareni rusälreni bee. ¹²Dxejc suga'tu ditu gumbee Jesucrist. Zijt yu'tu loj rexpejn Israel, najctu benzajt. Nicla gumbeetu rediidx ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre. ¹³Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojltu con xtiejn Jesucrist. ¹⁴Jesucrist najc ni rbecdxi lajznu. Laani bejn gujc rexpejn Israel tejsi con rebenzajt. Laani badzucajni redzuun xten leii te gujc rexpejn Israel tejsi con rebenzajt. ¹⁵Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzajt. Lagajc laani bejn ni bidxagsa'reni te gujcreni tejsi che huililajzreni xtiidxni, gujcreni te bencoob. Dxejc gulecdxini lajznireni. ¹⁶Con yälgujt ni gujtni lo cruzj badzu'ni guiro'preni lo Dios te gujcreni tejsi. Si'c guläjz rdexchnäj sa'reni.

¹⁷Cajza lo guijtj rediidxre:

Biädni te basule'ni xho ga'p rebejn yälrbedxni lajz rebejn ni suga' zijt lo Dios najza reni suga' gajxh lo Dios.

¹⁸Laani bejn sajcx jiu' guiro'p cuaa bejn lo Dios con tejsi xhigab, najza tejsi Sprit. ¹⁹Ni'cni dirutu gac benzajt, bejn ni rut numbeedi. Anajctu tejsi con rexpejn ni, najczatu sa' rexpejn Dios. ²⁰La'tu najctu si'c te yuro. La'tu najctu si'c padeer xten yu'ga. Reapost najza reprofet najc si'c cheni birixtiej yu'ga. Jesucrist najc si'c guiro ni gusuj squin yu'ga, guij ni sajceru, sa'csi Jesucrist rnibee. ²¹Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. ²²Sigajcza la'tu najza rexpejn Israel ni huililajz najctu tejsi con Jesucrist. Cagustioobtu guidooga te nenni cuääz Sprit Dxan xten Dios.

Pabl nungäjł chanä xtidx Dios lo rebenzıjt

3 Ni'cni yu'ä nen latzguiib, narä, Pabl sa'csi cagusule'ä Jesucrist, te jiäd-nää xtiidxni lojtu, najctu benzıjt. ²Pet abiejn diajgtu lacti hueen najc Dios baniidxni dzuunre loä, jiäd-nää xtiidxni lojtu. ³Dios baluiini xhigab-xhiga'tzni loä (si'cni bacuaä lojtu galoo). ⁴Che gołtu guıjtza, sacbeetu cati ananä rexhigabxhiga'tz xten Jesucrist. ⁵Xhigab-xhiga'tzre di bejn niembee galoo, niluxh naj Sprit Dxan xten Dios abaluiinini loj reapost najza loj reprof'e't. ⁶Dee najc xhigab-xhiga'tzga: por rediidx xcuent Jesucrist ni ruslaa bejn nen dojl rujn Dios gac reni najc benzıjt tejsi con reni najc xpen Israel, guidxaag sa'reni, gacreni tejsi bejn. Guıro'preni xca' yálnasa'c si'c bia'n Dios diidx.

⁷Narä nacä te apost xten dzuun ni baniidxni, por xcäl-rulaslazj Dios ni cuaxlia'ä. Dios baniidx dzuunre loä con xcäl-rnibeduxhni. ⁸Luxh masä guxiiru sacä lo guiraa rexpejnıni, loä baniidxni xcäl-racnäjni te lo rebenzıjt gusule'ä xtiidxni, nalajznu redidxcoob xcuent xcäl-nasa'c Jesucrist, ⁹te gusule'ä lo guiraa bejn rexhigabxhiga'tz nani bacua'tz Dios lojnu galooli. Dios benchee guiralii ni yu'. ¹⁰Si'c gujc te naj jien guiralii yäl-nanduxh xten Dios. Reni najc xpejn-pacni nen xquidooi guluii yäl-najnre lo rexangl Dios, loj reni rnibee xhaguibaa. ¹¹Galooli bejn Dios xhigabre par tejpas, ni'cni biääd xtadnu Jesucrist te guzobj xhigab ni bejn Dios. ¹²Con Jesucrist dinu guidxeyb guibignu, guini-abnu lo Dios sa'csi ahuililajznu xtiidxni. ¹³Na'c gac-huin lajztu sa'csi cadedä trabajw xcuenttu. Colguibalajz; dee najc xcäl-nasa'ctu.

Xcäl-sanälajz Jesucrist

¹⁴Ni'cni ruzuxhibä nez loj Xtad Dad Jesucrist ¹⁵nani badeed lajni lo guiraa reni yu' xhaguibaa najza reni yu' lo guedxliuj, ¹⁶rniabä loj Dad xhaguibaa gutijpni lastootu con yäl-rnibee xcuent Sprit Dxan xtenni, sa'csi yuduxh xcäl-nasa'cni lo xcäl-rdimbicha'ni xhaguibaa. ¹⁷Rniabäza lo Dios te jiädläjz Jesucrist nen lastootu sa'csi ahuililajztu. Te che agusudzu'tztu, agusutijptu lo yäl-rinälajz ¹⁸dxejc sajc gacbeetu sigajc guiraa rexpejn-pacni lacti gulajz, lactiza siool, lacti jiät, lactiza jiaa najc yäl-sanälajz xten Jesucrist. ¹⁹Te gumbeezatu xcäl-sanälajz Jesucrist ni najc gurobduxhtej, digacdi guichalonuni. Te chaza lastootu, najza xcäriejntu con guiraa rexäl-nasa'c Dios.

²⁰Dios rnibeduxh. Sajc gunid-duxhruni loj xhitis ni rniabnu lojni, loj recos ni riennu xhigab. Con Sprit Dxan ni rujn dzuun nen lastoonu suniidxni reyäl-nasa'c. ²¹Loj Diosre coldeed xquixtios. Colguiliä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

Por Sprit Dxan nadxaag sa'nu

4 Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäjł, si'cni bejnzatu xhigab cheni gurejdxni la'tu. ²Colguibajn con yäl-nalaslajz, najza yäl-nadolajz, colcuedcxi lajztu. Colyujn huant resa'tu con yäl-rinälajz sa'ni. ³Colhuıi te guidxaag sa'tu gactu tejsi con Sprit Dxan ni ruscuedxilajztu. ⁴Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl-runloj ni rajptu xcuent diidx nani gurejdxtu. ⁵Rajptu tejsi Dad, tejsi yäl-rililajz, tejsi yäl-robnis, ⁶tejsi Dios, tejsi Xtad guiraanu nani rnibee guira'ti lo guiraanu.

⁷Lo tejganu abaniidxni dzuun si'ctis bejn Jesucrist xhigab guniidxni lo tejganu. ⁸Ni'cni caj lo reguijtz: Che huä'pni xhaguibaa, cadro rnibeeni, abejnni gaan lo guiraa yälrnibee, dxejcti badeedni dzuun lo rexpejnni lo guedxliuj.

⁹¿Xhi säloj cadro caj, "huä'pni"? Dee säloj ganid biäjtni maazru jät lo guedxliuj. ¹⁰Lagajc nani biäjtgä, lagajc laani huä'pni jiaaru lo guiraa rexhaguibaa te sajc guinibeeni guibaa näjza guedxliuj. ¹¹Lagajc laani badeedni xtzuum tejgareni. Yu'reni badeedni gac apost, yu'reni badeedni gac profet, gaiireni badeedni gusule' xho rusläa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejnni. ¹²Guiraa redee badeedni te guluiireni rexpejn Jesucrist, te gunreni dzuun te gustajlreni rebejn ni gac xquidoo Jesucrist. ¹³Nungäj] gac dzuunre che guidzujnli dxej ni nadxaag-sa'nu guiraanu loj yälrlilälajz, che guidzujnli dxej riembesa'cnu Xi'n Dios, dxejc anajcnu benguyajl lo xtiidxni, si'c te ni aguroob loj xcälrnibee Jesucrist. ¹⁴Dirunu gac si'c rebuiux ni tera'tsi rusiejch lajzni, rucua diajgreni xtidx chutis bejn, mase xhitis diidx ruluini. Dxejc riabreni lo redidx-xhii xten bejn nani rusguee, nani cabäjztis gusguee bejn. ¹⁵Maazru hueen chonuunu loj redidxlii xten Jesucrist con yälrinälajz te tioobnu lo guiraa recos xten nani rnibee, lagajc Jesucrist. ¹⁶Loj Jesucrist nazdu'tz guiraa rexpejnni, te si'cni nazdu'tzsa'reni sääreni, najcreni tejsi loj tiejxh Jesucrist, racnäj sa'reni segun xhi dzuun rujn tejgareni, casieedrueni te cayajc xhidajlru rebejnnga con yälsanälajz.

Te yäl_nabañcoob con Jesucrist

¹⁷Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riabj yejcreni. ¹⁸Nayääl xcäriejnreni, direni ga'p xcäl_nabajn Dios sa'csi nadduxh lastooreni. ¹⁹Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäj] gunreni. ²⁰Niluxh la'tu xhet si'cdi bisieedtu loj Jesucrist. ²¹Palga abiejn diajgtu xtiidxni, niluxh abaluiini lojtu didxlii ni siädnä Jesucrist, ²²colgusaan yäl_nabayujxh ni gojptu: Lo yäl_nabayujxhga rujn bejn si'ctis ni rlajzni. Dxejcti si'c runijtni la'tu lo Dios. ²³Colgusiejch lajztu, colgusia xcäriejntu, ²⁴te gactu bencoob nani bejn Dios, colchanuu te yäl_nabansa'c, te yäl_nabanya xten xtidxliini.

²⁵Colgu'ro'n diidx-xhii, colnii didxlii lo resa'tu sa'csi tejsi najcnu guiraanu.

²⁶Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. ²⁷Na'c gusaantu jiu' bendxab nen lastootu.

²⁸Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnäjzani rebejn nani xhet rajpdi.

²⁹Na'c gusaantu guirii nicla tej didxguijdx ro'tu. Colnii ganax didxsa'c te gacnäjni guisieed reni rucua diajg xtiidxtu. ³⁰Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbäjzni nen lastootu che guidzujnli dxej ni chäätu lo Dios.

³¹Colgu'ro'n yäl_nabandxuudx xtentu, näj yälrdxe'ch, näj yälrdxagdij] sa'ni, näj yälrbexa', näj yälrgue. Colguibicaj lo guiraa redojlga, na'c gactu benguijdx. ³²Nungäj] gactu huen loj resa'tu, colgulaslajz resa'tu, colsiäj] lajztu con resa'tu

ni rujn dojl lojtu si'c rsiäjł Dios lajzni rex-tojłtu xcuent Dad Jesucrist.

Xho nanab guibajñ rexi'n Dios

5 Colguibajñ si'c nabajñ Dios, sa'csi najctu xi'nni nani sanälajzni. ² Colchasanäj yälsanälajz sigajcni huinälajz Jesucrist nuure cheni badeedni lagajc laani lo Dios, cuajni lo crujz, gujtni. Laani gujcnı si'c gojn, gujczani yälrbıbyaal ni bidxagłajz Dios.

³ Nicla gusätıtu yälrusguee chääl bejn, nicla redol dxuudx, niclaza yälsanälaztej xhixtentisni. Nicla gusätıtuni lo sa'tu, sa'csi xhet si'cđi nungäjł gun bejn ni naban-naya. ⁴ Sigajcza colcuälaz diidx ni rujn xtujy, näjza didxnajđ, näjza didxnaj nani digac laaca. Colgudeedtis xquixtios lo Dios. ⁵ La'tu anajntu nicla tej ni rusguee chälbejn, nicla tej beñdxuudx, nicla tej ni sanälaztej xhixtentisni, nicla renani rajñ rebanäjb, nicla tej reni'c di xca' yälñasa'c loj Jesucrist, dizareni jiu' lo xcälñıbee Jesucrist, xcälñıbee Dios. ⁶ Na'c gusaantu gusguee bejn la'tu con diidx ni xhet sajcdı sa'csi xcuent redzuinga riääd xcälrdxe'ch Dios loj rebejn ni di gusoob xtiidxni. ⁷ Na'c guntu sigajc rujnreni.

⁸ Galoo nacäjytis xcäriejntu gubajntu, luxh ñaj abasanij Jesucrist xcäriejntu. Colguibajñ si'c nungäjł guibajñ nani abianij xcäriejñni. ⁹ Sa'csi nani abianij xcäriejñni rujn dzunsa'c, rniini didxgulii. ¹⁰ Colguiseed xhini'c rchagłajz Dios. ¹¹ Na'c guntu redzundxuudx nani rujn reni nacäjy xcäriejnreni, coltilñäj reni rujn sa' dzunguijdxga. ¹² Sa'csi te xtujyılı najc jieinu diidx xcuent xtzunreni ni runxhiga'tzreni. ¹³ Niluxh guiraa sa' redzusunre ni rdilñäjnu, huenliisi sien xhi najczeni, suzenni lo xpianij Jesucrist. Sa'csi guira'ti ni ružen najc nianij. ¹⁴ Ni'cni caj loj reguijtz, räjp Dios: Gubajñ, huistie luj ni rejslu.

ıHuistie lo dojl, luj ni naga'lu lo dojl si'c bengut,

te gusanij Jesucrist xcäriejñlu!

¹⁵ Colhuii, colsin, na'c guibajntu si'c te bejn nani di gacbee, colguibajñ si'c bejn nani yu' xcäriejñni. ¹⁶ Coltedsa'c redxey sa'csi neñ redxeyre ganax cosguijdx rujn bejn. ¹⁷ Ni'cni na'c guibajntu si'c rebejn nani di gacbee, colyacasın, te gacbeetu xhini'c najc ni rıajz Dad xhaguibaa guntu. ¹⁸ Lacuaa yätu nejp nani runijt bejn, colgapchee Sprit Dıxan xten Dios neñ lastootu. ¹⁹ Colñii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyälriel colguiliä'p xpala'n Dios neñ lastootu. ²⁰ Di jiiäl lajztu gudeedtu xquixtios lo Dios xıadnu con laj Dad Jesucrist.

Xho guibannäj sa' rexpejn Jesucrist

²¹ Sa'csi rajntu Jesucrist, colgusoob xııdx sa'tu.

²² Lojtu, regunaa ni abachñaa, rniä scree: Colgusoob xııdx chäältu si'c rusoobzatu xııdx Dad Jesucrist. ²³ Sa'csi niguii rñıbee gunaa si'cni rñıbee Jesucrist xquidooni, niluxh laazani rusłani rexpejn guidooni lo redojl, najczeni si'c tiejxhni. ²⁴ Ni'cni, sigajc rusoob reben guidooga nani rñıbee Jesucrist gunreni, sigajcza nungäjł gusoob regunaa ni abachñaa nani guiniibeetis chäälreni gunreni.

²⁵ Lojtu, reniguii ni abachñaa rniä scree: Colchanälajz chäältu sigajc ni huinälajz Jesucrist rexpen guidooni, badeedni lagajc tiejxhni loj Dios cheni cuajni lo crujz por laareni ²⁶ te basiani xtojł rexpejn guidooni, te gujcreni te beñcoob, abidiib lastooreni con xıııdxni si'c rdiib te cos con nis ²⁷ te che xca'ni rexpen guidooni, najczeni te guidoo ni sajcrı, te guidoo nani xheti xtojłni, te guidoo nani sugadzı'tz, te guidoo xhet xhi riäädııdı, najcni te

guidoya, xheti xhi xtojldini. ²⁸Sigajcza, te nigui nani abachnaa nungäj| chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpelj guidooni. ³⁰Najczanu tejsi loj tiejxh Jesucrist, loj xpäälni, loj rextzujtni. ³¹“Ni'cni che guchnaa te niguii rusa'nni xtadni, xnanni, te xca'ni gunaa, te gac guiro'preni si'c tejsi bääl, si'c tejsi bejn.” ³²Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpenguidooni. ³³Niluxh nanabpac chanälajz tejgatu chäältu sigajc sanälajztu tiejxhtu. Dxejcti gunaa ga'pzani xpala'n chäälni.

6 Lojtu biuux, rniä scree: Colgucuadi-ajg xtidx Jesucrist, colgusoob xtidx xtadtu sa'csi ni'c sajc nez loj Dios. ²Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga; ³“Te saruduxh guibajntu xchero lo guedxliujre.”

⁴La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälnej, colgulijdxreni con xtidx Jesucrist.

⁵La'tu ni najc mos, colgusoob xtidx xlamtu lo guedxliujre, colcuadiajg xtidxni, xhet xhi steedi xhigabdi guntu nen lastootu. Colyejn xtzuumni si'cni najc xtzuum Jesucrist. ⁶Colyejn xtzuumni, niluxh xhet che suga'tisreni, cahuiireni, parsj jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuumnactu; si'cni rrajz Dios. ⁷Colyujn xtzuumni guideb lastootu si'c xmos Jesucrist, et si'cni xmos ben guedxliuj. ⁸Anajntu dzunsa'c ni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

⁹Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

Nani gacw rexpejn Jesucrist lo guerr

¹⁰Didx lult ni rniä, sa'ä, najc scree: Colsutijp lo xcälracnäj Jesucrist, colsudzu'tz lo xcälradip xcälrnibeeni.

¹¹Colgajcw xhabguiib xten Dios te gac sudzu'tzto lo reyälrusguee xten bendxab. ¹²Sa'csi xhet ben guedxliujtis cadilnäjnu. Cadilnäjzanu reguxhtis xte yälkäjy, näjza reyälrnibee, rebejn nani rnibee loj reyälkäjyre, näjza rexangl bendxab nani rnibee bej xten guedxliujre. ¹³Ni'cni colca' guideb lad-guiib xten Dios nani runiidxni loonu te gac sudzu'tznu nen dxej ni guideednu trabajwduxh, te che agudejndi, lahtis sisiudzu'tznu. ¹⁴Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu. ¹⁵Colcuuaa gurach-guiib ni'tu (ni'c najc xtidx Jesucrist ni ruscuedxi lajztu). ¹⁶Colca' escud-guiib ni najc yälirililajz te con yälirililajz xtidx Dios di bendxab gun gaan gusguee la'tu con rextidx-xhiini. ¹⁷Colca' yälruslaa xten Dios lo dojl si'c te xhumbrel-guiib chu yejctu; colca'za lans xten Sprit Dxaan xten Dios ni najc xtidx Dios. ¹⁸Colnab lo Dios guiraa dxej; colnab lojni con Sprit Dxaan xteni; colsusintis; na'c jieedtu guiniabtu lo Dios xcuent guiraa xpejnni. ¹⁹Colnabza lo Dios por narä te guniidx Dios diidx cheni gal guiniä, te na'c guidxebä guiniä che guluiä didx-xhiga'tz xten yälruslaa bejn lo dojl. ²⁰Xcuent rediidxga ni yu'ä nen latzguiib, caduä con caden. Ni'cni colnab lo Dios te na'c guidxebä guiniä rediidxga si'cpacni säbyäj| guiniäni.

Lult xtixtios

²¹ Niluxh te gacbeetu xho sasaj rextzunä, nägajcza xho yu'ä narä, Tiquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx. ²² Laapacni ruxhalä lojtu, te gacbeetu xho yu'nu, te si'c guscuecdxini lajztu.

²³ Rniabä yälrbexilajz par resa'nu, näjza yälrlililajz con yälsanälajz xten Dios Xtadnu näjza xten Dad Jesucrist.

²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Te Guijtz Lo Reben̄ Filipos

Latzguiib yu' Pabl bacuaani loj rebenguidoo xten guedx Filipos

1 Pabl nájza Timoteu, nani najc rexmos Jesucrist, rucuaanu guijtzre lo guiraa respejn̄ Jesucrist nani rbájz guedx Filipos, loj rebejn̄ nani ruluii xtidx Dios nen̄ reguidoo nájza loj rediaconos. ²Gacnáj Dios la'tu con yälrbedxi-lajz xten Xtadnu nájza xten Dad Jesucrist.

Rniab Pabl lo Dios xcuent rebejn̄ nani rililajz

³Che rnaj lazä la'tu, rudedä xquixtios lo Dios. ⁴Che rniabä lo Dios, rbaa lazä rniabä lo Dios xcuent la'tu, ⁵sa'csi abidxaag sa'nu lo xtidx Jesucrist che guslojli huililajzta hasta najli. ⁶Anancheä Dios nani gusloj cayunsa'c dzuun nen̄ lastootu, lagajc laani suluxsa'c dzuunga dxejli ni jiaäd Jesucrist. ⁷¿Xhiru xhigab nungäjil gunä? Ni rapä la'tu nen̄ lastoä sa'csi cayacnájtu narä nen̄ latzguiib luxh rsiudzu'tzta riye'tzta lo bejn̄, gulii najc rediidx nani rusule'ä xcuent Jesucrist nájza la'tu rusule'tu rediidxga. ⁸Dios nanchee xho rbannäätu, xho sanälazä guiraatu lo xcäl'sanälajz Jesucrist. ⁹Rniabä lo Dios te tioobru xcäl'rinälajzta naj xcäl'najntu nágajc churu xcäriejn̄ guiraatu, ¹⁰te cuetu nani najc dzunsa'c te si'c guiban̄ nayatu, te na'c ga'ptu nicla tej dojl̄ cheni jiaäd Jesucrist. ¹¹Te guidxa lastootu yäl'nasa'c xten te yäl'nabansa'c ni runiidx Jesucrist, te guspaa lajzta Dios, guiliä'ptu xpala'n̄ni.

Jesucrist najc xcäl'nabanā

¹²Rlazä gacbeetu betzä: guiraa nani gusacä ni'c cayacnáj guire'chru xtidx Jesucrist. ¹³Ni'c guiraa rebejn̄, renani yu' jusgaad sigajc renani yu' garenca lajt, anajnreni niäüä latzguiib xcuent Crist.

¹⁴Xhidajlr̄u resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

¹⁵Guliica yu' reni rusule' xtidx Jesucrist sa'csi rdxe'ch lajzreni, rdxe'chzaren loä. Yu'za reni rusule' xtidx Jesucrist sa'csi laaca najc xhigabreni. ¹⁶Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrureni trabajw nani tedä nen̄ latzguiib. ¹⁷Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. ¹⁸Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. ¹⁹Ananä laaca guiriä loj guiraa recosre sa'csi canabtu lo Dios xcuentä. Luxh xcäl'racnáj Sprit xten Jesucrist ²⁰rujn̄ runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n̄ Jesucrist con tiexhä palga guibanä o palga guetä. ²¹Sa'csi palga guibanä, su'ä lo Jesucrist; luxh palga guetä sunäru gaan. ²²Palga guibanäru lo guedxliujre, sajru gunä xtzuun Dad Jesucrist, ni'cni dina gacbeä xhinic cueä xca'ä. ²³Nagajn̄ najcni par narä cueä lo guiro'preni. Te lajt runä xhigab: malaii guetä te cha'a cadro yu' Jesucrist sa'csi ni'c najc hueenru par narä. ²⁴Niluxh stee lajt nancheä nungäjil guibanäru lo guedxliujre xcuent la'tu. ²⁵Niluxh narä racbeäpac siannäaru la'tu, su'äru lojtu te chanuurutu lo xtidx Jesucrist, te guibalajzta lo yäl'rililajz, ²⁶te guibalajzrutu xcuentä loj Jesucrist che guibisacä lojtu stehüält.

²⁷Colhuiitiis guibajntu si'cpac ni rni xtidx Jesucrist, te palga jiaädhuiätu o palga ruti narä, jiejn̄ diagä sugadzu'tzta, rujntu tejsi xhigab, nadxaag sa'tu rujntu tejsi dzuun con yäl'rililajz xten

xtidx Jesucrist. ²⁸ Na'c guidxejbditu renani rdxe'ch lojtu. Laareni huenliisi rusen agunijtreni ni'c rdxe'chreni, ni'cni la'tu huenliisi rusen agulaatu nen dojl si'c baniidx Dios, ni'cni ditu guidxe'ch. ²⁹ Sa'csi lojtu abaniidx Jesucrist chalilajztu xtiidxni. Niluxh xhet ni'ctis; naga-jcza tedtu trabajw xcuent laani. ³⁰ Cadejdtu lagajc trabajw ni cahuiitu gud-edä luxh naj riejn diajgtu cadedsicä trabajwga.

Xcälñalaslajz näjza xcälguobduxh Jesucrist

2 ¿La ruspaä Jesucrist lajztu? ¿La racnäjä xcälñälajztu la'tu? ¿La yu' Sprit Dxiän xtenni con la'tu? ¿La yu' xcälñälajzni näj xcälñalajzni lastootu? ² Palga yu'ni, colguspaa lazä, colyejn tejsi xhigab con narä, colga'p lagajc yälñälajzga, colguidxaag sa'tu, colyejn tejsi xhigab. ³ Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuumtu con yälñalaslajz, colhuii loj sa'tu si'c benroru lojtu. ⁴ Na'c jiu chu tejtü lagajctis xhixtenni, coljiu tejgatu xhixten sa'ni.

⁵ Colga'p lagajc sa' xhigab nani gojpza Jesucrist ⁶ nani mase najcni sigajc Dios, dini niniadzdu'tz xcälñabee Dios, ⁷ alga basa'nni te laad yälñabee nani rajpni con Xtdadni Dios te gujcní mos cheni gojlni lo guedxliujre. Gujcní si'ctis te bejn. ⁸ Che gujcní si'ctis beñ guedxliuj, gujcní beñ nadolajz, beñ nasobdiidx. Basoobni xtidx Dios, gujtni lo crujz, luxh yälrejt lo crujz najc te yälrtuiduxh. ⁹ Ni'cni baspañsac Diosni, gule'cni Crist te lajt ni najc jiaaru, badeedza Dios sajru lajñi lo laj guiraa relaj ni rusä't bejn. ¹⁰ Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez nen yuj. ¹¹ Te guiraareni gacbeepac,

guiniizareni: “Jesucrist najc Dad”, te si'c chä'pduxh xpala'n Xtdadnu Dios.

Rexpejn Jesucrist najc si'c bajl ni rusanij lo guedxliuj

¹² Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä naj ni yu'ä zijt, colhuii tejgatu xho gac laatu nen dojl, colyajc bejn ni rusoob diidx con yälrdxejeb. ¹³ Sa'csi Dios najc ni rujñ dzuun nen lastootu te rajc rujntu xhigabsa'c, dx-ejc racnäjäzani la'tu te rajc rujntu si'cni rlanjñi.

¹⁴ Loj guira'ti ni rujntu, na'c gusmo-jmtu, na'cza gun tiop lajztu, ¹⁵ te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' la' ni tre'tu loj rebenguijdx ni rujñ redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäjä, ¹⁶ sa'csi arapdu'tztu xtidx yälñabajn ni runiidx Crist nen lastootu te guspaatu lazä dxej cheni jiaäd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. ¹⁷ Mase lagajc xtienä guixe' te guiza' te gojn ni xca' Dios xcuent xcälñilajztu, rbaa lazä, sibalaznääza la'tu. ¹⁸ Sigajcza colguibaa lajztu, colguibalaznäjä narä.

Timoteu con Epafrodito

¹⁹ Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucebä xho yu'tu nejzga. ²⁰ Sa'csi rutru rapädi nani rujñ tejsi xhigab, tej ni guliipac gun dzuun, jiu-upacni la'tu. ²¹ Guiraa rebejnre rujntis xtzuumcareni, direni jiu gunreni xtzuum Jesucrist. ²² Niluxh la'tu anajntu xho rujñ Timoteu; si'c racnäjä te bi'n xtdadni, si'cza racnäjäni narä lo xtidx Jesucrist. ²³ Ni'cni rlazä guxhaläni te jiaädhuiini la'tu, fixgaäsi don xho sasaj xcuentä ree. ²⁴ Cabäzäza nez lo Dad Jesucrist don la näjza narä sajl jiaädhuiagacätu.

²⁵ Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhal'tuni te jiuni narä, fiini xhini'c rquinä. ²⁶ Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. ²⁷ Guliica gucxhuuni cuentro, ameer niejtni, niluxh Dios balaslajzani narä te di nidedäru loj yäl'nahuinlajz ni yu'ä ree. ²⁸ Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. ²⁹ Colca'ni con yälrbalajz si'c bejtztu lo xtidx Dios, sigajcza colyejn reni najc sigajc laani. ³⁰ Xcuent xtzuum Jesucrist ameer niejtni, dini niu xcäl'nabajntisni te bejnni redzuun nani di niajcdi niujntu lagajc la'tu xcuentä.

Te yäl'nabansa'cpac

3 Naj rebetzä, colguibalajz nez lo Dad Jesucrist. Xhet najcdi gucasacä lagajc rediidx nani abacuaä lojtu, sa'csi sacnäjni la'tu. ² Colnati renani najc si'c bä'cw. Colnatiza rebejn nani rujn dzun guijdx. Colnatiza reni ru' bee tiejxhtisreni luxh xlia'si rujnreni si'c. ³ Renani guliipac yu' bee najc nuure nani ahuililajz xtidx Dios, rienzanu xtzuumni si'cni rlanjzni sa'csi ayu' Sprit Dxan xtenni neñ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. ⁴ Narä sajcza guibalazä xcuent ni rujn tiexhä. Palga yu' chu tej ni rbalajz, narä rbalazäru ⁵ sa'csi guyu'ä bee che guyu'ä xhujn gibjdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtadä najc te beñ hebreo; xcuent leii nacä te farisee. ⁶ Basobduxhä guiralii rextidx Dios ni caj lo leii ni'cni basacsiduxhä rexpēn Jesucrist; xcuent yäl'nabansa'c xten leii, xhetliidi xtolä yu'; basobdu'tzä xtidx leii. ⁷ Niluxh najc rediidx nani galoo benä xhigab sac-

duxh, naj xhet sajcdini sa'csi sanälazä Jesucrist. ⁸ Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, ⁹ te chu'ä lojni, xhet xcuentdi xcäl'nabansa'cä ni najc xcuent leii, alga xcuent yäl'nabansa'c ni najc xcuent xcäl'rillilajz Jesucrist, yäl'nabansa'c ni najc xten Dios xcuent yäl'rillilajz. ¹⁰ Ni'cni rlazä gumbeäru Jesucrist loj yäl'rimee ni rajpni sa'csi huistie gubansa'cni sacni loj rebengut, te gumbeäru retrabajwduxh ni gudejdni, te ganä xho gunä ni rlanjz Dios si'c gucbee Jesucrist, bejnzani ni rlanjz Dios che gujtni. ¹¹ Te gac guidzunä lo yälguibansac loj rebengut te xca'ä yäl'nabajn par tejpas lo Dios.

¹² Dizana guiniä “abenä gaan” o “anacä bensa'c”, alga sanuätis te gunä gaan yäl'nabajn nani cua'ä lo Jesucrist. ¹³ La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää nää si'cni guiniazä nani churu gac. ¹⁴ Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵ Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

¹⁶ Naj, cadrotis abidzunnu lo nani abiembeenu, sigajcza nanab guibansi-jcnu, chanuutis gusoobnu rediidxga; nungäjł guibajnnu loj rediidxre, jiennu tejsi xhigab.

¹⁷ Rebetzä, coltanajł narä, colyejn si'c runä narä, colhuiiza rebejn nani nabajn si'c nabanä. ¹⁸ Xhidajł huält

aguniä lojtu, naj ronäli rnisacä lojtu, yu' xhidajl reni rdxe'ch lojtu, rniyareneni nani bejn Jesucrist che gudixjni xtojlnu lo cruzj. ¹⁹Redee che luux xnezyujreni sinitlojreni, sa'csi xtioozreni najc yälrausa'c; luxh rbaali lajzreni rujnreni dzun xtuju; luxh riutisreni xcäl'nasa'c guedxliujre. ²⁰Niluxh nure, xhaguibaali najc laadxnu, luxh ro'cli cabäaznu jääd nani ruslaanu nen dojl, nalaaznu lagajc Dad Jesucrist. ²¹Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcäl'rni-beeni. Sujnni dee con yäl'rni-beduxh ni rajpni te rni-beeni loj guirali'ti, guiraa nejz.

Colguibalajztis xcuent Dad Jesucrist

4 Ni'cni miä lojtu, rebetzä nani sanälazä, lojtu ni rlazä fisacä, lojtu ni ruspaazä, lojtu ni najc yäl'nasa'c xtenä, col'sudzu'tz loj xtidx Jesucrist.

²Rniabduxhä lo Evodia näjza lo Sín-tique, rulidxäreni gunreni tejsi xhigab xcuent Dad Jesucrist. ³Sigajcza rniabä lojlu betzä, ni runnäjä narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj nen reguijtz xten yäl'nabajn par tejpas.

⁴Colguibalaznäjti Dad Jesucrist; stehuält miä: colguibalajz. ⁵Sugacbee guiraa rebejn xho najc xcäl'nabajn lo xtidx Dios. Asiäddzungajxh dxej xten Dad Jesucrist.

⁶Na'c guidxejbtu, col'nabtis lo Dad guira'ti, colgudeedza xquixtios lojni laj ni cabedx-canabtu lojni. ⁷Dios guniidx xcäl'rbedxilazduxhni, nicla guntu xhigab lacti najc yäl'rbedxilajzga. Yäl'rbedxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa redidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. ⁹Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbecdxilajz, laani jianäjni la'tu.

Gojn xten refilipenses ni xca' Pabl

¹⁰Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rrajztu niacnäjtu narä, luxh di nijjedini. ¹¹Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹²Sajc guibanä che guxii rapä; sajc guibanä che xhidajl rapä; abisiedä guibanä xhotis: sajc gauduxhä, sajcza guilianä; sajc gapä xhidajl xhixtenä, sajcza tedä trabajw. ¹³Guira'tini sajc gunä sa'csi Jesucrist racnäjä narä. ¹⁴Niluxh xhet najc di; laaca dzuun bejntu che bejntu xhigab gacnäjtu narä laj ni cadedä trabajw.

¹⁵Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäjä narä, la'tistu gucnäj narä. ¹⁶Cheni yu'äli guedx Tesalónica, baxhałtu meel loä tej-tio'p huält. ¹⁷Niluxh narä di rlazä xca'ätis xhixtentu ni guniidxtu, nani rlazä najc tioobru xcäl'nasa'ctu nez lo Dios xcuent dzuun ni rujntu ruxhałtu meel loä. ¹⁸Naj acua'ä guiraa ni baxhałtu, arapä xhidajl, arapduxhä sa'csi acua'ä nani biädnä Epafradito baxhałtu loä, te gojn ni rlianejxh si'c guxhyaal, te dzunsa'c ni rchagljaz Dios. ¹⁹Dios xtenä guniidx

lojtu guiraa nani riäädx xca'tu, si'ctisni rajpni reyálnasa'cduxh xhaguibaa con Dad Jesucrist. ²⁰ Colguiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹ Coldeed xtixtios lo guiraa rebejn ni abia lastooni nez loj Dad Jesucrist. Re-

bejtznu ni yu' ree näj narä ruxhalnu xtixtios lojtu. ²² Guiraa rebenree ni abia lastooni nez loj Dad Jesucrist ruxhal xtixtios, niluxh ruxhalru resa' César xtixtios lojtu.

²³ Suga'p xcälracnäj Dad Jesucrist lastootu. Sugacni si'c.

Te Guijtz Lo Reben Colosas

Bacuaa Pabl loj reben guidoo ni yu' guedx Colosas

1 Narä, Pabl nacä te apost xten Jesucrist. Dios gule narä. Narä näjza bejtznu Timoteu ²cagucuaanu reguijtzre loj reben Colosas nani nabannaya rujnreni si'cpacni rlajz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbedxilajz xten Dios xtadnu.

Rniab Pabl gudeed Dios yälnejn xtenni

³Rdeednu xquixtios lo Dios xtad Dad Jesucrist rniabnu lojni xcuenttu guixeguixee. ⁴Abiejn diajgnu xho rililajztxu xtidx Dad Jesucrist, näjza xho sanälajztxu rebejn ni ahuililajz xtidx Jesucrist, ⁵sa'csi cabäjztxu xca'tu reyäl'nasa'c ni yuchee xhaguibaa par la'tu. Laa xcuent reni'c ni biejn diajgtxu cheni bacuadiajgtxu xtidxlii Jesucrist xcuent yälrusläa lo dojl. ⁶Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlrü rebejn ni cayacbee diidxre, asalilajzreni diidxga, sigajc guzajctü la'tu. Cheni biejn diajgtxu xtidx Jesucrist, dxejc biembeezatu guliipac najc xcäl'rulaslajz Dios. ⁷Sigajcza bisieedtuni lo Epafra, ni sanuutis cayacnäjni nuure lo dzuun. Laani najc te beñsa'c, yu'ni lojtu cayujnpacni xtzüun Jesucrist lacuaa nuure. ⁸Laani abasule'ni diidx loonu xho sanälajz sa'tu sa'csi nabajn Sprit Dxan xten Dios neñ lastootu.

⁹Laa ni'cni dxejli nani biejn diajgnu diidxre xcuenttu, di cuääz cabedx-canabnu lo Dios, canabnu gacbeduxhtu xho rlajz Dios guntu, guniidxni guiraa yälnejn näjza gusanijni xcäriejntu ¹⁰te guibajntu si'cni nungäj'l guibajn bejn ni sanajl Dad Jesucrist, te guspaatu lajzni lo guiraa

redzuun. Chanuuzatu gunrutu guiraa redzunsac näjza jianjru xcäriejntu xcuent yälriembe Dios. ¹¹Tioobrutu loj xcäl'nadip, xcäl'rnibee Dios te guibaa lajztxu gusutiplajztxu, cue'cdxilajztxu loj xhitis ni sajctü. ¹²Guibalajznu guideednu xquixtios loj xtadnu Dios nani basudzu'tz nuure te xca'na yäl'nabajn par tejpas sigajc guiraa rebejn nani ahuililajz xtiidxni yu'reni lo xpianijni. ¹³Laani abasläani nuure loj xcäl'rnibee yäl'nacäy, abateedni nuure lo xcäl'rnibee xi'nni ni sanälajzni. ¹⁴Laa xi'nni ni basläa nuure neñ dojl cheni baxhe'ni xtiejnni, gujtni lo cruzj, dxejc gudijxni rextojlñu.

Gubisacnu loj Dios xcuent xcäl'gajt Jesucrist

¹⁵Rut rajcdi ruhuui lo Gueb-Dios, niluxh xi'nni najc si'cpac najc Dios; si'cpac rujn lojni. Laani guyu'ni galodoo luxh rnibeeni lo guiralii ni yu' lo guedxliuj. ¹⁶Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: rereii, näjza reni rnibee loj rexangl Dios, näjza reni rnibee loj rexangl benxgab, nägajcza reyäl'rnibee xten reguixhajg, sigajczani loj regubier, lo reguxhtis ni rajp yäl'rnibee, guiraani guc-chee por laani, näjza par laani. ¹⁷Alanabajn Jesucrist galooli, che gajdli guirixtiej guedxliuj. Por laani yu' guira'ti ni yu'. ¹⁸Laani najc nani rnibee guidoo, nalajznu rebejn nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' laatisni najc nani sajg guinibee. ¹⁹Sa'csi bidxagljaz Dad Dios ga'p Jesucrist guiralii yäl'rnibee nani najc xten Dios, ²⁰por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäj'l-lajzni, aguredxi lajzni sa'csi bixe' xtiejn Jesucrist lo cruzj.

²¹ Luxh la'tu gujctu si'c benzijit lo Dios sa'csi galoo rdxe'chtu lo Dios nen lastootu xcuent redzunguijdx nani bejntu. ²² Niluxh naj abiäj-lajz Dios abadzu' Jesucrist la'tu, agucnayatu gubi'tu lo Dios xcuent xtiejn Jesucrist ni baxhe'ni lo cruzj cheni gujtni. Ni'c bejn ni te che suutu nez lojni, xhetiru xtojltu, xhet xhi guiniidi Dios lojtu sa'csi anayapactu. ²³ Niluxh riäj lchanuu sudzu'tztu, cuedxitu lo yälirililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴ Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. ²⁵ Ni'c nacä te bejn ni rusule' diidx nen guidooga. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios, ²⁶ te gacbeenu rexhigabxhiga'tz nani najc xhiga'tz galododuxh niluxh naj abaluiini redidx-xhiga'tzre loj rexpejn. ²⁷ Lojreni bejn Dios xhigab guluiini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yälxhiga'tzre säloj Jesucrist rbäjz nen lastootu ni'c runlojtu chaläjztu lo yälrdimbicha' xten Dios.

²⁸ Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujreni nez loj Jesucrist. ²⁹ Xcuent dzuunre guideb xtipä runä dzuun con guiraa yäl'nibee nani runiidx Jesucrist narä.

2 Rlazä gacbeetu lacti cadedä trabajw xcuentu, najza xcuent reni yu' guedx Laodicea, najza xcuent guiraa reni gajd gumbee narä. ² Te tioob lastoo guiraatu sa'csi abidxagsa' lastootu lo yäl'nälajz, najza te ga'ptu guiraa reyäl'nasa'c ni rajp bejn che racbesa'creni xtidx Dios. Te gumbeezatu guiraa redidx-xhiga'tz xten Dios xtdadnu najza Dad Jesucrist. ³ Nen lastoo Dios najza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'nubee. ⁴ Dee rniä lojtu te di gusguee chu gusgueetu con rediidx-xhii. ⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yälirililajz xten Jesucrist.

⁶ Ni'cni sigajc ni huililajztu xtidx Jesucrist, sigajcza colchasanäj Jesucrist. ⁷ Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yälirililajz xten Jesucrist si'c ni abisieedu. Colgudedduxhru xquixtios lo Dios.

Yäl'nabancoob ni rudeed Jesucrist

⁸ Col'huii, na'c gusaantu guxhiid bejn xcälirililajztu con xtiidxtisreni najza redidx nani xhet sajcdi, si'c najc xtidx reben galoo, najza si'c najc diidx xcuent xhigab xten reben guedxliuj, di rediidxga gac si'cni rlazj Jesucrist.

⁹ Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. ¹⁰ Xhet cayäädxdi lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guira lajt. ¹¹ Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtoj l bejn sa'csi rusaan bejn redzunguijdx, rujnreni tejsi xhigab con Jesucrist. Si'c najc xpee Jesucrist. ¹² Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios

yäl̄rnibee nani gulässac Jesucrist lo rebengut. ¹³Che najctu si'c bengut lo dojl̄, näjza sa'csi di bee niu' tiejxhtu, dxejcli baniidx Dios yäl̄nabaj̄n par tejpas lojtu con Jesucrist, badzucajni guiraa rextojl̄nu. ¹⁴Dios badzucaj guiraa releii nani basäuu nuure neñ dojl̄, badzucajni lojni, sa'csi bacuaanini lo cruzj, cadre gudijx Jesucrist guiralii rextojl̄nu. ¹⁵Cheni gujt Jesucrist lo cruzj bejn̄ni gaan loj reyäl̄guxhtis näjza guiraa reyäl̄rnibee xten beñdxab näjza rexspritni. Basanxujynireni nez loj guiraa rebejn̄. Laani bejn̄ni gaanreni cheni cuajni lo cruzj.

Colquiiil recos ni najc xten xhaguibaa

¹⁶Nicla tejtu na'c cubee sa'ni xcuent reyäl̄rajw näjza reyäl̄rä', niclaza xcuent redxe lanij näjza rexchej rebäicoob, näjza redxej ni rusilajzni. ¹⁷Guiraa redee najc si'csi te balaa xten nani churu jääd, te guluiireni ni rujn balaa, nalajznu ni'c najc Jesucrist. ¹⁸Na'c gusaantu gudzucaj bejn̄ xcäl̄nasa'ctu te gunreni gactu nadolajz, te gantu reangl. Sa' bejn̄ga richu' loj nani gajdreni fii; rchaloreni najcreni beñro xcuent lagajc xhigabreni. ¹⁹Laareni direni chanajl Jesucrist nani rnibee, nani rujn roobru tiejxhni, nalajznu rexpejn̄ni, sa'csi lojni rca'reni ni rquiin lastooreni, te ruchaagni sa' tejegareni si'c nadxaquiid bääl cuä' dzujt lo tiejxh bejn̄, te gacreni tejsi con Dios.

²⁰La'tu agujttu con Jesucrist, abiritu lo rexhigab xten guedxliujre. Naj̄ xhicuient guibajntu sigajctis nabaj̄n rebejn̄ nani di gumbee xtidx Jesucrist, ä? ¿Xhicuient rusoobtu rediidx ni caj lo releii? Loj releii caj sa' diidxre: ²¹“Di chahuallu dee, di gaulu ni'c, di canlu dec.” ²²Luxh guiraa redee rmitloj che runnäjn̄ni dzuun. Luxh guiraa sa' leiiga najc diidxtis nani ruluii bejn̄. ²³Guluiicani sa' releiiga rien̄ asdoo ru-

luiireni yäl̄nanduxh, luxh che rusoob bejn̄ releiiga rchaloreni raj̄nreni Dios, rchaloreni rac nadolajzreni, rusacsireni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

3 Palga anabansactu con Jesucrist, colquiiil reyäl̄nasa'c ni yu' xhaguibaa cadre sobga' Jesucrist xladbee Dios. ²Colyejn̄ xhigab xcuenttis reyäl̄nasa'c ni yu' xhaguibaa, na'c guntu xhigabtis xcuent reni yu' lo guedxliuj. ³La'tu anajctu si'c bengut loj reyäl̄nasa'c ni yu' lo guedxliuj, luxh yäl̄nabaj̄n ni rajptu naj̄, yäl̄nabaj̄nga naga'tz con Dios xcuent Jesucrist. ⁴Che guluiilosac Jesucrist ni najc xcäl̄nabajntu, dxejc näjza la'tu suluiilojtu con laani lo xcäl̄rdimbicha'ni.

Yäl̄naban̄biejw con yäl̄naban̄coob

⁵Colcuälaz redzunguijdx xten guedxliuj nani rujntu, yäl̄rusguee gunaxteb, yäl̄rujn recosdxuudx, recos ni rdxagljaz tiejxhtu, rexhigab-guijdx, yäl̄rsiäb-lajz xhi xten bejn̄, guiraa redee rujn runijt bejn̄ lo Dios sigajc rujn bejn̄ che raj̄n bejn̄ rebanäjb. ⁶Guiraa redzuunga rujn riääd xcäl̄rdxe'ch Dios yejc renani rujn sa' redzuunga. ⁷Näjza la'tu bejntu sa' redzunguijdxga galoo cheni guyu'tu lo sa' yäl̄nabaj̄nga. ⁸Niluxh naj̄ näjza la'tu colgusaan recosre; nalajznu yäl̄rdxe'ch, yäl̄ruche'ch sa'ni, yäl̄rujn latzsiäj sa'ni, yäl̄rniyaj sa'ni, näjza rediidx-dxuudx ni rniitu. ⁹Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx. ¹⁰Colyajc te beñcoob, ni guixe-guixee cayanijru xcäriejn̄ni, te gumbesa'ctu Dios, te gactu sigajc najc Dios ni benchee benguedxliuj. ¹¹Lo yäl̄naban̄coobre rutiru benzijt, niclaza xpen̄ Israel, rutiza rebejn̄ ni ru' bee, niclaza bejn̄ ni di chu bee; rutiza benzijt, niclaza bejn̄ ni siääd zitduxh; rutiza mos, niclaza bejn̄ nani

di chu lo bejn, sa'csi che rililajz te bejn xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn Jesucrist.

¹²Naj agule Dios la'tu te gactu xpejn nani gac naya, nani sanälajzni, colguibajn con yälrunaslajz, na'c guidxe'chtu, colyacnadoo con yälradolajz, colniiza nadolajz. ¹³Colyujn huant, na'c guidxe'chtu loj sa'tu, palga yu' chu sa'tu rdxe'ch loj sa'ni, colgusiäj-lajztu sigajcni basiäj-lajz Dad Jesucrist lojnu xcuent rextojnu. ¹⁴Che abejntu guiraa recosre, colguilru yälsanälajz nani rusa' loj guiraa recosre. ¹⁵Xcälrbedxilajz Dios guinibee nen lastootu, sa'csi parpac ni'c gurejdxni la'tu, te gaczatu tejsi con rexpejn Jesucrist. Colgudeed xquixtios loj Dios.

¹⁶Xtidx Jesucrist chuduxh nen lastootu con guiraa yälrajn, te guluiitu, te gulijdxtu tejga resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga golnu te guideednu xquixtios lo Dios nen lastoonu. ¹⁷Guira'ti nani guntu, sigajc rediidx ni rniitu, sigajcza redzuun ni rujntu, colyejn guiraani con laj Dad Jesucrist, coldeed xquixtios lo Dios xtadnu con laj Jesucrist.

Xho nanab guibajn te fami ni najc xpejn Jesucrist

¹⁸Regunaa nani abachnaa, colgusoob xtidx chäältu sa'csi si'c rlajz Dad Jesucrist. ¹⁹Reniguii nani abachnaa, colchanälajz chäältu, na'c guidxechnäjtureni. ²⁰Reni najc biuux, colgusoob xtidx xtadtu loj guira'ti, sa'csi si'c rchagla'jz Dad Jesucrist. ²¹Reni najc Dad, na'c guche'chtu rexi'ntu, didi gac-huin lajzreni. ²²Reni najc mos, colgucuadiajg xtidx xlamtu lo guedxliujre loj guira'ti xtzuumni. Na'c gunsa'ctu dzuun che cahuiisreni

si'c rujn renani ruspaajz lajz bejntis. Con yälradolajz colyejn dzuun sa'csi sanälajztu Dios. ²³Guira'ti nani guntu, colyejnni guideb lastootu si'c xtzuum Dios, et si'c xtzuumdi rebejntis. ²⁴Anajntu lo Dad Jesucrist sica'tu yälrasa'c ni najc yälrabajn par tejpas, sa'csi loj Dad Jesucrist rujntu dzuun. ²⁵Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebejnguidx.

4 Renani najc lam, coldeed loj rexmostu nani riäj xca'reni sa'csi anantu näjza la'tu rajptu xlamtu xhaguibaa.

²Colchanuu colnab lo Dios, colsusin che rniabtu lo Dios. Colgudeed xquixtios lo Dios. ³Colnabza lo Dios con nure te gacnä'jz Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä nen latzguiib. ⁴Colnab lo Dios te guyasi gusule'ä redidxga si'cni riäj guiniä.

⁵Colguibansin loj rebejn nani di gumbee xtidx Jesucrist, colgusule' diidx cheni riäj guiniitu lojreni. ⁶Rextiidxtu nanab gacni si'c rchagla'jz Dios, saruduxhza gac xtiidxtu te gacbeetu xho riäj gudzu'tu diidx loj tejjareni.

Lult xtixtios

⁷Tiquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. ⁸Ruxhaläni lojtu te gacbeepactu xho yu'ä, te guspaani lajztu. ⁹Laani jiadnäzani Onésimo nani najc te betznu ni sanälajznu. Laani najc tej resa'tu. Laareni gusule'zareneni guira'ti nani cadeednu ree.

¹⁰Aristarco, nani yunäj narä nen latzguiib, ruxhaläni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jiadhuini la'tu, sacru colhuini).

¹¹Nājza Jesús nani laaza Justo, ruxhal x̄tix̄tios lojtu. Laatisreni najc rexpejn̄ Israel nani cayacnāj loj dzuun xten xcāl̄rnibee Dios. Laareni ruspaa lazä. ¹²Epafras, ni najc te sa'tu, ruxhal x̄tix̄tios lojtu, luxh rniabduxhni xcuenttu lo Dios te sudzu'tztu guntu guiragajc ni rlajz Dios guntu. ¹³Narä rniliä xho rdzuun Epafras xcuent la'tu, nājza xcuent rebejn̄ ni yu' guedx Laodicea, nājza guedx Hierápolis. ¹⁴Lucas, doctoor ni sanälajznu, nājza Demas ruxhalzaren̄i x̄tix̄tios lojtu.

¹⁵Coldeed x̄tix̄tios loj rebejtznu nani yu' guedx Laodicea, nājza loj Ninfas, nājza lo rebejn̄ nani re' rolizjni. ¹⁶Cheni agulujx bil̄tu guijtzre, colguxhal̄ni te jiel̄ni neñ guidoo xten guedx Laodicea, dxejcti colyelza guijtz nani baxhalä lo rebeñ guedx Laodicea. ¹⁷Colye'tz loj Arquipo: “Bahuisa'c x̄tzuun Dad Jesucrist nani cua'lu lojni. Bensa'c dzuunga.”

¹⁸Lagajc narä Pabl rucuaä x̄tix̄tiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnāj Dios la'tu. Sugacni si'c.

Guijtz Ganid Lo Reben Tesalónica

Bacuaa Pabl con reexamigwni lo guidoo guedx Tesalónica

1 Narä, Pabl, näjza Silvan, näjza Timoteu cacuaanu guijszre lojtu, resa'nu ni yu' guidoo lo guedx Tesalónica, reni yu' lo Dios Xtdadnu näjza lo Dad Jesucrist. Guspaa Dios näjza Jesucrist lajztu, guscuecdxizareni lajztu.

Xho huililajz bejn Tesalónica xtidx Dios

² Guet-guejt reedenu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. ³ Ruzä'tnu lo Dios xtdadnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. ⁴ Bejtznu, racbeenu sanälajz Dios la'tu, laani aguleni la'tu. ⁵ Sa'csi che basule'nu xtidx Dios lojtu, et ganax diidxtis gujcn, niluxh xcälrnibee Sprit Dyan xten Dios nejn lastootu bejn gucbeepactu diidx ni najc didxlii. Nanchesact'u xho gujcnu che guyu'nu lojtu. Si'c baluiinu la'tu te guibañsa'ctu.

⁶ Sigajcni nabannäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dyan xten Dios ni baniidxni lojtu, mase gudejdtu trabajw. ⁷ Si'c gujc te baluitu loj guiraa reni rililajz nez Macedonia näjza nez Acaya xho nungäj] gac. ⁸ Ni'c abire'ch xtidx Dios, xhet nejzdi Macedonia näjza Acayatis, bire'chza didix guira nejz. Ro'c najnreni xho sanälajztu Dios, ni'c xhetru nanabti guiniinu lojreni. ⁹ Alga lagajc laareni rujyreni didix xho guyu'nu lojtu; nägajcza xho basaantu gojntu rebanäj]b te rajntu Dios

ni nabajnpac ni najc guliipac. ¹⁰ Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni ruslaa nuurnu lo xcälrdxe'ch Dios ni churu siääd.

Xhi bejn Pabl nejn guedx Tesalónica

2 Naj lagajc la'tu najntu, bejtznu, et xlia'di bio'pnu lojtu. ² Et najntu xho gudéreni loonu, basacsfréni nuurnu guedx Filipos. Niluxh mase gudejdnu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdnu trabajwduxh. ³ Sa'csi dinu nulijdx la'tu con didx-xhii, niclaza didxduudx, niclaza diidx ni rusguee. ⁴ Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu. ⁵ Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. ⁶ Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäj] niennu niacbeetu rajpnu yälrnibee sa'csi baxha] Jesucrist nuurnu. ⁷ Niluxh guc nadolajznu che guyu'nu lojtu, cuanäjnu la'tu si'c rcanäj te nañ rexpäzni. ⁸ Sa'csi huinälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu. ⁹ Bejtznu, la'tu rmalajztu xho biennu dzuun te biennu gaan xcälñabaannu. Biennu dzuun dxej-yääl, te di niednäjtu nuurnu la] ni basule'nu xtidx Dios lojtu.

¹⁰ Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni randuxh Dios, gujcnu bendxojn, gujcnu beñsa'c. ¹¹ Anajntu xho baliidxnu la'tu, xho

bascuecdxinu lajztu si'c runnäj te dad rexingaanni. ¹²Guiraa dee biennu, te guibansa'ctu si'c nungäjł gun reni najc xi'n Dios, lagajc Dios ni gurejdx la'tu te chunäjtuni lo xcälrmibeeni näjza lo xcälrdimbicha'ni.

¹³Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi beñ guedxliuj. Niluxh gullii xtidx Diosni, sa'csi rusiani lastoo renani rililajz. ¹⁴Bejztzu, dxejcti bejntu lagajc si'c rujn rebejn xquidoo Dios neñ reguedx Judea reni najc xpen Jesucrist; luxh gusajctu lagajc ni gusajceni, basacsı rebeñ lajdxtu la'tu. Sigajcza biringajc rexpem Israelreni. ¹⁵Rexpem Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarenı nuurnu. Direni chanälajz Dios, dizarenı gusaan chanajl rebejn Jesucrist. ¹⁶Che rlanjznu gulijdxnu reni digac rexpem Israel, te näjza laareni laareni lo dojl, direni gusaan, si'ctis cagutajlreni xtojłreni. Niluxh naj abiääd-pac yälrdx'ch xten Dios yejceni.

Rlanjz Pabl nihuisacni ro'c

¹⁷Bejztzu, mase biriinu ro'c, naj dirunu guihuii lojtu, malazduxhnu la'tu, batijp lajznu jio'pnu ro'c, rlazduxhnu fisacnu lojtu. ¹⁸Rlanjznu nio'pnu, narä, Pabl xhidal huält rlazä niälä, niluxh bendxab di nusaan. ¹⁹¿Xhini'c najc xcälrbäaznu, xcälrbalajznu, xcälracnaronu? Lagajc la'tu gactuni che suunu nez loj Jesucrist che jädsac Dad Jesucrist. ²⁰La'tu najc ni ruspaalajznu ni rliä'pza xpala'nnu nez lo Dios.

3 Dxejc, che dirunu nutijp lajznu, biennu xhigab bianxtebä guedx Atenas. ²Dxejc baxhalä Timoteu, bejztzu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuecdxini lajztu,

guzudzu'tzni xcälrlilajztu. ³Te nicla tejtı di guidxejb che jääd reyälhuin sa'csi la'tu anajntu agule Dios nuurnu ni'c sidejdnu trabajw. ⁴Cheni yusijcnu lojtu, nixgaanu lojtu sidejdnu trabajw; niluxh si'cni agusojb diidxga naj. ⁵Ni'cni diruna nutiplazä, baxhalä chu jäädnä diidx xho najc xcälrlilajztu, sa'csi cadxebä andi abasguee bendxab la'tu, luxh xlia'si biennu dzuun guyu'nu lojtu.

⁶Naj agubi' Timoteu, biädhuiini la'tu. Biändäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. ⁷Ni'cni, betznu, masä riäädx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸Naj laaca rdxunnu sa'csi racbeenu sudzu'tztu nez loj xtidx Dad Jesucrist. ⁹Xhocha gac guideednu xquixtios lo Dios xcuent guiraatu naj xcuent yälrbalajz ni yu' lastoonu xcuent la'tu nez lo Dios. ¹⁰Dxej-yäl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacbeetu xcuent xcälrlilajztu.

¹¹Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiophuiinu la'tu. ¹²Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu näjza loj guiraa rebejn, si'cni rinälajznu la'tu, ¹³te gunni sudzu'tz lastootu, na'c ga'ptu dojl nez lo Xtadnu Dios, che jääd Jesucrist näjza guiraa rexpejnı xhaguibaali.

Guibajznu si'c rchagljaz Dios

4 Naj, rebejztzu, rniabduxhnu lojtu, rulijdxnu la'tu con laj Dad Jesucrist, guibajntu si'cni baluiinu la'tu nungäjł guibajntu te guspaatu lajz Dios, te si'c chanuutis guibansa'ctu nez lo Dios.

²La'tu, anajntu rediidx ni baluiinu lojtu con xcälrmibee Dad Jesucrist. ³La-

gajc Dios rlanj nayatis guibaŋsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni. ⁴Tejgatu gantu xho guibaŋnäjtü chäältü nayatis näjza xpala'nni. ⁵Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios. ⁶Rut chutejditu gusguee bejtzni lo redzunguijdxre, sa'csi Dios susacsj guiraa rebejn ni rujnza redojlre, ni'cni abiniinu lojtu, agunixgaanu diidxre lojtu. ⁷Sa'csi Dios gurejdxni nuurnu te guibaŋnu lo yälŋabannaya xtenni, xhet lo yälŋabandxuudxdi. ⁸Ni'cni bejn ni di gucuadiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

⁹Ditu guiquiin gucuaäru diidx xho chanälajztu resa'tu, sa'csi lagajc Dios abaluitu xho chanälajztu resa'tu. ¹⁰Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtznu, chä'pru xcälrinälajztu. ¹¹Colgutijp lajztu, dxitis colguibaŋ, coljiu xtzunucatu, lagajc ŋaatu colyejn dzuun si'cni agunibeenu guntu. ¹²Te fii rebejn ni di chalilajz laaca nabansa'ctu, nägajcza te xhet jäädxdxdi xhi rquiintu.

Xho gac che jädsac Jesucrist lo guedxliuj

¹³Bejtznu, rlanjznu gacbeetu xcuent rebengut te di gac-huin lajztu si'c rujn rebejn ni di chalilajz xtidx Dios. ¹⁴Si'c ni rililajznu gujt Jesucrist, dxejc gubansa'cni, sigajcza rililajznu suspansa'c Dios guiraa reni nagayejs nen baa, renani huililajz xtidx Jesucrist. Luxh che guibi' Jesucrist, siädänireni.

¹⁵Xcuent xcälrnibee Jesucrist rniä lojtu, nuurnu ni nabajnu che jädsac Jesucrist, dinu nid loj reni nagayejs nen baa. ¹⁶Sa'csi lagajc Dad Jesucrist siäjt

lo guedxliujre, sibedxa'ni, siejnza xse' guixhajg ni rnibee, sibedxa'za trompet xten Dios. Dxejc sibaxxaa reni nagayejs nen baa, reni huililajz xtidx Crist. ¹⁷Dxejc nuure ni nabansa'cni sidxaagnureni nen rebäj te lo bej chachagloonu Dad. Si'c chonnu cholaznäjnuni par tejpas. ¹⁸Ni'cni rniä lojtu, colcuedxilajz sa'tu con rediidxre.

5 Niluxh xcuent redxejga, reijzga, xhet riquiinditu gucuaäni lojtu, ²sa'csi la'tu anansa'ctu sidzujn dxej ni jääd Jesucrist cheni rut cayunlojdini, sigajc che riääd te gubaan yääl. ³Che canii bejn: "laaca dxunnu, dxunsa'cnu", chela gacbeereni acadiejdreni trabajw si'c che rdzujn yälŋayan te gunaa che rajl xi'nni, luxh digacdi guxunreni lojni. ⁴Niluxh bejtznu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan. ⁵Sa'csi guiraatu najctu bensa'c nabajntu lo bianij, lo rdxee, dinu gac benguijdx, dinu guibaŋ lo yääl, lo yälrcäy. ⁶Ni'cni di nungäjil guidiesnu si'c rejs stecuaa bejn, ni'cni nungäjil sunasinu na'cza jiennu redojl ni rlanj tiejxhnu. ⁷Reni rejs, rejsreni yääl, reni rsiojz, rsiojzreni yääl. ⁸Niluxh nuure nabajnu lo rdxee, ni'cni nanab na'c jiennu si'c, riäjil xca'nu yälrililajz näjza yälrinälajz si'c rca' soldaad gamangw guuib ni rajcwini, ni rusäuu lastooni. Riäjilza guiläzdu'tznu sa'csi yälrusläa lo dojl najc si'c xhumbrelguuib ni ru' yejc soldaad ni rusäuu yejcn. ⁹Sa'csi di Dios nibe nuurnu te chonnu gabijl, alga guleni nuurnu te xca'nu yälŋabajni ni rudeed xi'nni, Jesucrist. ¹⁰Sa'csi gujt Jesucrist lacuaa nuurnu, te guibaŋnäjnuni masä nabajnu lo guedxliujre o nagayejsnu nen baa che guibi'ni. ¹¹Ni'cni, colguspaa lajz sa'tu, tejtü sigajcza steetu, sigajcni cayujntu naj.

Rulijdx Pabl resa'ni

¹² Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu. ¹³ Riäjlza chanälazduxhtureni xcuent dzuun ni rujnreni. Colcuedxi con resa'tu.

¹⁴ Rulijdxnu la'tu, bejtznu, colgulijdx reni najc beñlatsiaj; colsudzu'tz lajz reni guxii rbalajz lo xnez Dios; colgacnäj reni di gumbesa'c xtidx Dios, colcuedcxi lajz guiraasi bejn.

¹⁵ Colhunii di chu tejtü gunza dolguijdx lo rebejn ni rujn dolguijdx. Laaca guntu ganax dzunsa'c lo sa'tu, sigajcza lo chutis bejn.

¹⁶ Colguibalajztis guideb nabajntu. ¹⁷ Na'c cuääz guiniitu lo Dios. ¹⁸ Mase xhitis rsiajctu, coldeed xquixtios lo Dios, sa'csi si'c rlajz Dios gun reni rililajz Jesucrist.

¹⁹ Di cuälaztu xtidx Sprit Dxan xten Dios ni rniini neñ lastootu. ²⁰ Na'c

cuälaztu xtidx reni rni xtidx Dios xcuent nani churu gac. ²¹ Colquiiil guiraa redidix, coljiannäjtis rediidx ni najc didxa'c. ²² Colbicaj lo guiralii dolguijdx.

²³ Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäjł guntu te cuääztu dxej ni guibisac Dad Jesucrist. ²⁴ Dad ni gurejdx la'tu rujnza guiraa ni rniini, ni'c sujnzani guiraa redzuunre.

Ruzadiidxnireni

²⁵ Bejtznu, colnab lo Dios xcuent nuurnu.

²⁶ Colgudeed xtixtios lo rebejtznu ni yu' ro'c.

²⁷ Con laj Dad Jesucrist rnibeä, gołtu guijtze loj guiraa rebejtznu.

²⁸ Gacnäj Dad Jesucrist la'tu. Sugacni si'c.

Guijtz Ni Roj^o Lo Reben^o Tesalónica

Rucuaanu gui^ojtze lojtu, rexp^on Jesucrist ni rbäjz guedx Tesalónica

1 Narä Pabl, näjza Silvan näjza Timoteu, cacuaanu gui^ojtze lojtu, rebejtznu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. ²Gacnäj Dios Xtadnu näj Dad Jesucrist la'tu, guscuecdxizareni lajztu.

Gun Dios yälguxhtis loj reb^odoj^ol che guibi' Jesucrist lo guedxliuj

³Bejtznu, rudednu xquixtios lo Dios xcuenttu, si'c riäj^ol jiennuni, sa'csi xcäl^orililajztu siädroobru, näjza yäl^orinälajz ni rajp tejgatu näjza sa'tu siädroobruni. ⁴Ni'cni rliä'pnu xpala'ntu nen^o reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsí bejntu. ⁵Dee ruluiipac xcälguxhtis Dios najc laaca, ni'c rni^o Dios riäj^ol jiu'tu lo xcäl^ornibeeni sa'csi cadejdtu trabajw xcuent yäl^ornibeega.

⁶Sa'csi rujn Dios xhigab riäj^olza quix reni bateedtu trabajw xtoj^olreni, ni'c suteedzani reni'c trabajw. ⁷Niluxh la'tu ni cadejdtu trabajw, sujn Dios gusilaznäjtu nuure che gului^oloj Jesucrist, siriini xhaguibaa siädnäjni rexangl^oni ni saj^oc, ni rnibeduxh. ⁸Lo te balduxh siädäni, dx^oejc guisloj susacsíduxhni reni di gan^o Dios, dizareni gusoob xtidx Dad Jesucrist nani rudzucaj dojl. ⁹Guiraareni sidejdreni trabajw, par tejpas agunijtreni, zijt churen^o lo Dios, lo yäl^ordimbicha' xten xcäl^ornibeeni. ¹⁰Che jiädä Dad guiriini xhaguibaa, dx^oejga siliä'p rexpej^onni xpala'nni, sidxelojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riäj^ol guibaj^on reni guleni. Rniabzanu gu^oniidx Dios lojtu guntu guiraa redzunsac ni rchaglajz Dios guntu, gacnäjzani la'tu con xcäl^ornibeeni te guntu redzuun ni rujntu sa'csi rililajztu. ¹²Te chä'p xpala'n laj Dad Jesucrist si'cni nabajntu, te laani guiliä'pzeni xpala'ntu, xcuent yäl^orinälajz xten Dios näjza Dad Jesucrist.

Ben^odoj^oduxh

2 Naj, rniabduxhnu lojtu bejtznu, xcuent dx^oej ni jiädä Jesucrist, dx^oej ni guidoj^opzanu lojni, ²na'c chugajtu yarsia'. Na'cza gusaantu guchejbreni la'tu con diidx ni ruluii te bej^on ni najc profet, nicla con diidx ni rni^o stee bej^on lojtu, niclaza con diidx ni naareni lojtu caj loj te gui^ojtz ni naareni baxhalnu lojtu, cadre caj "dx^oej ni guibi' Jesucrist abidzuj^on". ³Na'c gusaantu gusguee bej^on la'tu xcuent rediidxre. Che gajd dx^oejga guidzuj^on, su' bej^on ni sibälaz xtidx Dios, dx^oejc sului^oloj ben^olatsiaduxh, xi'n nani sinitloj par tejpas. ⁴Bej^onre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni raj^on bej^on, te cueni nen^o xquidoo Dios, gulu^olojni si'c lagajc Gueb Dios.

⁵¿La di lajztu guisaj cheni guyusicä lojtu, rniä rediidxre lojtu, ä? ⁶Naj la'tu anajntu xhini'c ruscuääzni, te na'c guiricajni ansde guisa' redx^oej xtenni. ⁷Te yäl^oxhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscüääzni galäiini. ⁸Dx^oejc sului^oloj ben^olatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. ⁹Ben^olatsiaduxhre najc si'cpac najc ben^odxab. Che guidzuj^onni, guidzuj^onni si'c te bej^on nani rnibee, suj^onni seen, sujnzani milagr^ow ni rusguee. ¹⁰Con xcäl^olatsiaj bej^onre susgueeni guiraa renani alagunij^ot lo Dios sa'csi direni nicäjb ninälajzreni

didxlii ni nuslaareni neñ dojl. ¹¹ Ni'cni susaan Dios jiaäd te yälrusgueduxh te chalilajzreni didx-xhii. ¹² Te gabijl jii guiraa renani di nicäjb nililajz didxlii, alga bidxaglazjreni yällatsiaj.

Reni gule Dios guirii neñ dojl

¹³ Niluxh nuurnu riäjł gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dx-anni ni rusia lastootu, näjza redidxlii ni huililajztu. ¹⁴ Ni'cni che biejn diajgtu didix ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

¹⁵ Naj bejtznu, colchanuu, colsudzu'tz, na'cza jiaällajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijtz ni baxhalnu lojtu. ¹⁶ Lagajc Dad Jesucrist, näj Dios Xtadnu, ni sanälajz nuurnu, ni ruscäjñ lajznu par tejpas, ni baniidx xcälrbääznu racnäjni nuunu, ¹⁷ guspaani lajztu, gusudzu'tzni la'tu lo guiraa redidxsac ni guiniitu näjza redzuunsa'c ni guntu.

Colnab lo Dios xcuent nuurnu

3 Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcn con la'tu. ² Colnabza lo Dios xcanäjñ nuurnu te di tednu ladzña rebenlatsiaj, rebenguijdx, sa'csi xhet guiraadi bejn rajp yälrlilajz. ³ Dios rusoob xtiidxni, susudzu'tzni la'tu, sacnäjzani la'tu te di sactu dolguijdx. ⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. ⁵ Canabä lo Dad Jesucrist guniidxni gacbeerutu

xcäl-sanälajz Dios, canabäza colcuedxli lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtad Jesucristnu, rnibeenu guibicajtu lo chutis te sa'nu ni ricanzajtis, ni di rlaiz gunni dzuun. Guibicajzatu loj reni di guibajñ si'cni baluiinu riäjł guibajntu. ⁷ La'tu anajntu xho riäjł guibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. ⁸ Dizanu nidauxlia' xcu'n chu tejtu; guiraani bidiixnu, biennu dzuun dxej-yääl, te di nutaalnu xtzuum chu tejtu. ⁹ Masä nungäjł niniabnu ni acnäjtu nuurnu, dinu niniabni; alga biennu dzuun te baluiinu xho chanuutu. ¹⁰ Cheni guyu'nu lojtu, gunibeenu scree guntu: Chutis ni di rlaiz gun dzuun di riäjł xca'ni xhi gauni. ¹¹ Aguniireni loonu baltitu rcanzajtis, direni gun dzuun, alga rihuiireni xhi cayujñ rebejn. ¹² Rulijdxnu rebejnre, rnibeenureni con laj Xtad Jesucristnu: colcuedxi, colyejn dzuun te gautu.

¹³ Bejtznu, na'c guidxajgtu guntu dzunsa'c. ¹⁴ Palga yu' chu tejtu di gucuadiajg xtiidxnu ni caj lo guijtzre, colhuii chuni'cni te na'c guchaagtuni, te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶ Gueb Dios xten yälrbexdi, guscuedxli lajztu guixe-guixee, masä xhitis sajctu. Jiannäj Dad Jesucrist guiraatu.

¹⁷ Narä, Pabl cacuaä xtiixiosre con naäpac si'c runä lo guiraa rexquitzä, scree rucuaä. ¹⁸ Gacnäj Xtad Jesucrist guiragajctu. Sugacni si'c.

Guijtz Ganid Lo Timoteu

Pabl rucuaa te guijtz lo Timoteu

1 Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni rusläa nuurnu lo dojl näjza Dad Jesucrist nani cholääznu. ²Timoteu, luj najclu si'cpac xinganä lo yärlililajz. Xtdnu Dios näjza Xtd Jesucristnu gacnäjlu, gulaslajzreni luj, guscuecdxireni lastoolu.

Pabl rulijdx xcuent reni rului diidx-xhii

³Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, ⁴te na'c jiutejreni rexcuent rebenjtemp, te na'cza jiuduxhrene chu gujc rexpengoldooreni, sa'csi di rediidxre gacnäj guiroobru lastooreni si'c rustioob yärlililajz lastoonu. Naj rnibeä si'c chanuu gulijdxlu rebejn.

⁵Rulijdxnu bejn te ga'preni yärlinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶Yu'reni abaro'n rediidxre, riejtis ro'reni saniduxhrene diidx ni xhet sajcdi. ⁷Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

⁸Anajnnu leii xten Dios najc sacduxhni, palga jiennu si'cni rniipacni. ⁹Najnnu di leii gac par bensa'c, najcni par reni najc benlatsiaj ni di jiu leii xten Dios, näjza reni di gusoob diidx; par rebenj guiidx, näjza rebendojl; par reni di jiu Dios, näjza reni rusguee; par reni rugu't xtdni, xnanni, näjza guiraa reni rugu't bejn; ¹⁰par reni resnäj te gunaa ni digac chäälrereni, näjza reni resnäj lagajc saniguiireni; par reni rbajn bejn; reni rni

didx-xhii; reni rni didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹najaznu sa' redzunsa'c ni rulijdx xtidx Dios-le', diidx ni rusläa lo dojl. Narä biannää diidxre.

Rudeedni xquixtios lo Dios sa'csi rulaslajznini

¹²Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuumni. ¹³Luxh galoo guniyaäni, birinalä xpejn, basacsä'reni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. ¹⁴Niluxh lacti guroob gujc yälracnäj xte Xtdnu, guideb yärlililajz, näj yälsanalajz ni rajp Jesucrist.

¹⁵Diidxre najc guliduxh, nanab chalilajzpacuni: Jesucrist biääd lo guedxliujre te gusläani rebenj dojl; lo rebenj dojl narä nacäru bendolduxh. ¹⁶Ni'cni balaslajz Dios narä, mase nacä bendolduxh lo guiraareni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yälnabajn par tejpas. ¹⁷Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgajnni guideb guibajntu näjza par tejpas. Si'c gacni.

¹⁸Xi'nä, Timoteu, dee najc yärlulijdx ni runidxä lojlu te gucuaasa'clu si'c te soldaad ni abisieed, sigajc ni gunii reprofet xcuentlu galoo. ¹⁹Di gunijtlu yärlililajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yärlililajz. ²⁰Si'c gusajc Himeneo näj Alejandro, luxh abatedä'reni ladznaa bendxab te guisieedreni na'c guiniya'reni Dios.

Ruluini xho guiniabreni lo Dios

2 Rulidxälu ganiddoo cueedxlu, guini-ablu lo Dios, gudeedlu xquixtios lo

Dios xcuent guiraa rebejn. ²Guiniabzalu xcuent rereii näj guiraa reni rnibee lo guedxliujre, te gac guiban^{dx}inu, te gac chanuunu xnez Dios, te saru guibaj^{nnu}. ³Sa' yälriabga najc laaca, luxh si'c rdxaglajz Dios ni ruslaa nurnu lo dojl guiniabnu lojni. ⁴Dios rlanj laa guiraa bejn lo dojl, rlanjzani gacbeep-acreni xti^{dx}liini. ⁵Yu' tejtis Dios, näjza tejtisza nani rusiäjl diidx lo Dios näjza loj reben guedxliuj. Laani najc Jesucrist ni gujca niguii. ⁶Jesucrist gujt lo crujz te gudijxni redojl xten guiraanu ni tre' lo guedxliuj. Dee guj che gojl dxej ni gule Dios. ⁷Dios gule narä te gacä apost te gusule'ä xti^{dx}xni, yälirilajz näjza didxlii lo reni di gac xpejn Israel. Si'c ni rlanj Jesucrist rniä didxlii, dina guiniä diidx ni rusguee.

⁸Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yälrdxe'ch, na'c gunreni biey. ⁹Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'cdi regunaa ni entis rsiucheduxh con oor o perl o ladsajc, rajc guichniil yejcn te guidxeloj bejnreni. ¹⁰Masru ruchaag gunreni si'cni rchalglajz Dios, si'c riäjl gun guiraa regunaa ni yu' lo Dios. ¹¹Riäjl dxitis gucuadiajg regunaa xti^{dx} Dios ni rusule' reniguii. ¹²Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucuadiajg diidx nani cagusule'ni. ¹³Sa'csi ganid benchee Dios Adán, dxejctiru bencheeni Eva. ¹⁴Luxh et Adandi basguee bendxab, bendxab basguee gunaaga, dxejc biajbni nen dojl. ¹⁵Niluxh siliaa regunaa, palga jiureni xtuunreni si'c nan, palga chanuu chalilajzreni xti^{dx} Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

Xho riäjl gac reni rnibee

3 Dee najc didx gulii: palga rlanj te niguii ga'p dzuun xten Dios, gusule'ni xti^{dx} Dios, guinibeeni rebejn, te dzunsa'c najc ni rlanjzni gunni. ²Ni'cni, ni rlanj gac nani rnibee, riäjl guibansa'cni te na'c chu xhicuent guiniyaj rebejn. Riäjl gacni chää tejtis gunaa, riäjl susiⁿⁿⁱ, gacni te bensa'c, cuedxini, te guibansa'cni. Riäjlza di gudxojni rolijzni guidzujⁿ bejn, nägajc riäjl gacni te bejn ni nansa'c te guluuini. ³Na'c gacni te bengu, nicla te ni rdxagdijl bejn, na'cza gacni te nani rsia' lajzni ga'pni xhidajl meel, riäjl cuedxi lajzni, na'c chanälajzni meel. ⁴Riäjl guinibesa'cni rolijzni, saru gunni te gusoob rexi'nni xti^{dx}xni. ⁵Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. ⁶Di riäjl guinibee te ben^{coob} nani entis huililajz, te di guschä'pni xpala'nni sas jiajbni lo lagajc xcäl^{naj} Dios ni biajb bendxab. ⁷Luxh riäjlza guinii reni di chalilajz xti^{dx} Dios laaca najcni, te na'c jianxtujyni, te na'cza jiajbni ladz^{naa} bendxab.

Xho riäjl gac reni rcanäj nen guidoo

⁸Si'cza rediaconos riäjl gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹Riäjl gapdzu'tzni rediidx nagajn xten yälirilajz, ni'c nanab gac naya lastooreni. ¹⁰Riäjl fixgaatu xho nabajⁿreni. Palga nabansa'cni, rutza gacdi gucuaquidireni, sajc gacreni diacono. ¹¹Regunaa ni rlanj gac diaconas riäjlza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹²Riäjl gac rediacono chää tejtis gunaa. Riäjl guinibesa'cni rexi'nni

näj guiraa reni yu' rolijzni. ¹³Sa'csi rediaconos ni runsa'c xtzuumni, sanälajz bejnreni, dizareni guidxejb rsudzu'tz lastooreni lo xcälrlilajz xtidx Jesucrist.

Gurobduxh najc yälxhiga'tz xten Jesucrist

¹⁴Cacuaä diidxre lojlu, niluxh rlazä jädhuigaä la'tu. ¹⁵Luxh palga gaclaä, anajnlx xho riäjł guibajñ bejn rolijz Dios, nalajznu xquidoo Gueb Dios ni nabajñ par tejpas. Guidoore niasdzu'tz näjza ruluiuru didxlii xten Dios. ¹⁶Rdx-loyaduxh guiralii bejn yälxhiga'tz xten xcälñajn Dios:

Dios biääd lo guedxliuj si'c te benguedxliuj,
Sprit Dxan xten Dios gunii bendxanni;
bahuii rexangl Dios lojni;
basule'reni xtiidxni lo rebejn ni di gac xpejn Israel;
guira lajt huililajz bejn xtiidxni;
huäjsni lo xcälrdimbicha' Dios xhaguibaa.

Reni rbicaj lo xnezyuj Dios

4 Aguniipac Sprit Dxan siääd redxej che chu reni guro'n yälrlililajz, sucuadiajgreni xtidx rebejn ni rusguee näj xtidx rebendxab, ²nicla jiuireni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxuj te guiblaa: xhetru racbeedini. ³Suluii rebejnre na'c guchnaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rlilajz, ni racbeeza didxlii, te gudeedreni xquixtios lo Dios. ⁴Guiralii reni benchee Dios najc laaca, di riäjł cuälaznu xhi rca'nu che rudeednu xquixtios loj Dios. ⁵Sa'csi xtidx Dios näj yälrbedx-rniab lo Dios runsa'c guira'ti.

Te ni runsa'c xtzuum Jesucrist

⁶Palga susnajlu lajz rebejtznu redidxre, sajclu te mossac xten Jesu-

crist, luxh si'c sisieedruzalu diidx xten yälrlililajz, näj yälrluisa'c ni sanuulu. ⁷Na'c jiulu ni rnii regunaroyei ni xheti xtzuumni. Bisieed sudzu'tz lastoolu lo xtidx Dios. ⁸Guxii sajc guinibduxh bejn te gusutijpni tiejxhni. Niluxh sacduxhru cucheeni xtidx Dios nen lastooni, sa'csi racnäjni bejn lo yälñabajñre näjza lo yälñabajñ ni najc par tejpas. ⁹Dee najc didxlii, riäjł chalilajz guiraatuni. ¹⁰Ni'c riennu dzuun, rdeednu trabajw, sa'csi cabäjznu Gueb Dios ni nabajñ, ni ruslaa bejn lo dojl, ganiddoo renani rililajz xtiidxni.

¹¹Sajplu guinibeelu soob rediidxre, näjza guluiulu rediidxre. ¹²Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniilu, xho nabajñlu, xho sanälajzlu sa'lu, xho rililajzlu, näjza xho rajplu xhigabsa'c. ¹³Lał ni guidzunä ro'c, bił xtidx Dios lo rebejn, bali-jdxreni, baluiiza xtidx Dios lojreni. ¹⁴Di gusaanlu reyälñajn ni baniidx Dios lojlu cheni basuj rebengool naareni yejclu por xtidx Dios, guniireni diidx xcuent nani churu gac.

¹⁵Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. ¹⁶Gopdzu'tz lagajc luj näjza rediidx ni ruluiulu; guzudzu'tz lo guiraa rediidxre, te si'c laalu lo dojl, te laaza reni rucudiadj xtiidxlu.

Xho guibanñajnu reni rlilajz

5 Na'c quidxa'lu loj te bengool; guninäjni si'c xtaclu, balijdx rebi'n si'c bejtzlu, ²balijdx renanbengool si'c xnanlu, balijdx redxap steeb si'c rebisajñlu con rehxigabsa'c.

³Gucnäj rebiiud ni guliipac rquini chu gacnäjni te chu xhi gaureni. ⁴Niluxh palga yu' chu biuud yu' xi'nni o xajgni, suguisiedxgaareni guibanñayareni lo xnez Dios, te quixreni di'n

ni nasääbreni lo xtradreni, näj xnanreni ni baslaareni, sa'csi ni'c najc laaca, rdxagljazza Diosni. ⁵Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios. ⁶Niluxh biuud ni nabajñ cadedgustisni najc si'c te ni agujt neñ dojl. ⁷Basule' rediidxre lojreni te rut gucuaquijdireni. ⁸Palga yu' chutej ni di gacnä j resa'ni, lagajc reni rbä jz rolijzni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

⁹Di gucuaalu laj rebiuud lo gujtz te gacnäjtuni palga gajdni chu gayojñ ijz. Riäjlza gac biuudga te gunaa ni gubannäsa'c chäälni. ¹⁰Riäjlza gumbee bejn ni xcuent redzunsac ni rujñni; palga baslaani rexi'nni, palga badedlaani rolijzni gues beñ zijt, palga gudiibni ni' rexpejn Dios te si'c guzen xcälñadolajzni, palga racnä jni reni rdej trabajw, palgaza riuni rujñni guira'ti redzunsac.

¹¹Niluxh na'c gucuaalu laj biuud ni yu' guxiiru ijz sa'csi che guichagljazreni te niguii, siällajzreni diidx ni bia'nreni lo Jesucrist, te rlanjni guchnasacreni. ¹²Dxejc siu'reni neñ dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios. ¹³Dxejc sia' lojreni xhet gundireni, rijreni rolizj bejn ricuereni. Luxh malaii ni'ctis gunreni. Niluxh rliäsazreni didxxhi, richu'reni lo xhitis, miiizareni diidx ni di guchaag guiniireni. ¹⁴Ni'cni rlazä rebiuud ni najc dxa'p ru guchnaareni stehuält, chu xi'nreni, fisa'creni rolizjreni te na'c guiniyajreni rebejn ni rdxe'ch lojnu. ¹⁵Sa'csi yu' gaii biuud ni alagubica j lo xnez Dios sanajlreni bendxab.

¹⁶Pal yu' tej resa'nu ni najc sa'ni te biuud, riäj l gacnä jnini, na'c gusaanni gutajl ni xtzuun guidoo, te si'c guidoo sa j gacnä j rebiuud ni rquiiñpac chu gacnä jreni.

¹⁷Rebengool ni rnibesa'c guidoo, riäj l chanälajzruturen i nä j gudeedrutu guiraa

nani rquiiñreni, si'c najc reni rusulesa'c xtidx Dios, rulidxsa'creni la'tu con xtidx Dios. ¹⁸Sa'csi lo xtidx Dios caj scree: "Na'c gusällu guijxh ro' gon che rusiani triuu"; si'cza caj stee diidx: "Riäj l gax bejn ni rujñ dzuun."

¹⁹Na'c cucuadiajglu xtidx tej ni rucuaquij te bengool palga ruti tio'p, chon testiigw. ²⁰Niluxh reni sanuu rujntis dojl, riäj l gulijdxluren i nez lo j reben guidoo, te nä jza laareni guidxjebreni. ²¹Nez lo j Dios, nez lo j Dad Jesucrist, nez lo jza reangl ni gule Dios, rulidxduxhälu chanuulu lo rediidxre, na'c jiuuru tej bejn lo sa'ni. Bejn teblo j lo j guiraa rebejn. ²²Na'c gusiojb lajzlu gusuju lu naalu yejc te bejn, te gacni beñ guidoo palga gajdni guisieed guibansa'cni lo xnez Dios sa'csi lagajc yejclu jiajb rextojl ni. Gubica j lo guiraa dolguijdx.

²³Na'cru yälu ganax nis. Gu'za tudxe'n bin sa'csi racxhuu xque'lu, nä jza sa'csi yu'ru rexcälracxhuulu.

²⁴Yu' bejn ruzengajc rextojl ni ni'c rajcni castiigw, niluxh yu' bejn ni di xtoj l ni guzengajc. ²⁵Sigajcsa redzunsac ni rujñ bejn; yu'reni ruzengajc, niluxh mase dini guzengajc, digacdi jianxhiga'tzni, sidzujñ dxej suzen ni.

6 Reni najc mos riäj l cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. ²Palga yu' remos ni najc xlamni te nani rililajz, na'c cuälazreni rextiidxni sa'csi najcni bejtzn i lo xcäl rililajz Jesucrist. Riäj l gunsa'crueni xtzuunni, sa'csi najcni sa'ni lo j yäl rililajz xten Dios, luxh sanälajzarenini. Rediidxre baluii, basule'.

Yäl nabansa'c nä jza te lastoo ni rbedxi

³Palga yu' chu ruluii garenca diidx, diidx ni digac didxsa'c, si'c najc xtidx Jesucrist, nä jza xhet si'c diidxdi ni ruluii xho guibansa'c bejn, ⁴bejn ga

rlajz guiliä'p lagajc xpala'nni, niluxh xhet najndini. Si'c te yälguijdx yu'tis yejcni yälguiniab diidx, yälrdildiidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. ⁵Rujnzani rdilnäjä bejn sa'ni. Guiraa redee gun bejn ni aguxhijñ xcäriejnñi, bejn ni diru ga'p didxlii. Rchaloreni sujnreni ganduxh xcuent rediidx ni ruluireni. Gubicaj lo sa' bejnre. ⁶Niluxh yäl nabansa'c näjza te lastoo ni rebedxi, redee sa'cduxh. ⁷Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸Niluxh palga rajpnu xhi gaunu, xhi gajcwnu, con ni'c riäjñl guibalaaznu. ⁹Niluxh reni rlajz ga'p xhidalduxh meel, riäjbreni lo xhigab guijdx, rujnzareni xhidajñl dzuun ni xhet sajcdi, ni rujn daan, ni rusiääz bejn lo yälruhxhñ, lo yälrmñtloj. ¹⁰Sa'csi yäl rinälajzni meel najc xlobaa guiraa redzunguijdx. Yu'za bejn ni rlazduxh ga'pni meel, rusaanreni xcäl rililajz Dios, dxejc lagajc laareni rujn rdedduxhrenei trabajw.

Dzun-huen xten yäl rililajz

¹¹Niluxh luj, bejn xten Dios, baxu'ñ lo guiraa dee, te chanuulu lo xcäl xhigabsa'clu näjza yäl nabansa'clu; te chanajllu yäl rililajz näjza yäl sanälajz; te chanuulu lo yäl rbecdxi lajz näjza yäl nadolajz. ¹²Benduxh dzuun xcuent yäl rililajz Jesucrist, gunazdzu'tz yäl nabajñ ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajñl bejn, te anancheereni. ¹³Naj

rulidxälu nez loj Dios ni rudeed yäl nabajñ lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, ¹⁴rñibeä guzobsa'clu guiraa rediidx ni rñiä lojlu, na'c guchaaluni, te na'c guiniyajreni luj naj niclaza cheni jiääd Xtad Jesucristnu. ¹⁵Sidzujñ dxejga nani agunii Dios guidzujñni. Dios ni najc le' sujñ scree sa'csi laatisni najc Dios, najcni rei xten rerei, rñibeezani reni rñibee. ¹⁶Laatisni dini guet, nabajñni lo bianij cadre rut rajcdi rbig. Nicla te bejn gajd fii lojni, niclaza gac fiireni lojni. Xtebtis laani riäjñl ga'p rebejn xpala'nni. Laani rajp yäl rñibee par tejpas. Sugacni si'c.

¹⁷Balijdx reni rajp xhidajñl xhixtenu lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajñ, ni runiidx loonu guiralii xhixtenu ni rquiinnu te guibalajznu. ¹⁸Balijdxreni gunreni dzunsa'c, gundajñreni dzunsa'c, gacnäjäreni reni xhet rajpdi, cuenäsa'creni sa'reni. ¹⁹Si'c ga'preni yäl nasa'c ni guzudzu'tzreni che jiääd Jesucrist, te guiniaztzu'tzreni yäl nabajñ par tejpas.

Rulijdxni Timoteu

²⁰Timoteu, cuenäjä ni rñiä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl najñ'. ²¹Sa'csi yu' reni sanuu yäl najñre ni'c banijtreni lo Dios xcuent yäl rililajz. Gacnäjä Dios luj. Sugacni si'c.

Guijtz Ni Rojp Lo Timoteu

Stee guijtz ni baxhal Pabl loj Timoteu

1 Narä Pabl, nacä apost xten Jesucrist. Dios gule narä, xcuent yäl**na**bajñ ni gudeed Dios loj reni yunäj Jesucrist, si'c ni bia'n diidx. ²Cacuaä guijtze lojlu, Timoteu, xi'nä lo yäl**ri**lilajz. Rinälazä luj. Rniabä lo Xtradnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

Rusule'ni xcuent Jesucrist

³Rnaj lazälu che rniabä lo Dios dxejyää. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä. ⁴Rnaj lazä xho biinlu, naj rlazä fiä lojlu te guibalazä. ⁵Rnaj lazäza yu'pac yäl**ri**lilajz lastoolu si'cni guyu'ni galoo lastoo xmamlu Loida dxejcru lastoo xnanlu Eunice si'cza yu' yäl**ri**lilajzga lastoolu naj.

⁶Ni'cni rniä lojlu naj, si'cni rcanäj bejn rodäj te di juuini, si'cza cuanädu**x** reyäl**na**najñ ni baniid**x** Dios lojlu cheni basuä naä yejclu. ⁷Sa'csi di Dios nuniid**x** te lastoo ni rdxejb loonu, baniid**x**ni te lastoo ni rsiutijp, baniid**x**ni te lastoo ni rinälajz, baniid**x**zani yudux**x** cäriejnnu. ⁸Na'c guitujylu guiniilu rediidx xten Xtrad Jesucristnu, na'cza guituinäjlu narä sa'csi yu'ä neñ latzguiib xcuent Jesucrist. Näj luj gudejd trabajw ni siääd xcuent yäl**ru**sule' xtid**x** Dios si'ctis gacnä**j** Dios luj. ⁹Dios ni gulää nurnu neñ dojl, gurejdx nurnu te guiba**na**sa'cnu lojtisni. Gurejdxni nuurnu xhet sa'csi bienu dzun**sa**'c, alga sa'csi si'c r**la**z**ni** laani, sa'csi balas**la**z**ni** nuurnu xcuent Jesucrist galooli che gajdli guncheeni guedxliuj. ¹⁰Niluxh cheni biääd Jesucrist ni badzu**ca**j rext**o**jl**nu** lo guedxliujre, baluiloj yäl**ru**las**la**z**ga**. Jesucrist

banitloj yäl**ru**nibee xten yälgujt. Xtiid**x**ni, ni rusule' xho r**ba**caj dojl, baluui yäl**na**abajñ, näjza yäl**na**abajñ par tejpas.

¹¹Dios gule narä te gacä te ni rusule' xtiid**x**ni, te gacäza te apost, näjza te bejn ni rului loj reni di gac xpejñ Israel. ¹²Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiid**x** huililazä, nancheä laani sajc gapdzu'tz**ni** dzuun ni baniid**x**ni loä dxejli cheni guibi'ni.

¹³Chanuu guluilu redid**x**sa'c ni bandid**xä** lojlu. Gubaj**na** lo yäl**ri**lilajz näj lo yäl**na**älajz ni rajpnu sa'csi yu'nu lo Jesucrist. ¹⁴Cuanädu'tz reyäl**na**najñ ni baniid**x** Dios lojlu näj Sprit Dxan xt**en**ni ni rbäjz neñ lastoonu.

¹⁵Anajnlu guiraa reni siääd reguedx Asia gulälaz narä; lo redee nadxaag Figelo näj Hermógenes. ¹⁶Dad Jesucrist gacnä**j** reni yu' rol**ij**z Onesíforo sa'csi balti huält biädspaani la**zä**, dini nitujy sa'csi yu'ä neñ latzguiib. ¹⁷Che bidzuj**ni** gued**x** Roma, gudiilpacni narä te bid**xä**lni narä. ¹⁸Dad Jesucrist gulaslajz laani che guidzuj**ñ** dxej ni guibi' Jesucrist. Luj anajnlu balti dzun**sa**'c bejn**ni** che guyu'ni gued**x** Éfeso.

Te ni runsa'c xtzuun Jesucrist

2 Ni'cni xi'nä, guzutijp sa'csi rulaslajz Jesucrist luj, racnäjnilu. ²Rediidx ni abiejn diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajc guluuiza did**x**ga lo stecuaa bejn.

³Batijp lajzlu ted**nä**jlu narä trabajw si'c te soldadsa'c xten Jesucrist. ⁴Di te soldaad gun dzuun ni bejn**ni** che gajd**ni** gac soldaad. Ruj**ni** xtzuun bejn ni guleni gac**ni** soldaad, te si'c guspaani lajz bej**nga**. ⁵Sigaj**ca**za, ni rguij**t** digacdi xca'ni yäl**na**sa'c palga dini quitsa'c si'c riäj**l** quit**ni**. ⁶Bejn ni ru**j**n dzuun loniaa nanab xca'ni xcäl**na**sa'cni ganidoo. ⁷Bejn

xhigab xcuent ni rniä lojlu, dxejc sujn Dios gacbeelu guiraani.

⁸Basnaj lajzlu Jesucrist, te xagdo to-David ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu. ⁹Ni'cni cagutipä lazä cad-edä trabajw, caduä caden si'c te bejn ni bagu't sabejni. Niluxh digacdi xcaduu xtidx Dios. ¹⁰Ni'cni cadedä trabajwre te gacnää reni agule Dios te näjza reni'c chalilajz xtiidxni te guibajpreni lo bianij xten Jesucrist par tejpas.

¹¹Guliiduxh najc diidxre; palga agujtnu con laani, sibannäjzanu laani.

¹²Palga rdejndu trabajw, sinibenäjzanu laani.

Palga dinu guicä'p numbeenuni, dizani guicäjp numbeeni nuurnu loj Xtadni Dios.

¹³Mase dinu chanuu lo xtiidxni, laani su-soobni xtiidxni sa'csi digacdi cuatzlajzni diidx lagajc laani.

Te bejn nani abia xtzuunni

¹⁴Basnaj lajz rebejn xcuent rediidxre, gunibee lojreni nez lo Dad Jesucrist na'c tilidiidxreni sa'csi sa' diidxga xhet sajcdini, ruxhintisni reni riendiajgni.

¹⁵Batijp lajzlu te guidzujnlu lo Dios si'c te bejn ni runsa'c dzuun, xheti xhicuent guitujyulu, sa'csi ruluisa'cpaclu xtidxliitis Dios. ¹⁶Gulälaz yälriyaj näjza xhidalduxh diidx ni xhet sajcdi, sa'csi renani rucudiajg rediidxga riajbrureni lo redolguijdx. ¹⁷Luxh diidx ni ruluiireni suxhingajcni lastoo bejn si'c rxhinlajz tiejxh bejn. Ni'c casiajc Himeneo näj Fileto. ¹⁸Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rlilajz. ¹⁹Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejni"; näjza "Nanab

guibicajreni lo redolguijdx, guiraa reni ahuililajz xtidx Jesucrist."

²⁰Nen te yuro, xhet ganaxdi cos or näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquiin guixe-guixee. ²¹Sigajcza te bejn ni rlanj gun dzuunro xten Dios, riäjł guibicajni loj redolguijdx ni xhet sajcdi. Dxejcti Dad Jesucrist sacnäjni te gunni redzunro xtenni.

²²Gubicaj lo redzunguijdx ni rujn rebejn, huinuu yäl nabansa'c, yäl rililajz, yäl sanälajz, gulecdxza lajzlu näj reni rujn xtzuun Dios, naya lastooreni rbedxrniabreni lo Dios. ²³Na'c jiulu redidix ni ruluii rebejn guedxliuj. Anajnlulu rediidxga rujn rdilnäjä rebejn sa'ni.

²⁴Niluxh te xmos Dad guibaa di riäjł guchaagni reni rdijl; riäjł gacni bensa'c loj guiraatis bejn. Riäjłza guluisa'cni; riäjłza gutip lajzni che xhet laadi rujn bejn lojni. ²⁵Guideb yäl nadolajz guluiilu reni rdxe'ch loj rediidix ni ruluiilu. Cuääzlu gaxäjsi gusiejch lajzreni gun Dios gacbeereni didxgulii, ²⁶te jianij xcäriejnreni te guiriireni ladznaa bendxab, te gunreni ni rlanjtis Dios.

Xho gac rebejn nen redxelult

3 Nanab gacbeelu nen redxelult sidzujn dxej tedtu trabajw. ²Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchagljaz chä'p xpala'tisni, bejn ni rniyaj Dios; su' bejn ni di gusoob xtidx xtadreni, su' bejn ni di gudeed xquixtios lo Dios, su' bejn ni najc benguijdxctis. ³Nen redxelultga su'za bejn ni di chanälajz sa'ni, bejn ni di lajzni jäjł, bejn ni rusgueduxh; bejn ni digacdi guscuääz dolguijdx ni rujnreni; bejn ni gualazduxh; bejn nani ru'ro'n guira'ti dzunsa'c. ⁴Nen redxelultga su' bejn ni ruto' sa'reni; bejn ni di guidxejb gunreni ni riajbtis yejcreni, bejn ni rchalosi najcreni bensacduxh;

bejn ni rchaglajzru gun nani rchaglajz tiejxhreni lacuaa chanälajzreni Dios. ⁵ Nen redxelult su' bejn ni najc si'c benguidoo, ascanu rusoobreni xtidx Dios, niluxh naadireni xca'reni yäl'nadip näj yäl'rnibee xten Jesucrist ni ruchaa lastoo bejn.

Na'c guchaaglu rebejnğa, ⁶ sa'csi loj sa' bejnre yu' reni richu' rolizj bejn, sasgueereni regunanayääl ni rujn dojl. Reguenaare rinuu rujreni ni rlazztis tiejxhreni, rujnreni guiraloj. ⁷ Rebejnre rsiedduxh didxcoob, niluxh di didxlii xten Jesucrist jiu' yejcreni. ⁸ Sigajcni gujc Janes näjza Jambres ni bidxe'ch loj Moisés, sigajcza najc rebejnre, cadxehnäjreni didxlii xten Jesucrist, najcreni bejn ni aguxhijñ xcäriejnreni, luxh direni gacbee xtidx Dios, direni ga'p yäl'rilitajz. ⁹ Niluxh direni chanuu xchej, sa'csi huenliisi suhuiu guiraa rebejn najcreni benguijdx. Si'cza gusajc guiro'p reni bidxe'ch loj Moisés.

Pabl rnibee sudzu'tz Timoteu

¹⁰ Luj sanuutislu lo nani rusule'ä, näj xho nabañä, näj xhicuent runä dzuunre, lo xcäl'rilitazä, lo xcäl'nadolazä, lo xcäl'sanälazä, näjza xho batip lazä.

¹¹ Najnlu xho basacsíreni narä gudedäza trabajw ladzña rebejn nen reguejdx xten Antioquía, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga.

¹² Guliduxh guiraa reni rlazj chutis loj Jesucrist sidejdpacreni trabajw.

¹³ Niluxh rebenguijdx näj reni rusguee, sinuutisreni redolguijdx, sinuuru gusgueereni bejn, luxh susgueeza bejn laareni.

¹⁴ Luj huinuu guzudzu'tz loj ni abisieedlu, nani ahuililajzzalu, luj anajnlu chuni'c baluiini lojlu. ¹⁵ Cheni biuuxlilu racbeelu xtidx Dios, ni ruluiilu xho guiriilu nen dojl te xca'lu yäl'nabajn par tejpas sa'csi rililajzlu xtidx Jesucrist.

¹⁶ Guiraa rediidx xten Dios ni caj lo guijtj, lagajc Dios baniidxn te xcajni lo guijtj.

Guiralii xtidx Dios najc laaca te guluii nuurnu xhini'c najc didxlii, te gacbeenu xhi najc didx-xhii, te gacbeezanu xho riäjł guibañsa'cnu.

¹⁷ Te susiñ niguii ni najc xpejn Dios, te gac gunni guiraa redzunsac ni riäjł gunni.

4 Rulidxälu nez lo Dios näjza nez lo Dad Jesucrist ni jääd si'c reii te gunni yäl'guxhtis loj reni nabajn näjza loj reni agujt; rniäza dee lojlu: ² basule' xtidx Dios, gususiñ lo Dios mase xhitis or. Baluii reben dojl, gudilñäj reni di rlazj guzobdiidx xtidx Dios, balidxnäj resa'tu xtidx Dios. ³ Sa'csi sidzujñ dxej di rebejn guidxaglazj gucuadiajg yäl'r-luisa'c; alga diidx ni najc lagajc si'c najc xhigabreni rlazjreni jiendiajgreni, ni'cni siguiilreni xhidajl bejn ni ruluii te guisieedreni ganax ni rlazjreni gucuadiajgreni. ⁴ Susäuureni diajgreni te di jiendiajgreni xtidxlii Dios; alga xhitis diidx gucuadiajgreni. ⁵ Niluxh luj huin-uutis lo xtidx Dios, batiplajz yäl'huin, guniitis xho rudzucaj Dios rextojlreni, beñsa'c xtzuuunlu.

⁶ Sa'csi narä suga'ä ree te ju'treni narä, asiäddzungejx dxej ni guetä. ⁷ Agulujx bacuaä si'c te soldaad ni huicuasa'c lo guer, agulujx xnezyuä, gopdzutzä yäl'rilitajz. ⁸ Naj cabazä xca'a yäl'nasa'c ni guniidx Dad xhaguibaa, suniidxn yäl'nabansa'c. Dad najc juejz ni runsa'c yäl'guxhtis. Niluxh xhet loätis guniidxn yäl'nabansa'c. Sudeednini loj guiraa rebejn ni catiplajz cabäjzreni dxej cheni guibisac Jesucrist.

Rediidx ni räjpni lojtis Timoteu

⁹ Basaaga lajzlu jädhuigajlu narä; ¹⁰ sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhałä Crescent

sää lo reguejdx ni re' nez Galacia. Baxhaġä Tito sää guedx Dalmacia. ¹¹ Xtebtis Lucas suganäj narä. Gudiil Marcw te jiädnäluni sa'csi sajc gacnäjni narä lo xtzun Dios. ¹² Tíquico baxhaġä sää guedx Éfeso. ¹³ Cheni jiäädlu, jiädnälu ca'p ni basa'nä guedx Troas rolijz Carpo, näj rexlibrä; di jiälza lajzlu rexquitzä. ¹⁴ Alejandro, ni najc gubetzguiib, basacsí-duxhni narä. Dios quiixni sigajcni bejnni. ¹⁵ Luj bahuii te di gunni xhi gunni luj sa'csi rdexchduxhni lo xtidx Dios ni rusule'nu.

¹⁶ Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni. ¹⁷ Niluxh Dad ni yu' xhaguibaa gucnäj narä, baniidxni yälñadip te gujc guniä guiraa xtidx Dios te biejn diajg reni digac xpen Israel xtidx Dios.

Luxh gucnäj Dios narä gulääni narä ladznaareni, si'c ro' te beedz. ¹⁸ Suslaani narä loj guiraa redolguijdx, saptzu'tzni narä, sigucheezani narä te chunääni lo xcälñibeeni xhaguibaa. Lojni coldeed xquixtios, colganduxhni par tejpas. Sugacni si'c.

Rudeedni xtixtios lo reexamigwni

¹⁹ Badeed xtixtios lo Prisca näjza lo Aquila näjza loj resa' Onesíforo. ²⁰ Erasto bia'n guedx Corinto, niluxh basa'nä Trófimo guedx Mileto sa'csi cayacxhuuni. ²¹ Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxhalreni xtixtios lojlu.

²² Dad Jesucrist chunäj xaimlu. Dios gacnäjä guiraatu. Sugacni si'c.

Te Guijtz Lo Tito

Bacuaa Pabl lo Tito

1 Narä Pabl, nacä xmos Dios, apost xten Jesucrist, te gacnäá guiroobru xcälirililajz reni agule Dios, te gacbeezareni didxlii ni rusia xcäl'nababajnu. ²Cayunlojzanu yäl'nabajn par tejpas nani Dios, ni digacdi guinii didx-xhii, bia'nni didx guniidxni cheni gajdli guedxliuj guirixtiej. ³Niluxh che bidzujn dxej ni agulexgaa Dios, laani baluiini xtiidxni. Si'cza baniidxni xtiidxni loä te gusule'äni si'c gunibee Xtiosnu ni rusläa nurnu nen dojl. ⁴Cacuaä guijtzre lojlu, Tito, xi'nä lo yälirililajz ni ria'pnu xcuent Jesucrist. Rniabä lo Dios Xtadnu näj lo Dad Jesucrist ni rbää nuurnu nen dojl, gacnäjreni luj, gulaslajzreni luj, guscuedxizareni lajzlu.

Dzuun ni rujn Tito guedx Creta

⁵Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo nen teja reguejdx si'cni gunibeä gunlu. ⁶Gule bengool ni nabansa'c, te na'c guiniyaj bejnreni, nanab gacni chääl tejtis gunaa, riäjzla chalilajz rexi'nni, na'c guibajnreni si'ctisni rlanj tiejxhreni, jiureni xtidx xtadreni. ⁷Niguii ni rnibee guidoo rcanäj rehxixten Dios, ni'cni riäjg ga'pni te yäl'nabanya. Na'c gacni te bennajd, na'c gacni te bennadxecha', na'c gacni bengü, na'c gacni te bejn ni rdxagdijl bejn, na'cza xca'ni meel ni dini niunsa'c gaan. ⁸Nanab gacni te bejn ni rudedlaa rolijzni jia'n ben biooz, riäjzla chanälajzni dzunsa'c, gac nasinni, chu xcäriejnni; guibansa'cni nez lo Dios, sigajcza nez lo rebejn, guibannayani nez lo Dios, na'c gunni nani rlanjtis tiejxhni. ⁹Riäjg chanuutisni lo didxlii ni bisieedni te gac

gulidxnäjzani bejn xtidx Dios, te guzejni diidx lo rebejn ni rniyax xtidx Dios.

¹⁰Yu' xhidajl benguijdx, bejn ni rnii diidx ni xhet sajcdi, näjza xhidajl bejn ni rnii didx-xhii ni rusguee. Näjza lo rexpenn Israel ni riuduxh leii yu' sa' bejnre. ¹¹Sa' redee ni nanab jääu ro'ni, sa'csi rusgueereni xhidalo sa'reni, ruluiireni ni di riäjg guluiireni te gunreni gaan meel.

¹²Te niguii ni siääd lagajc lajdxreni guniini xcuent lagajc reben lajdxni: "Rebejn ni najc cretenses rniduxhreni didx-xhii, niälajzareneni. Rlanjreni gausa'creni niluxh di rlanjzreni gunreni dzuun."

¹³Niluxh guliini, ni'cni gudilnäjreni, te chalilazsa'creni xtidx Jesucrist, ¹⁴te na'cruza gucua diajgreni rediidx ni rdxälajz rexpenn Israel, niclaza rediidx ni rnibee bejn ni gulälaz didxlii.

¹⁵Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxuudx, xcäriejnliireni nacdxuudx.

¹⁶Naj rujsireni si'cni numbeereni Dios, niluxh ni rujnreni huenliisi ruzen direni nililajz, najcreni benguijdx, direni jiu xtidx Dios, digacdi gunreni nicla tej dzunsa'c.

Rulijdx Pabl Tito guluisa'cni rebejn

2 Niluxh luj guniitis rediidx ni ruluisa'c. ²Baluii rebengool gac benya, bejn ni yu' xcäriejnni, bejn ni rumbbee xhini'c najc dzunsa'c, xhini'c najc dzunguijdx, bejn ni rajpza yälirililajz, yälsanälajz, näjza ni rbecdxi lajzni. ³Sigajcza, regunagool, nanab guibajnreni si'c te ni yusa'c lo Dios, na'c guiniireni diidx ni di riäjg guiniireni, na'cza soozreni. Riäjg guluiireni redidxsa'c ⁴te guluiireni regunaa dxa'p chu xcäriejnreni, chanälajzreni chäälreni näj rexi'nreni. ⁵Gacreni nasin, guibannayareni, xcanäsa'creni rolijzreni, gacreni bensa'c gusoobreni xtidx chäälreni, te rut guiniyajdi xtidx Dios.

⁶Sigajcza gojz lo rebi'n riäjł chu xcäriejnreni. ⁷Luj guzuj te fiireni xho riäjł gun bejn dzunsa'c. Che guluiilureni, saru baluii guiraa reni riäjł guluiilu. ⁸Didxsa'c gunii te rut gacdi guiniyaj diidxga, te si'c guitujy chutis ni rłajz guidxe'ch lojtu te xhet xhi didxguijdxdi gac guiniireni xcuentlu.

⁹Balijdx remos te gusoobreni xtidx xlamreni, te gunsa'reni dzuun, na'c guzejreni diidx lo rexlamreni. ¹⁰Na'c cuanreni alga guibansa'reni te guluii xcäl'nabajnreni lacti sacduxh xtidx Dios ni basłaa nuurnu nen dojl.

¹¹Sa'csi abiädä xcäl'racnäj Dios, abiäd-näni yärusłaa nen dojl lo guiraa rebejn.

¹²La xcäl'racnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibansa'cnu, te chonälajznu Dios lo guedxliujre. ¹³Ruluiizani nuurnu cuääznu guidzujn dxej ni soob xtiidxni ni basa'nni loonu xcuent dxej che jiädä Gueb Dios näj Xtda Jesucristnu ni rusłaa nuurnu lo dojl. ¹⁴Laani gujtni te gusłaa ni nuurnu lo guiraa redolguijdx, te basiani nuurnu te gacnu xpejnni, gaczanu te bejn ni rdxagłajz rujn dzunsa'c.

¹⁵Diidxre gunii, balijdx, basule' si'c te bennajn. Di gusaanlu cuälazreni luj.

Ni riäjł gun reni rililajz

3 Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzarenı gunreni xhtis dzunsa'c. ²Na'c guiniyajreni bejn, cuedxireni, gaczarenı bensa'c, saru gac nadolajzreni loj chutis bejn.

³Sa'csi galoo sigajcza xheti xcäriejnnu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchagłajztis rujn tiejxhnu, nabajntisnu lo dolguijdx, rudxonłajznu, rdxe'ch bejn loonu, rdxe'chzanu lo sa'nu. ⁴Niluxh che baluiiloj xcäl'rulasłajz näjza

xcäl'rinälajz Dios ni rusłaa nuurnu näjza reben guedxliuj lo dojl, ⁵dxejc basłaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balasłajzni nuurnu. Basłaa Dios nuurnu lo dojl sa'csi bidiib lastoonu, te biäjł xtojłnu te najcnu beucoob, sa'csi bascoobza Xsprit Dxan xten Dios xcäriejnnu. ⁶Baniidx Dios cuääzpac Xsprit Dxanni nen lastoonu xcuent ni bejn Jesucrist ni basłaa nuurnu, ⁷te sa'csi rujn Dios cuent najcnu bensa'c sa'csi abadzucajni xtojłnu, naj sica'nu xcäl'nasa'cnu ni cabääznu, nalaaznu yäl'nabajn par tejpas.

⁸Dee ni najc guliipac, ni'cni rłazä chanuutislu guiniilu rediidxre loj rebejn, te rebejn ni rililajz xtidx Dios gunduxhreni ganax dzunsa'c. Rediidxre najc laaca, sacduxhreni loonu. ⁹Naj basaan rediidx ni najc xlia'si, rediidx ni gunii reben galoo, yäl'rđiđiidx xcuent xleii to-Moisés sa'csi guiraa rebieyjga xhet sajdini, xhetza huendi rujnreni.

¹⁰Palga yu' te bejn ni gun la' sa' reben guidoo, gunii lojni tej o tio'p huält. Palga dini jiejn, colcuääni lojtu. ¹¹Sa'csi anajntu sa' bejnga abaro'nni, agulälazni didxlii, lagajc xtojłni sujn nitni.

Diidx ni bacuaani lojtis Tito

¹²Che guxhalä Artemas o Tíquico lojlu, gudahuipac narä lo guedx Nicópolis. Ro'c abenä xhigab tedä rebäinajł. ¹³Gucnäduhx licenciaad Zenas näjza Apolos, badeed guiraa ni rquinnreni te chanuurenı xpıajrenı, te xhet jiädxdirenı. ¹⁴Suguisieedza resa'nu gunrenı dzunsa'c te gacnäjnrenı che guiquinnurenı, te na'c guibajnrenı xlia'si.

Ruxhalni xtixtios

¹⁵Guiraa reni yunäj narä ruxhal xtixtios lojlu. Badeedza xtixtios loj resa'nu lo yäl'rililajz. Dios gacnäj guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

1 Narä, Pabl, yu'ä neñ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. ²Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolizlu. ³Dios Xtadnu näj Dad Jesucrist gacnäj la'tu, guscuedxireni lajztu.

Xcälsanälajz näj xcälrililajz Filemón

⁴Rudedä xquixtios lo Dios xcuent luj che rniä lo Dios. ⁵Abiejn diagä xcuent yälrinälajz näj yälirililajz ni rajplu lo Dad Jesucrist, näjza reni yu' lo Dios. ⁶Rniabä lo Dios tioobru xcälrililajzlu laj ni rusule'luni, te gacbesa'creni xcuent guiraa reyälناسа'c ni rajplu, ni runiidx Dad Jesucrist lojlu. ⁷Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸Mase rapä xcälrnibee Jesucrist sajc guiniä gunlu xhitis ni riäjł gunlu, ⁹rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. ¹⁰Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

¹¹Galoo, dini niajc beñsa'c lojlu, niluxh naj sacnäduxhni guiro'pnu.

¹²Ruxhałsacäni lojlu, te xcasacluni stehuält si'c ni najräni xca'lu, sa'csi siädnäni lojlu ascanu lagajc lastoä. ¹³Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios. ¹⁴Niluxh di rlazä niunä si'c palga luj dilu xcäjb gacni si'c. Dina guinia gacnäjpauclu narä si'c gojn. Narä rlazä gunluni sa'csi rlazpauclu gacni si'c. ¹⁵Pet gubicaj Onésimo lojlu tio'p-choñ dxejsi. Niluxh naj xca'luni te chuni lojlu par tejpas. ¹⁶Naj xhetru si'c'di te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäjł chanälajzruluni, xhet si'c chutis te bejn, alga si'c te bejtzlu lo Dad Jesucrist.

¹⁷Näj palga rumbeelu narä si'c te sa'lu, cua'ni sigajc narä. ¹⁸Palga yu' xhi bejnni lojlu o palga yu' xhi nazäabni lojlu, basa'nni lo xcuentä. ¹⁹Lagajc narä, Pabl abacuaä guijtzre con naä con xleträ, narä siguixäni. (Te na'c guiniä nazäabzalu lagajc luj loä.) ²⁰Betzä, benlaa hueenre narä si'c te ni sanälajz Dios te guspaalu lazä nez loj Dad Jesucrist.

²¹Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. ²²Sigajcza basuchee te lajt cadro jia'nä, sa'csi cabäzä gudzu' Dios ni gunabtu lojni, gusaan Dios jädhuiä la'tu.

Ruxhałni xtixtios lojni

²³Epafras ruxhał xtixtios lojlu. Laani yunäjni narä latzguiib, sa'csi guniizani xtidx Jesucrist. ²⁴Marcw, Aristarco, Demas, näj Lucas, ni racnäj narä lo dzuunre, ruxhałzareni xtixtios lojlu.

²⁵Dad Jesucrist gacnäj la'tu. Sugacni si'c.

Te Guijtz Nani Biääd Loj Reben Hebreë

Agunii Xi'n Dios xtidx Xtadni

1 Neñ redxe galoo garen-garen mood guninäj Dios rextotadgoldoonu. Xhidajlza huält guniini por reniguii ni bacuaa xtiidxni. ²Neñ redxejre aguniini loonu por Xi'nni, lojzani badeed Dios yälrnibee guncheeni guedxliujre, badeedzani guira'ti lojni. ³Laani najc xtuxh xten xcälrdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴Ro'c gurej Xi'n Dios sa'csi sajcruni loj reangl xten Dios, sa'csi acua'ni yälrnibee si'c te bejn ni riannäj xhixten Xtadni. Lajzani sajcru lo relaj rexangl Dios. ⁵Sa'csi Dios di niäj b loj nicla tej rexanglni:

Luj najclu Xi'nä. Narä guleälu te guinibeelu.

Dizani niäj b xcuent nicla tej rexanglni: Narä gacä xtadni, laani gacni xi'nä.

⁶Niluxh che biädnäni Xi'n xtebni lo guedxliuj, guniini:

Guiraa rexangl xten Dios, ¡Colgan Xi'nä!

⁷Che gunii Dios xcuent rexanglni räjpni: Rujnni ruxhuñ rexanglni si'c bej, rujnni rbejajl rexmosni.

⁸Niluxh xcuent Xi'nni guniini:

Luj najc Dios.

Nabajnlu par tejpas;

xcälrnibeelu par tejpas najc te yälrnibesa'c.

⁹Ahuinälajzlu xhigabsa'c, dipaclu nichaglajz xhigabguijdx, ni'cni Dios ni najc Xtioslu, baniidrxu yälrbalajz lojlu quela loj resa'lu.

¹⁰Rniizani:

Luj, Dad, che guslojli bencheelu guira'ti, bencheelu cad soob guedxliuj, naazalu bencheelu reguibaa.

¹¹Laareni sinitlojreni, niluxh luj nabajnlu par tejpas.

Guiraareni siujx si'c riujx te lajd.

¹²Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajnlu, di rexijzlu ted.

¹³¿Gucxha räjp Dios lo te xanglni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

¹⁴Guiraa rexangl Dios najc sprit, ruxhal Diosreni te chayacnäjreni rebejn ni xca' yäl nabajn par tejpas.

Na'c gusaanni diidx ni ruslaani lo dojl

2 Ni'cni nanab jiuunu xtidx Dios ni abiejn diajgnu, te na'c guibicajnu lo xnezuyjni. ²Anajntu aguzojb diidx ni gunii rexangl Dios neñ redxe galoo. Luxh reni di nusoob diidxga bejnreni dojl, dxejc bateed Diosreni trabajw. ³¿Xho gac guibicaj xcäl'naj Dios yejcnu palga dinu jiu rextidx Dios xcuent yälruslaa lo dojl, ä? Ni Dad, Jesucrist basa'n diidxga lo rexpejn pacni, dxejc laareni basule'reni rediidxre loonu. ⁴Niluxh Dios baluii najc diidxga guliipac sa'csi bejnni resean, näjza yälrdxeloduxh, näjza xhidajl remilagrw. Badeedzani Sprit Dxan xtenni loj renani ahuililajz xtiidxni te gun tejpgareni garen-garen xtzunreni si'ctis ni rlaiz Dios gunreni.

Nani guläxtej yälruslaa bejn lo dojl

⁵Di Dios gudeed yälrnibee lo rexanglni te guinibeereni guedxliucoob ni cagasä'tnu naj. ⁶Guyu' tej ni bacuaa xtidx Dios lo guijtz, räjpni:

¿Chu najc niguii, te guinalajz Dios laani?

¿Chu najc xi'n niguii te jiädhuiizaluni?

⁷Nagabsi dxej guxiiru sajni lo reangl xhaguibaa, dxejcti badesaclu xcäl_nasa'cni, badesaclu xpala'nni, badeedzalu yäl_mibee lojni te guinibeeni guira'ti ni bencheelu.

⁸Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c. ⁹Alga rhuiinu Jesucrist, ni bejn Dios guxiiru sajni lo reangl xten Dios che guyu'ni lo guedxliuj balsi dxej. Che baluux Jesucrist xtzuumni lo guedxliuj, badeed Dios yäl_rdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

¹⁰Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rlajz chanäni xhidajl xi'nni xhaguibaa, ni'cni baxhal Dios xi'npacni Jesucrist te guläxtiejni yäl_rusläa bejn lo dojl che gudejndi trabajwduxh lo crujz.

¹¹Sa'csi Jesucrist, ni rujn chasanäj bejn te yäl_nabanya, näjza reni risanäj yäl_nabanya, tejtis najc xtadreni. Ni'cni di Xi'n Dios guitujy guiniini lojreni: "betzä".

¹²Scree caj lo xtidx Dios:

Chasule'ä lo rebetzä xho najclu, siliä'päza xpala'nlu lojreni.

¹³Räjpzani:

Sibäzä gacnäj Dios narä.

Ste lajt guiniini:

Bahuii loä näjza rexi'nä ni baniidx Dios loä.

¹⁴Te famil najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xtiejnni si'c beņguedxliuj, gujtzani te gujc bejnmi gunijt nani rnibee yäl_gujt, nalajznu, beņdxab. ¹⁵Te si'c basläani guiraa reni rdxejb yäl_gujt, najcreni si'c reni yu'tis loj xlamni guideb nabajreni, lacti

rdxejbreni yäl_gujt. ¹⁶Guliini dini niääd te gacnäjni reangl xten Dios, biäädni te gacnäjni guiralii rexajg toAbram. ¹⁷Ni'cni gujcn si'cpac te bejtznu, te gac gacni te bixhojz xten Dios ni rulasajz, te bixhozsa'cza xten Dios, si'cni rlajz Dios gacni te gusläani rebejn lo dojl. ¹⁸Sa'csi lagajc laani gudejndi trabajw, luxh baquuilza beņdxabni niujnni dojl, ni'c naj sajg gacnäjni renani ruquuil beņdxab gun dojl.

Jesucrist sajrcu loj Moisés

3 Ni'cni bejtznu, reni anabansa'c, sa'csi najctu reni gurejdx Dios gac xi'nni, colyembee Jesucrist ni baxhal Dios loonu. Laani najc bixhojz ni sajrcu, rusule'zani xtidx Dios xcuent nani ahuililajznu. ²Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuum Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. ³Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés. ⁴Yu' xtad guiraa refamil lo guedxliuj, niluxh gule'c Dios guiralii bejn, bencheezani guedxliuj. ⁵Basoob Moisés diidx si'c te mos, cuanäjni rexpēn Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuunga. ⁶Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

Yäl_rusilajz xten rexpejn Dios

⁷Ni'cni, si'cpac mii Sprit Dxi' xten Dios:

Naj, palga jiendaajgtu xse'ni,

⁸na'c gun-najdtnu lastootu si'c bejn rebejn ni bidxechnäj Dios che cuansajreni lo reyubijdz.

⁹ Ro'c bidxehnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.

¹⁰ Ni'cni laĵ ni cadxe'ch Dios loj rebejnġa, bejn Dios xhigab:

Sujiannäjreni xhigabguijdxreni, dina gusanä jiu'reni xcälrusilazä.

¹¹ Ni'cni bidxe'ch Dios lojreni, bejn Dios te xhigabduxh, di rebejnġa jiu' te gusilaznäjni.

¹² Bejtznu, colnatiro andi chu tejturu xhigabguijdx, rĵajz guibicaj lo Dios, ni nabajñ par tejpas, sa'csi dini chalilajz xtiidxni. ¹³ Ni'cni colgulijdx resa'tu guixe-guixee, laga najcni nadxej; te di chu tejturu gacnajd lastooni xcuent reyälrusguee xten redoĵl. ¹⁴ Sa'csi palga chanuunu sudzu'tznu lo xtidx Dios ni huililajznu che biemeenuni, dxejc yu' xhi rajpnu con Jesucrist. ¹⁵ Si'c caj lo guijtz:

Nadxej, palga jriendiajgtu xse' Dios, na'c gunnajdntu lastootu si'c bejn rebejn ni bidxehnäj Dios lo reyubijdz.

¹⁶ ĶChu reni'cni bidxehnäj Dios che biendiajgreni xtiidxni? ĶLa et laadi guiraa rebejn ni gulää Moisés guedx Egipto, ä? ¹⁷ ĶChuxh loj bidxe'ch Dios tiuu ijz lo reyubijdz, ä? ĶLa et laadi reni biajb lo doĵl, dxejc gujtreni, huijiajbreni nez loj reyubijdz, ä? ¹⁸ ĶChu loj räjpni dipacreni jiu' lo xcälrusilajzni? Loj reni di nusoob xtiidxni. ¹⁹ Ni'c ruhuiinu di nijajcni niu'reni lo yälrusilajz sa'csi direni nililajz xtidx Dios.

4 Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gunaan jiu' lo yälrusilajzga. ² Sa'csi nuure abiejn diaagzanu diidx ni rusia doĵl, sigajc biejn diajg rebejnġa; niluxh xlia'si biejn diajgreni diidxga sa'csi bacuadiajgreni niluxh direni nililajzni. ³ Luxh nuure ni ahuililaaznu siu'nu lo yälrusilajzga; caj lo guijtz gunii Dios rediidxre:

Ni'cni bidxe'chä lojreni, benä te xhigabduxh,

di rebejnġa jiu' te gusilaznäjreni narä.

Mase abaluuxni xtzuumni cheni birixtieĵli guedxliuj. ⁴ Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuumni, dxejcti basilajzni tebdxej.

Xhet bejndini dxejga.

⁵ Stehuält guniini:

Di rebejnġa jiu' te gusilaznäjreni narä.

⁶ Niluxh yu' reni gajd jiu' loj yälrusilajzga, luxh reni biejn diajgn diidx ni rusia doĵl di niu' sa'csi direni nusoob xtiidxni. ⁷ Ni'cni basoob Dios ste dxej gac "nadxej". Gudejdxhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jriendiajgtu xse'ni, na'c gunnajdntu lastootu.

⁸ Paru nudeed Josué yälrusilajzga loj rexpen Israel, diru Dios ninisac xcuent stee dxejre. ⁹ Naj ria'nza te yälrusilajz par rexpen Dios, ¹⁰ sa'csi nani riu' lo xcälrusilaznäj Dios, rusilajzani lo xtzuumni sigajc basilajz Dios lo xtzuumni.

¹¹ Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gacnajd lajz renani di nililajz.

¹² Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, räazni nez neñ redzujt näj yojb. Sigajcza xtidx Dios räaz nez cadre rlia' sa' xsprit näjza xaim bejn. Ruluuiza xtidx Dios rexhigab ni yu' lastootu bejn, näjza redzuun ni rĵajz lastootu bejn gun. ¹³ Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

Bixhojz ni sajcru najc Jesucrist

¹⁴ Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu

chalilaaznu xtidx Dios. ¹⁵Xpixhojznu ni sajrcu sajc gulaslajzni nuure te di jiajbnu lo dojl, sa'csi laani sigajcza gudejdni trabajw, baquii bendxabni te niujjni dojl, niluxh dini niujn dojl. ¹⁶Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjazani nuure.

5 Galooli guiraa rebixhojz ni sajrcu nabee lo rebejn. Bixhojz ni sajrcu rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlni nez lo Dios. ²Rdejdza bixhojz trabajw sigajc benguedxliuj, ni'c sajc ga'pni yälndolajz loj rebejn nani nayääl näjza reni abanijt lo Dios. ³Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojlni rebejn.

⁴Rut sajcdi gac bixhojz xcuentcani. Dios najc ni rbejdxni te gacni bixhojz, dxejc rudeedni xpala'nni lojni si'c badeedni lo Aarón. ⁵Si'cza di Jesucrist najc bixhojz ni sajrcu xcuentcani. Dios najc nani gulälajni gacni bixhojz ni sajrcu, räjpni lojni: Luj najclu Xi'nä, narä guleälu nadxej te guinibeelu.

⁶Scree cajza lo xtidx Dios stee lajt: Luj najclu bixhojz par tejpas sigajc gujc te niguii ni laa Melquisedec.

⁷Cheni gubajñ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajc nudzucajni lo yälgujt; Dios bacuadiajg xtiidxni sa'csi huinälaajz Jesucrist Dios. ⁸Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. ⁹Che bidzujñ dxej baluuxni guiraa redzuun ni rlaiz Dios gunni, laani gujcn nani rudeed laa bejn nani rusoob xtiidxni lo dojl par tejpas ¹⁰sa'csi Dios

gulälajni bixhojz ni sajrcu, gujcn bixhojz sigajc gujc Melquisedec.

Rxhunriezgw gusa'nni xcälirililajzni

¹¹Rlaiznu guiniinu xhidalduxhru didx xcuent Melquisedec, niluxh nagan-duxh gusule'nuni lojtu sa'csi nadyejctu, ditu gacbee. ¹²Agujc xchej huililajztu rediidx xcuent Jesucrist. Ariäjñ gusule'tu rediidxre naj, niluxh alga rquinnrutu chu gusule' rediidxre lojtu stehuält, luxh rediidxre najc rediidx guyasi xten Dios. Agusactu si'c báz. Rlaiztu yäsactu le'ch lacuaa gautu yäjt, bää; nalajznu, redidxnagajñ xten Dios. ¹³Reni najc si'c báz, rä' le'chtis, direni gumbesa'c redidxxa'c xten Dios. ¹⁴Niluxh reben guyajñ rajw yäjt. Sigajcza redidxnagajñ xten Dios najc par rebejn ni aguyajñ lo xtidx Dios, renani ayu' xcäriejnñi, arumbeereni nani najc dzunsa'c, nani najcza dzunguijdx.

6 Nanab guisieedrunu xtidx Dios te churu xcäriejnñu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechlaiz, xcuent redzuun ni rujñ rejt bejn, näj yälirililajz xtidx Dios. ²Na'c guluiitisnu xcuent yälrobnis, näj yälrudzubnaa yejc bejn, näj xcuent yälrbajñsac rebengut, näj xcuent yälguxhtis par tejpas. ³Alga do'o guisieedru xtidx Dios te churu xcäriejnñu, palga si'c guniidx Dios jiennu.

⁴Yu' bejn ni abianij xcäriejnñi, ni acua' reyälñasa'c ni rudeed Dios, ni rbäjz Sprit Dxañ xten Dios nen lastooreni, ⁵luxh bidxaglaizreni xtidx Dios näj yälñibee xten Dios ni churu jiäd. ⁶Palga laareni guibisacreni lo sa' yälñabajñ ni gojpreni galoo, diru gacdi guidxaa xmodreni stehuält, sa'csi dxejc sajcn si'c ni lagajc laareni gucuasacreni Xi'n Dios lo cruzj, nalajznu susanxtujyreni Jesucrist nez loj rebejn. ⁷Ben guedxliuj ni biejn diajgn najc si'c najc yuj ni rä' nis che riajbtis nisguij. Palga yujga gudeed yäl-

nasa'c loj reni rujn dzuun lojni, sunle' Dios yujga. ⁸ Niluxh palga gudeed yujga ganax yaguejch näjza cuaan ni xhet sajcdi, xlia'sini, sujñ rebejn gac nadeni te checni.

Diidx ni rusudzu'tz lastoonu

⁹ Mase rniinu scree lojtu, anajñnu huililajztu xtidx Jesucrist näjza xtiidxni ni ruslaa lo dojl. ¹⁰ Sa'csi Dios najc ni rujñ yälguxhtissa'c, diza lajzñi jääl ni rujntu la'tu näj yälsanälajz ni rajptu par laani che racnäjtu rebejztu lo yärlililajz, luxh guixe-guixee si'c rujntu. ¹¹ Naj rñajznu teygatu chanuu ga'p lagajc yärlbalajzre dxe lultli, te gac guiraa ni cabäjztu. ¹² Rñajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yärlililajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

¹³ Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcru lojni. ¹⁴ Scree gunii Dios: "Guliä sacnäá luj, sunidxäza xhidajl xi'ñlu." ¹⁵ Cheni aguläjz Abram xchej, gusojb diidx, cua'ni nani gunii Dios lojni. ¹⁶ Sa'csi cheni rñilipac bejn te diidx, rñiireni diidxga por laj ste'ca bejn ni sajcru lojreni, sas che rusä'treni laj bejnğa xhetru yu'di xhi gunreni biey. ¹⁷ Rñajz Dios gacbeepac rexagdo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajñi che bia'nni diidxga. ¹⁸ Ni'cni naj yu'tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yärlbedxilajz loj renani gubig-guxun lojni, loj reni sanuu loj yärlililajz xtiidxni nani abaniidxni loonu por lagajc lajñi. ¹⁹ Laa ni'cni cabääznu ni rusudzu'tz lajznu si'c duu-guiib con ancl ni rñiazdzu'tz te barcw. Si'c rusudzu'tzni lastoonu te jionnu cadro yu'ni detz ladró.

²⁰ Lagajc ro'c biu' Jesucrist xcuent nure, te galooli baxhalni xnez Dios loonu, te gujñi bixhojzro par tejpas si'c gujzca bixhojz nani laa Melquisedec.

Jesucrist najc bixhojzro si'c najc Melquisedec

7 Galoo che guj Melquisedec reii xten guedx Salem, gujñi bixhojzro xten Gueb Dios. Che gubi' Abram che gulujx guer cadro bagu'tni reñei ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. ² Dxejcti bejn Abram tzuu cuaa guiraa ni bejnñi gaan, te badeedni tej cuaani loj Melquisedec. Laj Melquisedec säloj "reii ni runsa'c yälguxhtis", dxejtiru reii xten guedx Salem sälojzani "reii xten yärlbedxilajz". ³ Baluiilojni lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujñi si'c najc Xi'n Dios. Najetizani bixhojzro par tejpas.

⁴ Naj colhuii, lacti te bensa'c, te benro najc Melquisedec. Lojni badeed toxtadgoldoonu Abram tejsa ni sajcru lo tejsa tzuu ni bejnñi gaan. Luxh Abram najc bejn ni sajcru lo rexpejnñi. ⁵ Leii xten Moisés, rñibee xca' rebixhojz ni najc xfamil Leví te cuaa lo sa'reni si'c ni badeed toAbram loj Melquisedec, mase najczeni rexagdo Abram. ⁶ Niluxh di Melquisedec gac xfamil Leví. Niluxh badeed Abram te cuaa xhixtenni loj Melquisedec. Dxejcti benle'ni Abram ni biannäj xtidx Dios. ⁷ Naj rut sajcdi guinii garenca, sa'csi nani sajcru runle' yeje nani guxiiru saj. ⁸ Naj rebixhojz ni rca' tejsa lo tzuu ni rajpreni, najc bejn ni rejñt. Niluxh rñii xtidx Dios xcuent Melquisedec ni cua'te cuaani galooli: najcni si'c te bixhojz nani nabajñ par tejpas. ⁹ Ni'cni sajç guiniinu xcuent Leví nani rca' te cuaa, lagajc laani agudijx te cuaaga che badeed Abram tejsa yeje

tzuuga lo Melquisedec. ¹⁰ Sa'csi mase gajd xi'n to Abram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni sug-anäjni rexajgni.

¹¹ Rexpelj Israel cua' leii che gujc bixhojz relevitas, reni najc rexi'n to Aaron. Paru ni ajc niujnreni nibansa'c rebejn ni huisanäj leiiga, dirureni niquini niäd stee bixhojz ni di gac si'c Aaron, alga si'c najc bixhojz Melquisedec najcni. ¹² Sa'csi cheni rdxaa te cuaa bixhojz nanab najza leiiga guidxaa. ¹³ Niluxh mii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga. ¹⁴ Huenliisi najnnu najc Dad Jesucrist te bejn xten xfamil to Judá, niluxh di Moisés ninii gac te rexpejn Judá bixhojz.

¹⁵ Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. ¹⁶ Luxh dini najc bixhojz si'c rniilei ni guyu' dxejc. Laani guj-cni bixhojz xcuent yälrnibee ni najc par tejpas, ni rut gacdi gutzujl. ¹⁷ Scree najc diidx ni gunii Dios xcuentni:

Luj najclu bixhojz par tejpas si'c gujc te nigui ni laa Melquisedec.

¹⁸ Dxejcti gunijt leii sa'csi xlia'si guj-cni, di najcdi niujn bejn si'cni rniini. ¹⁹ Di xleii to Moisés niujn gaan nibansa'c bejn. Naj lacuaa leiiga rajpnu te xcälirililazsa'c; ni'c rujn rbignu lo Dios.

²⁰ Dios bejn gacni bixhojz con xtidxliini, ni guniini con lagajc lajni. ²¹ Stecuua rebixhojz gujcreni bixhojz niluxh et con didxliidire, con laj te benro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni, niluxh dini gusiech lajzni, räjpni:

“Luj najclu te bixhojzro par tejpas, lagajc si'c gujc Melquisedec.”

²² Ni'cni, Jesucrist najc ni rujn rile' rediidxre, luxh diidxre sajcruni loj xleii

Moisés. ²³ Guyu' xhidalduxh stecuaa rebixhojz, sa'csi rejtreni, digacdi chanu-ureni gacreni bixhojz. ²⁴ Niluxh Jesucrist rajpni yäl nabajn par tejpas, naj najczani bixhojz par tejpas. ²⁵ Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajnni par tejpas te canabni lo Dios xcuent laareni.

²⁶ Jesucrist najc bixhojzro nani rqui-innu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa. ²⁷ Dini gac si'c stecuaa rebixhojz ni nanab ju'tan guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojlni rebejn. Niluxh Jesucrist tejtis huält gudejdni trabajw, bejnnini cheni cuajni lo cruzj, baxhe'ni xtiejnni xcuent nuure, gujtni. Si'c gudijxni xtojlnu par tejpas. ²⁸ Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

Jesucrist najc nani rusiäjil diidx

8 Diidx ni sajcruloj rediidx ni caniinuo najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. ² Neñ yu' ni najc dxan, neñ guidoo ni benchee Dios yu' bixhojzre, xhet nendi guidoo ni runchee reben lo guedxliuj. ³ Guiraa rebixhojz rajc rudeedreni gojn lo Dios, rajcza ju'treni guidxaa te gusejcreni lo Dios xcuent xtojlni, ni'cni nanab ga'p Jesucrist xhi gudeedni lo Dios. ⁴ Paru suga'ni lo guedxliujre, nicla bixhojz dini najc, sa'csi yu' bixhojz ni rudeed regojn si'c ni rnibee xleii Moisés. ⁵ Niluxh redzuun ni rujn rebixhojzga najc si'c te balaa xten guirati ni yu' xhaguibaa. Najnnu najcreni balaa sa'csi balijdx Dios Moisés cheni agojl gunni

xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinai.”⁶ Niluxh xpixhojznu Jesu-crist rujn dzuun ni sajcru, sa'csi najcni nani suga' galäii xnezyuj Dios loj reben guedxliuj, gusule'ni diidx ni gunii Dios cheni bejni xhigabcoob, basa'nni didxcoob loj reben guedxliuj. Luxh didxcoobre sacduxhruni.

⁷Paru niäc nusiejch leii ni badeed Dios galooli lo Moisés lajz rebejn, di niqiin niujn Dios ste xhigabcoob.
⁸Niluxh bahuii Dios xhet cayunsa'c di reben guedxliuj, dxejc räjpni:

Naj rmlia sidzujn redxey che gunä stee xhigab,
jia'n stee diidx loj rexpejn Israel näjza loj rexpejn Judä te xca'reni didxcoob.

⁹Xhet si'c di xhigab ni benä che bia'nä diidx loj retoxtadgoldooreni nen redxey ni gunazä naareni te gulääreni lajdx reben Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

¹⁰Niluxh diidx nani runä xhigab rlazä jia'n diidx loj rexpejn Israel nen redxeyre gac scree, räjp Dad:

Sunä chu rexleia lo xcäriejnreni, su-cuaäza xtidxä nen lastooreni.

Dxejcti narä gacä Xtiosreni, laareni gac rexpenä.

¹¹Rut chu tejdi guluii sa'ni, nicla bejtzni, nicla chu stee bejn gäbreni, “colyembee Dad”,

sa'csi alanumbee guiraareni narä, rebaz sigajc rebengool.

¹²Narä sulaslazäreni susiaä redzundxudx ni bejnreni, diru lazä guizaj rextojlneni, nicla latzsiäj ni bejnreni.

¹³Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

Xquidoo guedxliujre näjza guidoo xhaguibaa

9Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre. ²Guc-chee guidoo dxejcti gojl te ladro galäiini te gujcn ti'o'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le' ³Ni rojp yu'ga najc dejtz ladro, ro'c najc yudxanduxh. ⁴Ro'c suga' te guiib cadro ru' yaal. Najcni ganax oor. Ro'c yu'za te guiin ni laa “arco de pacto”, najcwni ganax oor, sigajc dejtzni, sigajcza nenni. Nenga yu' te bo't ganax oor. Nen bo'tga, yu' yätxtiil ni laa mana. Lagajcza nen guijnga yu' bar xten toAarón nani biga', guyu' bid lojni, näjza guij cadro bacuaa Dios xleii toMoisés. ⁵Yejc guijnga caj ti'o'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusäuu con rehxigareni cadro ruxhe' bixhojzro xtiejn guidxaa xcuent xtojlni rebejn. Ro'cti di gacdiru guiniirunu xcuentreni naj.

⁶Che gulujx gusucheereni, riu' rebixhojz si'csi si'c nen guidoo, nen yudxan te rajnreni Dios si'c gunibee Dios. ⁷Niluxh nen stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen teb ijz, te chanäni xtiejn reguidxaa ni gudeedni te jia xtojlni näjza te jia xtojlni rebejn ni najc xpejn Israel. ⁸Luxh guiraa reni'c ruluui Sprit Dxan xten Dios loonu, gajd yudxanduxh guxal che sugasiyc yu' ganid, yu' ni laa dxan, cadro sanuu rajnreni Dios. ⁹Guiraa ni gujc galoo najc si'c te balaa, baluiini xho gacni naj. Regon näjza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtojlni rebejn. ¹⁰Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn te ria ganaxtis tiejxhrene

che guidzujnli dxej cheni guchaa Dios guira'ti.

¹¹ Niluxh abiääd Jesucrist, naj laani najc bixhojzro xcuent redidxcoob ni sajcru naj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani gac guidoo guedxliujre. ¹² Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejnmi ca'ni biu'ni yudxanduxh tejtis huält, te si'c baslaani nuure lo dojl par tejpas. ¹³ Reni basia xtojł bejn galoo najc redec: xtiejn regon najza redxib, naj cobdäj xten reguidxaa ni rejc nen guidodxanga; bastiojbni guiro'preni yejc reni yu' xtojłni. ¹⁴ Palga basia redec xtojł bejn, aticaxh xtiejn Jesucrist sajc gusia dojl, sa'csi rajpni yalnabajn par tejpas. Lagajc laani badeedni xtiejnmi lo Dios. Niluxh najcni renya sa'csi dini niujn dojl, rusiazani xcäriejnnu xcuent retzuun ni xhet sajcdi, te chunu loj Dios ni nabajn par tejpas.

¹⁵ Ni'cni Jesucrist najc nani suga' galäii: nez lo Dios najza nez loj reben guedxliuj xcuent didxcoob. Yälgujt xten Jesucrist najc te gudzucajni xtojł reben najza xtojł renani bejn si'cni caj lo leii, te xca' guiraa reni agurejdx Dios yalnabajn par tejpas, si'c bia'n diidx galooli. ¹⁶ Didxcoobre najc si'c che rłajz tej bejn guinibee xho guidis xhixtenni che agojl guetni, nanab gucuaa bejnga lo te guijt xho guidisni, dxejcti gucuaani lajni. Niluxh xhet sajcdi guijtza che gajd bejnga guet. ¹⁷ Xhet sajcdi guijtza che nabansijc nani bejnmi. Sajcni che agujt bejnga. ¹⁸ Ni'cni che bia'n Dios diidx loj rexpejn Israel galoo, gujt te man te bixe' rejn. ¹⁹ Che gulujx gunii Moisés redidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga najza nis, bahuajdxni guid-xiil xniaa najza te la' yajg balagbäz, hysopo, dxejcti bastiojbni rejn yejc guijt cadro

caj leii, najza yejc rebejn. ²⁰ Dxejc guniini lojreni: "Rejnre najc seen sile'pac didx ni abaxhał Dios lojtu."

²¹ Sigajcza bastiojb Moisés rejn guidoo naj guiraa renani rquiin rebixhojz che rajpreni Dios. ²² Leii xten Moisés rnibee jia guiralii con rejn, palga di rejn guixe', di xtojł bejn jia.

Xtiejn Jesucrist rudzucaj dojl

²³ Ni'cni biquinpac gujt remanre, bixe' xtiejnmi te basiani reni najc xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajcru. ²⁴ Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios. ²⁵ Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejnmi. Di guiquiin jiu'runi balti huält. ²⁶ Palga nanab gunni si'cni rujn rebixhojz, sajpmi por nejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejnmi lo Dios cheni gujtni, cuajni lo cruzj te si'c badzucajni par tejpas xtojł rebejn. ²⁷ Guiraa bejn nanabpac guetreni tejtis huält, dxejctiru sidejdreni yälguxhtis xten Dios. ²⁸ Sigajcza tejtis huält badeed Jesucrist xtiejnmi ni bixe' lo cruzj te badzucajni xtojł xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcälruslaa renani cabäjzni.

10 Sa'csi leii xten toMoisés najctis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gusa'cni rebejn nani guibig lo Dios, sa'csi di xtiejn man

gudzucajpac rextojlreni. ²Paru niajc nibicajpac xtojł reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtojłreni, diru xcäriejnreni gumbec dojl. ³Niluxh yälrejt man näj yälruudeedreni rejn casob ijz rusnajtisreni lajzreni xcuent dojl. ⁴Sa'csi digacdi gudzucajpac regon näjza xtiejn redxib xtojł bejn.

⁵Ni'cni che biääd Jesucrist lo guedxliuj räjpni lo Dios:

Di rlaizlu xtiejn guidxaa niclaza regon niluxh abejnlu gacä nigui-guedxliuj.

⁶Dilu nichaglaiz yälrejc xten guidxaa niclaza yälruudeed rejn, niclaza gojn ni rudeed rebejn te gusiani xtojłreni.

⁷Dxejc räpä: “Narä basiälä te gunä si'cni rlaizlu Dad, Dios, (si'cni caj neñ reguijtz xcuent ni sacä).”

⁸Che gulujx gunii Jesucrist diidxga: “Di rlaizlu, dizalu guidxaglaiz xcälrejt guidxaa näjza regon niclaza xcälrejc guidxaa, niclaza yälruudeed rejn xcuent xtojł bejn si'cni caj lo leii gun bejn.” ⁹Dxejcti räjpni: “Narä siälä, te gunä si'cpac ni rlaizlu, Dad Dios.” Dxejc badzucac Jesucrist nani gujc galoo, te guläxtiejni didxcoob ni bia'n Dios loonu naj. ¹⁰Abasia Dios lastoonu sa'csi bejn Jesucrist si'c rlaiz Dios cheni baxhe'ni xtiejn ni lo cruiz tejtis huält par tejpas.

¹¹Guiraa rexpixhojz Israel rujnreni dzuun guixe-guixee te rudeedreni laga-jctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl. ¹²Niluxh Jesucrist tejtis huält baxhe' xtiejn ni lo cruiz te badzucajni xtojł rebejn par tejpas. Naj agurejni xladbee Dios cadro rnibeeni.

¹³Ro'c cabäjzni guiraa ni rdxe'ch lojni te cuereni ladzni'ni. ¹⁴Ni'cni tejtis huält cuajni lo cruiz te basiani par tejpas guiraa renani ahuililajz xtiidxni. ¹⁵Sigajcza rnii Sprit Dxan xten Dios loonu; najni:

¹⁶Diidx nani jiannääreni neñ redxejre gac scree, naj Dad Dios: sucuaä rextidxä lo xcäriejnreni, susäläza xtidxä neñ lastooreni.

Dxejcti räjpni:

¹⁷Diru lazä guizaj rextojłreni nicla rextolguijdxreni.

¹⁸Ni'cni, cheni abia xtojł bejn, diru quiquini gudeedreni guidxaa te jia rextojłreni.

Nanab guibignu lo Dios

¹⁹Ni'cni resa'nu, na'c guidxejbtu, sajc jiu'nu yudxanduxh cadro bixe' xtiejn Dad Jesucrist nani abadeedni lo Dios. ²⁰Naj yu' te nezyuj, nezsiucoob, nezyuj xten xcäl'nabancoobnu ni baxhalni che badzucajni ladroga. Ni'c säloj cheni biu'ni neñ yudxanduxh, badeedni lagajc xtiejn ni lo Dios. ²¹Jesucrist najc xpixhojzronu nani rnibee rexpejn Dios. ²²Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yälrlililajzpac abia lastoonu xcuent rexhigabgujdx, abidiibza tiejxhnu lo nisya. ²³Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴Naj do'o guihuii xho jiennu te gacnä j sa'nu te si'c chonälajznu sa'nu nägajcza te jiennu ganax dzunsa'c. ²⁵Na'c jiennu si'c rujn rebejn nani diru jiäd che rdxagsa'nu. Nanab guiliidxnu resa'nu sa'csi naj asiäddzungejx dxej ni guibi' Dad Jesucrist.

²⁶Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejc. ²⁷Dxejcsii guidxeebtisnu guiläznu yälguixhtisduxh xten Dios näj guiboo ni guze'c renani rdxe'ch loj Dios. ²⁸Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o choñ ni nancheepac, räjpreni dini nusoob leii, gujt bejnğa, rut balaslajzdini. ²⁹Maazru yälrusacsí-

duxh nanab ted renani ruläj yejc Xi'n Dios cheni direni gusobdiajg xtiidxni. Alga ruro'nreni xtiejnni ni baxhe'ni lo cruzj te basianini. Rusanxtujyzani Sprit Dxañ xten Dios nani badeed didxcoob lojni. ³⁰ Anancheenu gunii Dios: "Narä susquixä bejn; loä siguijx bejn", räjp Dios. Stehuält guniini: "Dad sujñ yälguhtis rexpejnñi." ³¹ Cosduxh gac bejn ni jiajñ ladzñaa Dios nani nabajñ par tejpas!

³² Niluxh colsnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. ³³ Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw. ³⁴ La'tu banaj lajztu renani yu' latzguiib, guideb yälrbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyälñasa'c ni sajcru, niluxh yu'ni par tejpas. ³⁵ Na'c gunijttu xcälñrililajz xtidx Jesucrist, sa'csi yälñrililajzga gun xca'tu yälñabajñ par tejpas. ³⁶ La'tu nanab cuedxitu te che abejntu ni rlañz Dios, dxejc xca'tu nani aguniini guniidxni. ³⁷ Sa'csi xtidx Dios ni bia'n rñii:

Asiäddzũgajxhpc dxej ni jiaädni,
asiäddzũgajxhpc dxej ni jiaäd nani
siaäd, dipacni gaclaa.

³⁸ Renani nabansa'c sibannäj yälñrililajz, niluxh palga yu' chutej ni guidxejb chalilajz,

dini'c gun guibaa lazä.

³⁹ Niluxh nuure dinu gac si'c reni rusaan yälñrililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

Yälñrililajz

11 ¿Xhini'c najc yälñrililajz?
Yälñrililajz säloj cabääznu sajcpac tejni gajd gac, yu'pacza ni mase dinu

fiini, najcni si'cni abahuiinuni. ² Dios huinälajz retoxtadgooloonu sa'csi huililajzreni xtiidxni.

³ Sa'csi rililajznu, najnñu benchee Dios reguedxliuj, bencheeni guibaa, bencheezani guiraa nani rhuuinu. Con xtiidxtisni bencheeni nani dinu guihuii.

⁴ Gojpza toAbel yälñrililajz badzubyaalni rexquidxaani lo Dios. Yälñrbijbyaal xtenni sajcru loj yälñrbibyaal xten toCañ. Ni'cni gunii Dios najc toAbel bensa'c. Naj mase agujt Abel, sanuutis racbeenu xcuent yälñrililajz ni gojpni.

⁵ Sigajcza gojp Enoc yälñrililajz, ni'c sinä Dios Enoc xhaguibaa, guideb nabajñni, te na'c niejtni. Diru rebejn nidxälñi sa'csi asinä Diosni xhaguibaa. Luxh räjp Dios xcuentni che gajd Dios jinäni, gubansa'cni, baspaani lajz Dios. ⁶ Rut chu tejdi sajg guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzani sudeed Dios xcälñasa'cni loj renani rguilni, nalajznu renani rlañz gumbeepac Dios.

⁷ Gojpza toNoé yälñrililajz. Che räjp Dios lojni siajbpac nisguij ni gajdreni fii, huililajzni. Bejnñi si'c ni räjp Dios. Bidxejbni sa'csi najñi rusoob Dios xtiidxni, ni'c bencheeni te canuduxh te di niejt rexi'nñi. Sa'csi gojpni yälñrililajzga, bejnñi gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yälñabansa'c ni siaäd xcuent yälñrililajz.

⁸ Sa'csi gojp toAbram yälñrililajz, ba-soobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuääzñi ro'c. Biriini lajdxni, mase dini gan caro chääni.

⁹ Gojp toAbram yälñrililajz, ni'c huilajzñi si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Guläjzñi nen reyuguijd, sigajcza bejn toIsaac näjza toJacoob, sa'csi

näjza lojreni räjp Dios gudeedni yujga. ¹⁰Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹Sigajcza gojp toSara yärlililajz te mase anajcni bengool niluxh agudejd chu xi'nni, cua'ni yälrnibee xten Dios te gujnci nan, guyul' te xi'nni, sa'csi huililajzi susoob Dios xtiidxni. ¹²Ni'cni mase siäddzongajxh dxej ni guet toAbram, guyu' xhidalduxh xajgni. Si'c rebalxh-aguibaa näj si'c reguibäzlule' xten yujxh ni tre' ro' nisdoo, si'c najcreni xhidalduxh, nicla gac guigabreni.

¹³Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yärlililajz, bahuiireni lo yujga zitro, ni'c bibalajzreni, sa'csi anajreni najcreni benzijt, cansajsireni lo guedxliuj. ¹⁴Reni nii si'c, nniireni caguilsijcreni cadro gac lajdxreni. ¹⁵Paru niujnreni xhigab lajdxreni najc guejdx cadro biriireni, pet niajc nibisacreni ro'c. ¹⁶Niluxh laareni rlajzreni te lajdxreni ni sajcru, nalajznu lajdx Dios xhaguibaa, ni'c rguuilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadro cuääzreni xhaguibaa.

¹⁷Gojpza toAbram yärlililajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbnii gugu'tni xi'nni lacuaa xhiil, luxh Dios ni najc tejtis aräjp lojni galooli: ¹⁸“Isaac guniidx chu xhidajl xajglu, xagdoolu.” ¹⁹Sa'csi nanchee toAbram rajp Dios yälrnibee te guspajnni rebengut. Luxh si'c'za cuasacni xi'nni, ascanu loj rebengut cuasacni xi'nni.

²⁰Näjza toIsaac gojp yärlililajz benle'ni toJacooob näjza toEsaú, räjpni xhini'c gun tejjarenii. ²¹Gojpza toJacooob yärlililajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni

te si'c gojnni Dios. ²²ToJosé gojp yärlililajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtzujtni.

²³Gojp rexcuzajn Moisés yärlililajz, ni'c cheni gojl Moisés, bacua'tzrenini chon bäii, sa'csi bahuiireni bäzdaanni. Direni niu xtidx reii ni gunibeeni, räjpni ju'treni bäz niguii. ²⁴ToMoisés gojp yärlililajz, ni'cni che aguroobni di rlajzni nirilajni xi'n xindxa'p reii xten Egipto. ²⁵Bejnii xhigab tednäjni trabajw rexpejn Dios lacuaa niujnni redzuun ni rchaglajz rujn reben Egipto, sa'csi najc reni'c dojl, luxh tera'tsi ruspaareni lajz bejn. ²⁶Par laani maazru sajz tedni lagajc trabajw ni gudejd Jesucrist lacuaa niajpni reyäl'nasa'c xten Egipto sa'csi laani cabäzjtisni reyäl'nasa'c nani churu gudeed Dios lojni. ²⁷Gojp toMoisés yärlililajz biriini lajdx reEgipto, dini nidxejb yälrdx'e'ch xten reii, huinuutis gusudzu'tzni si'cni najc xhigabni, ruhuiini loj nani di guzen, nalajznu Dios.

²⁸Gojp Moisés yärlililajz bejnii lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. ²⁹Gojp rexpejn Israel yärlililajz gudejdreni galäii nisdoo ni laa nisdoxniaa luxh asdoo loj yubidz rsiajreni si'c gudejdreni. Niluxh che rlajz rebejn Egipto nidejd, gubi' nis, dx-ejc gulo'reni nen nis.

³⁰Xcuent yärlililajz gurebän paderguij xten guedx Jericó, cheni basa' gajdz dxej caded huält rexpejn Israel guejdxga. ³¹ToRahab, te gunaguijdx, gojppzani yärlililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³²¿Xhiruxh guiniä? Di galdi guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, näjza xcuent

retoprofe't. ³³ Guiraareni gojp yälirililajz ni'c bejnreni gaan xhidajl reguejdx, bensa'creni yälguختis, cua'reni xcälracnäjä Dios ni bia'n diidx xca'reni, basäureni ro' rebeedz. ³⁴ Guyu'reni nen te balduxh luxh xhet gujcdireni, gojl baxunreni te di nejtrene con espaad. Reni gujc bejrdxajg, guzutzu'tzreni gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni. ³⁵ Guyu' regunaa ni cuasac rextogoolreni, gubansacreni lo rebengut.

Sgaiireni gujt xcuent yälrusacsí lacuaa nicäjbreni nusiech lajzreni te nusläa bejnreni sa'csi rlajzreni xca'reni stee yäl'nabajn ni sajcrü. ³⁶ Sgaiireni gudejd trabajw guniyaj bejnreni, gudinnäjä bejnreni chiir, cuaduuzareni caden, guyu'zareni latzguuib. ³⁷ Guyu'za reni gujt che bacuaa bejn guj yejcreni o che gujcreni tio'p la' con sier. Guyu'za reni basacsí bejn te guro'nreni yälirililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdejdreni trabajw rusacsí bejnreni. ³⁸ Sa' rebejnga di nungäjl reben guedxliuj niääd rebejnga lojreni. Cuanzaj rebejnga nez lo reyubijdz cad xhet yu'di xhi gaureni nicla nis te yärene; cuanzajreni nez nen redajn, nez nen rebiliää näj nez nen guedduxh ni yu' nen yuj. ³⁹ Guiraa rebejnga gojp yälirililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, ⁴⁰ sa'csi bejn Dios xhigab gunni te dzunsa'c lojreni. Bejn Dios xhigab guniidxni yäl'nasa'c loonu, naj tejsi guica'nu con laareni nani bia'n diidx guniidx Dios.

Guihuitisnu lo Jesucrist

12 Ni'c najcni si'cni suga'nu galäii guiraa rebejnre luxh cahuiireni

xcälirililaaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcäl'nabajnnu, te di jieednu chosaanu nez lo nezyuj ni sasanäanu nez cadro chonnu. ² Do'o guihuidzu'tz nez loj Dad Jesucrist nani guläxtiej, nani guluuxza xcälirililajznu. Jesucrist gudejd trabajw lo cruzj, dini nitujy gujtni lo sa' yälgujtgä, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadro rnibeeni.

³ Colyujn xhigab la'tu xho gudejd Jesucrist ladznaa reben dojl, te na'c guidxajgtu, na'ca jieedtu laj ni cabäjtuni. ⁴ La'tu gajd xtiejntu guixe' lo yälrucuanäjä dojl. ⁵ ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcäl'naj Dad niclaza jieedlu che tilnäjni luj.

⁶ Sa'csi si'c runnaj Dad renani sanälajzni, rujnni ríaa guiraa renani rca'ni si'c xi'nni.

⁷ Palga gatijp lajzlu lo xcäl'naj Dios, sica'ni luj si'c xi'nni, sa'csi ¿chu dad di gunnaj xi'nni? ⁸ Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redolguijdx. ⁹ Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rlajzni. ¿Xhicuent dinu cuadiajg xtidx xtadnu ni yu' xhaguibaa te si'c jia'pnu yäl'nabajn, ä? ¹⁰ Xtradnu lo guedxliujre bennajreni nuure tio'p-chon dxej, te gac gusoobnu xtiidxni. Niluxh si'c runnaj Dios nuure te jia'pnu te yäl'nabanya, te gac nayazanu sigajc najcni laani. ¹¹ Guliini xhet xhi yäl'najdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yäl'najga rusoob xtiidxni, rca'reni te yäl'nabanya ni rbecdxilajzreni.

Riez guze'ni xtidx Dios

¹² Ni'cni colsudzu'tz renaatu ni abadxajg, colsudzu'tz yecxhijbtu ni abadxajg, ¹³ te colquuil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴ Colquuil xho cuedxinäjtu guiraa rebejn. Colchanä te yäl nabanya, sa'csi renani di guibanyadi, digacdi fiireni loj Dad Jesucrist. ¹⁵ Colhuisa'c te di gunijt chutejtu lo xcäl racnäj Dios, colnatiro gac chu tejtü si'c te cuanlaa ni rujn daan, sa'csi sa' bejnga suxhiñni guiraa renani ahuililajz. ¹⁶ Nicla tejtü na'c ga'p stee guanaa te laad, nungäj cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl nasa'cni ni najc xtenni sa'csi najcni xingan galoo xtadni. Bato'nini te cua'ni yälrajwtis. ¹⁷ Anajntu, cheni rlanjni niunle' xtadnini te nica'ni ni najc xten xinganga looni, dini nica'ni mase guc-huin lajzni, binduxhni. Dxejcti diru niajcdi nica'nini.

¹⁸ Colnatiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäjäy, nacäiboo, cayajcza bedonduxh. ¹⁹ Diza diajgtu niejn xse' trompet, xse' Dios si'c biendiajg rexepejn Israel agujc xchero. Luxh che biejn diajgreni rediidxga, direni nutiplajz, gunabduxhreni na'cru guiniini lojreni. ²⁰ (Sa'csi direni nutiplajz diidx ni caniini, räjpni: "Palga ted te mantis guläj xhuj dajnga, colju'tni con guij.") ²¹ Te yäl nadxebduxh najc nani guzen ro'c, lagajc toMoisés räjp: "Cayacditä yälrdxejb."

²² Niluxh la'tu agubigtu lo dajn xten Sión, cad najc lajdx Dios ni nabajnpac, nalajznu guedx Jerusalén ni yu' xhaguibaa cadro yu' xhidalduxh xangl Dios, ²³ cadro re' reni calä'p xpala'n Dios. Ro'c re'za reni najc xi'n Dios, renani acaj lajzni xhaguibaa. Agubigzatu lo Diospac, ni najc Juejz xten guiraanu, näjza loj

resprit xten rebejn nani abasia Dios te anajcreni bennasa'c. ²⁴ Agubigzanu loj Jesucrist nani suga' galäii nez loj Dios näj benguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jiäj lajz Dios, luxh ni'c sajcrü loj nani rniab xtiejn toAbel. Xtiejn toAbel rniab quix nani bagu'tni.

²⁵ Ni'c colnatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siäd guedxliujre, xho jiennu tedbianu palga guilälaznu nani ruluii nani siäd xhaguibaali? ²⁶ Xse' Dios basniib guedxliuj galooli, niluxh naj rnisacni: "Ste huält susnibä xhet ganaxdi guedxliuj, susnibä näjza xhaguibaa." ²⁷ Che gunii "ste huält", ni'c säloj guibicaj renani benchee Dios ni rac rniib, te jia'n renani digacdi guiniib. ²⁸ Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yälrdxejb näjza yäl nadolajz, ²⁹ sa'csi Xtiosnu najc si'c te balduxh ni ruse'c, ni runitlojza.

Xho guspaa bejn lajz Dios

13 Colchanuu lo yäl rinälajz sa'ni. ² Di gusaantu gudeedu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl Dios rolijzreni, niluxh direni niacbee chu najczeni.

³ Colsnaj lajztu reni yu' nen latzgüiib, ascanu la la'tu ni yunäreni latzgüiib. Colsnajza lajztu renani basacsí bejn, ascanu la la'tu ni cagusacsíreni sa'csi näjza la'tu najctu benguedxliuj si'c najczeni.

⁴ Colga'p xpala'n yäl guchnaa te guiban-nayatu con chäältu sa'csi sujn Dios yäl guxhtis rebejn ni resnäjä chääl bejn näjza reni rusguee rebenxteb.

⁵ Na'c chanälajztu meel, colguibalaznäj ni rajptu, sa'csi Dios agunii: "Di-

pacna gusanälu, dizana cuälazälu.”⁶ Ni'c dinu guidxeb guiniinu:

Dad ni yu' xhaguibaa najc ni rcanäj narä; dina guidxebä xhitis ni gunnäj bejn narä.

⁷ Colsnaj lajztu renani baluii guibaŋsa'ctu, ni basule'za xtidx Dios lojtu; colhuii xho nabajñreni te sigajcza colchanä xcälirilajzreni.

⁸ Sigajc gujc Jesucrist nani, sigajcza najcni nadxej, sigajcza sajcnj par tejpas. ⁹ Na'c gusaantu gusiejchreni lajztu xcuent ste'ca yälrluii ni digac si'c najc xtidx Jesucrist. Sacduxh sudzu'tz lastoonu lo yälracnäj ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

¹⁰ Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguijd galoo. ¹¹ Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga. ¹² Si'cza gujt Jesucrist te laad, dejtz guejdx, te basiani xtoj l rebejn xcuent lagajc xtiejn. ¹³ Naj colcho' chonnu loj Jesucrist te laad dejtz guejdx te guideednu trabajw näjza yälxtujy si'cni gudejd Jesucrist. ¹⁴ Sa'csi lo guedxliujre dxunlaasinu, niluxh caguiilnu laadxnu ni chu jäädru, te ro'c guidxunnu par tejpas. ¹⁵ Guideb xcälracnäj Jesucrist do'o guideedtisu xquixtios lo Dios si'c te gojn ni gudeednu lojni, guiliä'pnu xpala'nni näj jieñu redij. ¹⁶ Na'cza jäälla-

jztu guntu huen, gacnäj sa'tu, sa'csi reni'cni najc redzuun ni rdxagljaz Dios.

¹⁷ Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Colnab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun. ¹⁹ Rniä lojtu, guiniabrutu loj Dios, te gun Dios jiojb guibi'ä jäälä lojtu.

Te didxle' näj lult xtixtios

²⁰ Dios xten yälrbedxilajz ni baspajn Dad Jesucrist lo rebengut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas. ²¹ Dios gun gactu bensa'c, bendxojn loj xhitis te guntu ni rlajzni, näj gunni loj guiraa nuure si'c ni rlajzni xcuent Jesucrist. ¡Colspaa lajz Jesucrist par tejpas! ¡Sugacni si'c!

²² Resa'nu, rniabä lojtu, colcuedxci lajztu, colcuadiajg rediidx ni ruliidxre, sa'csi riojbga cacuaä te labäz guijtze lojtu. ²³ Colyacbee abirii bejtznu Timoteu latzguiib. Palga guidzungajni ree, siäd-näani jäähuiä la'tu.

²⁴ Colgudeed xtixtios loj guiraa renani ruluii la'tu näj loj guiraa rebejtznu ni rililajz. Reben Italia ruxhal xtixtios lojtu.

²⁵ Gacnäj Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guijtz loj renani nare'ch lo guedxliuj

1 Narä Santiaag, xmos Dios näjza xten Dad Jesucrist, ruxhalä xtixtios loj guitzubutio'p cuaa rexpejn Israel ni nare'ch lo guedxliujre.

Yäl'najn nani runiidx Dios loonu

²Rebetzä lo xtidx Dios, colguibalazduxhtis che rsiajctu recos nani ruquiiltu cuälaztu xnezuyj Dios, ³sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yäl'rbecdxi lajz. ⁴Dxejcti yäl'rbecdxilajz sajz gunni xtzuunni nen lastootu, te gactu bensa'c, bejn ni aguyajl lo xtidx Dios, nani xhet cayäädxd xcal'najnni.

⁵Palga yu' tejtü ni cayäädx xcal'najnni, suguiniabnini lo Dios, sa'csi Dios rudeedduxhni yäl'najn loj guira'ti bejn, luxh dini guinii didxlaa lojni. Palga guiniab bejn, sudeedza Diosni. ⁶Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c baj ni sanä bej, nezree-nezre'c sääbni. ⁷Nani najc si'c, na'c gunni xhigab yu' xhi xca'ni lo Dad Jesucrist. ⁸Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

⁹Te sa'nu ni najc nadolajz, suguibalajzni sa'csi najcni benro sa'csi guläs Diosni, ¹⁰sigajcza bejtznu ni yu' xhixtenni, suguibalajzni sa'csi abaluu Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. ¹¹Sa'csi che rliejn gubijdz näjza te belaa, li rgoj recuaanga, li riuii reguii ni caj lojni, dx-ejc rtejbreni, dxejcti agunijt xcälsacrüni. Si'cza sinitloj te bejn ni yuduxh xhixtenni laj ni yu'ni lo xnezuyjni.

Xhi xca'ni che tedni trabajw

¹²Chicbaa niguii ni rsiudzu'tz laj ni cadejndi trabajw, sa'csi che agunii Dios didxsa'c xcuent nani bejnni sica'ni coron xten yäl'nabajn par tejpas ni bia'n Dios diidx gudeedni loj rebejn ni sanälajz Dios. ¹³Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquii Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. ¹⁴Niluxh tejtatu runijt che rcäyj xcäriejntu sa'csi riajb yejctü guntu cosguijdx. ¹⁵Che riajb yejctü guntu cosguijdx, runijttu rujntu dojl, luxh dojl che abejntuni, riäd-näni yäl'gujt.

¹⁶Sa'ä ni sanälazä, na'c gusaantu gusguereni la'tu. ¹⁷Guiraa recoshueen, guiraa recossa'c xhaguibaali siäädreni loonu; Dios ruxhal'reni, lagajc Dios ni benchee rebajl xhaguibaa, Dios nani di guchaa, sigajctis najcni. ¹⁸Lagajc xcuentni bejn Dios gacnu xpejnni sa'csi huililajznu xtidxliipacni, te gacnu reben galoo loj rexpejnni.

Xho nanab jiennu

¹⁹Acanajntu recosre, sa'ä ni sanälazä. Niluxh tejtatu nanab gusquejnni te gucuadiajgni, per gaclaani te guiniini, gaclaazani te guidxe'chni, ²⁰sa'csi xcälrdxe'ch bejn dini gun xcäl'nasa'c Dios. ²¹Ni'cni colcuälaz guiraa recosguijdx, guiraa recoslatsiaj ni ria'n. Guideb yäl'nadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajz gusläa xaimtu lo dojl.

²²Niluxh baluui lo guira'ti bejn najctü bejn ni rusoobpactu xtidx Dios, xhet bejndi ni rucuaadijgtis xtiidxni, ni rusguenei lagajc laani. ²³Sa'csi palga najc te bejn te nani rucuaadijgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihuajj. ²⁴Sa'csi che ruhuii xho najcni, säga-

jcnj, riallazgajcni xho najcni. ²⁵ Niluxh nani ruhuidzu'tz lo leisa'c, nalajznu leii nani ruslaa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnnga najc ni sajp yälrbalajzpac lo xhitis ni rujnni.

²⁶ Palga yu' tejtju ni rujn xhigab najcni te bejn ni randuxh Dios, niluxh di gacdi gusaäni ro'ni, guiraloj rniini, bejnnga rusgüee lagajc laani, luxh xhet sajcdi yälrajn Dios xtenni. ²⁷ Yälrajn Dios ni najc guliipac, ni xhet nu'chdi lojni najc scree: chahuini rebisiäjb, näjza regunaa ni agujt chäälni che yu' xhi rquiinreni, näjza na'c säblajztu guntu nani rujn reben guedxliuj ni di chalilajz xtidx Dios.

Nanab tebloj jiennäanu guira'ti bejn

2 Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajcru tej bejn lo sabejnni. ² Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, ³ dxejcti la'tu jjurutu nani najcw ladsa'cga, naatu: "Ree gurej lo yagxhilsa'cre", dxejcti gäblu lo bejn ni xhet rajpdi: "Rec gusulii o gurej lo yujre", ⁴ ¿la xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

⁵ Colgucua diajg, betzä ni sanälazä! Agule Dios bejn nani xhet rajpdi lo guedxliujre te ga'preni yälirililazduxh, te lo xcälrnibee Dios xca'reni xcäl'nasa'c ni bia'n diidx gudeed Dios loj renani sanälajzni. ⁶ Niluxh la'tu agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsítu, li rgobxhaxh'reni la'tu, rinäreni la'tu loj reguxhtis, ä? ⁷ ¿La xhet laadi rebejn ni rajp ni rniyaj loj Dios ni sacduxh? La'tu abirila-jtu rexi'n Dios.

⁸ Palga guliitu cagusoobtu leii xten xreiiinu Dios, si'cni caj lo xquijtz Dios

scree: "Colchanälajz sa'tu sigajc rinälajztu lagajc la'tu", laaca rujntu. ⁹ Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctu bejn dojl, bejn ni rbälaz leii.

¹⁰ Palga yu' te bejn ni rusoob guiraa ni caj lo xleii Moisés, niluxh abanijtni lo tejtis diidx ni caj lo leii, abanijtpacni, najcni si'cni dini nusoob niicni tej diidx lo guideb leiiga. ¹¹ Sa'csi lagajc Dios ni gunii: "Na'c guesnäjlju bejn ni di gac chäällu", lagajc laani guniizani: "Na'c ju'tlu." Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guiralii releii. ¹² La'tu colguinii, colguibajn si'c rebejn ni gun Dios yälguxhtis con xtiidxni ni ruslaa bejn lo dojl. ¹³ Sa'csi renani di gulaslajz bejn, che gun Dios yälguxhtisreni, dizani gulaslajz laareni. Sajcru yäl'rulaslajz lo yälguxhtis.

Yälirililajz näj dzuun ni rujn bejn

¹⁴ Resa'ä, ¿xhi sajc palga guinii te bejn: "Ahuililazä xtidx Dios", niluxh dini gun dzuun ni riäjil gunni, ä? Sa' yälirililajzre, ¿la suslaanini lo dojl, ä? ¹⁵ Palga yu' te bejtznu o te bisiajnnu ni dini ga'p xhajbni, luxh xhetiza xhi gauni, xhi yäni, ¹⁶ luxh gäb tejtju lojni: "Sucuedxi lajzlu jiilu, suguidxa' lajzlu, suguidxaj xque'lu", niluxh dini gudeed nani caquiinni, ¿xhi sajc rediidx ni räjpni lojni, ä? ¹⁷ Sigajcza yälirililajz nani di guquuil bejn gunreni xtzuum Dios najc si'c te ni agujt, sa'csi dini guquuil bejn gunreni dzuun.

¹⁸ Yu'za reni naa: "Luj rajplu yälirililajz, narä runä xtzuum Dios; baluii narä xcälirililajzlu xhet näjdi xtzuum Dios, dxejcti narä suluiä xcälirililazä xcuent rextzuum Dios ni runä." ¹⁹ La'tu rililajztu yu' tejtis Dios. Laaca rujntu, niluxh näjza rebejndxab rililajz yu' tejtis Dios, racdiijtlireni, rdxebduxh'renini. ²⁰ ¿La di rlaiztu gacbeetu, bennayääl? ¿La ditu gan, yälirililajz ni di guichagnäj xtzuum Dios najc te yälirililazgut? ²¹ Dios

badzucaj xtojł toxtadgoldoonu Abram sa'csi bejn̄ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. ²² Colhuii xho tejsi junt sadxaag xcälirililajz toAbram dzuun ni bejn̄ni, dxejcti sa'csi bejn̄ni nani gunibee Dios gunni, bejn̄ Dios gujc xcälirililajzni sa'c yälirililajz nani rlajz Dios ga'p rexpejn̄ni. ²³ Dxejcti huile' xtidx Dios cadro caj scree: "Abram huililajz ni räjp Dios lojni, ni'cni badzucaj Dios xtojłni, cua' Dios Abram si'c te bejn̄naya." Birilajzani "xamiigw Dios."

²⁴ Ni'cni ruhuiitu rca' Dios te bejn̄ si'c bejn̄naya nez lojni xcuent xtzuum Dios ni rujnzani, xhet ganaxtis xcuent xcälirililajz bejn̄ga. ²⁵ Sigajcza gusajc toRahab, ni gujc te gunadxab. Dios badzucajza xtojłni, bejn̄ Dios xhigab najcni te bejn̄naya sa'csi bejn̄ni xtzuum Dios che badeedni rolizjni bacua'tzloj tio'p xpejn̄ Israel ni gujc guixhajg ni sagula'tz guejdxga, dxejc gucnäjnireni te siireni ste'ca nez yuj. ²⁶ Sigajc ni di gacdi guibajñ tiejxh bejn̄ palga xheti sprit, sigajcza di gacdi guibajñ yälirililajz palga dini gun dzuun ni rnibee Dios gunni.

Rediidx nani rnii luudxnu

3 Resa'ä, na'c gac xhidajltu bejn̄ ni ruluii xtidx Dios, sa'csi anajnnu rac yälguhxhtisoru rebejn̄ nani ruluii xtidxni. ² Sa'csi guiragajcnu riennu xhidajl cuaa dojl. Palga yu' te bejn̄ ni di gunijt lo diidx ni rniini, laani najcni te bensa'c, rajcza rnibeeni guideb tiejxhni. ³ Palga rusälñu guiib ni ru' ro' cabaii te chääni cadro rlajznu jiini, rnibeezanu guideb xtiejxhni. ⁴ Colhuii rebarcwro, mase siolduxhrenei, luxh rebeduxh rulanareni, niluxh capitán ni rusaj barcw lo nisdoo, te guibbáz ni caj xhajñ barcw nen̄ nis, con ni'ctis rinänini cadrotis rlajzni. ⁵ Sigajcza najc luudxnu, najcni te labáz tiejxhnu, luxh colhuii lacti

didxro rniini. Najcni si'c te balbáz ni rajc ruze'c guiragajc reyajg ni yu' dajn. ⁶ Luxh luudxnu najc si'c te bajl. Rnii luudxnu guiraa redidxdxuudx ni rnii reben̄ guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijl. ⁷ Rebejn̄ sajc gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejn̄reni, ⁸ per nicla tej bejn̄ di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn̄. ⁹ Lagajc luudxnu rliä'pnu xpala'n Dios Xtadnu, lagajc laani rniyajnu sabejn̄nu ni benchee Dios sigajc najcni. ¹⁰ Tejsi ro'nu rnile' lo Dios nägajcza rgue lo bejn̄. Rebetzä, jxhet si'c di nungäjłdi gacni! ¹¹ ¿La rbää bejn̄ nisnejxh näjza nisrop lo tejsi bisie, ä? ¹² Betzä, ¿la caxajsi sajc xcaj aceitun̄ loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yälñajn ni siäd xhaguibaa

¹³ ¿Chuni'c lo guiraatu yu' xcäriejn̄ni, nanduxhni, ä? Suguluuini xho najcni xcuent xcälñabansa'cni, sugunni xtzuumni guideb yälñadolajz ni rudeed xcäriejn̄ni. ¹⁴ Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcälñasa'c lagajc luj, na'c gaclu gualajz, sa'csi ni'c najc si'c ni caniilu didxrusguee xcuent xtidxlii Dios. ¹⁵ Sa'csi sa'c yälñajnre, xhet xhaguibaadi siädni, alga najcni yälñajn xten guedxliujre, xten reben̄ guedxliuj, xtenza reben̄dxab. ¹⁶ Sa'csi cadro yu' yälrdxe'ch lo sa'ni, näj cadro rujñ bejn̄ guira'ti parsi xcälñasa'c lagajc laani, ro'c yu' bieje, yu' guiraloj latsiaj. ¹⁷ Niluxh yälñajn ni ruxhał Dios, ganiddoo najcni naya, dxejcti rulecdxini xcäriejn̄ bejn̄, dxejc rujñni rajc bejn̄ nadolajz lo sa'reni, rujnzani saru runnäj bejn̄ sa'reni, rulazlajz bejn̄

sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. ¹⁸Renani rguiil yälrbedxi, yälrbedxi rbe'creni te xca'reni te yäl'nabannaya nez loj Dios si'c xcäl'nasa'creni.

Ni nabannäj guedxliuj

4 ¿Casiäd rebieju, reyälrdxe'ch lo sa'ni ni casiajctu? ¿La direni jääd xcuent lagajc xhigab ni yu' lastootu, ä? Lagajc rehxigabga rujn bieju nen lastootu, ruscäjyreni xcäriejntu. ²La'tu rla-jztu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilnäjtu sa'tu. Ditu ga'p nani rla-jztu sa'csi ditu guiniabni loj Dios. ³Rni-abtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rla-jztu gunijttuni si'cni rla-jztu. ⁴¡Aii! Bejn ni di gandzu' Diostis. ¿La ditu gan bejn nani rla-jz gun redzuun ni rujn reben guedxliuj, bejnga rdxe'chreni lo Dios, ä? Ni'cni palga yu' chu teju ni rla-jz chanuu lo ni rajc lo guedxliujre, bejnga rdxe'ch lo Dios. ⁵O ¿la rchalotu xlia'si caj lo xtidx Dios rediidxre: “Sprit ni baxhał Dios te cuääzni nen lastoonu, randzu'ni nuurnu sa'csi rla-jzni guiniweeni nuurnu”? ⁶Niluxh runiidxru Dios xcäl'racnäjni loonu. Ni'cni nii xtiidxni scree: “Dios rdxechnäj renani runnaro lagajc laareni, niluxh rudeedruni xcäl'racnäjni lo rebenadolajz.” ⁷Coljiu'pac lo xnezyuj Dios. Col'sudzu'tzpac te di guntu ni rla-jz bendxab, te guxunni lojtu. ⁸Colguibigru lo Dios te guibizgani lojtu. Bendojł, colquib naatu, nalajznu na'cru guntu latsiaj; colgusia lastootu, la'tu ni runtio'p lajztu. ⁹Sugacnaj lajztu, suchuti xliajs, colyonduxh. Colguchaa xcäl'ruxijstu, colca' yälhuin, colguchaa xcäl'rbalajztu, colca' yälroon. ¹⁰Colyajc si'c bejn

ni xhetliidi sajz nez loj Dad Jesucrist, te laani guiliäsni la'tu gunni la'tu benro.

Na'c guiniyajtu sa'tu

¹¹Rebetzä, na'c guiniyajtu resa'tu. Sa'csi renani rniyaj sa'ni o rujnni yäl'guxhtis sa'ni, reni'c rniyaj xleii Dios, rujnreni yäl'guxhtis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii. ¹²Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajzca gunitloj bejn. La'tu, ¿chuxh najctu te guntu yäl'guxhtis lo sa'tu, ä?

Dinu gan xhi gac guixee

¹³Naj colcuadiajg dee, la'tu ni mritu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. ¹⁴Luxh nicla gantu xho gac xcäl'nabajntu guixee. Xcäl'nabajntu najc si'csi te za nani rienloj tera'tbäz, dxejcti mritlojni. ¹⁵Hueenru guiniitu scree: “Palga rla-jz Dios sibaannu, te jiennu dee o dec.” ¹⁶Niluxh si'c ni rujntu naj, rajc gualajztu rniitu didxro; luxh guiraa redidxroga najc dojl. ¹⁷Ni'cni ni najn xho riäjł gunni, palga dini gun si'c, rujnni dojl.

Rulijdxni rebejn ni yu' xhidajł xhixtenni

5 Colgucadiajg xtidxä, bejn ni yu' xhidajł xhixtentu. Colyoon, colcuedxa' xcuent recasionduxh ni sactu. ²Guiraa rehxixtentu nani rajptu aguxhijñ, luxh rehxajbtu agudajw rebaguiidni. ³Oor näjza pla't xtentu agubibtiejnni, aguxhijñni. Lagajc dee gun gacbee Dios ditu niujn ni rla-jz Dios guntu, lagajc ni'c gun chectu, nitlojtu. ¿Xlia'si batiedajntu xhixtentu nen redxej lultga! ⁴Colhuui! Ditu niguixsa'c loj reni bejn xtzuuntu, ni'cni laareni cayujnreni yälquij lo Dios xcuenttu.

Luxh xhadiajgli Dios xten reangl ni yu' xhaguibaa abidzujñ yälquij xtentu ni cabe'c renani batie' xcäl'nasa'ctu. ⁵Agubansa'c pactu lo guedxliujre, bejntu lanij si'ctis ni rlaiztu, abastio'tu lastootu neñ redxej xten yälrugut'. ⁶Gudiiltu xho bagu'ttu rebensa'c luxh laareni dxiitis gusuireni, xhet bejndireni te na'c nugu'ttureni.

Colcuääz jiädxhii Diostu

⁷Resa'ä, dxitis colcuääz guidzujñ dxej cheni jiääd Dad Jesucrist. Colhuii xho rujn bejn ni rbe'c binij, dxitis rbäjzni gac xcäjlni lañ ni riajb nisguigaloo näjza nisguij ni riajb lult. ⁸Si'cza la'tu colcuäzdxi, colgustioob lastootu sa'csi asiäddzungajxh dxej ni jiääd Dad Jesucrist. ⁹Resa'ä, na'c chale'ctu xquej sa'tu, didi gun Dios yälguixhtis la'tu, sa'csi asiäddzungajxh dxej che guidzujñ Dios ni najc Juejz. ¹⁰Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjzwareni. ¹¹Colhuii xho rniinu chicbaa renani guläzdxi lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzunsac'c ni bennäsac Diosni, ni ruluiloj xho riaduxh Dios bejn, rapduxhni yäl'rulasajz.

¹²Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu:

“Mbaj”, ni'ctisza colguinii. Che naatu: “Na'c”, ni'ctisza colguinii te na'c gun Dios yälguixhtis la'tu.

¹³¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugoñni dij te guiliä'pni xpala'n Dios. ¹⁴¿La yu' chu tejtü ni cayacxhuu, ä? Sucueedxni rebengool ni mibee neñ guidoo, te guiniabreni lo Dios xcuentni lañ ni cagusälzarenise't lo cuajni con laj Jesucrist. ¹⁵Luxh palga rililajzpacreni che canabreni, siajc benracxhuuga, siliäs Jesucrist bejnğa. Luxh palga bejnni dojl, sibicaj xtojlni. ¹⁶Ni'cni colguxhobdojl lo sa'tu, colnab lo Dios xcuent sa'tu te jiajctü. Che rni-abduxh te beñ naya lo Dios, dzunroza rujn Dios. ¹⁷Elías, te bejn ni gunii xtidx Dios agujc xchero, gujca te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj choñ ijz garol. ¹⁸Dxejc gunabsacni lo Dios, dxejc bixal xhaguibaa, biabsac nisguij, dxejru gujc reyäl'nasa'c xtenreni lo guedxliuj.

¹⁹Rebetzä, palga yu' chu tejtü ni guibicaj lo xtidx Dios, luxh yu' chu gacnäj guibisacni lo xtidx Dios, ²⁰sugacbee bejn nani racnäj guirii benđojl lo xnezyuguidxni te guibisacni lo Dios, bejnğa agucnäjni te gulaa xaimni lo yälgujt, te gubicajza guiraa xtojlni, mase xhidalduxh najc xtojlni.

Guijtz Ganid Nani Bacuaa Pedr

Pedr cacuaa guijtz loj reni rililajz ni nare'ch

1 Narä Pedr, te apost xten Jesucrist, cacuaä guijtzre loj renani agule Dios gac rexpejñni nani rbäjz si'c benzijt lo reguedx Ponto, Galacia, Capadocia, Asia, näjza Bitinia. ²Xtadnu Dios gule la'tu galooli bencheeni niguii, aguleni la'tu par lagajc laani te gun Sprit Dxi an xtenni xtzuuñni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruñi la'tu, guscuecdxini lastootu lo guiraliiti.

Te yälñabajñ ni cabäaznu

³Colguiliä'p xpala'n Dios ni najc Xtad Jesucrist, Dios nani xcuent xcälñulaslaz-duxhni bejnñi gojpnu te yälñabañcoob sa'csi baspañsacni Jesucrist loj rebengut. Sa'csi rajpnu yälñabañcoob, ni'c nadipac lajznu. ⁴Ni'cni laani suniidxni te yälñusalajz ni di nitloj, ni di xhiñ, ni di jiuui si'c riuii rebalajc. Yälñusalajzga aguluchedzu'tzni xhaguibaa par la'tu, ⁵nani cayapdzu'tz xcälñmilaagwr xten Dios sa'csi rililajztu xtiidxni, te guluii Dios guira'ti ni rajpni par la'tu, ni arapcheeni te guluiinireni lojtu che luux guedxliujre.

⁶Ni'cni rbalazduxhtu, mase nanab tedtu balti trabajw gaie'si dxej lo guedxliujre, ⁷te guzeñ xho rililajztu. Xcälñrililajztu sajrcu lo oor nani rnitloj, niluxh xcälñrililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcälñmilaagwrni, näjza xcälñrdimbicha'ni.

⁸Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yälñrbalajz ni rut rajcdi rusule', sa'ni yu' xhaguibaatis,

⁹sa'csi xcälñrililajztu susläa xaimtu lo dojl, sica'tu yälñabajñ par tejpas.

¹⁰Luxh xcuent yälñrusläa dojlre, rebejn nani gunii xtidx Dios agujc xchero, laareni abasulexgaareni xcuent xcälñracnäjä Diosre nani siääd lojtu. Luxh bisiedduxhrene, gunabdiidxzareni, ¹¹te rlaajzrene gacbeerene chu bejn o gupac gac nani cagusä't Sprit xten Crist ni yu' neñ lastooreni che gunixgaani xho nungäjñ ted Jesucrist trabajw, dxejrcu xcasacni yälñribee. ¹²Baluii Dios lojrene, di rediidxga soob neñ redxej ni nabajñrene, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhal Dios Sprit Dxi an xtenni te cuäazni neñ lastooreni. Näjza rexangl Dios ni rbäjz xhaguibaa rlaajz gacbeerureni rediidxga.

Xcälñabannayanu nez loj Dios

¹³Ni'cni, colsanij xcäriejntu, colgusudzu'tz lastootu, guideb lastootu colyenloj yälñracnäjä xten Dios ni abia'n diidx xca'nu che guibisac Jesucrist lo guedxliuj. ¹⁴Gactu si'c biuux nani rusooob xtidx xtadni. Na'cru xcäjbtu guntu redzunguijdx ni bejntu galoo che gajdtu gumbee Dios. ¹⁵Dios ni gule la'tu najc dxan. Sigajcza la'tu, loj guiralii ni rujntu colyajc bendxan. ¹⁶Sa'csi lo xtidx Dios caj sree: "Sajctu bendxan sa'csi narä nacä dxan."

¹⁷Palga la'tu rniitu "Dad" lo Dios nani tebloj rujñ yälñguxhtis loj guiraa bejn xcuent dzuun ni bejnñi, la'tu riäjñ guidxejbtuni guiraa dxej ni nabansijctu lo guedxliujre. ¹⁸Anajntu di Dios nudeed yälñnasa'c ni rnitlojdi, si'c oor näjza pla't, te basläani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te basläani la'tu, ¹⁹badeedni rejñ ni saceduxh te basläani la'tu loj xtojltu. Rejn si'c xtiejn te xiil ni naya, xhetpac najcdini,

xtiejn lagajc Jesucrist. ²⁰ Guliipacni che gajdli guirixtiej guedxliujre, gule Dios Jesucrist, niluxh najru, nen redxelult che gajd guedxliujre nitloj, biädluilojni par xcäl'nasa'ctu, ²¹ la'tu nani rililajz xtidx Dios xcuent Jesucrist. Luxh Dios baspansac Jesucrist loj rebengut, badeedni yäl'nibee lojni, ni'cni ahuililajztu xtidx Dios, luxh Diostis cayenlojtu naj.

²² Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu. ²³ Sa'csi acua'tu xcäl'nabancoobtu xcuent xtidx Dios ni najc par tejpas, et xcuentdi xtidx ben guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. ²⁴ Galooli gunii Dios scree:

Guiraa reben guedxliuj najc si'c recuaan, guiraa xcäl'nasa'creni najc si'c reguii ni rcaj lo cuaan,

recuaan rgoj, lirtejbza reguii xtenni,

²⁵ niluxh xtidx xtad Jesucristnu rsiudzu'tzni tejpas.

Luxh diidxre najc diidx ni basule'reni lojtu.

2 Ni'cni colgusaan guiraa redzunguidjdx ni yu' lo guedxliuj, na'c gusguetuu sa'tu, na'c guntioj lajztu, na'c chuguij lajztu xhixten sa'tu, na'c guiniyaj sa'tu. ² Si'c riojl rebäznite' le'ch, si'cza colquuil xtidx Dios par sprittu. Coljiojl xtidx Dios te gustioobruni la'tu lo yäl'ruslaa lo dojl, ³ palga agucbeetu lacti hueen najc xcäl'racnäj Jesucrist.

Crist najc si'c te guij ni nabajn

⁴ Colguibig loj Jesucrist ni najc si'c te guij ni nabajn. Laani suniidx yäl'nabajn par tejpas loonu. Rebejn badzucaj guijga, niluxh Dios gulenini sa'csi sacduxhni. ⁵ Sigajcza teygatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuääz Sprit xtenni, te gactu rexpixhojz Dios, nani nayapac las-

tooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xprit xtentu. Dee najc nani rchagljaz Dios. ⁶ Sa'csi galooli gunii Dios scree:

Agule'cä te bejn nen guedx Siön, nalajznu Jerusalén,

ni gac si'c te guisa'c, te guiro ni rsiuj squin te yuro.

Chutis bejn ni chalilajz xtiidxni, dini jianxtujy.

⁷ Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu', lagajc guijga gujc guijpac ni baliib squin xten yu'ga

⁸ näjza:

Te guij ni rliaj ni' bejn, ni ruzäl'ta'reni, laareni riabreni sa'csi direni gusoob xtidx Dios,

luxh agunibexгаа Dios nitlojreni.

Renani gule Dios

⁹ La'tu najctu te cuaa bejn ni agule Dios, teygatu najctu rebixhojz ni najc si'c reii xten Dios. La'tu najctu te bennaya, te bensa'c, rexpajn pacni. Aguleni la'tu te gusule'tu reyäl'nasacduxh ni bejn Dios ni gurejdxtu che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios. ¹⁰ La'tu galoo rut najcditu, niluxh naj najctu rexpajn pac Dios. Galoo gajd Dios gulaslajztu, luxh naj abalaslajz Dios la'tu.

Colguibajn lo xnezyuj Dios

¹¹ Rebetzä ni sanälazä, nabajntu lo guedxliujre si'c benzijt, ni rbäz te laad, ni'c rniabduxhä lojtu, na'c guntu recosguijdx xten guedxliujre, ni rutijl nen lastoo bejn te cuälazreni xnezyuj Dios. ¹² Colguibansa'c laj ni yu'tu loj rebenzijt ni di gac xpejn Israel te palga guiniyajreni la'tu gäbreni najctu benlat-siaj, che fiireni redzunsac ni rujntu,

siliä'ppacreni xpala'n Dios che jiädsac Jesucrist te gunni yälguxhtis.

¹³ Ni'cni, sa'csi huililajztu xtidx Jesucrist, colgusoob xtidx guiraa reni rniibeetu lo guedxliujre, si'c najc presidentro, ¹⁴ regubernadoor nani ruxhałni te rujnreni yälguxhtis rebendojł nájza te guiliä'pni xpala'n reben nani laaca rujnreni. ¹⁵ Sa'csi Dios rłajz guntu recossa'c te cuedcxitu rextidxnayääl ni rni reni di rłajz gumbee didxlii xcuent Jesucrist.

¹⁶ Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios. ¹⁷ Ga'ptu yälnadolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidentro.

Gudejd Jesucrist trabajw te baluiini xho jiennu

¹⁸ La'tu ni najc mos, guideb yälnadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, nájza relam ni najc benguijdx. ¹⁹ Sa'csi rchaglajz ruhuii Dios te bejn palga sa'csi rililajz te bejn xtidx Dios rujn bejn huant che rdejđni trabajw luxh xhet bejđdini. ²⁰ Palga la'tu rujntu latsiaj ni'cni rusacsini la'tu, ¿xhi guntu gaan palga rujntu huant rdejđtu trabajw? Niluxh palga la'tu rdejđtu trabajw sa'csi rujntu redzunsac, luxh rujntu huant, ni'c najc laaca nez loj Dios. ²¹ Te guntu si'c gurejdx Diostu, sa'csi gudejđza Jesucrist trabajw xcuenttu te guluini xho guntu che chanuutu lo xnezyujni. ²² Laani dini niujn nicla tej dojł, laani dini nusguee nicla tej bejn con didx-xhii. ²³ Che guniyajreni lojni, dini nudzu' yäl'niyajga. Che cadejđni trabajw, dini nudzu' diidx niluxh bateedni lagajc laani ladznaa Dios ni rujn yälguxhtissa'c. ²⁴ Gudeed Jesucrist trabajw si'c te bendolduxh, bacuaarenini lo cruzj te ro'c gusacsiduxh

teijxhni xcuent xtojłnu, te na'c gunrunu dojł, te guibansa'cnu lo xnezyuj Dios. Gudilguijdxreni teijxhni te basiajčni la'tu. ²⁵ Sa'csi galoo gujctu si'c rexiil ni rut rajpdi, rijreni nezree-nezrec. Niluxh naj agubisactu lo xpaxtoortu nájza nani randzu' xaimtu, Jesucrist.

Xho nanab guibannájtu chäältu

3 Sigajcza la'tu, regunaa ni abachnaa, colgusoob xtidx chäältu, te mase yu' tejreri ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. ² Sa'csi fiini xho riulu xtiidxni nájza xho rniilu nadolajz lojni, nájza xho nabannäsa'cluni. ³ Na'c gusucheeu ganax lo jiaatis, si'c najc guichniil yejctu, nájza biaoar ni rcaj diajgtu, guejntu, naatu, nájza ladsa'c ni najc sacru. ⁴ Colgusuchenäj lastootu yälnadolajz, yäl'rbecdxi lajz, nájza yälsanälajz, sa'csi direni nitloj, luxh sacduxhreni nez loj Dios. ⁵ Galoo si'cza bejn regunaa ni gujc xpejn Dios ni huililajz xtidx Dios, basucheereni lastooreni, basoobreni xtidx chäälreni. ⁶ Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac, nájza na'c guidxejđditi.

⁷ Sigajcza la'tu, niguii ni abachnaa, colguibannäsa'c chäältu. Colgapdani sa'csi dini gacnadip si'c te niguii; nanab guntu si'c sa'csi nájza lojreni badeed Dios yälnabajn par tejpas. Colyejn si'c, te gucuađiajg Dios che cuedx-guiniabtu lojni.

Renani rdejđ trabajw che laaca rujnreni

⁸ Dee najc ni cania loj guiraatu, saru colguibannäj sa'tu. Colgulasajz sa'tu, colchanälajz sa'tu si'c rinälajz te niguii bejtzni. Gactu bensa'c, bennadolajz. ⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj

che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyäl'nasa'c ni gu-niidxni lojtu. ¹⁰ Sa'csi scree caj lo xtidx Dios:

Nani rchaglazj guibajjni,
luxh rlazjzani saru tedni redxej lo
guedxliujre,
sugudxojni guinii ro'ni didxnaj näjza
didx-xhii.

¹¹ Guibicajni loj redzunguijdx, sugunni
redzunsac'tis.

Suquuilni yäl'rbedxi te ni'c chanuuni.

¹² Sa'csi ruhuii Dios rebejn ni rujn
dzunsa'c,
rucuadiajgzani xtiidxreni che rniabreni
lojni.

Niluxh rudzuréni lojni, rbälazzani re-
nani rujn latsiaj.

¹³ ¿Chu laa ni gun latsiaj la'tu, palga
la'tu rbaali lajztu rujntu dzunsa'c?

¹⁴ Palga caxäjsi tedtu trabajw che
guntu redzunsac'c. ¡Chicbaatu! Na'c
guntu xhigab, niclaza guidxejbtu
xcäl'ruchejbreni. ¹⁵ Colgusaan guinibee
Dad Jesucrist neñ lastootu, gususin
te gudzu'tu diidx loj reni rniabdiidx
lojtu xhicuent runlojtu guibi' Jesucrist.
Guideb yäl'nadolajz saru gudzu'tu diidx.

¹⁶ Colguibañsa'c te cuedxi xcäl'riejntu te
che guiniyajreni la'tu sa'csi nabañsa'ctu
loj Crist, jianxtujy reni rniyaj la'tu.

¹⁷ Sa'csi hueenru tedtu trabajw che
cayuntu te dzunsa'c, palga si'c rlazj
Dios, lacuaa tedtu trabajw sa'csi
cayujntu dojl.

¹⁸ Sa'csi sigajcza tejtis gujt Jesucrist
xcuent rextojlnu. Xhetliidi xtojlni guyu'
nez loj Dios, niluxh gudejdni traba-
jwduxh xcuent rebendojl. Bejnni si'c
te gac guibignu lo Dios sa'csi gujt
tiejxh Jesucrist, luxh guyusac sprit
xtenni lo tiejxhni te gubañsacni. ¹⁹ Che
gajd xpriitni guibisac lo tiejxhni, huij
spritni basule'ni diidx loj resprit ni yu'
latzguuib. ²⁰ Respritga najc renani di

nusoob xtidx Noé che basule'ni xtidx
Dios lojreni. Guläjz Dios rebejnğa guiraa
redxej ni cayujn Noé barcwro agujc
xchero. Baslaa Dios xcäl'nabajn xhu-
jntis bejn, xhet gujcdireni gudejdreni
lo nisguiro ni biajb guideb guedxliu-
jre. ²¹ Che robnisnu naj, rusnaalajznu re-
bejnğa; yäl'robnisga ruluiloj xho ruslaa
Diosnu lo dojl. Et sa'csi riäjt beed lo
tiejxhnu neñ nisga, alga sa'csi dxejc rni-
abnu lo Dios guniidxni te xcäriensa'c,
sa'csi sajc xca'nuni xcuent ni gubañsac
Jesucrist lo rebengut. ²² Che birii Jesu-
crist loj rebengut, biu'ni xhaguibaa cadro
gurejni xladbee Dios te ro'c rnibeeni loj
rexangl Dios, näjza loj guiraa resprit ni
rajc rnibee, ni yu' lo guedxliuj näjza
xhaguibaa.

Colyejn xtzuum Dios

4 Ni'cni sa'csi agudejd Jesucrist tra-
bajw cuajni lo cruuj xcuentnu, sigaj-
jca la'tu riäj loj guntu xhigab sidejdtu tra-
bajw lo guedxliujre sa'csi nani agudejd
trabajw, diruni gun dojl, ² te guideb
nabajjni lo guedxliuj, guibajjni si'c rlazj
Dios, diruni guibajn te gunni redzun-
guijdx xten guedxliujre. ³ Sa'csi bejntu
si'ctis ni rlazjtu galoo, bejntu si'c rujn
rebejn ni di gumbee Dios, bejntu si'cni
rlazj tiejxhtu, bejntu latsiaj, gusojztu, be-
jntu relaniro, gudedcaj gusojztu, luxh
bejntu cosxtuiduxh bazuxhijbzatu loj re-
banäbdxab. ⁴ Dxejcti rebejn ni rujn re-
cosga naj, rdxeloreni sa'csi dirutu gun
ni rlazjreni, ni'c rniyajreni la'tu. ⁵ Niluxh
laareni suureni nez loj Jesucrist ni agojl
gun yäl'guxhtis loj guiraa rebejn, re-
bejn ni nabajn näjza renani agujt, te
gusule'reni xcuent nani bejnreni. ⁶ Ni'cni
basule' Jesucrist xtidx Dios loj reni agujt,
te mase che gubajjreni lo guedxliuj gu-
jcreni yäl'guxhtis si'ctis ni rajc bejn, dxejc
gujtrene, naj sprit xtenreni sinuu guibajn
si'c ni rlazj Dios.

⁷ Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusin xcäriejntu te saru cuedx-guiniabtu lo Dios. ⁸ Niluxh ni maazru sajc najc yälsanälajz resa'tu sa'csi che rinälajztu resa'tu, riallajztu xtojł sa'tu. ⁹ Saru gurenäj bejn ni rdzujn rolizlu, na'c jiejytu. ¹⁰ Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. ¹¹ Palga tejtı najc xtzuumni guluiini xtidx Dios, suguiniini ascanu najcni xtiidxpac Dios. Palga tejtı najc xtzuumni gacnäjni sa'ni, sgunnini, guideb yäl_nadip yäl_nadaan ni rudeed Dios lojni, te guira'tis ni rajc sujn guiliä'p xpala'n Dios xcuent Jesucrist. Sa'csi laatisni riäjł chä'p xpala'nni, laatisni riäjł guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siääd te gactu preeb. Na'c guntu xhigab xhichani'c casiajctı. ¹³ Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist. ¹⁴ Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xpirt Dxan xten Dios guideb xcälrdimbicha'ni nen lastootu. ¹⁵ Gunatiro, andi gusaantu ted tejtı trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjłdi gacbeeni. ¹⁶ Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

¹⁷ Abidzujn dxej che ganid rexpejn Dios ted trabajw. Luxh palga ganid nuurnu gacnu yäl_guxhtis luxh ahuililaaznu xtiidxni, jxhochä gun rebejn nani di

chalilajz xtidx Dios xcuent Jesucrist!
¹⁸ Lo xtidx Dios caj scree:

Lacti naganlajz rliäa rebennaya lo dojl, jxhochä gunäjni rebejn nani di chalilajz xtidx Dios näjza rebendojl?

¹⁹ Ni'cni, guiraatu nani cadejd trabajw xcuent xtidx Dios si'cni rlajz Dios, colgudeed xprittu lo Dios ni di gusguee, ni bencheetu, te chanuutis guntu ni riäjł guntu.

Yäl_rulijdx loj renani ahuililajz xtidx Dios

5 Narä nacä te bengool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebengool, ² colgajp renani rililajz xtidx Dios nani rajptı fiipactu xhi rujnreni. Colga'preni si'c te bejn ni rajp xiil, colyejnni guideb yejc, guideb lajztu. Colyejn si'c sa'csi si'c rlajz Dios guntu, na'c gunlojtu meel. Colguibalajz cayajptı rexpejn Dios. ³ Na'c guinibeetu lojreni si'c rnibee te lam loj reni rujn xtzuumni, colguluiireni xho gunreni con xcäl_nabansa'clu. ⁴ Che guibisac Jesucrist, ni rajp nuure, laani suniidxni xcuentnu, te yäl_nasacduxh nani dipac nitloj.

⁵ Sigajcza la'tu ni najc bi'n, colgusobdiajg xtidx rebengool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni,

niluxh racnäjni rebejn ni najc nadolajz.

⁶ Ni'cni guideb yäl_nadolajz coljiu lo Dios sa'csi rajpni yäl_rnibeduxh, te guiliä'pni xpala'ntu che gal dxej ni guibisacni. ⁷ Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

⁸ Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguiliini chu gux-

hinni. ⁹ Col̄sudzu'tz nez lojni, guideb las-tootu col̄chalilajz xtidx Dios, sa'csi ana-jntu sigajcza cayunnäjni guiraa rebet-znu ni nabajñ lo guedxliujre. ¹⁰ Che agudejdtu trabajw tiop-choñ dxej, Dios nani rajp guiraa yälracnäj, nani gurejdx la'tu te näjza la'tu xca'tu xcałrdimbicha'ni xcuent lagajc Jesucrist, lagajc laani sunsa'cni la'tu, bejñ ni rsiudzu'tz lo xtiidxni, bejñ ni nadip lajzni, bejñ ni di guidxejb. ¹¹ Laani rajpni yälrnibeduxh par tejpas, guiliä'pnu xpala'nni par tejpas. Sugacni si'c.

¹² Siädnä Silvan guijtze lojtu. Runä xhigab najcni te bejñ nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcälracnäjpac Dios. Col̄sudzu'tz xcuent yälracnäjre.

¹³ Rexpejñ Dios ni re' lo guedx Babilonia ruxhał xtixtios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhałza xtixtios lojtu. ¹⁴ Col̄guinii "xchan" lo tejga sa'tu ro'c.

Rniabä lo Dios guscuedxini lastoo guiraatu ni rililajz xtidx Crist.

Guijtz Ni Rojpedr Ni Bacuaa Pedr

Pedr rucuaa te guijtz loj reni ahuililajz

1 Narä nacä Simón Pedr, ni rujn xtzun Jesucrist, te apost xtenni. Rucuaa guiitzre lojtu nani rililajz xtidx Dios sigajc ni rililajznu, sa'csi bahuii Dios loonu si'c bennaya xcuent Xtiosnu Jesucrist nani basläa nuurnu lo dojl. ²Rniabä lo Dios gacnäduxhruni la'tu, guscuedxiruni lastootu, te gacbeerutu xtidx Dios näjza Dad Jesucrist.

Xho riäjl gac rexpejn Crist

³Sa'csi xcälrnibee Dios baniidx guira'ti ni rquiinnu te guibansa'cnu, te gacnu bennaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni. ⁴Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejnni, sajcnu bensa'c si'c najcni sa'csi abiriinu loj redzunguijdx ni chagljaz rujn rebejn ni ruxhin guedxliujre. ⁵Ni'cni nanab gacbeenu xho nabanu lo guedxliujre. Siroobru xcälrrililajztu sacnäjni la'tu te guibansa'cnu lo Dios; luxh sa'csi nabansa'ctu, siroobru xcäl'najntu xcuent dzunsa'c näjza dzunguijdx. ⁶Luxh palga guroob xcäl'najntu xcuent dzunsa'c näjza dzunguijdx sajcnu guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälrbedxilajz, sajctu bensa'c, bendxan. ⁷Che anajctu bensa'c, bendxan, sinälajztu resa'tu; che asanälajztu sa'tu, arajptu yäl'sanälajz sa'tu xten Jesucrist. ⁸Palga la'tu rusoohtu guiraa rediidxre, luxh chanuutis caroobreni nen lastootu, ditu guibanxlia'; sujnpactu xtzun Dios,

luxh rediidxre sacnäjrutu gumbeetu Dad Jesucrist. ⁹Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälajzni xho basia Dios rextojlni nani bejnni galoo. ¹⁰Ni'cni rniä lojtu rebetzä, colsejs, colguiseed xtidx Dios te gacbeepactu, guluilojzatu lo bejn xho gurejdx, xho gule Dios la'tu, sa'csi la' ni chanuu gucuadiajgtu rediidxga, dipactu gunijt lo Dios. ¹¹Palga guibajntu si'c lo guedxliujre, siu'pactu xhaguibaa cadro rnibee Dad Jesucrist par tejpas.

¹²Ni'cni anasuga'ä te gusnaä lajztu xcuent rediidxre, mase anajntureni, mase risutzutzu yälrrililajz xten didxlii ni yu' nen lastootu. ¹³Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabanä lo guedxliujre. ¹⁴Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä. ¹⁵Ni'cni cayunduxhä dzuun naj, te che guiquiinni sinaj lajztu xtidxä che agu'tä.

Renani bahuii loj yäl'nasa'c xten Crist

¹⁶Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpacni, dinu niniitisni, dizanu nusguee la'tu, sa'csi abahuiloonu xcälrdimbicha'ni. ¹⁷Sa'csi che badeed Dios xtadnu yälrnibee, yälrdimbicha' lojni, dxejc biejn diajgnu gunii Dios, birii xse'ni nen te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." ¹⁸Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

¹⁹Ni'cni naj guliiru rediidx ni gunii reprofet. Ni'cni sujntu laaca palga gusobdiajglu rediidxga, sa'csi najczeni si'c te bajl ni rusanij te lajt ni nacäy, susanijreni xcäriejntu dxejli ni jiääd bajl xhaguibaa. Dxejc lagajc laani su-

sanij lastoonu. ²⁰ Niluxh ganiddoo nanab gacbeetu dee: nicla tej bejn sajc guinii laatisni sajc guinii xhi säloj xtidx Dios, ²¹ sa'csi nicla tej diidx ni bacuaa reprofet dini gac diidx ni biajbtis yejcreni. Guiraliireni bacuaareni ganaxtis diidx ni badeed Xpirt Dxan Dios lojreni gucuuaareni.

Rebejn nani rusguee

(Judäs 4-13)

2 Niluxh galoo biricajza te cuaa bejn ni basguee rexepejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejx lajz bejn xcälrlilalajzreni, sibälazreni lagajc Dad Jesucrist nani gudijx xcuent xtojlni. Niluxh renani rusguee, siojb nitlojreni par tejpas. ² Xhidajlza bejn sinajlreni lo xcälñabanguijdxreni, dxejcti ni'c gun siniyaj xhidajl bejn xnezyuj xtidxlii Dios. ³ Sa'csi ruguilajzreni xmeeltu, xhixtentu, ni'c siädgusgueerene la'tu te xca'reni xhixtentu. Niluxh xcälgujxhtisreni nani gun Dios, näjza xcälñnitlojreni cabäzgjajreni agujc xchero.

⁴ Najcni si'c sa'csi di Dios niällajz rextojlni rexanglni nani bejn dojl, niluxh baxhalñireni gabijl, basäunireni nen reguednacäyj cadro cabäzjreni dxej ni gun Dios xcälgujxhtisni. ⁵ Sigajcza rebejn ni guyu' galoo, banitloj Diosreni, basläa Dios xcälñabajn Noétis näjza sgajdzreni, sa'csi basule' Noé xtidx guluii Dios. Luxh baxhalñi nisguuro te biädnitlojni guiraa rebejn nani di nucuadiajg xtidx Dios. ⁶ Bejn Dios yälgujxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx Dios. ⁷ Gulää Dios Lo't ni gujc te bensa'c lo reguejdxga, sa'csi guc-huin lajzni xcuent relatsiaj ni bejn rebendojlgä. ⁸ Guideb ni guläjs Lo't, te bensa'c, lo guejdxga, dxej, yäl guc-

huin lastooni xcuent nani bahuiini, nani biejn diajgni, xcuentza latsiaj ni bejnreni, sa'csi bensa'cni. ⁹ Anajn Dios xho racnäjni rebensa'c te rbäänireni lo re-trabajw ni cadejdreni, anajnza Dios xho gusacsäni rebendojlni cheni guidzujnli dxej ni gunni xcälgujxhtisreni.

¹⁰ Guliduxhni, sujnrü Dios yälgujxhtis loj rebejn nani rlaiz gun si'ctisni rlaiz tiejxhrene, näjza renani rbälaz xcälñibee Dios. Najceni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'. ¹¹ Niluxh nicla tej rexangl Dios ni rajpru yälñibee lo rebejnre, direni guiniyaj, cue'creni xquejreni lo Dios.

¹² Luxh, rebejnnga najc si'c reguidxaa nani xheti xcäriejnreni, cabäjtisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni. ¹³ Bejnreni dojl, ni'c sinitlojreni, sidejdreni yälrusacsiduxh xcuent rextojlni. Laareni rchaglajzreni guntisreni laniro rdxee. Laareni najceni si'c te cosdxuudxo si'c te manch ni rcäj lo te ladnol, rbaali lajzreni rusgueerene la'tu lañ ni cayajc lanij cayaunäjreni la'tu.

¹⁴ Digacdi fiireni loj te gunaa, li rsia' lajzreni, direni guidxajg rujnreni dojl, rusgueerene rebejn te gunzaren dojl, ruluireni lastooreni te säblajzreni meel, najceni bejn nani batzubde Dios, ¹⁵ agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yällatsiaj. ¹⁶ Niluxh gudilnäjä Diosni xcuent xtojlni, bejn Dios gunii te mandip si'c xse' bejn, te bascuääzni profet'ga, dini nusaan niujnni nani cayujnni, cayujnni si'c te bejn ni rajc yejcnä.

¹⁷ Rebejn latsiajre najc si'c te bisie cadro xheti nis, najczareni si'c rexkäyj ni sanä bej nezree nezrec che cabi' te bero. Laareni su'reni lo xcäyj par tej-

pas che gun Dios yälguxhtis. ¹⁸Sa'csi rmiduxhrene didxro, niluxh xhet sajedi rediidxga luxh rniireni huenduxh najc gun bejn ni rlanjtis tiejxhrene, con yällatsiaj rusgueereni rebejn nani entis birii loj reni rujn sa' dzunguijdxga. ¹⁹Rusgueereni, rniireni rut gudxoindini palga jiädnaajnireni, niluxh lagajc laareni najceni mos, sa'csi rniireni latsiajreni. Xhitis ni rniireni te bejn, ni'c rusäuni nen latzguiib. ²⁰Sa'csi palga agubicaaj te bejn loj redzunguijdx xten guedxliuj sa'csi huililajzreni xtidx Dad Jesucrist nani rusläa rebejn lo guiraa dojl, dxejctiru gubisacni loj xtojlni, abixhidsacreni lo xtojlni, nalajz najceni si'c che gajdreni gumbee xtidx Dios. ²¹Huenru direni niembee xnezyuj Dios, quela che abiembeerene nezyujga, cuälazreni didx dxan, xtidx Dios ni basule'reni lojreni. ²²Dxejcsii rsiojb diidx ni najc scree: "Rbisac te bä'cw loj xcälrdzujbni. Cuch ni entis gojz richusacni lo xpajjni."

Xho gac che guibisac Jesucrist

3 Rebetzä, dee najc ni rojp guijtz ni caguxhaälä lojtu; lo guiro'p guijtzre cagusnibä la'tu xcuent reyäl'rulijdx ni gusnaj lajztu. ²Colgusnaj lajztu rediidx ni gunii reprofet agujc xchero, näjza rediidx ni gunii Dad Jesucrist nani basule' reapost.

³Ganiddoo, colgacbee dee: che asiäddzungajxh redxelult, siäd rebejn ni rgubee rextidx Dios, laareni sujnreni si'ctis ni rlanj tiejxhrene. ⁴Siniabdiidxreni: "¿Xhicuent gajd Jesucrist guibisac si'cni bia'n diidx? Cheni gujtl rextadgoldoonu, guira'ti sanuutis najcni si'c gujcn cheni guc-cheeli guedxliujre." ⁵Niluxh che rniireni si'c, rlanjpac jiällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen nis, naj tre'ni loj niska. ⁶Dxejcti gunitloj

guira'ti ni yu' lo guedxliujga che biajb te nisguiro, gunitlojni. ⁷Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yälguxhtis, che gunitlojni rebejdojl.

⁸Rebetzä, na'c jiällajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej. ⁹Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjnzi gusiejch lajztu, sa'csi di rlanjzi nitloj nicla tejt.

¹⁰Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

¹¹Sa'csi sinitloj guiraa redee, ni'c nanab guibannayatu lo guedxliujre, na'c guntu dojl. ¹²Colcuäjz dxejctis ni jiäd Dios lo guedxliuj. Dxejcti sejc xhaguibaa, sinitlojni, luxh guiralii ni yu' sialni lo guiboro. ¹³Niluxh abasa'n Dios diidx loonu, ni'cni cayenloonu te guibacoob, te guedxliucoob, cadro gunreni ganaxtis dzunsa'c, xhetiru dojl.

¹⁴Ni'cni rebetzä ni sanälazä, sa'csi cabäaznu guiraa ni gac, colyejn huant te che guibisac Dios, sidxälni la'tu dxitis nabajntu, nabannayatu, xhetiru xtojltu. ¹⁵Colhuui xhi dzuun bejn Dad Jesucrist ni'c rajpnu yälrusläa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yäl'najn lojni. ¹⁶Nen guiraa rexquijtzni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi j-ajbtu ladznäa renani gusgueetu, te na'c gunijttu xcälrsiudzu'tztu lo xtidx Dios.

¹⁸ Colgustioob xcäriejntu con yälracnäj

näjza yäl'najn xten Dad Jesucrist nani rusläa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx yäl nabajñ par tejpas loonu

1 Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä ñaani. Laani najc Diidx ni runiidx yäl nabajñ par tejpas loonu. ²Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliápac nabannäj Jesucrist Dios. Baluii Dios Jesucrist loonu. ³Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtennu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu. ⁴Cagucuaä rediidxre lojtu te guibalazduxhtu.

Dios najc Bajl

⁵Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl nacäjäydi yu' lo Dios. ⁶Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. ⁷Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

⁸Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. ⁹Palga guicäjpnu lo Dios guiraa redojl ni cayennu, siälñlajzni xtojñnu, sudzucajni rextojñnu, sa'csi laaca rujñni luxh guliü najc rextiidxni. ¹⁰Palga guinuunu dinu niujñ dojl, rniinu najc Dios si'c te bejn ni rniü didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

Racnäy Jesucrist nuunu nez loj Dios

2 Guejbtu, resa'ä nani huililajz xtidx Dios, cagucuaä rediidxre lojtu lo gui-jtz te na'c guntu dojl. Niluxh palga jiennu dojl, racnäy Jesucrist nuunu, rniini xcuentnu lo Dios, sa'csi xheti xtojñni. ²Gujt Jesucrist xcuentnu lo cruzj. Gudijxni rextojñnu lo cruzj. Luxh et rextojñtisnu gudijxni. Gudijxni rextojñ guiraa rebejn ni re' lo guideb guedxliuj.

³Palga rusoobnu rextidx Dios, huenliisi rluii riembeenu Dios. ⁴Cheni rniü te bejn, "narä rumbeäni", niluxh dini gusoob rextiidxni, rusgueeni resabejnü. Di lajzni nilii xtidx Dios. ⁵Palga rusoobnu xtidx Dios, guliipac rinälaaznu Dios, ni'c najñnu nabannäjñni. ⁶Cheni rniinu nabannäjñnu Jesucrist, nanabpac guibansa'cnu si'c gubajñ Jesucrist lo guedxliuj.

Redidxcoob

⁷Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diajgtu galooli. ⁸Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajñ lo yäl nacäjäy. Baluii Jesucrist redidxcoobga loonu. Guliipac najc Dios si'c bajl. Dini guibajñ lo nacäjäy.

⁹Palga chutis tejnu rniü, "nabanä lo nianij xten Dios", niluxh rdxe'chni lo resa'ni, lo yäl nacäjäy yu'ni. ¹⁰Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichaglaiz gunni dojl. ¹¹Niluxh palga rdxe'chnu lo resa'nu, nabajñnu lo yäl nacäjäy sa'csi riennu dojl, sasaanu lo yäl nacäjäy. Nicla gacbeenu canejz chonnu, sa'csi ruscäjäy bendxab balojnu.

¹²Cagucuaä rediidxre lo guejbtu, resa'ä ni rililajz, sa'csi abadzucaj Dios rextojñnu, sa'csi lo cruzj gudijx Jesucrist

rextojl̄nu. ¹³Cagucuaä rediidxre lo guejbtu, redad bengool, sa'csi huililajztu rextid̄x Jesucrist, najntu laani nabaj̄nni galooli näjza par tejpas. Cagucuaä rediidxre lojtu, rebi'n sa'csi dirutu jiu xtid̄x bend̄xab.

Cagucuaä rediidxre lojtu rexi'nä, sa'csi rumbeetu Dios. ¹⁴Abacuaä rediidxre lo guejbtu, redad bengool, sa'csi numbeetu Jesucrist nani nabaj̄n galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtid̄x Dios neñ lastootu, dirutu jiu xtid̄x bend̄xab.

¹⁵Na'c guichagljaztu guntu renani rujn rebejn nani di chalilajz xtid̄x Jesucrist; na'cza chanälaztejt̄u xhixtentu ni rajptu lo guedxliuj. Palga rinälaztejt̄u rehxixtenti ni ra'pnu lo guedxliuj, dxejc dinu chanälajz Dios. ¹⁶Reben̄ guedxliuj ni di chalilajz xtid̄x Dios rchagljazreni rujnreni redzunguijdxre: rujnreni dzunguijdx nani rchagljaz tiejxhrene; rujnreni dzunguijdx nani rchagljaz baloren̄i, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. ¹⁷Luxh rnitlojpac guedxliuj. Sinitlojza guiraa reni rchagljaz rujn reben̄ guedxliuj ni di chalilajz xtid̄x Dios. Niluxh palga gusoobtisnu xtid̄x Xtdadnu Dios, sibannäjnuni par tejpas.

Didx gulii näjza didx-xhii

¹⁸Guejbtu resa'ä ni rililajz xtid̄x Dios, asiäddzungajxh dxej che gululioj niguii nani rdxe'ch loj Jesucrist. Abiejn di-ajgtu siääd niguiiga. Naj̄ yu' xhidajl reniguii nani rdxechlajz lo Crist. Ni'c alaracbeenu asiäddzungajxh dxejga che gululioj niguiiga. ¹⁹Yu' xhidajl rebejn̄ ni rdxechlajz lo Jesucrist. Biriireni lo resa'nu. Direni nililajz xtid̄x Jesucrist. Palga nililajzreni xtid̄x Jesucrist si'c huililaaznu nuure xtid̄x Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn̄ Jesucrist.

²⁰Gule Dios Jesucrist. Jesucristre baniid̄x Sprit Dxan xten Dios loonu te gacbeenu xhini'c najc redid̄xliipac. ²¹Et sa'csi ditu gan xhi diid̄x najc did̄x gulii bacuaä rediid̄xga lojtu. Sa'csi najntu xhi diid̄x najc did̄x guliipac, ni'c bacuaäni, te gutijp lajztu. Palga rucuaä rediid̄x ni najc gulii, anajntu dina gusgueä la'tu.

²²Chutis ni naa di Jesús gac Crist Xi'n Dios, xhet guliidi rextiid̄xni. Renani rni di Jesucrist gac Xi'n Dios rdx-echlajzni lo Jesucrist. Di reni'c nililajz xtid̄x Dios. ²³Chutis reni rni di Jesucrist gac Xi'n Dios, di reni'c gumbee xtdadnu Dios. Niluxh renani rni Jesucrist najc Xi'n Dios, huililajzreni xtid̄x Dios, numbeezareni Dios.

²⁴Colgusoob rediid̄x ni biejn di-ajgtu galooli che huililajztu rextid̄x Dios. Palga rusoobtu rediid̄xga, nabannäjtu Dios näj xi'nni Jesucrist. ²⁵Abia'n Jesucrist diid̄x guniid̄xni yäl̄nabancoob loonu. Naj̄ ara'pnu yäl̄nabaj̄nre, ra'pnuni par tejpas.

²⁶Abacuaä rediid̄xre lojtu xcuent rebejn̄ ni rrajz chalilajztu rediid̄x ni xhet guliidi. ²⁷Baxhaļ̄ Jesucrist Sprit Dxan xten Dios loonu. Rbäjzni neñ lastoonu. Dinu guiquin̄ chu stee bejn̄ guluii loonu xhi diid̄x najc gulii, sa'csi lagajc Sprit Dxan xten Dios ruluii xtiid̄xni loonu. Naj̄ ruluiini la'tu guiraa ni najc gulii, dini gusguee la'tu. Col̄guibannäj̄ Jesucrist; col̄gusoob xtid̄x Jesucrist si'cni ruluii Sprit Dxan xten Dios lojtu.

²⁸Naj̄ guejbtu resa'ä, col̄guibannäj̄ Jesucrist, te che jädsacni lo guedxliuj si-siutzu'tznu nejz lojni, dinu guitujy nejz lojni. ²⁹Anajntu laaca najc Dios. Anajntu renani rusoob xtid̄x Dios sasanäjreni Dios, ni'c najczeni xi'n Dios.

Rexi'n Dios

3 Bahuii xho huinälazduxh Dios nuure, ni'c anaj Dios nuure najcnu rexi'nni. Luxh gulii najcnu rexi'n Dios.

Reben̄ guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu. ²Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. ³Che rnaj laaznu sidzujn̄ dxej gac tejganu si'c ni najc Jesucrist, dxej rbaṅsa'cnu si'c ni gubajñ Jesucrist lo guedxliuj.

⁴Di rebejn̄ ni rujn̄ dojl̄ gusoob leii xten Dios. Che riennu dojl̄, runijtnu lo leii xten Dios. ⁵Racbeenu Jesucrist biääd lo guedxliuj, gujcni niguii te gujc badzucajni rextojlnu. Laani dini niujn̄ dojl̄. ⁶Che sasanäjnu Jesucrist, dinu gac benguijdx. Di bejn̄ nani rujn̄ dojl̄ chalilajz xtidx Jesucrist, dizani gumbeeni. ⁷Resa'ä, na'c chalilajztu didx-xhii ni rnii bejn̄ lojtu, che rniireni cayujntu dojl̄. Rebejn̄ ni rujn̄ laaca, najczareni si'c najc Jesucrist. ⁸Rebejn̄ nani rujn̄ dojl̄ najc xi'n bendxab. Galodooli rujn̄ bendxab dojl̄. Ni'cni biääd Jesucrist Xi'n Dios lo guedxliuj te gudzucajni redojl̄ nani rujn̄ bejn̄ xcuent bendxab.

⁹Rebejn̄ nani najc xi'n Dios direni guichagljaz gunreni dojl̄, sa'csi abachaa Dios xcäriejnreni, sa'csi rbäjz Dios neñ lastooreni. Direni gun dojl̄, sa'csi najcreni xi'n Dios. ¹⁰Si'c riembeenu rebejn̄ ni najc xi'n Dios, näjza rebejn̄ ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäj̄l chanälajznu resa'nu

¹¹Lagajc rediidxre biejn̄ diajgtu galooli che huililajztu rextidx Dios: coḷchanälajz resa'tu. ¹²Xhet si'cdi toCain nani gujc xi'n bendxab. Bejn̄ni dojl̄, bagu'tni bejtzni. ¿Xhicuent bagu'tnini? Bagu'tnini sa'csi bejn̄ bejtzni ganax dzunsa'c, luxh toCain bejn̄ dzunguijdx.

¹³Na'c guidxelojtu che guidxechlajz rebejn̄ lojtu. ¹⁴Racbeenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yälñabajñ par tejpas sa'csi rionälaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni. ¹⁵Chutis ni rdxechlajz lo resa'ni, najcni nejz lo Dios si'c ni abagu'tni te bejn̄. Najnnu che rugu't te niguii te bejn̄ dini ga'p yälñabajñ par tejpas. ¹⁶Racbeenu rinälajz Jesucrist nuunu, sa'csi gujtni lacuaa nuunu lo cruzj. Sigajcza nungäj̄l gacnäjn̄u resa'nu, mase guetnu lacuaa guetreni. ¹⁷Chutis tejnu ni rajp xhidajl xhixtenni, luxh dini gacnäjn̄ nicla tejnu ni xhet rajpdi, di bejn̄ga chanälajz Dios. ¹⁸Guejbtu resa'ä, na'c chanälaznu resa'nu con rextiidxtisnu, na'c guiniitistnu rionälaznu resa'nu. Palga rionälazpacnu resa'nu, sacnäjn̄u resa'nu.

Sisiutzu'tznu nez loj Dios

¹⁹⁻²⁰Palga rionälaznu resa'nu, nancheenu najcnu rexi'n Dios. Palga jiajbnu xhigab dinu gac beṅsa'c, dizanu gac xi'n Dios, nanab jiunu rextiidxtis Dios, na'c jiunu rehxigabnu. Dios najn rehxigabga. Niluxh Dios anaj: renani rinälaz resa'reni, reni'c najc rexi'n̄ni. ²¹Rniä lo guejbtu nani rinälazä, palga lagajc lastoonu rnii loonu, “cagusooblu xtidx Dios”, sisiutjip lastoonu che rbedx-rniabnu lo Dios. ²²Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaalajz Dios. ²³Dee najc rediidx ni gunibee Dios gusoobnu: chalilaznu xtidx Dios, diidx ni rnii xho gujt Jesucrist lacuaa nuunu, chonälazzanu resa'nu si'cni gunibee Dios. ²⁴Palga rusoobnu guiraa nani gunibeeni, nabannäj̄nuni, si'cza nabannäj̄ni nuunu. Nancheenu nabannäj̄ Dios nuunu, sa'csi

baniidxni Sprit Dxaan xtenni te cuääz nen lastoonu.

Scree gacbeenu xhi didx najc guliipac

4 Guejbtu renani rinälazä, na'c chalilajztu rextidx chutis bejn nani naa, "rniä rextidx Dios lojtu". Ganiddoo colgula'tz rextiidxni te gacbeetu don chu xtidx caniini, sa'csi xhidajl bejn sinii lojtu, "nuunu miinu rextidx Dios", niluxh canisireni si'c. ²Scree gacbeenu xhi didx najc guliipac. Guiraa rebejn nani guinii "Jesucrist, Xi'n Dios, ni biäd lo guedxliuj si'c niguii", reni'c cayacnäj Sprit Dxaan xten Dios, reni'c canii xtidx Dios. ³Guiraa rebejn nani di guinii biäd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni lo Jesucrist. Abiejn diajgtu siäd te niguii ni rdxechduxh lo Jesucrist, luxh naj abidzujn rextzuun niguiiga lo guedxliuj.

⁴Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz nen lastoonu abejnni gaan lo bendxab ni nabajn lo guedxliuj. ⁵Rebejn ni rnii xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. ⁶Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rnii didxliipac. Scree gacbeezanu chu rebejn rnii diidx ni xhet guliidi.

Rinäälajz Dios rebejn

⁷Rniä lo guejbtu nani rinälazä, nanab chanälazanu resa'nu, renani huililajz xtidx Dios, sa'csi Dios racnäj nuunu te chanälazanu resa'nu. Palga rinälazanu resa'nu, dxejc najcnu rexi'n Dios, luxh guli riembeenu Dios. ⁸Palga chutis tejnu di chanälajz resa'ni, dizani gumbee Dios, sa'csi lagajc Dios racnäj chanälazanu Dios, racnäjzani

chanälazanu resa'nu. ⁹Abasule' Dios loonu lacti rinälajzni nuunu. Yu' tejtis Xi'n Dios. Abaxhalni Xi'nni lo guedxliuj te gudijxni rextojlno lo cruz te si'c guibannäjnumi par tejpas. ¹⁰Si'c racbeenu rinälajzpac Dios nuunu. Galoo dinu rinälajz Dios. Niluxh Dios huinälajz nuunu, ni'c baxhalni Xi'nni lo guedxliuj te gudijxni xtojlno lo cruz.

¹¹Rniä lo guejbtu nani rinälazä, si'cni rinälajz Dios nuunu, sigajcza rlanjzni chanälazanu resa'nu. ¹²Nicla tej bejn gajd fii lo Dios. Niluxh palga chanälazanu resa'nu, Dios nabajn nen lastoonu, dxejc guli rinälazpacnu Dios. ¹³Nancheenu nabannäjnu Dios, sigajcza nabannäjpac Dios nuunu, sa'csi abaxhalni Sprit Dxaan xtenni cuääz nen lastoonu. ¹⁴Narä näjza reapost abahuiinu lo Jesucrist. Caniä lojtu abaxhal Xtadnu Dios Xi'nni lo guedxliuj te guslaani rebejn lo xtojlreni. ¹⁵Chutis tejnu ni rnii "Jesucrist najc Xi'n Dios", nabannäjni Dios, nabannäjza Dios bejnga.

¹⁶Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälazanu Dios, nabannäjnu Dios, nabannäjza Dios nuunu. ¹⁷Naj sanälazanu Dios si'cni rlanjzni luxh palga chanälazannu guidebtis ni guibajnnu, dinu guidxjeb che guidzujn dxej ni gun Jesucrist yälguxhtis lo guedxliuj. Dinu guidxjeb sa'csi guideb nabajnnu lo guedxliuj, nabannäjnu Dios si'c nabannäj Jesucrist Dios. ¹⁸Palga rinälazsa'cnu Dios, dinu guidxjeb, palga rinälajzpacnu di gacdi guidxeebnu. Palga guliipacnu rinälazanu Dios, xhetliidi rdxejbdinu. Nani rdxejeb, rdejdnii trabajw, gajd bejnga chanälazsa'c Dios.

¹⁹Rinäälazanu Dios sa'csi ganiddoo Dios huinälajz nuunu. ²⁰Palga chutis tejnu naa "rinälazä Dios" niluxh rdxechlajzni lo resa'nu, xhet guliidi xti-

idxni. Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii. ²¹ Agunibee Dios, nani rinälajz Dios chanälajzni resa'ni sigajc rinälajzni Dios.

Riennu gaan lo guiraa redoļguijdx lo guedxliuj

5 Chutis ni rililajz Jesús najc Crist nani baxhaļ Dios, ni'c najc Xi'n Dios. Palga rinälaaznu Xtadnu Dios, sigajcza sinälaaznu renani najc Xi'n Dios. ² Palga rinälaaznu Dios, palga rusoozbzanu xtiidxni, dxejc najnnu rinälaaznu resa'nu nani najc Xi'n Dios. ³ Ni'cni, palga rinälaaznu Dios, susoobnu xtiidxni. Luxh dinu guichalo nagajñ gusoobnu xtiidxni. ⁴ Chutis tejnu ni najc xi'n Dios, riennu gaan lo redoļ ni re' lo guedxliuj. Riennu gaan lo redoļ lo guedxliujre sa'csi huililaaznu xtidx Jesucrist. ⁵ ĶChuni'c cayujñ gaan lo redoļ lo guedxliuj, ä? Renani rililajz najc Jesucrist, Xi'n Dios, reni'c rujñ gaan lo redoļ lo guedxliujre.

Rediidx ni baluui Dios loonu xcuent Jesucrist

⁶ Biädä Jesucrist lo guedxliujre. Birobnis Jesucrist, baxhe'zani xtiejñni lo crujuj. Xhet ganaxdi te guirobnisni biädäni, näjza te guxhe'ni xtiejñni lo crujuj che biädäni. Sprit Dxan xten Dios canii rediidxre. Guliipac rextiidxni. ⁷ Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. ⁸ Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejñni lo crujuj che gujtni. ⁹ Palga rililaaznu xtidx rebejñ ni rbäjz lo guedxliuj, nungäjļ chalilaazrunu xtidx Dios. Rediidx nani rnii jioñ reni baluiloj tejsi diidx najcreni con nani

rnii Dios xcuent Jesucrist Xi'n Dios. ¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist neñ las-toonu. Chutis tejnu ni di chalilajz xtidx Dios, rujñni najc Dios si'c tej ni rusguee sa'csi dini chalilajz xtidx Dios ni rniiini xcuent Jesucrist. ¹¹ Scree najc rediidx ni rnii Dios. Abaniidx Dios loonu yälñabajñ par tejpas. Yälñabajnga biädäni Xi'nni, Jesucrist. ¹² Palga nabannäjnu Xi'nni, rajpnu yälñabajñ par tejpas. Palga dinu guibannäj Xi'nni, dinu ga'p yälñabajñ par tejpas.

Xtixtios con diidx ni rulijdx

¹³ Abacuaä rediidxre lojtu ni rililajz rextiidx Jesucrist te gacbeepactu rajptu yälñabajñ par tejpas.

¹⁴ Ni'cni dinu guidxejñ che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. ¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujñ doļ, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälñabajñ lojni. Niluxh yu' te doļroduxh. Chutis te bejñ ni gun doļga, di Dios gudeed lo bejnga yälñabajñ par tejpas. Dizana guiniä guiniabtu lo Dios xcuent bejñ ni rujñ doļroga. ¹⁷ Guiraa redzunguijdx nani rujñ rebejñ najc doļ. Niluxh yu' redoļ nani di gun gunijñ bejñ lo Dios par tejpas palga jiu bejñ xtidx Dios.

¹⁸ Racbeenu guiraanu nani najc xi'n Dios di rlaaznu jiennu doļ. Racnäñ Jesucrist nuunu te di beñdxab gun gaan nuunu, te dizanu gusoob xtidx beñdxab.

¹⁹ Nancheenu nuure najcnu xi'n Dios, niluxh guiraa rebejñ nani riutis rextzun guedxliuj cagusoobreni xtidx beñdxab.

²⁰ Najnnu biädä Jesucrist Xi'n Dios lo guedxliuj. Baluuiinu nuunu rextiidx Dios te jiembeenu Dios, nani najcpac Dios guli.

Nabannäjnu Dios ni najc gulii, sa'csi nabannäjnu Jesucrist. Laani najc Dios ni najc gulii. Caguniidxni loonu yälnabajn

par tejpas. ²¹ Resa'ä, na'c guzuxhijbtu lo rebanäjb ni xhet guliidi. Sugacni si'c.

Guijtz Ni Roj Ni Bacuaa Juan

Diidx guliü näjza yälrinälaznu resa'nu

1 Narä nacä bengool. Cagucuaä gui-
jtze lojlu nane' nani agule Dios,
näjza loj rexi'nu. Rinälazäpac la'tu luxh
xhet xtebädi; näjza guiraa reni rililajz
xtidx Dios sanälajztu. ²Nuure rinälaznu
la'tu sa'csi yuchee neñ lastoonu redi-
idx nani najc guliü, luxh dilajznu jääl
rediidxre. ³Xtadnu Dios, näjza Jesucrist
Xi'nni, gacnäjä nuunu, jireni nuunu, gus-
cuedcxi lajznu con xcälñajn didxlii näjza
yälrinälajz.

⁴Bibalazduxhä che gucbeä yu' rexi'nu
ni ruseob xtidx Dios si'c gunibee Dios
loonu gusoobnuni. ⁵Nane' ni gule
Dios, diidx nani rniabä gusoob guejblu
ñaj dini gac didxcoob, niluxh lagajc
diidx ni biejn diaagnu galooli, che
huililaazlinu xtidx Jesucrist. Lagajc
dee najc nani gunibee Dios loonu:
nungäjlpac chanälaznu resa'nu.
⁶Sinälaaznu resa'nu palga cagusoobnu
xtidx Dios. Dee najc xtidx Dios ni biejn
diaagnu galooli, che huililaazlinu xtidx
Jesucrist: chanälaznu resa'nu.

Rebejn ni rnii garenca diidx ni xhet guliidi

⁷Balti bejn birii loonu, ñaj cagus-
gueereni xhidajl bejn ni re' lo guedxliuj.

Caniireni di Jesucrist ni ajc niguii che
biädni lo guedxliuj. Sa' bejnre najc
benrusguee. Sa' bejnre rdxe'chreni loj Je-
sucrist. ⁸Colga'p la'tu te na'c chalilajztu
xtidxreni, didi xlia'si biennu dzuun ro'c,
te xca'tu guiraa ni guniidx Dios lojtu.

⁹Chutis bejn ni rrajz gugu'ch xtiidx-
pacni lo xtidx Jesucrist, di bejnğa gum-
bee Dios. Niluxh chutis bejn ni riu xtidx
Jesucrist, rumbeeni Dios, rumbeezani
Jesucrist Xi'n Dios. ¹⁰Palga jääd te bejn
rolijztu ni di chasanäj xtidx Jesucrist,
na'c xcäjbtu jiu'ni roliztu, na'cza guini-
itu lojni, "Xchan. Biu'." ¹¹Sa'csi chutis
bejn ni guinii "xchan" loj te bejn ni
di chasanäj xtidx Jesucrist, cayacnäjäzani
redzunguijdx ni rujn bejnğa.

Rudeedni xtixtios

¹²Xhidalduxhru diidx rlazä guiniä lo-
jtu, niluxh di rlazä gucuaäreni lo gui-
jtz. Cabäzä jäädhuiä lojtu ro'c te guiniä redi-
idxre lojpactu, te guibaalajztu. ¹³Rexi'n
bäjllu, nani aguleza Dios, ruxhaļ xtixtios
lojlu. Ni'ctis najc ni rucuaä lojtu. Sugacni
si'c.

Guijtz Ni Riojn Ni Bacuaa Juan

Cagucuaani didxsa'c lo Gayo

1 Narä nacä te bengool. Caguxhalä guijszre lojlu, dad Gayo. Rinälazduxhälu sa'csi huililajzlu rextidx Dios.

²Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäladaanlu. ³Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. ⁴Xheti stee diidx ni ruspaaz laza si'c rbaaz laza che racbeä rusooob resa'nu redidxlii xten Jesucrist.

⁵Dad Gayo, laaca cayujnlu che racnäjlun renani rililajz xtidx Jesucrist, mase dilu gumbeereni che riädreni lojlu. ⁶Aräjpreni lo resa'nu ni rdxagsa' ree xho huinäälajzlureni näjza xho gucnäjlureni. Laaca bejnlu gucnäjlun resa'nu, badeedlu xhi biquiireni lo nejz che biriireni rolizlu. Si'cza nanab jiennu lo guiraa resa'nu, nalajznu rebejn ni ruluu xtidx Dios. ⁷Ruluu ireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. ⁸Si'cza nanab gacnäjnu rebejn ni riluu xtidx Jesucrist nen garen-garen guejdx, te si'c jiennänu xtzuum Dios guiraa renani ruluu xtidx Dios.

Di Diótfrefes niujn redzunsac

⁹Abaxhalä te guijsz lo rexpejn Jesucrist ro'c. Niluxh Diótfrefes rlajz

guinibeeni lo resa'nu ro'c. Dini jiu xtidxä. ¹⁰Ni'cni che guidzunä ro'c, narä siniä rediidxre lo resa'nu ro'c, che guidxaag sa'nu ro'c. Diótfrefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riäd ro'c, mase rlajz chu tejtun fiireni. Luxh rlajzni gudxojni guidxagnäjtun rebejn nani ruhuii resa'nu ni ruluu xtidx Jesucrist.

¹¹Saä ni rinälazä, na'c gunlu redzunguijdx, bejn redzunsac. Nani rujn dzunsac ni'c najc Xi'n Dios. Chutis tej ni rujn redzunsac najc xpejn Dios. Chutis tej ni rujn redzunguijdx, di ni'c gumbee Dios.

Rniireni didxsa'c xcuent Demetrio

¹²Guiraa rebejn ganax didxsa'c rniireni xcuent Demetrio, luxh huenliisi rusooobni xtidx Jesucrist. Sigajcza narä rniä didxsa'c xcuentni. Najnlu guliipac redidx ni rniä.

Rudeedni xtixtios

¹³Rlazä guiniä xhidalduxhru diidx lojlu, niluxh di rlazä gucuaä rediidxga lo guijszre. ¹⁴Runä xhigab di gaclaa jiädhuiä lojlu, dxejcti jieinu diidx.

¹⁵Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejga rexamigwä ro'c.

Guijtz Ni Bacuaa Judas

Judas cagucuaa loj renani agule Dios

1 Narä nacä Judas, ni rujn xtzuun Jesucrist. Narä nacäza betz Jacoob. Cagucuaä guijszre loj renani agule xtadnu Dios, renani sanälazduxhni, nani cayapcheeni par Jesucrist. ²Rniabä lo Dios, gulaslazduxhruni la'tu, guscuecdx-iduxhruni lastootu, gacnäjni la'tu, gunidixhruni yälšanälajz.

Renani ruluii yälrusguee

(2 Pedro 2:1-17)

³Rebetzä nani sanälazä, che cayunduxhä xhigab gucuaä lojtu xcuent yälrusläa lo rextojlnu ni rajpnu, benä xhigab riojbru gucuaä te guijsz lojtu te gulidxätu sudzu'tznu, gapdzu'tztu yälirililajz ni basule'reni par tejpas loj rexpejn Dios. ⁴Sa'csi abiuxhigat'z gaii bejn, renani galooli gunii Dios siädreni, niluxh sinitlojreni. Najczeni bejn ni di chalilajz xtidx Dios, najczeni benguidxduxh, rutzuräreni xcälracnäjä Dios, rujnreni xtujy, sanäreni te yäl'nabandxuudx. Rbälazzareni xpaxhuaannu nani rnibee loonu, Dad Jesucrist.

⁵Mase anajntu guira'ti rediidxga tejpas, rlazä gusnaä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtidxni. ⁶Rexangl Dios nani di nuquadijg diidx, ni birii cadro rrajz Dios churen, reni'c basäu Diosreni cadro nacäiboo te cabäzreni gun Dios xcälguxhtisni lojreni. ⁷Si'c bejnii guedx Sodoma näjza Gomorra näjza reguedxbäz ni tre' gajx ro'c, sa'csi bejnreni dojl, reniguii guyunäjreni niguii birääch, regunaa guyunäjzaren, regunabirääch. Dxejc gudejdreni trabawduxh

huejcreni nen guiboo par tejpas xcuent xtojreni, ni'c najc te yälruiljdx loonu.

⁸Rebejn ni riu' lojtu naj najc si'c reben galoo ni bejn dojl. Nabajreni si'c ni bisieedreni lo guiraa nani ruluii yälrmixcal, ruxhinreni tiejxhreni, rbälazreni xcälrnibee Dios, rniyajzaren, rexangl Dios. ⁹Miguejl ni rnibeeru loj rexangl Dios, che gudildiidxni bendxab yejc tiejx toMoisés, dini niniyaj bendxab, alga räjpni: "Sugun Dad Jesucrist yälguxhtis lojlu." ¹⁰Niluxh rebejnaga rniyajreni nicla ganreni xhini'c rniireni. Niluxh nani racbeepac rebejnaga najc yäl'najn nani nicla niqiuin nisieedreni, lala sa' nani rujnza reguidxaa, ni xheti xcäriejnii, reni'c sujn nitlojreni.

¹¹¡Aii! ¡Riazanuren! Sanajlreni xnezyuj Caïn, luxh te gunreni gaan meel ruxhunlireni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäjä Dios, luxh gunitlojni. ¹²Laaren, najczeni te xtuiduxh lo rexchej ni rajc guidoo, direni guidxejb gauxchenäjreni la'tu, sa'csi xque'tisreni riuren. Najczeni si'c te xcäjä ni xhet nisguii siädnäni, nani sanä bej nezree nezrec; najczaren, si'c te yagbigool nani di ninejx xcaj lojni, tio'p huält agujtreni, najczeni si'c te yaj ni abiliäädx. ¹³Laaren, najc si'c nis ni räjs lo nisdoo, che cayajc te bidonduxh, säa, siädni, carii xtujyreni si'c räjs nis lo nisdoo. Najczeni si'c bale' ni rtejb xhaguibaa, rijreni lo te yäl'nacäiduxh ni benchee Dios par tejpas.

¹⁴Xcuentza redee agunixgaaza Enoc ni najc xagdodoo Adán, räjpni: "Bahuii, siädnä Dios xhidalduxh xangl ni ¹⁵te gunni yälguxhtis loj guiraa bejn te gusacsiduxhni guiraa rebejn ni di gumbree Dios xcuent redoolduxh ni bejnreni, xcuentza redidxnaj ni guniyaj rebendolduxhre Dios." ¹⁶Rebejnre laa reni rmojm, runduxhreni quej, rujnreni si'ctis ni

rlajz tiejxhreni, rniireni guiraloj didxnaj, miisireni didxsa'c loj rebejn te gun rebejnğa si'c ni rrlajzreni gunreni.

**Rulijdxni rebejn nani
ahuililajz xtidx Dios**

¹⁷ La'tu, betzä ni sanälazä, riäjł guinaj lajztu rediidx nani gunii reapost xten Dad Jesucrist, ¹⁸ sa'csi guniireni lojtu: "Nen redxelult che guibisac Jesucrist, su' bejn ni suxhiznäjäreni rextidx Dios, sujnreni si'ctis guisia' lajzreni." ¹⁹ Redee najc renani run rlia' rexpejn Dios lo sa'reni; rinuuzareni ni yu' lo guedxliuj, diza Xpřit Dxan xten Dios cuääz nen lastooreni.

²⁰ Niluxh la'tu rebetzä nani sanälazä, coltioob loj xcälirililajztu ni siäd lo Diostis, colnab lo Dios xcuent yälrnibee xten Xpřit Dxan xtenni. ²¹ Colguibajntis lo yälstanälajz xten Dios, colsusintis lał ni cayunlojtu yälrulaslajz xten Dad Jesucrist ni guniidx yäl nabajn par tejpas.

²² Colgacnäjä renani di chalilazsa'c te chalilajzpacreni xtidx Dios. ²³ Colyacnäjä sgaii te guibicajreni lo dojl, gudobxhajxreni, colyejn xhigab lo guiboo cayejreni. Colyacnäjä sgaii bejn, colgulaslajzreni con yälrdxejb, niluxh colnatiru te di guntu lagajc dojl ni rujnreni. Gulälaz nani rujnreni, nani ruxhinreni.

Redidx lult

²⁴ Colguiliä'p xpala'n Dios nani racnäjä la'tu didi jiajbtu lo dojl, nani rujn sajc suutu lo xcälrdimbicha' Dios, nayadujtu, rbaduxh lajztu. ²⁵ Yu' tejtis Dios. Laatisni rajpni yäl najn te gušlaani nuurnu lo dojl xcuent ni bejn xtdanu Jesucrist. Colguiliä'p xpala'nni, rajpni guiralii yälrnibee, yälrdimbicha', galooli, näj naj, näjza par tejpas. Sugacni si'c.

Rediidx Nani Bacuaa Juan Xcuent Recos Ni Churu Gac

Baluiloj Jesucrist lo Juan

1 Dee najc rediidx ni badeed Dios loj Jesucrist te guluilojnini loj rex-mosni, xcuent recos nani di gaclaa gac. Jesucrist baxhaĵ xanglni lo Juan, te baluini guiraa recosga lojni. ²Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

³Chicbaa renani rol guijtze xcuent recos ni churu gac, renani riuza rediidxga, renani rguchee rediidxga nen lastooni sa'csi siäddzungajxh redxej che soob rediidxga.

Juan cagucuaa guijtza lo gajdz guidoo

⁴Narä nacä Juan. Cagucuaä guijtze loj guigajdz reguidoo ni tre' lo región Asia. Dios guspalajz la'tu, guscuecdxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälruspalajz näj xcälrbexilajz guigajdz respriit ni suga' guideb gabi cadro rnibeeni, ⁵näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtiejnii. ⁶Laani bejnii gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

⁷Colgacbee! Laani sibisacni lo rex-cäjäy, luxh guiragajc rebejn suhuui lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

⁸—Narä nacä ganid, nacäza lult, si'c najc relettr A con Z —nii Dad Dios—. Nabanä nadxej, sigajcza gubanä nani, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

Bahuiä loj Jesucrist lo xcälrdimbicha'ni

⁹Narä, Juan, bejtztu, näjza ni cad-ednäjtü trabajw xcuent Jesucrist, ni riunäjzatu cadro rnibee Dios, ni rsi-udzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. ¹⁰Te duningw, laĵ ni cayunää Dios, guzacä astoo canixcaĵä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet, ¹¹najni loä:

—Narä nacä ganiddoo, nacäza lult. Lo te guitro bacuaa nani fiilu, dxejcti baxhaĵ guijtza loj guigajdz guidoo ni yu' nez Asia, nen reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹²Dxejcti gubireä te bahuiä chuni'c canii loä. Che gubireä bahuiä lo gajdz gandilier oor. ¹³Galäii guigajdz recandilieerga, suga' te ni najc Xi'n Dios nani gujc Xi'n Niguii, najcwni te lajd ni rdzujn lo ni'lini, lastoozani naliib te cinturon gulajg ni najc ganaxduj oor. ¹⁴Yejcni näjza xquidxejcnii najczareni nolbäj si'c xquichlajd xiil, nolbäj si'c yejg. Dxejcti rbebajl lojni. ¹⁵Ni'ni rdimbicha' si'c guuii ni laa bronz che cayejcni lo guiboo. Xse'ni riejn nadipduxh astoo che riäjt nisro nen regueuu. ¹⁶Ladbee ca' naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

¹⁷Che bahuiä lojni, biabroä nez lojni si'c te bengut. Dxejcti batzuubni naani xladbeeni yecä, dxejcti guniini loä, najni:

—Na'c guidxejblu, narä nacä ni gubajñ galooli, narä nacäza ni guibajñ lult. ¹⁸Narä nacä ni nabajñpac; gutä, niluxh naj nabanä par tejpas. Rapä yälrnibee lo yälgujt näjza lo gabijl. ¹⁹Ni'cni bacuaa recos ni abahuiilu, nani cayajc naj, näjza nani churu gac. ²⁰Dee najc laa yälxhiga'tz xten regajdz balxhaguibaa ni bahuiilu lo naä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

Rediidx nani chää loj rexpejn guidoo Éfeso

2 Dxejcti najni loä:
—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, näjza nani rsiaj galäii guigajdz gandilier oor, nii rediidxre lojtu: ²Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu benlatsiaj; näjza balat'ztu xho rujn rebejn nani rniireni najcreni apost ni nii xtidx Dios, luxh direni gac, luxh la'tu gucbegajctu cagusgueereni bejn. ³Rsiudzu'tztu, rujntu huant xcuent xtidxä, gajdtu guidxajg. ⁴Empac yu' te quej ni rbe'cä xcuenttu: dirutu chanälajz narä si'cni huinäälajztu narä ganiddoo. ⁵Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechlajztu, sudzucä xcan-dilieertu cadre suga'ni. ⁶Laaca rujntu rbälaztu xtzuum rebejn ni laa nicolaítas, sa'csi näjza narä rbixlazä xtzuumreni. ⁷Nani yu' diajgni te cuadiajgni diidx, sucuadiajgni diidx ni nii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yälñabajñ, ni yu' xhaguibaa cadre yu' Dios.”

Rediidx ni rniini loj rexpejn guidoo ni yu' Esmirna

⁸Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, nii diidxre lojtu: ⁹Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz bendxab. ¹⁰Na'c guidxejblu trabajw nani agojl tedlu. Aree bendxab gusäl gaii sa'tu nen latzguiib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yälñabajñ. ¹¹Nani rlanj cuadiajg diidx sucuadiajgni diidx ni nii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojppa lojni.”

Rediidx ni rniini lo rexpejn guidoo ni yu' Pérgamo

¹²Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad nii rediidxre lojtu: ¹³Narä nanä caro rbäjztu, rbäjztu lo guejdx cadre rnibee Bendxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase nen redxej cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni nen guejdx cadre rnibee Bendxab. ¹⁴Niluxh yu' tiop-chon xtojltu. Lojtu nadxaag gaii bejn ni rujn si'c bejn toBalaam agujc xchero. Laani basedni Balac xho gunni te jiajb rexpejn Israel nen dojl, basednireni gau-reni recos ni gurej lo dxan nez loj rebanäj, basedzani rexpejn Israel guesnäjreni chutis gunaa. ¹⁵Sigajcza nadx-

aag lojtu gaii bejn ni riu rediidx ni rusule' reni laa nicolaítas. ¹⁶ Colgusiechxgaa lajztu, te di jiaalacá lojtu te gucuanááreni spaad ni yu' ro'á. ¹⁷ Nani rlanj cuadi-ajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedá yáxtiil ni laa mana ni yuchee-xhiga'tz. Sudedáza lojni te guibáz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

Rediidx nani rniini lo rexpejn guidoo ni yu' Tiatira

¹⁸ Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: ¹⁹ Ananá xtzuumtu, sanälajztu sa'tu, naná xho rililajztu xtidxá, xho racnäjtu resa'tu, näjza xho rsiudzu'tztu, runduxhtu huant. Nanáza cayujntu dzunroru naj loj ni bejntu che guslojtu. ²⁰ Niluxh yu' xhicuent rdxe'chá lojtu. Rcäjbtu riu'tu loj te gunaa ni laa Jezabel. Laani rniisini najcni te profet, gunaa ni rnii xtidx Dios, rus-gueetisni bejn. Luxh xcäl'ruseedni cagus-gueeni rexpənä nani ahuililajz xtidxá, te naj rujnreni cosguijdx, si'c yälres-näj ni di gac cháäl'ni, rajwzarení nani gurej lo dxan xten rebanäjb. ²¹ Ag-uläzä xchej te gusiechlajzni, gusaanni gunni dojl, luxh naaddini gusiechlajzni xcuent redzunguijdx ni rujnni. ²² Luxh palga laani dini gusaan gunni redzuun nani rujnni, narä siguixäni, gudedá te yälracxhuro. Luxh sutedá trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni. ²³ Sugutxhiä, sunit-loä rexi'n gunaaga, te si'c gacbee guiraa rebejn ni yu' nen reguidoo narä nacä ni rula'tz rexhigab ni yu' xcäriejnreni, näjza yälrililajz ni yu' nen lastooreni. Te gacbeezarení narä sunidxá lo tej-

gatu ni riäj! xca'tu xcuent redzuun ni rujntu. ²⁴ Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten bendxab, xhetru rniädi lojtu, dirunä gutalä xtzuumtu. ²⁵ Colyapdzu'tz rextidxá nani arajptu dxejli ni guibisacá lojtu. ²⁶ Nani gun gaan lo dojl, näjza nani cagusoob xtidxá dxe lultli, lojni sutedá yäl-rnibee te guinibeeni renacion. ²⁷ Si'cni baniidx Xtaďá yäl'rnibee loä, sutedá yäl'rnibee lojni, te guinibeeni guiraa reben guedxliuj, gunnäjni yäl'guxhtis lojreni te barguub si'c rujn ni runchee guesbajn, rlia'ni guiraa regues nani xhet sajcdi. ²⁸ Sunidxäza bale' xhaguibaa ni rii rsildoo (ni säloj guibannäjnu Dios). ²⁹ Nani rlanj cuadiajg sucuadiajgni diidx ni rnii Sprit Dxan xten Dios loj reguidoo.”

Rediidx nani rniini lo rexpejn guidoo ni yu' Sardis

3 Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejn nabajntu, niluxh narä nanä ascanu agujtu, dirutu gun xtzunä. ² Colguibajn, colgula'tzru nani rapsijctu xcuent rextidxá nani ameer nitloj nen lastootu. Narä ruhuiä ditu niunsa'c dzuun xtenä nez loj Dios. ³ Colgusnaj lajztu redidx ni basule'reni lojtu, nani abacuadi-ajgtu, colgusoob rediidxga, colgusiech lajztu. Palga ditu guibajn, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. ⁴ Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laarení säbyäjlni. ⁵ Nani gun gaan lo dojl, ni'c sajc gacwni ladnol,

luxh dizana guche'nä lajni loj xlibr cadro caj laj renani sibajnnäj Dios par tejpas. Sicäpäza nez loj Xtadä näjza nez loj guiraa rexquixhajgni, bejnğa najc rexpenä. ⁶Nani rlaiz cuadiajg diidx, sucuadiajgni diidx ni rni Sprit Dxi xten Dios loj reguidoo.”

Rediidx nani rniini lo rexpejn guidoo ni yu' Filadelfia

⁷Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäi to-David (ni säloj guiragajc yälrnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: ⁸Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. ⁹Suhuiitu xho gunä rebejn ni yu' lo guidobäz xten bendxab. Rniisireni najcreni xpejn Israel, luxh direni gac; rusgueereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu. ¹⁰Sa'csi basoobtu xtidxä ni gunibeä sutijptu, na'c jieedtu, ni'cni narä sacnäázatu che guidzujn dxej tedtu trabajw. Luxh orga ameer guidzujn lo guideb guedxliuj, luxh sidejd guiraa reben guedxliuj trabajw, te guibee rebensa'c lo reben guedxliuj. ¹¹Narä di gaclaa jäälä; gopdu'tz ni rajptu, te rut gudzucajdi ni gunidxä xca'tu. ¹²Nani gun gaan lo dojl, narä gunäni si'c te pilajr nejn xquidoo Xtioozä, nalajznu, sajcn te bejn nani gac guinibee cadro yu' Dios. Sibajnni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusaléncoob, nani guirii xhaguibaa cadro yu' Dios; lojni sucuaäza laä ni najcza nacoob sa'csi najcni xpenä. ¹³Nani rlaiz cuadiajg diidx, su-

cuadiajgni ni rni Sprit Dxi xten Dios loj reguidoo.”

Rediidx nani rniini lo rexpejn guidoo ni yu' Laodicea

¹⁴Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testi-igw ni nriliipac, ni di cuääz guiniini didxliiga, nani guläxtiej guedxliujre näj guiralii ni benchee Dios, laani rniini scree: ¹⁵Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläi guntu tejni o steeni! ¹⁶Ni'cni, sa'csi najctu si'c nistiib, ditu gac si'c nisanajl, niclaza gactu si'c nislää, sibäro'ä la'tu. ¹⁷Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga'lu xhabäalu nez lo Dios. ¹⁸Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujylu suulu xhabäalu; gusiiza unguent loä te chää balojlu, te jien lojlu. ¹⁹Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu. ²⁰Colhuii, ana suga'ä roxlä' lastootu, cagusezä, cabedxa'ä. Palga yu' chu tejtu ni jiejn diajgni xse'ä, guxhalni xpuert lastooni, siu'ä lastooni, te gacnääni, te guibansa'czani nez loä. ²¹Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadro rniireni xhaguibaa. ²²Nani rlaiz cuadiajg diidx, sucuadiajgni diidx ni rni Sprit Dxi xten Dios loj reguidoo.”

Calä'preni xpala'n Dios xhaguibaa

4 Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcru gunii xse' nani biejn

diagä ganiddoo, nani riejn si'c xse' te trompet, najni loä:

—Huä'p, gudaa ree, te guluiä lojlu recos ni churu gac che luux gac recosre.

²Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilo cadro rbej nani rnibee xhaguibaa, luxh ro'c sobga' nani rnibeeni.

³Nani sobga' lo yagxhilga, rieñni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda. ⁴Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejgareni.

⁵Nez lo yagxhilo cadro rnibeeni rii reyälrdinya' näjza guzii. Nez loj cadro rnibeeni cayalguij gajdz bajl ni najc gajdz Sprit Dyan xten Dios. ⁶Nez loj cadro rnibeeni yu' astoocanu te nisdoo ni rieñ si'c te guihuanro, rdimbichasejsni.

Galäi yagxhilroga näjza guideb gabini suga' tajp man, guideb nez lojreni näjza nez dejtzeni yu' balojni. ⁷Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te niguii; man ni rdajpga najcni si'c te bisiro cagutajt xhaguibaa.

⁸Niluxh guidap remanga tejgareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni:

Dyan, dyan, dyan najc Dad Dios ni rajp yälrnibeduxh,

nani yu' galooli, nani yu' naj, nani churu jiaäd.

⁹Guidap remanga rliä'preni xpala'n Dios, rusuxhijbreni rajnrenini, rdeedzaren i xquixtios loj nani rnibee par tejpas. ¹⁰Dxejc guigalbitap rebengool, suzuxhijbzen i loj nani rbej lo yagxhilo, te ganreni nani nabajñ par tejpas. Sucuaaren i xcoronreni nez loj yagxhiloni, siniireni lojni, säjpreni:

¹¹Dad Dios baxhuaannu, Guejpaclu riäj! xca' guiraa rebala'n, guiraa reyälruzuxhijb, guiraa reyälrnibee, sa'csi Guejblu guläxtiej guira'ti nani yu' naj,

yu'reni sa'csi rlajz Guejblu chureni, ni'cni benchee Guejblu guiraareni.

Te guijtznäj te ni najc Xiil xten Dios

5 Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te biliu guijtzn. Caj diidx nez lojni caj diidx nez dejtzn, nadxe'ni, caj gajdz seii lojni. ²Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj! guxhal guijtznre? ¿Chuni'c riäj! gutiäjs reseiire?

³Niluxh nicla tej bejn di nidxäj! ni riäj! gutiäjs reseiiga te guxhalni guijtzn; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäj! chu niajc nuhuii lo guijtzn. ⁴Narä ronduxhä sa'csi nicla tej rut riäj!di gutiäjs reseiiga, niclaza ni riäj! gol guijtzn, niclaza ni riäj! fiitis lo guijtzn.

⁵Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoo toJudá, xagdoo toDavid, abejnni gaan lo yälgujt ni'c naj riäj! guxhalni guijtzn, gutiäjszani guigajdz reseiiga.

⁶Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj. ⁷Laani gubigni, cua'ni guijtzn, guläänini naa ladbee xten nani sobga' lo yagxhilroga canibee. ⁸Che cua'ni guijtzn, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zaren i taz oor guidxa te ni najc si'c

yaal. Yaalga najc guiraa reyälrbexdx, yälriab xten rexpejn Dios. ⁹Cayolzareni te dicoob ni najc scree:

Guejblu sacduxh,
riäjlpac xca' Guejblu guijtzga,
gutiäjs Guejblu reseiiga, sa'csi bagu't
rebejnlu,
näjza xtiejnlu gudijx xcuent bejn lo Dios.
Gudijxlu xcuent bejn ni najc garen-garen
raz,

ni nrii garen-garen didxsaj,
ni siääd garen-garen guejdx lo garen-
garen ladxbejn.

¹⁰Badeedlu gacreni reii näjza bixhojz lo
Dios.

Laareni sinibeereni reben guedxliuj.

¹¹Che bahuiä, biejn diagä xse' xhidalduxh xangl Dios ni suga' guideb gabi yagxhilo cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyon najcreni.

¹²Dipduxh najc xse'reni, canireni scree: Sacduxh Xiil nani bagu'treni, ni'c riäjlpac xca'ni yälribeduxh, yälrapduxh, yälmanduxh, yälmilagwr.

Riäjlpac guiliä'pnu xpala'nni, guzuxhijbnu lojni gannuni, gudeednu xquixtios lojni.

¹³Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez nen guedxliuj näj lo nisdoo, biejn diagä canireni scree:

Loj nani sobga' lo yagxhilo cadro rnibeeni,

näjza loj ni najc Xiil xten Dios, laatisni sacduxhni,
guiliä'pnu xpala'nni, guzuxhijbnu nez lojni gannuni,

gäbzanu rinibeeni par tejpas.

¹⁴Dxejcti guidap remanga rnigajcreni scree:

—Sugacni si'c.

Dxejcti guigalbitap rebengool bazuxhijbreni nez loj nani nabajn par tejpas, gojnrenini.

Guigajdz reseii

6 Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

²Dxejcti bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

³Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

⁴Dxejcti bahuiä lo te cabai xniaa. Loj nani bijb cabai xniaaga badeedreni yälribee gudzucajni yälndadoo, yälrbexilajz, lo guedxliujre, te ju't sa' rebejn. Badeedreni te spadro cua'ni.

⁵Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te fiilu.

Dxejcti bahuiä lo te cabai yas. Nani bijbni naazni te balans. ⁶Biejn diagä astoo galäi guidap remanga, birii xse' te ni canii scree:

—Tej kil xob xca'lu gunlu dzuun tebdexj; chojn kil salbaad xca'lu gunlu dzuun tebdexj. Niluxh na'c guhua'llu bin niclaza se't.

⁷Dxejcti che batiäjsni ni rdap seiiga, biejn diagä gunii ni rdap manga, najni loä:

—Gudaa te fiilu.

⁸Dxejcti bahuiä lo te cabai gojtz. Nani bijbni laa yälgujt, luxh dejtzn siädnalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejcti loj redee badeedreni guinibeereni lo te cuaa rebenguedxliuj te ju'treni rebejnnga

con spaad, näj yälrliaan, näj yälracxhuu, näjza remanduxh ni yu' dajn.

⁹Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰Dipduxh caniireni, canabreni lo Dios, räjpreni:

—Dad, ni najc Dxan, ni najc guli-pac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quixreni ni bejnreni?

¹¹Dxejcti cua'reni te ladnolbäj gojt tejpgareni. Dxejc räjpreni lojreni cuäzsjc'reni, gusilajzreni, laḷ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹²Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. ¹³Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga. ¹⁴Dxejcti gunitloj guibaa si'cni rnitloj te guijtz che re'ni, rajcni te biliu. Guiraa redajn näjza reyuj ni re' galäii lo nisdoo biniibreni, bidxaa xladreni. ¹⁵Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajc'reni baxunreni, huicuatzlojreni nen rebiliää nen redajn. ¹⁶Dxejc räjpreni loj redajn, loj regulaj:

—Colguitejb yejcnu, colgucua'tz nuure loj nani rbej lo yagxhilo xhaguibaa näjza loj yälguxhtis xten nani najc Xiil xten Dios. ¹⁷Sa'csi abidzujn dxero xten xcälguxhtisni, ¿chuni'c sajc suu nez lojni?

Tegayuu tiubitajp miḷ rexpejn Israel

7 Dxejcti bahuiä lo tajp xangl Dios ni suga' loj guidajp laad guedxliuj.

Caguscuaäzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. ²Bahuiä lo stee xangl Dios, ni siääd nez cadro rliejn gubijdx, ca'ni sei xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo. ³Räjpni lojreni:

—Guläzsjc'tero, laḷ ni guicuaanu te seen lo cuaj reni najc xpejn Dios, te dxecru sajc guntu daan lo yuj, näj loj nisdoo, näj loj reyajg.

⁴Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp miḷ bejn ni bibee loj rexpejn Israel. ⁵Loj rexpejn Judá bibee tzubitio'p miḷ; loj rexpejn Rubén bibee tzubitio'p miḷ; loj rexpejn Gad bibee tzubitio'p miḷ; ⁶loj rexpejn Aser bibee tzubitio'p miḷ; loj rexpejn Neftalí bibee tzubitio'p miḷ; loj rexpejn Manasés bibee tzubitio'p miḷ; ⁷loj rexpejn Simeón bibee tzubitio'p miḷ; loj rexpejn Leví bibee tzubitio'p miḷ; loj rexpejn Isacar bibee tzubitio'p miḷ; ⁸loj rexpejn Zabulón bibee tzubitio'p miḷ; loj rexpejn José bibee tzubitio'p miḷ; loj rexpejn Benjamín bibee tzubitio'p miḷ.

Benguixhuj ni najcw ladnolbäj

⁹Dxejcti bahuiä lo xhidalduxh bejn, benguixhuj, nicla tej bejn digacdi gula-breni. Garen-garen ladx-bejn siäädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilo xten ni rnibee, näjza nez lojni ni najc Xiil xten Dios. Najcwreni ladnolbäj, ca'zaren zijn. ¹⁰Dipduxh rniireni, räjpreni:

Dios ni rnibee lo yagxhilo, näjza nani najc Xiilre, baslaareni nuure lo xtojlnu.

¹¹Suga'za guiraa rexangl Dios guideb gabi yagxhilo cadro rnibeeni, näjza

guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios, ¹² räjpreni:

Sugacni si'c. Loj Xtiostisnu colye'tz sacduxhni;

colguiliä'p xpala'nni;

laatisni rajpni yäl'najn;

lojtisni colgudeed xquixhtios, laatisni colgan,

col'suxhijb lojni; laatisni rajpni yäl'nibee näjza yäl'milagwr.

Sugacni si'c par tejpas.

¹³ Dxejcti gunii te bengool loä, najni:

—Renani najcw reladnolbäjre, ¿chu najcreni? ¿Casiädreni?

¹⁴ Dxejcti räpä lojni:

—Dad, anajn Guejblu.

Dxejcti najni loä:

—Redee najc renani agudejd yäl'tra-bajwduxh, renani abia rextojlreni sa'csi xtiejn Xiil xten Dios agudijx xtojlni.

¹⁵ Ni'cni suga'reni nez loj yagxhilo xten Dios dxej-yääl cayujnreni xtzuunni nen xquidooni. Ni'cni sacnä j nani sobga' lo yagxhilogra guiraa renani suga' nez lojni, sunäj'tisni laareni. ¹⁶ Dirureni guilaaan, niclaza jiojlni, diza gubijdx guze'c lojreni, dizareni gacnanlaa. ¹⁷ Sa'csi nani najc Xiil xten Dios ni sobga' galäii loj yagxhilo xten Dios, laani cayajpnireni si'c xilbäs, sinänireni cadre yu' nisyä ni ruded yäl'nabajn par tejpas. Suspijdz Dios nisbee balojreni, dirureni goon par tejpas.

Ni rajc gajdz seiiga

8 Che batiäjsni ni rajc gajdz seiiga, gucdxi xhaguibaa si'cti med or. ² Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³ Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejn Dios ni rniireni che rbedx-rniabreni lo Dios, te checni

lo piändxan ni najc ganax oor, ni yu' nez loj yagxhilogra. ⁴ Dxejcti gujxhga nägajc rextidx rexpelj Dios, birii ladsnaa xangl Dios ni ca' bacue, huä'preni nez loj Dios. ⁵ Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejcti guyu' te guziduxh, bidinyaduxh, gujca te xuduxh.

Retrompe't

⁶ Dxejcti guigajdz rexangl Dios ni ca' guigajdz retrompe't, guzusinjreni te guisloj golreni retrompe'tga.

⁷ Che bil trompetganid, guixob näj guiboo nu'chreni rejn gosloj cayajbreni loj guedxliuj. Dxejcti huejcti ni riojn la' guedxliuj, huejca ni riojn la' reyajc näjza guiralii recuaan.

⁸ Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujcti ni riojn la' nisdoo si'c rejn. ⁹ Dxejcti gujt ni riojn la' rebäjl näj guiraa reman ni yu' loj nisdoo. Gunitlojca ni riojn la' rebarcw ni sazaj lo nisdoo.

¹⁰ Che bil ni riojn xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojn la' regueuu, näjza cadre rliejn nis.

¹¹ Laj bajlga najc Ajenjo, ni säloj te cos ni nanladuxh. Ni riojn la' nis gujcti nis nanladuxh. Dxejcti gujt xhidalduxh bejn xcuent nisanlaaga.

¹² Che bil ni rdajp xangl Dios trompe't ni ca'ni, guxhijn ni riojn la' gubijdx, näjza ni riojn la' bäii, näjza ni riojn la' rebal xhaguibaa, bicäyjreni. Dxejcti dirureni guzanij ni riojn la' dxej, näj ni riojn la' yääl.

¹³ Dxejcti bahuiä xhaguibaa, biejn di-agä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—¡Aii! ¡Aii! ¡Aii! Riaduxhä reben guedxliuj che guisloj gol schon rexangl

Dios retrompe't ni ca'reni. Sidejd reben guedxliuj trabajwduxhru.

9 Che bił ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni liäii ni ruxhal ro' gabijl. ²Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³Dxejcti lo gujxhga birii betzsu gususjreni guideb lo guedxliuj. Cua'reni yälrnibee gacreni nialajz si'c nialajz renaxejb. ⁴Cua' remanga yälrnibee na'c gunreni daan loj reguixa', loj recuaan, loj reyagbajñ; rebejntis nani xhet beedi xten Dios caj lo cuajreni, reni'c gusacsíreni. ⁵Cua'reni yälrnibee na'c ju'tni bejn, gaii bäii gusacsíreni xcälñayanreni bejn. Luxh xcälñayanreni najc si'c yälñayan cadro rauya' te naxejb te bejn. ⁶Nen redxejga, siguiil rebejn yälgujt, luxh direni guidxälni. Luxh mase rla-jzreni guetreni, sibicaj yälgujt lojreni.

⁷Rebetzsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujn si'c loj rebejn. ⁸Xquichejcreni si'c najc xquichejc gunaa; reläjyreni najc si'c läjy lion. ⁹Luxh guideb tiejxhreni caj si'c guuib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii näj xcarreni che agojl chääreni guer. ¹⁰Xhibaanreni najc si'c xhibaan naxejb, xcuchreni yu' yälñayan te gusacsíreni reben guedxliuj gaii bäii. ¹¹Yu'za ni rnibee lojreni, xangl bendxab ni birii gabijl. Xtidx hebreo laani Abadón, xtidx griegw, laani Apolión.

¹²Naj agudejd tej casionroga, naj cayäädz stio'pni.

¹³Che bił ni rxho'p xangl Dios trompe't, biejn diagä te xse' bejn ni lascanu siäädni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. ¹⁴Luxh xse' bejnga

canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

¹⁵Dxejcti baslaani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bäi-iga, ijzga. ¹⁶Biejn diagä bal najc guiraa resoldaad ni rbiyb cabaii: najcreni tio'p gayuu miyon.

¹⁷Scree bahuiä lo bacał recabaiiga näjza renani bijb recabaiiga. Lastoo reni bijb recabaii caj te guuib, najcni xnäa näj zul näj gojtz. Dxejcru yejc recabai-iga najc si'c yejc te beedz. Ro'reni carii bajl näj gujxh, näj sufr. ¹⁸Ni riojn cuaa bejn gujt xcuent guichon replaag nani carii ro' recabaii, xcuent bajl näj gujxh, näjza sufr. ¹⁹Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰Luxh guiraa rebejn nani di replaagre nugu't, direni nusiejch lajzreni xcuent ni cayujñ naareni, te rajñreni rebendxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fi-ireni, di diajgreni jiejn, di gacdi saren.

²¹Diza rebejnga nusiejch lajzreni xcuent xcälrugutreni, xcälrujnreni yälbidxaa, xcälresnäjreni bejn ni di gac chäälni, niclaza xcälgubaanreni.

Te angl ni ca' te guijtz

10 Bahuiä stee xangl Dios ni rajp yälrnibeduxh, siädjajntni xhaguibaa, li yu'ni nen bāj, yejcti dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. ²Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, ³dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa. ⁴Che gulujx gunii guziiga, narä rlažä

nucuaä lo guijtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

⁵ Angl nani suj ni'ni loj nisdoo näjza loj yuj, guläs naani ladbee nez xhaguibaa.

⁶ Guniliini diidx con laj GuebDios ni nabajñ par tejpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' nen nisdoo. Räjpnii:

—Diru redxejre gaclaa. ⁷ Che guidzujntis dxej ni agojl goj ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

⁸ Dxejc gunisac xse' nani gunii xhaguibaali, stehuält biejn diagä caniiini loä, najni:

—Huij, te xca'lu libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

⁹ Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcnii nejxh si'c dzujn.

¹⁰ Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. ¹¹ Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rniij garen-garen xtiidxreni, näjza loj rerei.

Tio'p niguii ni rusule' xtidx Dios

11 Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusuxhijb nenga. ² Na'c gutiexhlu gabi

lole' guidooga, sa'csi ni'c acua' rebenzijtni te tiubitio'p bäii chaläjsreni guedxdxan si'ctis ni rlanjreni. ³ Narä sudedä yälrnibee lo tio'p dade' ni guinii diidx xcuentä, luxh guideb najcwreni ladiyas, susule'reni xtidxä lojreni te miil tio'pgayuu gayojñ dxej.

⁴ Guiro'preni najc si'c tio'p yag oliib, si'c tio'p gandilieer ni suga' nez lo Dios.

⁵ Palga yu' chu bejn rlanj reni latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjñ guet chutis ni rlanj gun latsiajreni.

⁶ Guiro'p redade'ga rajp yälrnibee te gusaureni xhaguibaa te na'c jiajñ nisguuj guideb nen redxej nani cagusule'reni xtidx Dios, rajpzareni yälrnibee te guchaareni nis te gacni rejñ, rajpzareni yälrnibee te jiadgusacs'f xhitis plaag lo guedxliuj, si'ctis huält ni rlanjreni. ⁷ Che luux gusule'reni xtidx Dios, dxejcti ni najc si'c te man nialajz sirii gabijl te jiadchagdijñni guiro'preni. Sujnni gaanreni, sugu'tnirenii. ⁸ Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo cruzj. Guejdxroga rbalajzareni Sodoma näjza Egipto. ⁹ Choñ dxej garol guiraa rebejn ni siääd guedxbäz, ni siääd guedxro, ni najc garen-garen raz, ni rniij garen-garen xtidx guiraa rebejn guedxliuj, suhuii loj guiro'p rebengutga, direni gusaan guiga'tzreni nen baa.

¹⁰ Guiraa renani nabajñ lo guedxliujre sibalazduxhreni sa'csi gujtreni. Luxh sa'csi rbalajzduxhreni, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. ¹¹ Che gudejd choñ dxej garolga, baspansac Diosreni, dxejcti huitiesacreni. Guiraa reni bahuii lojreni, bidxebduxhreni. ¹² Dxejcti biejn diaj guiro'preni xse' te ni canii dipduxh desde xhaguibaali, räjpnii lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahui-ireni huä'preni xhaguibaa. ¹³ Lagajc orga gujc te xuduxh, gurebän tej lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxeb-duxhzeni, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojl guidzujn ni riojnga.

Ni rajc gajdz xangl Dios goł trompe't

¹⁵ Che bił ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladznaa

Dad Dios näjza Jesucrist;

luxh laani sinibeeni par tejpas.

¹⁶ Galbitajp rebengool nani sobga' lo tron xtenreni cadro rnibee Dios, biabrolojreni nez loj Dios te calä'preni xpala'n Dios. ¹⁷ Räjpreni:

Xquixtioste Guejblu Dios, nani rajp yälrnibeduxh,

nani najclu, nani gujclu, nani churu gac, sa'csi acua'lu xcälrnibeduxhlu te agusloj canibeelu.

¹⁸ Bidxe'ch reben guedxliuj lojlu, luxh abidzujn dxej guidxe'chlu lojreni, gunlu yälguxhtis rebengut, te gudeedlu cossa'c loj rexpejnlu,

lo renani gunii xtidx Dios, lo renani huililajz xtiidxlu, lo renani rusuxhibni nez lojlu;

rebenproob sigajc rebenro.

Abidzujnza dxej che cuäcajlu renani bejn daan guedxliujre,

te nitlojreni par tejpas.

¹⁹ Dxejc bixal xquidoo Dios ni yu' xhaguibaa, nen guidooğa bien te guijn cadro yu' guij cadro caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc biabj te guixobroduxh.

Te gunaa näj te ni najc si'c te gutiatzro

12 Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcnj yu' te coron ni nacchee tzubitio'p balxhaguibaa. ² Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. ³ Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuvejcnj, sojb tzuu xca'chni. Tejga yejcnj yu' te coron, najczeni gajdz coron. ⁴ Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵ Dxejcti gojl xi'n gunaaga, najcni te niguii, luxh te bar guuib nungäjl guinibenäjni lo guiraa reben guedxliuj. Guläsgajczeni bäzga te sanärenini xhaguibaa cadro rnibee Dios. ⁶ Dxejcti baxun gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mił tio'p gayuu gayojn dxej.

⁷ Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroğa näjza rexanglni gudilduxhzeni, ⁸ niluxh direni niujn gaan, luxh di nijcdiru nia'n manga näjza resa'ni xhaguibaa. ⁹ Dxejcti bacuaareni manroga näjza resa'ni lo guedxliujre. Laani najc ni gujc bäl galoroga, ni najc gueb Bendxab, ni laaza Satanás, ni rusguee guideb guedxliujre.

¹⁰ Dxejcti biejn diagä xse' te ni canii dipduxh xhaguibaali, räjpni:

—Abidzujn yälrusläa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl.

¹¹ Laareni gujc bejnreni gaan loj bendxabre, xcuent xtiejn ni najc Xiil

xten Dios, nájza sa'csi huililazsa'creni xtidx Dios, dizareni nidxejb mase niejtzareni. ¹²Ni'cni, guiraa la'tu ni yu' xhaguibaa nájza gueb xhaguibaa, colquibalazduxh. Niluxh riaduxhnu renani rbájz lo guedxliujre, nájza lo nisdoo, sa'csi abiájt bendxab lo guedxliuj, luxh cadxchduxhni sa'csi anajni guxii dxej rajpni.

¹³Che gucbee gutiatzroga abacuaarenini lo guedxliuj, birinajl ni gunaa nani guyu' xi'ngaanni te gusacsínini. ¹⁴Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Chon ijz garol guyu'ni ro'c, nacuatzlojni lo bälga. ¹⁵Dxejcti ro' gutiatzrore birii nis si'c te gueuu te nuslo'ni gunaaga. ¹⁶Dxejc gucnáj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷Dxejc bidxchduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

Tio'p manduxh

13 Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuyceni cadro caj diidx ni rniyaj Dios. ²Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmilaagwrni lojni, nájza tron cadro rbejni, nájza xcälrnibeduxhni. ³Dxejcti bahuiä te yejcti najc ascanu yu' chu batiuugni con madxed, ameer guetni, luxh biajc cadro gurujg yejcti. Ni'cni rdxeloduxh guiralii rebejn guedxliuj, sanajlreni manduxhga. ⁴Bazuxhijbreni gojnreni gutiatzroga sa'csi badeedni xcälrnibeeni

lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijl ni, gucuanäjni?

⁵Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubutio'p bäii, gunni si'ctis ni rlajzni. ⁶Baxhalni ro'ni, guniyaduxhni Dios, guniyajni laj Dios, nájza xquidoo Dios, nalajznu renani yu' xhaguibaa. ⁷Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbáz, náj guiraa rebejn ni rni garen-garen xtiidxreni, nájza guiraa reguedxroduxh. ⁸Dxejcti guiraa reben guedxliuj sazuxhijbreni, sagajjnreni manroga, guiraa rebejn nani di lajreni nicaj lo libr xten yäl nabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

⁹Palga yu' chu rlajz cuadijg ni, sugucuaadiagsa'cni. ¹⁰Palga yu' chu nungäj jläu nen latzguiib, säuupacni. Chutis ni ju't te bejn con te madxed, con madxedza guetni. Ni'cni renani anumbee Dios, riäj gunreni huant, chanuutis chalilazsa'creni xtidx Dios.

¹¹Dxejcti bahuiä loj stee manro, carini nen yuj. Sojb tio'p xca'chni si'c xca'ch te xiil, rniini si'c rni te gutiatz. ¹²Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujc yejcti, luxh biajc yejcti. ¹³Manroga ni birii nen yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn. ¹⁴Rusgueeni rebejn nani nabajn lo guedxliuj xcuent remilagwrro nani rujnni nez loj manrogalooga. Guinibeeni gun reben guedxliuj te banäjb si'c najc manroga nani batiuug madxed yejcti, luxh biajza yejcti. ¹⁵Dxejcti man ni rojpa bas-

pajñ banājbgā te guinii banājbgā, dxejcti guñibeeni guet guiraa rebejn̄ nani di guzuxhijb lojni te ganrenini. ¹⁶ Guñibeezani chu bejn̄ te seen lo cuajni o ñaani ladbee, guiraa rebejn̄ ni xhet rajpdī, guiraa rebejn̄ ni rajp, guiraa reni najc mos, guiraa reni najc lam, guiraa reni najc benro, guiraa reni najc jca benbāz. ¹⁷ Guñibeezani digacdi sii, digacdiza guto' bejn̄ palga xhet seendi caj ñaani o lo cuajni. Seenga najc laj manga o numbr xten laj manga. ¹⁸ Dee rquiin yālnajn. Renani rajp yālnajn sugulabreni xseen manga, numbrga najc si'c xnumbr bejn̄; numbr xten manga najc xho'p gayuu gayonbixho'p.

Dij ni roļ te gayuu tiubitajp miļ

14 Che bahuiā stee, bahuiā suga' Xiil xten Dios yejc dajn ni laa Sión. Sugañajni te gayuu tiubitajp miļ bejn̄ nani caj lo cuajreni laj Xiil nāj laj Xtadni. ² Biejn̄ diagā rubej xhaguibaali, rubeduxh, riejnni si'c rubej xhidajl gueuro, nāj te guziro; riejnzani si'cni riejn che cayol̄ xhidajl bejn̄ ni roļ arp. ³ Cayolreni te dicoob nez loj tron̄ cadro rbej nani rnibee, nājza nez loj guidap reni najc si'c man ni naba-jnpac, nājza nez loj rebengool. Rutliidi guj bisieeddi dijga, xtebtis tegayuu tiubitajp miļ bejn̄ nani guļaa lo reben̄ guedxliuj. ⁴ Reniguire najc renani gajd xhin̄ con gunaa; nicla tejreni di nies-nāj te gunaa, najcreni ben̄ dxan. Laareni rinajlreni Xiil xten Dios cadrotis sääni. Redee guļaa lo reben̄ guedxliuj si'c te gojn lo Dios nājza lo Xiil xten Dios. Gojnre najc si'c gonganid ni rudeed bejn̄ xten te cose'ch. ⁵ Nicla tej didx-xhii di guirii ro'reni, sa'csi xhetliidi xtojln̄reni, nayareni suga'reni nez loj tron̄ cadro rnibee Dios.

Rediidx nani bazule' jion̄ rexangl Dios

⁶ Dxejcti bahuiā loj stee xangl Dios, rutajtñi nez galāii xhaguibaa, siādnāni diidx ni najc par tejpas xten Dios te gusule'nini loj reben̄ guedxliuj, guiraa lo reguedxro, guiraa lo reguedxbāz, loj reben̄ ni najc garen-garen rāz, nani rñii garen-garen xtiidreni. ⁷ Dipduxh guniini, rājpn̄i:

—Colguidxejb Dios, colguiliā'p xpala'n Dios sa'csi abidzujñ or̄ gunni yālguxhtis guiraa rebejn̄. Colguzuxhijb loj nani benchee xhaguibaa, nājza guedxliuj, nājza nisdoo, nājza cadro rliejn̄ nis.

⁸ Dxejcti siādnajl stee angl nani canii:

—Abiajb, abiajb guejdxroga nani laa Babilonia, sa'csi baquiiłni guzojz guiraa reguejdx xten guedxliuj xcuent xcāl-latsiajni, xcuent dojl̄ ni bejn̄ni guideb la-gaa; najcni si'c reni rā' nejp.

⁹ Dxejc biādnajl ni riojn̄ xangl Dios, dipduxh guniini, Rājpn̄i:

—Palga yu' chu bejn̄ guzuxhijb loj manroga o loj banājñ ni najc si'c manroga, o xcājbn̄i xca'ni xseen manro lo cuajni o lo ñaani, ¹⁰ sidxechduxh Dios lojni, di xcālguxhtisduxh Dios tedcaj lojni. Sidejdpacni trabajwduxh neñ balro nājza azufr nez loj rexangl Dios nājza nez loj Xiil xten Dios. ¹¹ Luxh gujxh xten reni cayejc sā'p nez lojreni guixe-guixee par tejpas. Digacdi gusilajzreni dxej-yāäl, renani guzuxhijb, reni gojn̄ manroga nājza reni gojn̄ banājñ ni najc si'c manroga, chutisza ni rca' seen xten lajni. ¹² Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

¹³ Biejn̄ diagā xse' te ni caniini loä xhaguibaali:

—Sree bacuaa: “Chicbaa rebejn̄ ni guet ñajli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejn̄reni.”

Yäl_nasa'c ni ruedeed guedxliujre

¹⁴Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron_ ganaxduj oor yejctni, dxejcti naani ca'ni te guiboz ni caduxh ro'ni. ¹⁵Dxejcti birii te xangl Dios loj xquidoo Dios, dipduxh caniini loj ni sobga' loj bájga, rájpnj:

—Basäl xquibozlu, batiuug, te batie' yäl_nasa'c, sa'csi agojl or guire' yäl_nasa'c, guideb guedxliuj aguyajlni.

¹⁶Dxejcti nani sobga' lo bájga basni-ibni xquibozni, batiuugni yäl_nasa'c ni caj lo guedxliujre.

¹⁷Dxejcti stee xangl Dios birii nen_ guidoo ni yu' xhaguibaa, ca'zani te guiboz ni caduxh ro'ni. ¹⁸Dxejcti birii stee xangl Dios nez loj piändxan xten Dios. Laani rajpni yäl_rnibee lo balro. Dipduxh guniini, rájpnj loj ni ca' guiboz ni caduxh ro'ni, rájpnj:

—Basäl xquibozlu nez ni' reyaguub, batiuug guiraa reresim_ uub ni yu' lo guedxliujre, sa'csi aguyajlni.

¹⁹Dxejc batiuug anglga guiraa reresim_ uub ni yu' lo guedxliujre nalajznu rebenguijdx, basäl_nireni nen_ tanc cadro guläjreni yejctni sa'csi rdxechduxh Dios lojreni. ²⁰Dxejcti baläjreni yejc reuub nez orii te guejdx. Biriiduxh rejn yejcteni, gutiäs rejnga, bidzujn rejnga ro'li recabaii, gujctni si'c che riu' nisro gueuu, biäjtni si'cti choñ gayuu mil metr guideb gabi cadro baläjreni yejc reuub.

Guigajdz xangl Dios nä_j lult xcäl_guxhtis Dios

15 Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejgareni ca' te plaag ni gusacsí reben_ guedxliuj. Redeetis najc lult, sa'csi che ted redee ati agulujx yäl_rdx'e'ch xten Dios.

²Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäii nisdoooga suga' renani bejn gaan loj manroga nä_jza lo banäj_b ni najc si'c manroga, ni bejnza gaan di nica'reni seen xten lajni. Ca'reni arp xten Dios. ³Cayol_reni dij xten toMoisés ni gujc xpejn_ Dios, cayol_zareni dij xten Xiil xten Dios. Scree najc dijga:

Sacduxh, ruscheloj guiraa redzuun ni rujn Guejblu, Dad Dios, ni rajp guiraa yäl_rnibee.

Rujn Guejblu ganax dzunsa'c, mii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

⁴Bahuii, Dad, çchu laa ni di guidxej_b Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhjbreni,

siädgaj_nreni Guejblu,

sa'csi abaluiloj guiraa rextzunsa'cpac Guejblu.

⁵Dxejcti bahuiä xhaguibaa, bixal ro' yu' ni najc dxanro nen_ guidoo, cadro yuchee guij cadro caj xleii toMoisés. ⁶Ro' yudxanroga birii gajdz xangl Dios ni ca' plaag te gusacsíreni reben_ guedxliuj. Najcwreni te ladlin_ ni najc nolbäj, ni rdimbichaduxh. Dejd si'c te cinturon_ lastooreni ni najc ganaxduj oor. ⁷Dxejcti yu' tajp reni najc si'c man nabajn_ ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rexhijgga xcäl_guxhtisro Dios nani nabajn_ par tejpas. ⁸Gudxaj guidoo ni najc yudxanroruga gujxh ni siäd_xcuent xcäl_milaagwr, xcäl_rdimbichaduxh xten Dios. Rut gujcti biu' nen_ yudxanroruga che gulujxli guiraa replaag ni ca' guigajdz reanglga.

Rexhijg ni guidxa xcälguxhtis Dios

16 Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

² Anglalo ni huij, baslojni ni yu' nen xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajnreni banäjb ni najc si'c manroga, birii tiejxhni te guedxyanduxh ni najc si'c cancer.

³ Dxejc ni rojp anglga baslojni ni yu' nen xhijg ni ca'ni loj nisdoo, te bejnii gubixhloj nisdooa gujcnii si'c rejn xten te bengut. Dxejcti gujt guiralii reman ni yu' lo nisdoo.

⁴ Ni riojn anglga baslojni ni yu' nen xhijg ni ca'ni loj regueuu näjza cadro rliejn nis. Gubixhlojreni gujcnii rejn.

⁵ Dxejcti biejn diagä gunii angl ni rajp yälrnibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujn Guejblu yälguxhtis redzunguijdx. ⁶ Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjł gacreni.

⁷ Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälrnibee, xcälguxhtis Guejblu najc laaca, si'c riäjł gacni.

⁸ Dxejcti ni rdajp anglga cua' xhijg ni ca'ni, baslojni ni yu' nen xhijgga lo gubijdx, te badeedni lo gubijdx yälrnibee guze'cnäjni rebejn guiboo. ⁹ Guiraliiireni gusloj cayejceni, lacti nanladuxh, dxejc gusloj caniyajreni Dios ni rajp yälrnibee loj recosga. Niluxh direni nusiechlazreni, niclaza niliä'preni xpala'n Dios.

¹⁰ Dxejcti ni rajc rgaii anglga cua' xhijg ni ca'ni baslojni ni yu' nen xhijgga lo tron cadro rnibee manroduxh. Bicäjy guideb cadro rnibee manduxhga, luxh rebejn rauya'tisreni lujdxreni sa'csi cayajceni yälnayanduxh.

¹¹ Guniyajreni Guejb Dios ni yu' xhaguibaa sa'csi rajceni yälnayanduxh, xcuentza rexquedxnayanreni. Luxh direni nusiechlazreni xcuentzi xtojłreni.

¹² Dxejcti ni rajc xho'p anglga cua'ni xhijgni, baslojni ni yu' nen xhijgga lo gueuro ni laa Eufrates. Gueuga gubidzlii nisni te guc-chee te nezyuj xten rejeii ni jääd nez cadro rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profet' ni rusguee, birii chon spritguijdx ni najc si'c bedz, ¹⁴ sa'csi najceni resprit xten bendxab, rujnreni milagwr, senro. Rirenii loj guiraa rejeii loj guedxliuj te gutie'reni guiraa bejn loj guedxliuj te gac gueerroduxh, te gucuanäjreni Gueb Dios ni rajp guiralii yälrnibee che guidzujni lo guedxliuj. ¹⁵ “Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajibni, te na'c guiga'ni xhabäälni, jianxtujyni che guibi'ä.” ¹⁶ Dxejc gutie'reni guiraa rebejnre te lajt ni laa lo didx hebre “Armagedón”.

¹⁷ Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸ Dxejc guyuduxh yälrdinya' näj guziro. Gujca te xuroduxh lo guedxliuj, te xu sa' ni gajdpac gac. ¹⁹ Che gujc xuroga, biräjs guedxroduxhga, gujcnii chon la', dxejcti gurebän guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis

guedxga. ²⁰Li gubicaj, gunitloj reyuj ni tre' lo nisdoo, gunitlojza redajn. ²¹Xhaguibaali biajb te guixhobro yejc rebejn; tejsa guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentrodux gujcnj.

Gun Dios yälguixhtis te gunadxab

17 Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajw-duxh ni ted gunadxabre ni sobga' cadro yu sijn nis. ²Guiraa rereii lo guedxliujre bennäjreni gunaaga dojl, sigajcza guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlajzreni.

³Dxejcti huiinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuvejcnj, sojbza tzuu xca'chni. ⁴Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosgujdx, recosdxab ni bennäjni reben guedxliuj. ⁵Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan regunadxab, xnan recosdxab ni rajc lo guedxliuj.” ⁶Bahuiä agusojs gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. ⁷Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjsa manroga ni sojb gajdz bitiuvejcnj näj tzuu xca'chni. ⁸Manroga ni bahuiilu gubajnni galoo, niluxh agunitlojni naj, luxh agojl guirini gabijl, dxejcti sinitlojni stee, sejtnei par tejpas. Rebejn ni nabajn lo guedxliuj nani di lajreni nicaj lo guijtz xten yäl-nabajn xten Dios, guijtz ni guc-chee che

birixtiejli guedxliuj, rebejnga sidxeloduxhrene che fiireni loj manroga nani gubajn galoo, ni gunitloj, niluxh naj agubansacni.

⁹Ree nanab ga'pni yäl-najn. Gajdz rebitiuvejcnj säloj gajdz dajn cadro sobga' gunaaga, ¹⁰sälöjzarenj gajdz reii. Agujc gatii reiiiga ni cayajb. Tej rereiiiga canibee naj. Stee reiiiga churu jääd. Luxh che jääd lult reiiiga, guxii dxej guinibeeni. ¹¹Manro ni gubajn galoo, ni agunitloj naj, ni'c rac xhujn reii, najczani tej loj guigajdz rereii, luxh sinitlojni, sejtnei par tejpas.

¹²'Guidzuu rexca'chni ni bahuiilu säloj tzuu reii. Gajdreni guisloj guinibee naj. Laarenj näjsa manroga xca'reni yäl-rnibee teb or, nalajznu guxii dxej. ¹³Tejtis xhigab gun rereiiiga, gudeedreni xcäl-nadipreni, xcäl-rnibereeni lo manroga. ¹⁴Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rereii. Luxh renani siäd-najlni najc reni agurejdxni, reni aguleni, sisiudzu'tznäjrenini.

¹⁵Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa ben guedxliuj, guiraa bejn ni rnii garen-garenca xtiidxreni, ni siäd garen-garen reguejdx. ¹⁶Guizuu reca'chga näjsa manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälnei, sawwreni bältiejxhni, suze'creni gunadxabga lo guiboo. ¹⁷Sa'csi abasniib Diosreni te gunreni tejsi xhigab, te gudeedreni xcäl-rnibereeni lo manroga che guidzujnli dxej ni chale' guira'ti ni gunii Dios gac. ¹⁸Gunadxabga ni bahuiilu säloj guedxro ni rnibee loj guiraa rereii loj guedxliuj.

Xho jiajb guedx Babilonia

18 Dxejcti bahuiä loj stee xangl Dios ni siädyäjt xhaguibaa. Siädnäni yälrnibeduxh, xcälrdimbicha'ni bazanij loj guedxliujre. ²Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadre rbäjz rebendxab, ro'c rcanzaj guiralii cuaa spritdxab, najczani xpitiaäz guiraa reman xhaguibaa ni najc mandxab, mandxuudx. ³Sa'csi guiraa reben guedxliuj agusojzreni xcuent dojl ni bennäjreni gunadxabga, guiraa rereii loj guedxliuj bejn dojl guläsnäjreni gunadxabga, luxh guiraa reben guedxliuj ni ruto' abejnreni ganduxh, agujceni ri'cw xcuent recosdxab ni rujn gunabdxabga.

⁴Dxejcti biejn diagä xse' stee nani canii xhaguibaa:

—Colguirii guejdxga rexpänä, te di näj la'tu gunnäjtu gunadxabga dojl, te di tedtu trabawduxh lo replaag xtenni.

⁵Sa'csi yuduxh rextojlni, abidzujnreni xhaguibaali, luxh abanajza lajz Dios rextojlni. ⁶Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnna laani. Neñ co'p cadre badeedni gu' bejn (te trabajw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält.

⁷Lacti gulä'p gunaaga xpala'nni, gubajnni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajnni, sigajcza gac-huin lastooni sa'csi bejnna xhigab neñ lastooni: “Narä sobga'ä ree si'c te reiñ, te benroduxh, dina gacä biuud, niclaza gac-huin lazä.” ⁸Ni'cni tejsi dxej siajb yejcti guiraa replaag xten Dios: yälgujt, yälhuin lajz, näj yälrliaan, luxh

sejczani lo balguiboo, sa'csi rnibeduxh Dad Dios ni gun xcälguxhtisni.

⁹Guiraa rereii lo guedxliujre ni bennäj gunaadxabga cosguijdx, reni cuansanäjnni, sonduxhreni, siaduxhreni che fiireni gujxh ni carii cadre cayejcti. ¹⁰Zijtru sisiujreni sa'csi rdxejbreni replaag xten gunadxabga, dxejc siniizareni:

—Aii, aii, riaduxhnu guedxrore, Babilonia, guedxdipduxh gujclu, luxh chela gucheenu, ala bidzujñ yälguxhtis yejclu.

¹¹Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. ¹²Laareni ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guiib, näj márm, ¹³näjza caneel, guiraloj laj comiid, näjza yalnejh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiil, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni. ¹⁴Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

¹⁵Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinduxh lajzreni, ¹⁶säjbrei:

—Aii, aii, riaduxhnu guedxrore, naii gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷tera'tbäztis baralii recosro ni najc xhixtenni, guxhijreni.

Guiraa recapitán xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusuujreni zijt, ¹⁸näjza

laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedxduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

²⁰ Guniizani xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejn ni lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxej najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. ²² Diru guibi' jiejn cayel nez xladcauilu reharp, reflaut, retrompe't; diru guibi' chu tej ni gunxhitis dzuun; diruza guibi' chubej molin ni cayo't. ²³ Diru guibi' jien xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni benroduxh lo guedxliuj sa'csi basguezazu reben guedxliuj xcuent rextzundxablu.

²⁴ Nen guejdxga bidxäjlza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19 Che gulujx recosre, bejn diagä lascanu xse' xhidalro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälrusläa lo dojl,

näj yälrdimbicha', näj yälmilagwr.

² Sa'csi xcälguxhtisni najc ganax laaca,

huentis najcni, sa'csi abejn ni yälguxhtis gunadxabga nani caguxhin reben guedxliuj xcuent xcäl'nadxabni.

Abejn Dios yälguxhtisni,

agudijxhni xcuent xtiejn rexpejn

Dios ni baxhe' gunadxabga, che bagu'tnireni.

³ Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebengool näjza guidap remanbajnga bazuxhijbreni, biabrojreni gojreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuum Dios,

guira'tu ni rajntu Dios, rebenro sigaje rebennadolajz.

Sa' xten Xiil xten Dios

⁶ Dxejcti bejn diagä ascanu xse' xhidalduxh bejn, riejn ni si'c che cayät nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtenu ni rajp guiralii yälrnibee, ani acanibee.

⁷ Guibalajznu, guibalazduxhnu, guiliä'pnu xpala'n ni sa'csi abidzujn dxej guchnaa Xiil xten Dios, aguzucheeza dxa'p.

⁸ Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹ Najza anglga loä:

—Bacuaa diidre: “Chicbaa renani bidon jääd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

¹⁰Dxejcti bazuxhibä lojni te gañäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios ruedeed gusule' bejn xcuent Jesucrist, gusule'zareni xtidx Dios.

Nani bijb te cabainol

¹¹Dxejcti bahuiä bixal xhaguibaa, biricaj te cabainol. Luxh laj nani rbi-jbni säloj casobsa'cpacni diidx, rni-zani ganax didxgulii. Entis laaca rujnni yälguxhtis, entis laaca rucuaani che rujnni guer. ¹²Rebalojni rbebajl, yejcn yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni. ¹³Najcwni te lajd ni nadiini rejn; lajni najcza Xtidx Dios. ¹⁴Guiraa resoldaad guibaa xten Dios siädnajlni najcwreni ladnol, ladnaya, bi-jbzareni cabainol. ¹⁵Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguieb. Sujnzani yälguxhtis loj reni rdexchlajz lo Dios, si'c ruläjreni yec uub che rbääreni bin, si'c sujnz Dios ni rajp guiralii yälrnibee. ¹⁶Lo xhajbni näjza cuä' cujdni caj lajni: “Reii xten reerei, Dad xten redad.”

¹⁷Bahuiä loj te angl suga'ni galäii gu-bijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; ¹⁸te gautu xpääl reerei, näjza xpääl recapitán, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbáz sigajc rebenro.

¹⁹Dxejcti bahuiä loj manro näjza loj reerei guedxliuj, abire'reni te gucuanäjreni nani rbijb cabainol näjza guiraa resoldaad xtenni. ²⁰Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb naba-jnreni neñ te bal guiboduxh ni recnäj sufr. ²¹Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

Te mił ijz

20 Dxejcti bahuiä loj te xangl Dios ni siädjiäjt xhaguibaa, siädnäni liäii ni ruxhal guedro ni laa gabijl. Ca'zani te cadenro. ²Anglre gunaaz gutiatzroga, ni gujc bäl galooli, ni najcza bendxab, ni laaza Satanás. Bacuaduunini te mił ijz. ³Basäl'nini neñ gabijl, te ro'c basäunini, bacuaani liäii te na'cru gusgueeni reben guedxliuj lał ni guiza' te mił ijz. Che guiza' reijzga, empac sibi' lasacni bale'si dxej.

⁴Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcn sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo naareni. Gubansacreni loj rebengut, gurenäjreni Jesucrist te laani gunibenäjreni te mił ijz. ⁵Dee najc yälrkansac galoo lo rebengut. Niluxh stecuaa rebengut, direni guibansac che guisa'li te mił ijz. ⁶Chicbaa rebejn nani guibansac ganid-doo, najcreni bendxan ni agubicaj xtoj-ljreni. Ni rojp yälgujt di guidzujn lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mił ijz.

⁷Che guiza' te miĵzga, suslasacni Satanás neĵ gabijl. ⁸Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni rebeĵ Gog nájza rebeĵ Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹Huá'preni lo te camp cadro gulagduxh. Gudájyreni guideb gabig cadro rnibee rexpeĵn Dios neĵ guejdx nani sanálajz Dios. Per baxhal Dios bal guiboo xhaguibaali bitejbní, te guyejc guiragajceni. ¹⁰Dxejc bacuaareni beĵdxab nani biádgusguee rebeĵn lo bal guiboo ni cayecnáj sufr, lagajc cadro yu' manro, nájza profetxhii nani basguee; lo bal guibooga susacsírenini sidejdreni trabawduxh dxej-yáäl par tejpas.

Yálguxhtis ni gujc nez loj tronronol

¹¹Dxejcti bahuiá lo te tronronol nájza lo nani sobga' lojni te rujnni yálguxhtis. Nez lojni gunitlojli guedxliuj nájza guibaa, xhetru lajtdi bidxájl par laareni. ¹²Bahuiá lo rebengut, benro sigajc benadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcálnabannáj Dios par tejpas. Dxejcti bejni yálgutxhtis rebengut xcuent ni bejnreni, xcuenta rediidx nani caj loj reguijtzga. ¹³Guiranejz biáäd rebengut: nisdoo batzuug rebengut ni yu' lojni, gabijl nájza yálgujt batzuugza rebengut ni yu' lojnreni. Dxejcti bejn Dios yálguxhtis tejpgareni xcuent ni bejnreni. ¹⁴Dxejcti bacuaani yálgujt nájza gabijl lo bal guiboo ni najc si'c te nisdoo te ro'c checreni par tejpas. Dee najc yálgujt ni roj. ¹⁵Guiraa bejn ni di lajni nidxájl lo xlibr yálnabajn bacuaazani reni'c lo bajlga.

Xhaguibacoob nájza guedxliucoob

21 Dxejcti bahuiá te xhaguibacoob nájza te guedxliucoob,

sa'csi agunitloj guibabiejw, nájza guedxliubiejw, luxh xhettiruzá nisdoo. ²Nará Juan, bahuiá lo guedx Jerusaléncob, guedxdxan, siádjájtñi xhaguibaali cadro rnibee Dios. Sucheduxhni si'c rsiuchee te dxa'p nani agojl guchnaa. ³Dxejcti biejn diagá te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhuii, aguzuj xquidoo Dios galáii rebeĵn, anabannáj Dios rebeĵn, sajczareni rexpeĵnni. Sibannáj lagajc Gueb Diosreni. ⁴Sutia Dios guiraa nisbee balojreni te na'cru goonreni. Sinitloj yálgujt, xhetru xliajdsi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵Dxejcti ni sobga' lo tron cadro rnibeeni guniini, najni loä:

—Bahuii, najrá guscobá guira'ti.

Guniizani loä:

—Bacuaa rediidxre, sa'csi guliipacreni, sajczalilajz bejn rediidxre.

⁶Dxejcti najzani loä:

—Agujcní. Nará nacá A nájza Z, ni säloj nani rbaxtiej nájza nani ruluux. Lo chutis ni cayojl, sudedxlia'ä nis yáni, nalajznu yálnabajn par tejpas. ⁷Chutis nani gun gaan lo dojl, sica'zani guiraa dee si'c yálnasa'c, luxh nará sacá Xtiosni, laani sacni xi'ná. ⁸Niluxh renani rdxejb, renani di chalilajz xtidxá, reni rdxe'ch loä, reni rugu't sa'reni, reni runnáj gunaa dojl, renani najc bidxaa, renani rusuxhijb lo banájw, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadro rejcz guiboo nájza sufr par tejpas. Dee ni najc yálgujt ni roj.

Guejdx Jerusaléncob

⁹Dxejcti lo guigajdz xangl Dios ni ca' guigajdz xhijg ni guidxa guigajdz

reyälguxhtis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiil xten Dios.

¹⁰Dxejcti bejnii gunixcalä, huinäni narä lo te danro ni jiaduxh, ro'c baluini loä te guedxro, te guedxdxan ni laa Jerusalén, luxh xhaguibaali siäd-jäjtnei nez lo Dios. ¹¹Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹²Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' tejsa portonga. Loj tejsa portonga, caj laj tej retzubitio'p cuaa xten rexpejn Israel. ¹³Chon portonga caj nez cadro rliejn gubijdx, yu'za chon portonga nez ladbee, yu'za chon portonga nez ladbäwj, yu'za chon portonga cadro räaz gubijdx. ¹⁴Yu' tzubitio'p guiro lo cimient xten guejdxga. Lo tejsa reguijga caj laj tej retzubitio'p apost xten Xiil xten Dios.

¹⁵Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. ¹⁶Guejdxga najc cuadraad: sigajc ni sioolni, sigajcza ni gulajgni. Dxejcti cua'ni biquii barejxni guejdxga, barejxni tio'p mił tio'p gayuu kilómetros tejsa laad. Sigajc sioolni, sigajcza gulajgni, sigajcza jiaani. ¹⁷Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cacutiexhnäjsa anglga.

¹⁸Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. ¹⁹Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda; ²⁰ni rgaiiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga

najc crisopraso; ni rtzubiteebga najc jacinto; ni rdzubitio'pga najc amatista.

²¹Guizubitio'p portonga najc tzubitio'p perl. Tejsa portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

²²Dina nuhuiä nicla tej guidoo nen guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga. ²³Guejdxga dini guiquiin gusanij nicla gubijdx niclaza bäii, sa'csi la-gajc xcälrdimbicha' Dios näjza Xiil xten Dios ruzanij ro'c. ²⁴Rebejn guedxliuj ni rililajz xtidx Dios sajc sareni lo bianijga, luxh rereii ni siäd lo guedxliujre siäd-näzareni xcälrnibeereni, näj xpala'nreni ro'c. ²⁵Di ro' reportonga jiäuu rdexj, luxh ro'c xhettiza yääl. ²⁶Ro'c chanäzareni yäl'nasa'c näj xpala'n reguejdxro ni yu' lo guedxliuj. ²⁷Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yäl'rusguee. Ro'c siu' ganaxduj renani caj lajni lo libr xten yäl'nabajn par tejsa nani ca' Xiil xten Dios.

22 Dxejc baluii anglga te gueuro loä, cadro yu' nisyä xten yäl'nabajn. Rdimbicha'ni si'c te guihuajn, luxh cariini lo tron cadro rnibee Dios näjza Xiil xten Dios, ²rdejdni loj nezyuro ni rdejd galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubitio'p cuaa ninejxh nen tebijz, tejsa cuaani tejsa bäii; luxh rebalajg ni rcaj lo reyajgga najc te gusajcni reben guedxliuj. ³Dxejcti ro'c xhettiru yälrdzubde, sa'csi ro'c yu' tron cadro rnibee Dios näjza Xiil xten Dios, ruzuxhibza rexpejnii, rajnreni laareni. ⁴Suhuiireni lojpacni si'cpac ni najcni, sicajza laj Dios lo cuajreni. ⁵Ro'c diru yääl chu. Luxh reni rbäjs ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjreneni par tejsa.

Siäddzungajxh dxej ni guibisac Jesucrist

⁶Dxejc naj anglä loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhalni xanglni te baluloini loj rexpejnni guira'ti nani agojl gac.

⁷—Sajngalu gan, siojb jiälä. jChicbaa nani riu rediidx ni caj lo libbre!

⁸Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee. ⁹Luxh laani najni loä:

—Na'c gunlu si'c, sa'csi narä runä xtzunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo libbre. Bazuxhijb loj Diostis.

¹⁰Dxejc najni loä:

—Na'c gusäuulu guijtz cadro caj rediidxre xcuent nani churu gac, sa'csi asiäddzungajxh redxej ni chale'reni. ¹¹Luxh lañ ni guidzujñ dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujñ dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

¹²Gunajtiro:

—Siojb jiälä, luxh siädnää xhi gunidxä loj tejgatu si'c ni riäjl xca'tu xcuent dzuun ni bejntu. ¹³Narä Jesucrist nacä si'c najcza A näjza Z, ni säloj nani rbäx-tiej näjza nani ruluux.

¹⁴'Chicbaa renani riu xtidx Dios, najczeni si'c ni rguuib xhajibreni te saj

jiu'reni nez porton xten guejdxga, sajcza gauni ninejxh ni caj lo yajg xten yälñabajn par tejpas. ¹⁵Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebänäjb, näjza ni rchagljaz rniidix-xhii te gusgueeni.

¹⁶'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä nen reguidoo loj rexpenä. Narä nacä te xajg to'reii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷Sprit Dxan xten Dios näjza chäl Xiil canii, najreni:

—Cołtaa.

Suguniiza nani riejn diajgreni diidxre, gäbreni:

—Cołtaa.

Sujiäädza chutis ni cayojñ, sujiädyaäxlia'ni nis yälñabajn par tejpas.

¹⁸Sa'csi narä rniliä'ppac lojtu, guiraatu ni riejn diajgtu rediidx ni caj lo guijtzre xcuent recos ni churu gac, palga yu' chu tejtü gutajlru diidx ni caj guijtzre, suteedru Dios bejnga replaag yejcnii loj ni caj lo guijtzre. ¹⁹Palga yu' chu gudzucaj loj rediidx ni caj lo guijtzre, sudzucajza Dios nani nica'ni lo yajg xten yälñabajn par tejpas, näjza lo guedx Dxan, ni caj xcuentreni lo guijtzre.

²⁰Nani cagusule' diidx xcuent guiraa redee guniini, najni:

—Guliipacni siojb jiälä.

Sugacni si'c. Gudaa Dad Jesucrist.

²¹Sujiääd xcälracnä j Dad Jesucrist lo guiraatu. Sugacni si'c.